

鄧汝高先生西樓全集序

蓋自韻書旣剏墳素日昌雖文  
與世新筆緣人異而情經辭緯  
趣本藻枝今昔一轍工拙同塗  
是以氣有淳澆運而爲世毓而  
爲才人有貞辟蘊而爲志發而



爲文文也者詎非抽心呈貌闡  
氣宣風者邪顧古之爲文者叶  
韻則風雅騷頌弗叶則典謨訓  
誥罔規角勝自爾成章才匪偏  
長簡絺竝美斯蓋時丁熙皞人  
僚真恬譬之圓昊初爍六宗畢

昭蒼靈始升品彙森煥迨夫世  
靡俗剽文隨波逝六經素文旣  
變於莊列荀墨再變於左國班  
馬三百五篇旣變於漢魏六朝  
再變於開元天寶易葦籥而陽  
春庚陶匏而瑚璉古法雖亡新

貫亦至第能文者不聞諧律之  
聲善詩者未覩襲六之筆孔璋  
元瑜詩不稱文劉楨王粲文不  
逮詩韓杜宜續以鳳髓子固同  
恨於海棠斯則人巧雖極天工  
未縱是宋人精於玉楮不能復

作金蓮公超幻於霧市不能復  
造月宮寧若六宗畢昭於圓昊  
品彙森煥於蒼靈者哉吾友汝  
高鄧先生生際嘉隆氣鍾光嶽  
麟產黃囿鳳止堯庭應運發祥  
彌中彪外玩乎衆妙抒於修能

濬與府於宋元之崩流振清響  
於何李之末奏文則敘事精簡  
而精采流動刺理淵微而骨氣  
跌宕詩則意與法融辭由境繪  
寓古健於雋爽曜藻艷於深沈  
摛文賦詩各臻極則長篇短什  
皆絕凡流葉福唐謂其氣深語  
沈屠緯真稱其天成物助鄒彥  
吉評其畜富才雄王百穀贊其  
辭逸思麗李本寧則以逢嘉隆  
之盛際收山川之靈異或以爲  
文采不屑於駱賓王或以爲逸

氣接武於李獻吉或以鄂渚之  
編可兩黃鶴之作是皆品隲其  
韻府未嘗盡見其縹囊蓋康樂  
詠歌雖競寫於都下而王充論  
著固多秘於帳中耳居無幾何  
天機旣洩真宰爲讎鬼神甫對  
於宣室而賈誼云殂參軍未遷  
於法曹而惠連早逝窺管豹者  
僅得其一斑嘗鼎臠者想飫其  
全烝於是其仲子慶霖感人情  
之景哲懼先業之淪光乃發藏  
珠於故櫝按亡璧於他山訪于

杜氏之武庫索於老子之柱下  
記誦道邊之碑繕錄竈中之銘  
殫心罷神積日累月凡得詩若  
千首得文若干篇合而名之曰  
西樓全集西樓者先生燃藜之  
所不忘故也集旣成請余序之

且授諸梓夫文士之業搦管刮  
腸援翰輸心鍛章煉句縛采鑄  
詞豈不欲托營窮宙飛譽終今  
哉然相如死家無遺書襴衡亡  
文不傳世侯瑾潛心著述卷帙  
無留邊讓覃思摩研身名俱喪

此皆若敖之鬼莫延虞卿之書  
固亦宜矣若乃儀甫不能存浩  
然之集而購採於士源阿新不  
足嗣樂天之志而附函于佛藏  
此雖子弗負荷人猶標榜亦云  
幸矣至于高岱知名當世而高  
彪之文多亡馮豹歷官尚書而  
馮衍之籍半失此叔向所以有  
阜隸之嘆景升所以來豚犬之  
譏者也豈若慶宋燹鼎其先烈  
金石其遺稿俾觀察公之九魂  
永傳于綠笥而千載同挹其玄

風者邪余既獲誦先生之全錦  
因嘉慶宋之爲裘敬誤斯文用  
章世美慶宋余之壻也學識金  
根才燿囊穎于汝高則子駿于  
余則鮑宣云  
萬曆辛亥秋日翁正春撰

### 鄧汝高詩序

南新市人李維楨本寧父誤  
鄧使君女高自爲諸生雅言詩  
詩五七言近體排絕歌行宗唐  
五言樂府宗六朝漢魏三百篇  
比成進士爲民部郎佐藩臬柄



文衡周游兩京三吳淮南北越  
東西齊魯燕趙滇黔之域者萬  
里楚不腆晚而辱在宇下瀟湘  
洞庭雲夢諸名勝褰帷攬轡無  
所不茹納采擷而所著詩益宏  
博瑰琦洋洋乎大國之風矣蓋  
國初詩纖穠綺縟猶有元之結  
習變者務爲和平典暢而其流  
失之猥鄙弘正之際變者務爲  
鉅麗雄深而其流失之粗厲嘉  
隆之代變者始一歸於正名家  
大家奄有前人之美而盛衰之

機實相倚伏今吳越關河齊魯  
間改絃學步寢以陵替獨閩後  
進蔚起如女高詩規模宏遠而  
意緒精深興會標舉而裁制綿  
密詞藻豐蔚而色相清空音節  
諧婉而骨力勅挺體勢方嚴而  
風神閒適諸所應有者女高必  
不無所應無者女高必不有也  
閩山川靈異鬱積深厚女高晚  
出而收其全勝作者得失之林  
遺編具在女高識能鑒別之才  
能苞舉之庀蓄富而師匠高其

於閩固宜雄據一隅先驅一代  
矣昔者吾友王敬美游閩稱閩  
家能佔俾而不甚長於詩卽十  
才子尚出徐楊下又置善夫於  
邊徐薛王之次而七子時先後  
相及者無稱焉令敬美而在讀  
女高詩爲閩人盱衡擊節宜何  
似也微閩而已海內人士思嘉  
隆之盛際恨不生逢其時余以  
爲求之女高有餘師矣

搔首集序

福唐友人葉向高撰

詩尊風雅尚矣、近代宗唐而禘三百篇、專言興象弘正之世、北地信陽、故自卓爾、其後離合不同、離者師心而合者擬迹、是非之辨、紛若糾纏、大較方改絃于宋、已失步于唐矣、乃信耳之夫、知有管晏、獨謂閩無詩、厯厯左袒繼之、列於齊盟、不知閩草昧十子竝興、子羽孟敷、蔚稱作者、已先繼之鳴矣、一代之運、亦準元會、方其初興、

追琢未工、其擊壤之世乎、十子首闢顛蒙、繼之引而愈昌、則風雅之盛也、要以工拙互存、而情景各轉、斯爲美耳、文明愈開、人巧已極、望表則合、扣衷則離、近代之斐然、以視弘正而前、其六朝以後之望風雅也、由斯以譚、海內何以詘閩、顧海內修業日多、而閩自十子繼之外、稱詩寥寥、閩以此詘、邇來英俊林立、濯磨振矜、幾欲折詞人之角、山川之精華、以畜久而厚、故氣深而語沈、得失有之、然皆不敢誕于格之外、而浮于

中之所欲言、蓋閩于海內常後起而代興、遵軌前驅、無能竟其稅駕矣、余不敏、故拙于詩、山居而從、鄧汝高遊、汝高之稱詩甚銳、而其氣深語沈、有瀟然之致、乃其趣獨在北地、繼之之間、寧離而合也者、毋寧合而離也者、汝高其妙悟哉、汝高將行、其詩若干首、命余爲之序、余惟稱閩詩于海內、無以易任耳者之口、顧海內用竭蹶之勢、而閩乘不盡之銳、其離合得失之衡、當俟來者、獨念汝高志大而力又能副、其勢不窮、風

雅不已、返靡靡之習、而奏以大音、則汝高之功、  
于閩猶小、而于詩大矣、夫寧功詩、功世運矣、余  
不敏、且操筆俟焉、

帝京篇序

東海友人屠隆緯真父撰

夫物有待、才有助、其不然哉、道濟遷鄂岳、其詩  
凄惋、子美人夔州、其調悲壯、古命世之才、猶爾、  
夫屈首蓬蒿下、目無鐱覽廓落之觀、胸無膠鬲  
宏達之致、氣不昌而才不極、小有撰結、不離措  
大口吻、一旦釋草屨、登朝觀帝王宮闕之盛、覽  
山川邊塞之雄、與海內豪儁、結駟連鑣、和詞響  
奮、觀遊壯則耳目廣、耳目廣則胸懷鉅、斯汝高

先生帝京篇之所爲擅場也。汝高心靈骨峻才  
雄思超其官在水衡錢穀之間而其意致乃抗  
山澤煙霞之表。所至購異書訪奇人。雖簿領紛  
如雅咏不輟。頗多篇什。而獨帝京篇最勝。今觀  
其鋪張黃圖。則徵材未央。角巧凌雲。極皇王之  
瑰壯。描寫宮闈。則托諷昭陽。含悽長信。悉才人  
之麗情。游南皮。祖東門。則山水河梁。流商激楚。  
白日爲之低回。歷邊塞。餉戎旅。則楊柳雨雪。急  
管悲笳。淒風因而蕭颯。吊古諸作。萎草殘陽。咄

夫牧豎能使行人聞而掩涕。贈友諸篇。託興薜  
蕪。寄情芍藥。能使良朋見而銷魂。汝高之于此  
道深矣。匪獨才大。亦繇思沈。匪獨天成。良得物  
助哉。不佞嘗著論。華轂朱輪。層裊纒席。受饗亦  
樂。資譚柄則俗。破屋版扉。敗簑殘衲。身處良苦。  
人畫圖則雅。斯清濁之辨也。夫詩清物也。有終  
身唾去而不肯黏手。亦有沈酒濡首。卽窮悴坎  
壑。死生以之。而不能捨離。豈非有至味乎。其中  
胡然哉。汝高天才俊邁。而又撥深心。用全力。以

此嘯咤秣壇、陵轢前後、誰能當之、以汝高才、取公卿大物、自其餘事、而又兼收雅道、流清譽、若燕許曲江、廣平諸公、又何弗都且美耶、不然而若所謂止堪受饗、不可資譚柄、入圖畫、雖珥貂擁笏、柰何、以斯知汝高之計未左也、閩饒佳山水、人物朗秀、霞蔚雲興、此時爲烈、前有千古、後有萬期、惟汝高其力、諸不佞耄矣、旗靡而鼓音衰矣、無虞不佞、

北征篤序

梁谿鄒迪光彥吉父撰

汝高先生、年少成進士、高等、名聲公卿間、籍甚矣、而意不自可、其所結好、獨在詩、所好詩、匪輓近白台傳子、惠心柔口之態、而獨神於黃初建安開元大曆元和上下千百載間、其所纂著、非劉陸阮謝李杜沈宋高岑王孟諸人、而外弗效也、以故詩出、人無不膾炙之、如一口、而汝高獨有所不嫌曰、吾安得窮一日而千里也、矢不貫



不徹金不鎔不成學不極不止染指而食望塵而適非吾志也其深嗜篤好若此今年春奉使過梁谿與予論詩城西壕上予謂之曰詩能窮人其於仕益能使宦不達故惟窮愁工詩惟仕而弗達者工詩汝歷金門而叩玉堂煜煜貴游人不譚申韓管晏不語召杜蕭曹而嚶嚶揚權曹劉以下諸人豈其能起六七君子於輦上爲汝推轂而加膝哉夫操瑟不可立齊門章甫不可適於越詩之爲物仕人之瑟持衡者之章

甫也捨所好投所忌無論驥足鴻翮不可攀附將索汝于枯魚之肆矣夫事有機行有會蹈機履會則從忤時捍禁則凶今海以內南絰島夷北絰突厥澤中之豪望風攘臂彼其瞋目語難運籌借箸矢口孫吳穰苴者胥操觚染槧翩翩修詞之士遭時慷慨投筆而起者也汝獨柰何以毛穎氏爲生活耶而又奚沾沾於韻語爲汝高曰誠哉所言雖然有盡者物也不朽者文也故左丘失明爰著國史垂之今曩屈原沉湘離

騷乃興、遂祖詞賦、故齊都之千駟、不如孔壁之一經、季子之百鎰、不如虞卿之數語、且也有譚道而窮、有稽古而榮、有揣摩捍闔而塞、有下帷發藻而得、有斤斤而敗、有觸諱而泰、必詩乃窮、必窮而後詩、固哉夏蟲之不可語冰也、子休矣、吾務吾不朽之業、不極不止矣、亡何別去、別越月、錄自七閩、抵薊門、所著詩若干首、題曰北征篇、而走一价、問序于予、曰、某不佞、敢不惟子之命、惟是初衷不欲、以一時而易千百世之業、故

扣舷而歌、憑軾以哦、靡非是物也、者、家有敝帚、享之千金、子幸有以督我、予惟汝高詩才、最雄畜、最富、才無所不盡、而一準之法、畜無所不吐、而約之情、思淵以渺、語嫵以徐、調魁以越、編中如車遥遥、白頭吟、鮑照何承天也、銅爵妓、明妃怨、王勃、盧照隣也、滕陽嘆、黃金臺、吳門看花行、杜甫、哀江頭、李白、扶風豪士、王維、桃源行也、古戰場、寄朗公、李遠、叢臺、劉長卿、送靈徹也、庶幾哉、矢徹而金鎔、無遺憾矣、乃汝高才、鉅而不存、

意廣而不居、德厚信矜、而達人之氣、無門無毒、無町畦而一飲人以和、其於仕宦也能不以方、柎入圓鑿、安知非康樂延年、張道濟、蘇廷碩之流乎、榮名與詞賦並茂也、詩胡足以窮汝高、詩胡足以窮汝高、

北征篇序

太原王穉登百穀撰

北征篇者、鄧計部汝高、謁選入都門、征途所作詩也、自閩走燕、爲程踰七千里、爲日踰兩晦朔、易星躔、更分野、所歷通都鉅邑、名山大川、不知凡幾、豈不道之云遠哉、它選人坐餘艤間、修竿牘、具羔鴈、東謁諸侯、西干令長、望門而借游揚、及階而乞咻喚、大者詭得華要、小者腰纏不乏而已、何暇譚風雅之遺、討三百之畧、舍軒舉就

攢眉薄纓紳、事鈔槧、鏤心雕腑、與詞人騷客角  
長技乎、計部君自爲經生時、十三習程書、十七  
習詞賦、不害其竝善也、旣成進士、而所謂程書  
一切罷不觀、專意詞賦、所至登高弔古、採風問  
俗、托物感事、或封題寄遠、或分袂自厓、或搔首  
歸鴻、或支頤朝爽、莫不於詩乎寓、比其入京師、  
覲雙闕、官画省、含雞舌、徘徊馳道之下、委蛇  
帝座之側、未嘗一日不事吟咏、出其行李中、詩  
以小史錄之、且盈帙矣、君所爲詩、非字鍛句鍊、

篇續什組、而清音秀色、麗思逸辭、若江山爲胸、  
雲烟爲筆、珊瑚翡翠爲風神、蘭芷杜蘅爲芳澤、  
讀之者意愜、覽之者心鬱、於是鄧計部詩名、不  
俟脛而走、翼而飛矣、憶君北上時、過余半偈菴、  
箕踞長松之下、語余曰、夫仕宦者、內何必金門、  
玉堂、外何必擁旄仗鉞、第免簿書期會、與文墨  
議論之紛紜、日索長安米、不廢嘯歌足矣、今君  
此官、可謂不虛所望哉、不知君尚能記半偈時  
言無耳、君初題此篇曰、越吟、余笑君方揚鑣天

路烏得自同莊烏羈愁易名北征乃授劄

帝京後篇序

雲夢九畹居士鄒觀光孚如撰

唐義烏氏蓋有帝京篇云第稱引山河城闕之盛與平臺戚里之雄而已李安平帝京篇文皇賞之謂其身老而才壯齒宿而意新然其什寥寥焉汝高茲集自京師于役越自越泝江淮道齊魯燕趙之墟游覽贈酬畢在固不祇爲帝都賦若其詞藻之媿則齒不待老而才壯意新者也夫自論詩者以臺閣與山林途岐而不能相

兼而又謂詩能窮人、詩待窮而後工、彼其以牢騷悒鬱、易爲造微、至于劇思竭木、讐真宰而忌人群、是固有之、然而不盡然也、明良喜起、薰風卿雲、炳蔚千古、鹿鳴皇華、卷阿天保、夫孰非廟廊之什、試使與所謂兩句三年、得一吟、雙淚流者、以絜人工而較天巧、不亦猶霄淵哉、詩何嘗能窮人、又何嘗待窮而後工也、汝高成進士、郎民部、去偕計、僅五六歲、所典文衡、視學政、于仕爲達、少好爲漢魏盛唐家言、有聲公車、自公豐

今之作者誰  
能有此八若  
能世之不可安  
該作若庶以之  
於此矣

暇、其業彌進、今觀其詩、考詞若未央、建章之闕、鉅徵材若昆明、太液之紛綸、賦情若長信、昭陽之綺靚、練氣若期門、虎賁之雄慄、選雅若金馬、石渠之容與、蒐奇若珊瑚、翡翠之華燭、束律若關石、和鈞之嚴整、調聲若九功、六律之鏗鏘、卽汝高所自名篇、以揚騰汝高之詩、彬彬哉、質有其文矣、古有之、岳牧用詞人、登高能賦、可爲大夫、汝高今以大夫佐方岳、治行褒然、高第、旣不以詩掩政、而所眺覽于山川風物、發其竒藻而

碧雞集序

楚人周弘禴譔

明興詩不大暢而驟振于李獻吉獻吉後王李相羽翼而名滿寓內余嘗師事王元美先生而聞先生之說詩謂兩李君可狎主齊盟嗣後業詩者多千家而以詩名者數十家耳嗚呼詩難言矣韜鋒囊光敦素崇朴者托之乎渾厚而失于野質勵氣吐英摩雲駕海者托之乎悲壯而失于怒張繪象彫彩鏤花吸露者托之乎組織

益其造日益廣、亦不以政掩其詩、以視唐兩帝  
京篇、文采不屑爲駱、功名有能爲李、而有不爲  
李者、汝高之集行、而世知詩之不必窮人、且不  
待窮而後工、汝高其左、驗與、抑余聞之、蘇子由  
嘗謂百氏之書、雖無所不讀、然皆古人之陳迹、  
不足以激發其志氣、決然求天下奇聞壯觀、則  
于山見終南嵩華之高、于水見黃河之奔流、至  
京師觀天子宫闕之壯、與倉廩府庫城市苑囿  
之富、且大已、又見歐陽公聆其議論、文藻與其  
門人賢士大夫遊、而後知天下之文章聚乎此、  
汝高以帝京名篇、其于高深鉅麗之觀、惟其有  
之、是以似之、第不審誰爲歐陽其人、則不佞願  
與聞之、汝高幸以語我、



碧雞集序

楚人周弘禴撰

明興詩不大暢而驟振于李獻吉獻吉後王李相羽翼而名滿寓內余嘗師事王元美先生而聞先生之說詩謂兩李君可狎主齊盟嗣後業詩者多千家而以詩名者數十家耳嗚呼詩難言矣韜鋒囊光敦素崇朴者托之乎渾厚而失于野質勵氣吐英摩雲駕海者托之乎悲壯而失于怒張繪象彫彩鏤花吸露者托之乎組織

而失于靡麗、探幽詣虛、飭澹索漠者、托之乎玄  
脫、而失于禪縛、搜僻點鬼、鈎隱志恠者、托之乎  
奇博、而失于不典、况詩以格重、以意勝、以調全、  
騁才則破格、戀景則礙意、累事則傷調、而五言  
古、七言古、及五七言律、五七言絕、其格、其意、其  
調、各殊、匪只律與絕異意、古與律易調、律與絕  
與古異格、卽五言古、七言古、其格、其意、其調、亦  
自不可比和而互奏、故唐之名家、能諸體擅長  
者、實不可多得、杜工部集大成之詩、試取其全

集、讀之、其五七言絕、能快人意者、幾何、李供奉  
稱仙才、而七言律亦僅寥寥、則他可知矣、碧雞  
集、鄧汝高全豹之一斑也、諸體備矣、而諸體亦  
各極其致、其金馬碧雞之遺響乎、大端渾厚沈  
着、而陶其野質、悲壯激昂、而消其怒張、組織工  
緻、而洗其靡麗、玄脫冲夷、而解其禪縛、奇博淫  
肆、而文其不典、蓋就格出意、緣意運調、叶調借  
格、而氣以貫之、昔人云、文章之逸氣、五百年而  
得、韓昌黎又五百年而得、蘇長公于詩亦然、近

代李王三先生俱以氣勝汝高其接武也往李  
獻吉官民部而民部重余濫竽民部時謬譚詩  
而詩未卒業無可自擬于獻吉而友人姜仲文  
趙夢白後先入民部夢白由民部改官銓曹余  
嘗戲語夢白曰以官則銓部重君以詩則君重  
民部民部亦重君何也得獻吉爲之蒿矢也汝  
高先亦民部郎可與趙姜兩君稱鬯足而俱重  
民部余則以民部重而序汝高之詩而因以汝  
高重也

### 鄂渚編序

合肥友弟竇子儂撰

汝高入楚而有鄂渚篇鄂之勝最著黃鶴樓漢  
樹鸚洲獨題千載則何以具是不朽哉一望蒼  
江多景而寡和豈難作者言固有至不至耳至  
則片言千萬言不敵也說者謂鳳凰臺詩謫仙  
陰始崔而易地以爭名移調以競烈品隲者卒  
亦未許駕之則信乎其至也人代已非桑田遞  
改今其言在不藉地勝而地藉以益勝故夫能

文之士、往往挾所長、雄鳴於天下、而騷人墨客、  
揆竒剖勝、致令天地大矣、煥無餘藏、編中爲是、  
樓律者二、卽不知向前人若何、臨江獨唱、竝及、  
諸篇、抑亦蒼然俯楚、戛擊金石者乎、崔之後、鮮、  
有聞、得汝高而兩之矣、汝高饒詩才、兼有今古、  
之志、嘉書異集、一韻一字之竒、靡不收焉、深入、  
而湧出、卽二年於此、攝行內外、日者什且八九、  
雖從續紛、愈開雅致、每以言濯余、余固慚無能、  
以稱汝高也、楚屈宋之遺聲、施自古、入國朝而、

漸、高皇帝菁莪之化、百餘年以起、世祖首、  
善在郢、風行江漢、其間人文翩翩乎有餘於致、  
也、以方煙波日暮、長安雲蔽之愁、何如今時哉、  
是編也、勒成於陽春白雪之區、足照盛事、至其、  
文章飾治、經濟敷猷、汝高所際、唐二公未有、則、  
豈盡人力哉、是又賡歌之風、於斯爲盛者矣、

先觀察公之詩、其成進士也、有搔首集、謁選、  
又有北征篇、郎民部有帝京篇、使浙漕有于、  
役藁、使還而北、自北而督學、日南而叅知荆、

楚也。於是復有帝京後篇、碧雞鄂渚、浮淮諸集。至於雜著諸文，則什三家藏，什七散逸。嗚呼！人子于親，思其居處，思其所樂，矧先公遺稿，生平之精神寓焉者乎？於是乃蒐輯成帙，合諸詩集彙刻之，命曰西樓全集。蓋先公讀書西樓，自幼而壯，卽千秋後，魂魄亦所憑依，舉以名集，識永思乎若。

諸名公序言則總弁之首簡云：萬曆辛亥夏，日男慶霖謹識。

### 重刻西樓全集序

予旣爲鄧道協序其所纂家乘外集，得因以奉揚其先觀察汝高先生之文名，才品羨慕其所刻先生西樓存稿，方爲海內傳誦，膾炙人口，稱風雅正宗詞壇的派。後學賴爲法程，不意道協家報近至，其樓居書板盡歸回祿。予聞之不勝爲其慨惜，道協急取曩惠予本重刻于此，又不勝爲其幸喜。惜則惜其旣刻而重損資力，喜則喜其早刻而得收稿本，益以見先生之精神不

隨煨燼以並滅道協之孝感得從梨棗而更彰也嗟夫世之名公文人豈少著述而其後昆孫子豈少富貴著述足傳人世富貴暇刻父書良亦難事近見寧化亡友伍惟極之子舜有特携父詩走金陵屬予序刻新安汪仲嘉之伯子力病刻父集皆足起敬獨予不肖先孝廉遺稿塵閣有年近藉友朋之力始獲成書不若道協之勇于爲而滋予愧也先生集有諸名公新舊序在予不文不復具述特書道協所以初刻重刻刻閩刻南肩鉅艱辛之繇如此謂非作者之精靈與述者之孝感有所交致不可也

天啓七年四月八日里中後學林古度頓首書

鄧汝高傳

年弟謝肇淛撰

蓋閩詩于是三變矣 國初十子爲政其言秀  
潤而弘朗蓋猶有正始之遺焉則林繕部子羽  
爲之冠弘正之間其人思深沉而詞雄鬱相尚  
以少陵致語一洗靡靡之聲則鄭吏部繼之爲  
之冠及吾黨諸子相與切劘始獲窮崑崙之原  
探宛委之秘自漢魏以迨中晚攷千年之變態  
而折衷之本于才情而歸之氣格毋失墜也于

是詩道大明而鄧觀察汝高爲之冠云汝高名原岳閩人也先世處士定者有詩名與十子頴顏父別駕遷博學能文章其得汝高也季而頴固心異之矣及長美髯自誓望之如神仙焉最攻舉子業戰輒屈其長老又攻古文詞也初爲詩學鄭吏部已又學七子旣而一意摹古要以唐人爲宗每一詩出示人人驚詫非汝高筆也旣乃思日攻苦神日王所爲詩日益進今前後著述俱在大率北征勝搔首于役勝帝京至

碧雞鄂渚浮淮漸入神境矣汝高三十一舉十鄉越七年而成進士授計部郎出視滇學拜楚叅藩督餉渡淮過家十五日而卒身後始拜憲副之 命僅五十歲耳爲郎一摧關一搜粟一督下糧一典粵試一督通州倉視學歷滇四封者再藩楚一督離一攝荆西道一攝江防一視觀察篆一監試楚闈五佩藩臬印計十二年中逐車轍馬足無寧日而所在事事精辦又以其簿書之暇肆力于雕龍吐鳳之業此他人所奔



走竭蹶而不能得之者汝高神閒氣定恢恢游  
刃有餘地焉寧非蓋代之兼才而三不朽之盛  
事哉然汝高有天幸所至輒饒佳山水于浙得  
西湖天日于粵得羅浮于滇得點蒼洱海于楚  
得洞庭黃鶴軒輶所經意與境會斗酒耳熱烏  
烏微吟奮筆疾書千言立就如裴將軍舞劍觀  
者辟易嗟乎汝高非獨人妬之天亦妬之矣汝  
高末年詩稍復閎肆政欲窮其力之所之而遽  
死藉令汝高不死其所成就可量哉汝高有集  
數十卷歿且十年而其孤慶霖始梓之行于世  
求余爲之傳余謂汝高家孝友仕勲蹟所在尸  
而祝之顧余所爲知汝高與汝高生平所自信  
者莫詩若也故獨傳其詩若此

謝外史曰余同汝高在浙浙郡縣大夫謂汝高  
傲弗善也顧余二十年未嘗見汝高傲慢無何余  
亦以傲挂吏議矣汝高又爲余白不傲也及今  
乃知之吾兩人者無傲心有傲骨矣夫傲骨者  
不愈夏畦乎余旣人尼之汝高又天奪之寧固

有不可知者同時蓋有徐孝廉燧亦詩成而早  
卒聞詩之振于世二君之功爲多也

西樓全集目錄卷一

五言古詩

飛龍引

車遙遙

戰城南

短歌行

初發芋江別諸子

登鼓山絕頂還宿靈源洞作

塞下曲二首

舟過武夷遊九曲歸宿冲祐宮有作

春日雜興

太姥山

塞上

擬登天台山

遊西山宿碧雲寺

同史世程太史劉叔通民部眺香山寺

來青軒

蘇節母

發京邑別諸子四首

擬春泛若邪溪

立夏述懷二首

三賢詩三首

同曹能始進士憇石屋

冬日同徐興公謝在杭飲昆山

秋懷

同陳用吉遊北山

高郵阻風

送陳伯孺南歸

感遇三首

舟次安德聞河冰已合遂從馬驛北發

同何水部萬都尉朱御醫盛太學集西寧

侯西園

出門

送陳用吉秀才南還

安德署中待曹能始不至四首

養芋原驛別諸兄弟二首

飛雲巖

盤龍寺

宿翠屏公館

春仲西巡藩臬諸公出餞遂遊圓照雲居

清淨諸蘭若晚抵進耳山昏黑乃別余

遂宿進耳

發昆明諸公餞送歸化寺丙夜乃別

露香臺爲鄒大澤先生題

題萬古閣

遊洪山寺

晴川閣

滄州偶咏

舟夜

澂江道中

西樓全集目錄卷一終

西樓全集卷一

閩中鄧原岳汝高著  
門人韓日纘緒仲訂

仲子慶霖編次

五言古詩

飛龍引

壯志隘九垓塵壚詎足羈白日駕飛龍乘雲隨  
所之朝遊蓬萊島暮宿青海湄海水浩茫茫下  
有仙人居飲我白石髓贈我瓊樹枝服食壽長

生遠與汗漫期笑彼尺蠖徒悠悠那得知

### 車遥遥

丈夫逐邊勲遠行不顧身公家有程役出戍河  
陽津河水聲漉漉朔風吹黃塵去者日已遠離  
思難重陳不如道傍花猶得隨車輪旅鴈哀失  
群鷄鳴悲蕭晨生死當決絕蛾眉恨誰伸

### 戰城南

戰城南走城北城南雲黃城北雲黑天蒼蒼野  
茫茫生不願封侯但願歸故鄉

### 短歌行

驅車歷遠道客思浩已盈勸君且停車聽我短  
歌行徒御慘不歡語短歌無聲芳春二三月黃  
鳥鳴嚶嚶君子肅于役盡室逐北征遲回不忍  
發去住頻自驚風雨戒前途飛鳥避寒旌送子  
一尊酒握手心怛怛豈不惜離別敢復稽王程  
去去但努力黽勉樹令名客子加餐飯用慰故  
人情

### 初發芋江別諸子

曉出城西門莫宿芋江湄嘆息七尺軀徒爲名利羈僕夫催上道征馬鳴聲嘶行李旣蕭瑟驪歌愴以悲零落秋氣涼寒風吹我衣酌子一杯酒行行與子辭猶憐東山雲黯黯西南馳人生重意氣諒不爲此移慷慨發長吁雙劍光陸離勗哉各努力芳名長自持

登鼓山絕頂還宿靈源洞作

步出東郭門已識巒阿面行行百十里山廻翼  
宮殿石罅響流泉百道如飛練矯首窮峯可望  
不可見歷覽稍忘疲玄象接羅遍賈勇陟其  
巔頓令心目戰蒼茫大海流三山雲外見天風  
颯然至寒燠忽已變歸宿靈源洞空翠落如霰  
山嵐日夕佳几席爭葱蒨幽鳥向我鳴浮雲自  
舒卷借茲清道心坐使塵慮遣朱門何足榮末  
俗豈能眩

塞下曲二首

秋高胡塵飛萬幕悲笳起驅馬入雲中謀報隨  
遷徙腰間挿寶刀炯炯明秋水風吹大白旗飄



颯西北指殺氣暗邊城斜日照殘壘

其二

進軍古北口沙飛風日昏轅門號令嚴馬鳴軍  
不喧戰苦鼓聲絕揚旗海水渾生取左賢王滿  
身刀槍痕丈夫當報國微軀何足論

舟過武夷遊九曲歸宿冲祐宮有作

稅駕風塵中泛泛若萍梗隨風度南關忽入神  
仙境褰帷意豁然山水夙所乘亭亭大王峯蒼  
翠遙可領九曲路透迤桃花川原永輕舟小如

刀探歷亦俄頃秋高山益峭溪澗水逾淨分明  
天外竒詎止盆中景歸來卧玄宮心清凡慮屏  
恍惚武夷君神采光炳炳起來發長嘯悠然動  
深省

春日雜興

東風方破凍草堂春事繁野雀遶舍鳴起來朝  
日曛閉門足幽事庭草淒以蕃對此已豁如况  
有酒盈罇陶然兀一醉意態亦言言微風吹梅  
花香氣清我魂起視遠山雲秀色恂孤鶩風塵

空自老詎如靜者尊歲月不我與逍遙得長存

### 太姥山

名山河翠律陰洞亦透迤古蹟墮荒陬世人那  
得知巍巍太姥山形勝良在茲真疑鬼斧鑿恐  
是天工移乳壑竅以深石壁峭而竒蛟螭忽飛  
翔日月相蔽虧仙姥去已久千載迴幽姿丹砂  
化不存蝙蝠大如箕欲作采真行且結汗漫期  
道遠苦莫致臨風徒噓唏臥游學宗炳披圖聊

自怡

### 塞上

九月塞草衰秋高風逾厲中夜聞舉烽胡塵忽  
而至結束行負戈甲光爛照地嚴霜侵人骨寒  
泉漾殘觝男兒志裹革生死心不二按劍髮衝  
冠瞋目血流背殺人豈顧身偉哉漁陽騎

### 擬登天台山

南泛福溪水北眺天台山仙靈杳何許珠條猶  
可攀側身度石梁巨石正當關瓊樓與玉闕乃  
在白雲間呼吸通帝座下視空人寰赤城色如

赭瀑布流潺湲欲結山水綠未覺途路艱尚想  
寒山子騎雲相往還

遊西山宿碧雲寺

杪秋天氣清風緊林烟霽杖策入西山日晏聊  
小憇化城殊輝煌淨土亦幽麗諸天法象竒夾  
道松蘿闕夕陽駐西嶺新月掛雲際如來放光  
明長空屏纖翳澗水響淙淙下方人語細坐久  
聞經聲層軒出香氣更深夜寂寥息心生妙契  
明鏡原不染虛舟誰能繫何當謝塵寰一證無

生諦

同史世程太史劉叔通民部眺香山寺

西山有名刹結構依巖谷寶殿盪浮雲精廬掛  
層曲客到聞晨鐘舉頭見金粟松風度天籟千  
林散晴旭金碧光熒熒高丘宜遠矚莫是化人  
居信有西天竺邀懽得良朋攬勝逢休沐況復  
秋氣清悠然豁雙目因之想長馭乘風駕黃鶴

來青軒

尋山信輕策捫蘿度層岑危亭駕雲際瞻眺極

高深秋氣沉蕭瑟長空絕飛禽天風颯然來萬壑鬱葱青  
宣皇昔巡幸駐蹕山之陰御墨儼球琅輝煥直至今夙昔慕名區茲辰遂登臨忽  
忽如夢寐山水還清音憑高一長嘯永寄滄洲心

蘇節母

死節固不易立孤良獨難豈爲七尺軀念此然諾間夙昔事君子白首願同懽中道忽棄捐涕泣摧心肝  
忼慨撫遺孤食荼中自甘遺孤幸成立母也名亦完含笑入重泉見者無愧顏梁山屹業業漳水流潺潺彤管有遺聲與之表歲寒  
發京邑別諸子四首

驅車上東門車塵蔽白日攬轡心徬徨日暮馬蹄疾感激平生交風塵忽相失睠此一杯酒相視空佇立野曠雲四垂天低河流急覲見復何時期君共努力

其二

出門何所之行行客吳越四牡向南馳雙旌從

北竅高柳翳浮雲不見黃金闕豈不念友生爵  
服慙羈紲旅鴈失其群悲鳴心斷絕迷途當蚤  
悟波流那可說願言懷德音西山采薇蕨

其三

去歲纔北征今年復南邁日月曾幾何睽離詎  
能柰慷慨歷長途春風不相待前年新栽樹倏  
見成車蓋人生非金石景光豈不愛何以慰相  
思幽蘭堪結佩

其四

京洛帝王都冠蓋紛通衢游道豈不廣鄙意不  
願俱擊筑燕市中結交皆狗屠頗慕魯連達未  
怪荆軻愚過從稍快意握手不須臾離筵載恹  
惻去去天一隅晤好諒非遙勗哉弘遠謨

擬春泛若邪溪

泛泛溪上舟茸茸溪畔草春風吹微波淡雲綴  
晴昊魚行若乘空縈流翠如掃鏡湖旣已湮蘭  
亭亦枯槁對景且自怡欣然豁幽抱

立夏述懷二首

芳春已受謝，倏見夏雲生。楊柳忽載陰，撫候驚  
朱明。麥風散微燠，驅車復前征。衰鳥倦長途，寒  
暑亦嬰情。誰令七尺軀，辛苦逐微名。對酒不能  
飲，擊劍歌無聲。去去勿復道，嘆息徒屏營。

其二

衰榮相倚薄，四序如轉轂。嘆息青陽徂，流光一  
何速。去家萬餘里，短策紛馳逐。况值時運遷，衰  
徊空躑躅。乾坤豈不廣，樊籠傷局促。素志旣已  
乖，終當返初服。

三賢詩

白太傅

白傅烟霞姿，詩名在長慶。雞林識雄篇，館娃傳  
遺詠。餘杭山水鄉，一麾有佳興。冷泉亭未湮，冷  
泠淨如鏡。風流不可見，文藻自相映。俯仰懷斯  
人，芳躅誰能竝。

蘇長公

吾慕蘇長公，憲愛播茲土。結客山水間，扁舟載  
歌舞。達觀本昭曠，豈以遊覽故。依依六橋柳，不

減河陽樹尚論千載後風流猶可睹矯首蘇公  
堤徘徊不能去

林處士

處士抱微尚風節何孤騫高臥茲山中嘯傲終  
天年山色暮復朝墓草自芊眠湖水清且綠蕭  
蕭疑寒烟不見山中人獨鶴何翩翩攬古更懷  
賢三嘆梅花篇

同曹能始進士憇石屋

艤棹西湖邊來往窮清眺杖策過叢薄石逕轉  
幽峭開門忽若堂赤日互迴照四壁寒蕭蕭虛  
空自生耀陰洞不可測疑有蛟龍窟或云通江  
湖荒惚誰能料曹生烟霞姿居然我同調遊探  
天外竒坐對人中妙莫將簪組羈而使山靈誚  
招隱懷古人悠然發長嘯

冬日同徐興公謝在杭飲昆山

伊余秉微尚兼懷物外蹤茲山何寂歷天際開  
芙蓉芳晨盍朋簪遊覽當玄冬霜風莽蕭瑟落  
日寒烟重蒼茫百里外隱見多竒峰梵閣出其

巔清籟鳴長松開窻豁遠目倚仗聞踈鐘太湖  
從東流蕩漾晴空天色不覺暝雲水幽朦朧  
誰謂簪組拘登眺亦從容勝事固不偶後會何  
當逢還期汗漫遊歲晏來相從

秋懷

青陽能幾時會見秋風靡昨日園中花今日憔悴  
矣芳華不自惜少壯亦難恃對酒徒傷悲嘆  
彼遠遊子

同陳用吉遊北固山

杖策訪名區悠然稅塵鞅茲山特秀發清秋氣  
逾爽偶爾尋精廬遂眺層臺上烟嵐日夕佳山  
僧自來往地窮境益幽江永望彌廣金焦相對  
峙雲開見高掌落日下平楚微鐘出林莽石上  
一班荆巖巒湛幽賞愧此風塵姿徒結真人想

高郵阻風

客途殊未央值此風波惡四面行旅稀秋風更  
蕭索愁雲黯四垂寒雨時復作驚濤如激雪孤  
蓬竟何託兀坐太無聊羈懷轉寂寞丈夫七尺



軀風塵坐銷鑠鬱鬱當告誰斗酒自斟酌嘆彼  
寢廟犧不及野田雀長歌招隱篇相期在寥廓

送陳伯孺南歸

歸客向閩越西風吹長襟送送城南隅遙天生  
暮陰昔夕我時桑園聞鳴禽今日我送女露  
冷秋已深久客羞空囊胡爲日滯淫忽然思故  
廬歲晏歸山林我愧簪組羈握手悲復吟聊酌  
一杯酒行行爲子斟杯酒安足云表此別離心  
後會渺無期形迹更商參此別各努力莫忘寄

徽音

感遇三首

春陽不相待忽忽歲云晏歲晏夫何如骨肉臨  
當散朔風吹我裳凄然發浩嘆故鄉日以遠迢  
遙隔河漢攬衣起徬徨愧彼南飛雁

其二

策馬事遠征行行歷齊魯齊魯非我鄉馳驅心  
獨苦浮榮何足言微軀寄簪組一葉在風波漂  
零安得住孤懷慷以慨脉脉向誰語

其三

朝發彭城道野曠多悲風濁流不可涉客子嗟  
途窮髣髴日已變遲暮激我衷達人思適性君  
子貴返終行當棄爵服遵晦息微躬

舟次安德聞河冰已合遂從馬驛北發

凜凜歲云暮朔風吹重裘黃河層冰合客子心  
煩憂王程不可稽行李難滯留舍舟歷長途怨  
彼路阻脩羸馬嘶嚴霜徘徊于道周弱子怯曉  
寒况乃筋骨柔輿人催上道涕泣聲啾啾風沙  
晝撲人面垢髮不收本爲饑寒驅不爲妻子謀  
雖知迷途誤失路難回頭東山慚遠志空貽達  
者羞

同何水部萬都尉朱御醫盛太學集西園  
侯西園

五侯愛結客賓從何光輝華軒開疏牖曲逕通  
璫扉濃陰覆廣術流泉含清暉竒草茁而葩紫  
綠爭芳菲薰風颯然至忽見繁花飛四座發微  
言咳唾落珠璣長安遊俠窟裘馬逐輕肥靜躁

不同量達士將安歸人生各有適玄默吾所希  
願言謝塵鞅一室聊相依

出門

出門何所適適彼南海涯暑雨薰鑠人况乃道  
路賒我本江海士寄跡如風花馬足歷四方旃  
胝誰怨嗟去日苦炎熱楊柳陰交加歸來當雨  
雪萬里逐飛沙朝廷急岩穴動設彌天置聖化  
遍海壖文風被幽遐願得明月珠永以奉王家

送陳用吉秀才南還

平生寡儔侶與子結綢繆握手三十年契託垂  
千秋羨子蜚英聲天路期遨遊如何襲竒服末  
俗乃不酬慷慨事北征仗劍歷齊州長安富游  
俠結納傾王侯出門復入門干謁信所羞困頓  
臥空齋歲月嗟淹留風雨時對牀道故以消憂  
一旦忽告別使我心若抽薄宦良苦貧何以爲  
子謀行李旣蕭瑟徒御生怨尤送子西城隅日  
暮風颼颼達人隨所適君子慎厥修譬如席上  
珍逢時終當售願言保歲寒黽勉樹令猷

安德署中待曹能始不至四首

河干相送罷悵此一杯酒睽違曾幾時我馬亦  
南首聚合固有緣分携諒非久他鄉儔侶孤徘徊  
須我友終風日夜號吹斷城南柳

其二

客子逐行役車敝豈遑顧昏黑馳出門晨月忽  
東吐辛苦當自任迢迢萬里路解鞍更徬徨此  
意向誰訴疾風斷河流遥遥不得渡

其三

陸行風塵多水行風波惡水陸各有虞浮生竟  
何託與爾金石交相期在寥廓君子識久要志  
士矜然諾乾坤信莽宕恐負平生約

其四

同作遠遊客訂此汗漫期手披綠玉杖足躡青  
雲達夜宿日觀峰朝憇嶧山陂蹤跡苦不常獨  
行將安之望子期夙來慰我長相思

發芋原驛別諸兄弟二首

從宦八九載跡若參與商一別動經年懷人空

徬徨薊門雖云遠音書猶得將南中夷服地瘴  
厲非吾鄉豺虎坐噬人處處埃塵揚妻子不我  
顧單騎歷風霜眷言骨肉親涕下沾衣裳對酒  
意悽惻欲飲不盡觴策馬出孤城浮雲西南翔  
野色忽已暝江流浩茫茫越鳥戀舊巢何必之  
窮荒終當期歲晏白髮永相望

其二

骨肉嗟多故荆樹不再榮羽翼各參差顧影長  
自驚相視非少年一散難復并歲月知幾許更  
作西南征中宵起嘆息怨彼鴻鴈聲凄然一掬  
淚洒向江流傾頻行再三囑安居崇令名爲我  
葺田廬百畝時經營松菊如未荒庶以樂吾生  
去去從此別遠客難爲情

飛雲巖

駐馬望層山山高秀可摘解鞍一登覽杖屨窮  
所歷群峰儼屏障亭亭百餘尺雕刻匪人工崢  
嶸固天闕漸覺衣袂寒片片歸雲集雲去山色  
青雲來山色白古洞出玄竅飛流瀉丹液倚檻

蒼翠來草木紛相襲  
蹙蹙更衰徊惆悵嗟行役  
戀戀翠微間去此更誰適

盤龍寺

駐馬盤龍山小憇盤龍寺  
徑道雜松蘿闖入有深致  
拾級叩山門林巒相虧蔽  
金碧漸輝煌妙相殊端麗  
後聳千佛閣回廊亦幽邃  
遠眺昆明池微茫海光膩  
曾有布金人捐貲求福利  
遂令丈六身莊嚴無不備  
瞻謁更冥叅頗了西來義  
下山日已昏嵐翠遠相媚  
舉手謝山靈歸途當

再至

宿翠屏公館

曉飢通海縣暮宿翠屏館  
出門天未明入門日已晏  
西風吹塵高荒郊行旅斷  
都無吏卒喧野鳥自相喚  
舉頭見青山秀色亦堪玩  
辟如作勞人忽現清凉觀  
趣合興彌劇心清境非幻  
臨別更躊躇淒然發浩歎

春仲西巡藩臬諸公出餞  
遂遊圓照雲居清淨諸蘭  
若晚抵進耳山昏黑乃別  
余遂

宿進耳

王事有程期馬首當西指跋涉固不辭敢復勞  
君子杯酒不盡懽便陟西山岷是時春雨餘景  
物無不美四野麥苗青垂楊映流水圓照本古  
刹莊嚴無與比涉級臨高臺浮雲出其底遠聆  
飛鳥翔俯視諸山靡眺聽已從容周遊亦隨喜  
雲居與清淨相去步武爾鐘聲朝夕喧閣影東  
西峙對酒足流連鼓勇猶未已望望進耳山却  
在蒼茫裏仄徑幾千盤回環七八里松陰暝相

映嵐氣當面起輿人四五息乃抵山之趾真覺  
遠人寰囂聲不入耳酒行且無算興盡觀亦止  
臨岐各分手山頭日暮矣終歲苦樊籠兀兀厭  
城市豈謂風塵姿因緣乃有此去住各無營勞  
逸亦由彼石榻淒復清聞鐘悟妙理明發別山  
僧奔馳從此始古人惜勝會衰徊良有以

發昆明諸公餞送歸化寺丙夜乃別

征鳥戀舊棲物情懷其故悠悠羈旅心那能忘  
去住伊予客南中花發今幾度睠我平生親金

石有同趣往還歷歲時提携朝復暮一旦遂飄  
蓬行行卽長路離別在俄頃辛勤向誰訴送我  
蕭寺中解鞍聊暫駐衷曲各自陳酒行亦無數  
流連不盡歡餘瀝及僕馭露下漏已殘分手尚  
云遽攬衣起徬徨臨發再三顧浮生信不常聚  
散如飛絮彷彿聞晨雞微茫天向曙惆悵板橋  
霜昆明在何處

露香臺爲鄒大澤先生題

曰古哲人行至性何超詣旦晝有所爲焚香告

于帝寥寥千載後清風更誰繼君子墓前修一  
究天人際方寸元不欺素履固無替冥冥者何  
言昭昭揭真諦斯臺亦幻跡要識平生意三復  
戶牖銘微言有深致

題萬古閣

傑閣宜眺望四面圍青山開軒無俗翳隱几多  
餘閒超然託萬古俯仰空人寰短榻絕纖塵  
雲相往還端居謝紛慮靜對孔與顏依依尚友  
心聊寄泉石間



遊洪山寺

秋原雨新霽野曠翔天風林巒迭映蔚客到聞  
晨鐘宛轉步山椒四望烟濛濛禮塔躡清漢  
香對遠峯尋山不覺暝斗酒歡娛同寄語寰中  
人應知物外蹤

晴川閣

暇日出行游秋江正新漲擊汰隨所如揚帆忽  
西上傑閣俯晴川暉陰各異狀山水信竒絕俯  
仰一何壯風色晨夕佳黃鶴儼相望攬景趣殊  
寂開尊意彌邈日晏澹忘歸臨流獨惆悵

滄州偶咏

久客倦長途侵晨櫓聲發天際澹微雲帆前掛  
新月沙岸樹如烟水次楊花落遙望滄州城孤  
懷幾超忽

舟夜

客舟夕暫休日落河流急遠火滅復明烟樹  
濛濛濕荒雞半夜啼雲氣舩窓入鄉夢忽已醒  
凄然憂思集

澗江道中

歲晚厭行役單車豈遑處衾冷不成寐出門復  
何許雪霽天色寒風急江聲怒何處落梅花  
徘徊日將暮

西樓全集卷一終

西樓全集目錄卷二

七言古詩

君馬黃

行路難

白頭吟

賦得江郎山

德州遇雪與吳維鎬飲客邸醉歌

六月一日風雨中赴部衣盡沾濕邸中撥

悶一首

哀寧夏

燕市七歌效杜同谷體

帝京篇

挑河謠

俠客行

宋硯歌

古別離

廢居嘆

長安道

劉將軍贈高麗刀歌

送張伯夜客薊遼

寄答陳女大女翔二秀才

吳門看花行寄社中諸子

儀真道中見桃花盛開感而賦之

滕陽嘆

孟嘗君墓下

黃金臺

汝實汝嚴弟邀飲陳太常池亭泛舟過東

城待月劇飲至醉同惟和興公賦得長  
歌

送白仲之海虞

登焦山

賦得苧羅村送屠田叔轉運便道歸越

浙西謠

擊鹿行

從軍行

放艇

潮陽謁韓昌黎祠

送徐七下第還山

登高丘望遠海送君密之北平

玉主行

將發潞河得家兄消息

舟中阻風戲柬能始

河上行

濟北謠

廣陵別曹能始

壽連江錢尹

桃源洞

遊雲津洞

垂柳篇和楊用修太史

春暮下關道中望點蒼積雪

點蒼石歌

登雞足山絕頂

同漆兵憲再登雞足山絕頂

賦得昆明池送薛觀察入覲便道還里

寄壽四叔隱君

潞江署中遲黃憲副不至

元夕馳入普安漏下二十刻寒甚戲作却

寄南中諸公

眺岳陽樓

聞鶯曲

石門篇壽楊太君

送胡仲脩歸西湖

贈林二雋卿

西樓全集目錄卷一終

西樓全集卷二

閩中鄧原岳汝高著  
門人韓日續緒仲訂

仲子慶霖編次

七言古詩

君馬黃

君馬黃臣馬黑君馬驕嘶臣馬辟易君馬行臣  
馬卻君馬絕塵臣馬偏又與君息駕崑崙顛一  
日凌風遊八極

行路難

高山無完轍急水多覆舟世路本嶮巖微軀寧  
自謀經年作客涉長道日月催人令人老山中  
村叟癡復頑緩步不憂行路難

白頭吟

淒淒復淒淒掩袂長太息一奏白頭吟悲來淚  
沾臆當時許妾偕老期楊柳春風嬌自持尋常  
對面生荆棘羅襦玉珥不相宜妾心如明月君  
情若流水君情翻覆不可知新人容華那足恃

賦得江郎山

吾聞海上三神山弱水環之不可度時有飛仙  
遊其中日月雲霞互吞吐神山縹緲仙所都秦  
皇漢武胡爲乎天地變幻無不有樓臺金碧還  
虛無不見江郎三片石亭亭直上幾千尺位置  
絕類巨靈掌蕭爽不減神仙宅神仙踪跡豈有  
常蓬壺只在大路旁峻嶒已訝星河迫奇恠猶  
疑龍鳳翔我來三過山之下秀色凌凌遠相射  
凡質原非出世資山靈判不容俗駕長安道上



風塵高雙髻，栖皇見二毛。  
江郎蒼翠還如此，眼底悠悠空爾曹。

德州遇雪與吳維鎬飲客邸醉歌

德州城南河水澀，德州城北沈雲黑。  
朔風吹雪飛滿天，車煩路滑愁行客。  
屋上饑烏噤不啼，江頭瘦馬行復卻。  
我今頭顱已如許，胡爲空老長安陌。  
栗冽那禁白帽寒，淋漓更覺青衫濕。  
誰其同者吳維鎬，狂來自許文章伯。  
意氣真憐爾汝交，天涯莽蕩同于役。  
下車呼酒不停口，倏忽相看盡一石。  
天明酒醒出門去，路旁枯楊雪猶積。  
寒帷錯指梅花春，腸斷江南淚沾臆。

六月一日風雨中赴部衣盡沾濕邸中撥悶一首

長安六月雨如注，騎馬出門何所之。  
馬疲路滑愁無那，心忙恐後尚書期。  
歸來客舍突欲冷，雙袖淋漓坐苦饑。  
問奴月俸餘幾許，且買半斗開愁眉。  
閉門高臥者誰子，碌碌風塵徒自嗤。

哀寧夏

國初環邊十三鎮寧夏在昔稱繁華何物么麼  
能啟釁遂令平地生龍蛇中丞駢首罪固當闔  
門塗炭如枯蝦當時禍起只頃刻豈料套虜坐  
紛拏可憐城中十萬戶深閨少女顏如花白刃  
驅出嫁胡子飄塵斷梗隨風沙唵劉瓚瓚叛卒  
耳勾連出沒禍豈賒花馬池頭金鼓震天陰日  
黑聞悲笳 廟堂督戰何太苦士也不力奈何  
邪 天子深居赫斯怒軍前賜劍飛鏑鄒此輩  
皮毛本相類肯以一矢相遺加曾聞北軍苦剝  
削無衣無食仍無家平時怨氣已滿腹一朝變  
起何足嗟土崩之勢既如此旁皇首鼠成叉牙  
輦上君子多石畫勿憂拱把憂萌芽

燕市七歌效杜同谷體

丈夫生來軼軻身已老十年三走長安道欲歸  
不歸無奈何黃塵滿面色枯槁六月炎風飛火  
雲五侯冠蓋日紛紛此時跨馬逐官長令人心  
折越江濱嗚乎一歌兮歌始發兀坐書空愁咄

咄

其二

東山墓木日已大一水回環曲如帶平生魂魄  
思此山老樹菁葱聞天籟悠悠一別今幾時黃  
沙碧蘚埋豐碑山頭杜宇啼紅血游子天涯知  
不知嗚乎二歌兮歌聲急天陰雨黑愁雲濕

其三

有兄有兄生計微薄田不收常苦饑辛勤憔悴  
已半百更兼人事多是非去年別我芋江上九  
月霜前菊初放今年消息不相聞使我淒涼坐

惆悵嗚乎三歌兮歌獨苦荆樹花開飛夜雨

其四

婦生六子四子殤兩雛啾唧何人強壯夫不作  
兒女態但覺中年情易傷大兒僅能弄紙筆小  
兒只解覓梨粟我今汗漫天一方向平婚嫁何  
時畢嗚乎四歌兮腸九迴中夜瑟瑟悲風來

其五

少年白眼不相下肝膽稜稜向誰寫論交却愛  
高陽徒風流便結高陽社邇來握手二十年一

旦分飛北海邊昨日封書寄遠道天長地濶心  
茫然嗚乎五歌兮懷故人思繁調短不得伸

其六

我有古宅在竹林蒼梧翠柏高十尋偶然獨往  
便經月焚香打坐清素心主人出山忽已久流  
水潺潺怨楊柳長安埃塵幾尺高笑殺人間牛  
馬走嗚乎六歌兮歌欲斷虫聲唧唧夜將旦

其七

我今行年三十餘頭顱漸老骨節踈書生意氣  
太無賴手持寸管高稱譽邯鄲才人斲養婦蛾  
眉入宮還見妬長門虛却千黃金浪說相如解  
詞賦嗚乎七歌兮歌且休不如歸卧南山頭

帝京篇

由來佳麗地自古帝王居日月皇圖在山川霸  
氣餘九重宮闕連雲起萬戶千門春旖旎高拱  
橫分薊北霞遙堤直引西山水西山水作東南  
流百道飛來擁上游鈎陳象映雙龍闕闔闔天  
開五鳳樓椒房馥郁粧臺晚金屋逶迤官漏遠

香奩種柳柳千條玉祀滋蘭蘭九畹王侯甲第  
大市街左揮右霍山可排曲宴朝朝銀作箔華  
筵夜夜翠爲釵平陽戚里傍朱門結客邀賓車  
馬喧片語承恩真自幸一朝得勢更誰論北苑  
花新發南鄰草正菲鳴騶馳道出列騎灞亭歸  
南鄰北苑香塵滿紫陌青樓春夢斷王孫錦帶  
忽如雲倡婦羅袞誰獨旦王孫倡婦鬪豪奢醉  
舞酣歌日未斜東江巷口花爭折西集門邊酒  
可賒對酒看花兩不厭芳魂憶得春風面但將

歌舞娛少年肯信光陰逐飛電春花春草總堪  
憐莫雨朝雲亦惘然帝京風景長如此易水蕭  
蕭楊柳烟

挑河謠

徐淮河決水浸天十家九家無人烟黑雲壓城  
風颯颯平陸化作魚龍川昨日帖下挑河道瘦  
骨伶仃不自保官司督促安敢辭其奈生涯已  
如掃不恨河伯爲民災但怨公人橫索財

俠客行

結客不交游冶郎使酒不挾邯鄲倡一片雄心  
貫白日披肝瀝膽天茫茫尋常殺人只寸鐵杯  
酒殷紅化爲血壯士借名仍借軀不似君卿但  
唇舌

宋硯歌

宋家石材馬肝紫鳳喙龍鱗無乃是傳來人間  
五百秋古色淋漓汗流泚漳臺破瓦那足數臨  
洮堅珉差可擬中心鶴眼浮精光四足勾連在  
其底茫茫奇蹟無不有前輩風流今尚爾萬事  
遇合豈偶然茵席糞溷皆有以寶墨含風飛彩  
雲一片瓊瑤冷秋水感君提攜爲君使莫教棄  
置落泥滓眼中之人吾與汝

古別離

飄風自何來吹我連理花隨風倏相失各在天  
一涯挽君衣酌君酒君今忽作萬里行賤妾深  
閨難獨守控君馬加君鞭丈夫意氣在四海別  
離豈爲婦女憐出家不如在家好執別河梁何  
草草但將相思寄夢魂與君同上關山道

廢居嘆

誰家古宅大道邊敗垣廢井生秋烟花開花落  
長太息春去春來空自憐當時富貴盛豪華繡  
戶雕楹堆綺霞急管嬌歌日向暮朱絃寶瑟漏  
初斜世間反覆無不有白衣倏忽成蒼狗秋雨  
何堪燕雀棲夜深但見狐狸走君不見咸陽宮  
闕化成灰瓊樓金屋亦蒿萊只今唯有秦時月  
夜夜清光照綠苔

長安道

長安大道平如砥參差宮闕連雲起寶馬真憐  
遊俠兒鮮衣競識繁華子五侯七貴盡承恩榮  
辱升沈在一言已道邀賓趨廣陌更看結駟向  
平原人情世態一回首覆雨翻雲亦何有昔時  
錦幃映垂楊今日朱門閉衰柳以茲感慨厭風  
塵歲歲年年芳草春莫笑明時疲執戟揚雄原  
是尚玄人

劉將軍贈高麗刀歌

將軍贈我雙寶刀乃是一片高麗鐵爛如閃電

利如風黑點斑斑猶帶血將軍昔守東海東坐  
令海上烟塵空出陣入陣俱無敵此物與爾成  
大功儒生跬步徒齷齪三寸毛錐羞碌碌感君  
脫贈爲君舞青天茫茫白日速海氛未滅爭戰  
多邊城流血愁干戈自昔空談能誤國刀乎刀  
乎奈汝何

送張伯夜客薊遼

長安春柳纔發芽東風習習吹黃沙尊酒臨岐  
黯不語馬蹄蹠蹠隨天涯薊北東行卽遼左客  
裏看山無不可望海樓前潮正平醫閭山下月  
將墮平生俠氣那可羈明珠暗投人共疑勸君  
有酒且當飲誰能局促悲鬚眉袖中短劍昆吾  
鐵醉後指天天欲裂此去應邀邊塞勳莫學張  
儀失意空存舌

寄答陳女大女翔二秀才

薄宦不愜意栖栖憐此身時從薊北望每憶江  
南春江南詞客別來久臨水看山幾回首江館  
荒涼草又新桂花零落苔應厚前日寄我雙鯉



魚開械識得故人書循環吟咀如見面側身東  
望徒欷歔平生落魄悠悠者一逐風塵轉衰謝  
疎狂不受衆人憐懶慢寧遭官長罵岐路由來  
苦陸沉低頭不覺淚沾襟便當歸向東山老山  
中故人知我心

吳門看花行寄社中諸子

春色已如許征途當奈何游吳客越仍未已悵  
望鄉園愁思多吳門二月饒芳草姑蘇臺上看  
花蚤粉黛淒涼月可憐金虎銷殘跡如掃杖藜  
到處卽青山尊酒尋春往復還弔古真悲雲漠  
漠懷人空恨水潺潺懷人弔古幾回首別後風  
流相憶否昔日同聽蕭寺鐘此時獨對閶門柳  
閶門楊柳何青青江水江烟共杳冥我今走馬  
燕臺去君但逢人問客星

儀真道中見桃花盛開感而賦之

偏側復偏側行盡江南又江北二月桃花爛熳  
開燦若朝霞弄春色今年苦雨花較遲江北不  
如江南時但願春風隨轉轂到處花開絆馬足

滕陽嘆

君不見滕陽城外多暴骨蔓草填沙白岑律悲  
風慘淡吹白楊過客不行愁斷腸道旁父老饑  
欲死破帽蕭疎面不洗自言此身已半殘且復  
爲客述艱難前年冰雹秋無麥去年水潦勢尤  
岌公私積貯百不存流移轉徙餘空村賣妻鬻  
子那足惜草根木皮從爾食草木旣盡髓亦枯  
橫屍溝瀆無時無但言溝瀆意亦足猶有饑民  
攫其肉神理荼酷不可知災祥反覆從何來語  
罷悲酸轉蕭瑟我亦徬徨重淒惻回頭四野空  
茫茫立馬西風日將夕

孟嘗君墓下

滕陽城南三尺墳行人云是孟嘗君平生俠氣  
歸何處寂寞荒阡空白雲戰國爭雄志未已縱  
橫策士隨風靡公子門前車騎多三千賓客盡  
珠履珠履翩翩殊可憐高臺曲榭入雲烟出關  
幸不爲秦虜此日終須食客賢雍門一說涕如  
雨富貴繁華那足數當時已懷亡國悲何況於

今一杯土陵谷銷沉知幾回墓前石虎變成灰  
徘徊往事那堪問禾黍西風鳥雀哀

### 黃金臺

君不見黃金臺昔時宮闕今塵埃易水東流去  
不返燕王雄豪安在哉駿骨銷沈易水滸臺上  
黃金化爲土霸圖零落不勝悲千載風流猶可  
睹故鼎西還入薊丘征東將士盡封侯臺前飲  
至天爲動立馬憑陵海氣秋一朝倏見繁華歇  
歌舞荒涼水流咽百萬秦兵動地來血洒高臺  
空嶽薛傷心往事不堪聞禾黍蕭蕭飛白雲試  
問黃金臺下路行人但說樂將軍

汝實汝嚴弟邀飲陳太常池亭泛舟過東  
城待月劇飲至醉同惟和興公賦得長歌  
吾家二仲真好奇今朝醉我芙蓉池池上樓臺  
開錦繡池中水鏡堆琉璃老夫性癖愛丘壑到  
處探奇心卽樂層城返照入澄泉一片清光映  
虛閣平生同調者何人徐氏昆季稱絕倫小榜  
移來成勝會濁醪相對見吾真須臾雲散月東

出風急帆輕行轉疾金光閃鑠玉玲瓏菱葉蘋  
花秋瑟瑟此時風露倏生寒促席移觴坐夜闌  
四面淒清人語絕游魚跳躍落驚湍酒盡徘徊  
不能去扁舟更泊雲深處但愁別去卽風塵明  
日相逢更何許人生百年三萬六千日明月青  
山須共適少壯不樂奈老何願罄餘杯永今夕  
送白仲之海虞

湖上青山愁送客隔岸芙蓉秋水碧片帆西指  
風日晴便歷長江過震澤三年謝病不出門蓬  
蒿塞戶寂無喧一日辭家仗劍出猿鶴驚詫秋  
江昏客路相逢何草草斗酒邀來耐醉倒余今  
甞駐武林城君復遠出吳門道尊前握手淚霏  
霏惆悵山中白板扉爲語虞山舊儔侶秋風還  
送客船歸

登焦山

江頭倏與西風遇一水盈盈不得渡閒來聊作  
焦山遊小榜飄飄豁烟霧焦山宛在水中央萬  
里滄波坐渺茫缺甕逶迤忽西走金鷲崖寧遙

相望日暮鳧鷺散江渚芳草萋萋不知處空翠  
真憐楊柳烟落紅却愛桃花雨焦光洞口白雲  
飛瘞鶴銘荒今是非山水年年祇如此風流摧  
謝令人悲丈夫意氣傾千古那得羈愁哭窮路  
但當對酒復看山不厭江邊十日住

賦得苧羅村送屠田叔轉運便道歸越

若耶溪上春風暖草軟花嬌香不斷芳魂艷質  
擅風流落日孤村苧羅短美人粉黛殊可憐清  
歌妙舞春風前宛轉蛾眉貯金屋越宮吳苑爭  
嬋娟興亡反覆一回首富貴繁華亦何有響屨  
廊荒柳已摧鬪雞陂廢苔應厚使君好古復好  
奇浣紗遺跡君自知但駕扁舟尋范蠡不妨藻  
句弔西施

澗西謠

澗西今年春寒蠶半死綿繭繰成化爲水秋禾  
苦雨田盡荒下戶人家無斗糧一身饑寒猶自  
可縣官催租急如火千里汚邪悲草萊區區改  
折胡爲哉去年改折尚有粟今年租稅何從出

君不見民間逋負歲已多日日鞭笞將奈何

擊鹿行

謝在杭司李有牡鹿喜觸度非樊柵可畜  
者一日余與陳伯孺秀才過在杭則在杭  
擊殺此鹿相與歎血甚驩偶憶李于鱗擊  
鹿行羨其豪致遂各賦一章用嗣前哲

李官官舍冷如水買得蒼鹿龍之子司農使者  
日經過把酒呼盧聊復爾主人醉後忽自放袖  
出短刀不盈咫失去霜毛何處尋逐來捷足應  
難恃奮衣大叫太憑陵左右見者俱披靡平生  
弱肘甘碌碌從傍作勢爲君倚須臾角朽血亦  
崩瓊瑤摧謝珊瑚死使君歎血鬚盡殷陳生瞪  
目驚相視中厨屢薦骨董羹鬻炙脂膏無不美  
老饕大嚼勢轉雄風捲白波差可擬但言飽食  
且捫腹不比尋常僅染指歷下風流今已無竝  
驅中原竟誰是覆蕉夢覺且勿論眼前意氣吾  
與尔

從軍行

丈夫七尺軀不爲毛錐死平生負寸衷耿耿良  
在此不如投筆事戎行身膏草木還輝光束裝  
慷慨出門去腰間短劍凝秋霜居庸城外日色  
惡虜騎成羣夜吹角前麾猶擁漢旌旗別隊先  
馳胡部落陰風白草莽蕭蕭大漠無人夜寂寥  
黃塵眯目馬不發哀鳴一聲魂已銷君不見無  
定河邊多白骨云是當年戰亡卒野曠狐狸聽  
斷冰夜深燐火飛殘月丈夫去國事長征戰勝  
寧須論百城砍頭陷胸何足道要令千載垂芳  
聲但言生不封侯死卽朽財後金印大如斗寄  
語繁華遊俠兒莫笑區區牛馬走

放艇

淮徐以北皆逆流灘高水澀羈人愁南旺閘頭  
放孤艇錦颿西指風颼颼舟中兀坐差快意斗  
酒百錢不論費推蓬但遇北來人爲問長安何  
日至

湖陽謁韓昌黎祠

君不見昌黎伯老作湖陽一遷客危言籲天天

不回萬里風沙憐遠謫何物鱷魚敢跳梁咲投  
短檝波低昂一夜隨風竟西徙魍魎魍魎爲深  
藏古來奇事無不有勝蹟悠悠在人口乃信文  
章格異類不忝聲華齊北斗荒祠寂寂大江湄  
前輩風流良在茲韓山千古名不滅來者但看  
潮陽碑

送徐七下第還山

南宮上書不見收長安旅食生煩憂牀頭短劍  
失光彩浪言詞賦垂千秋一片寒氊消不得出

早覺乾坤窄英雄致身會有時莫向青山嗟  
落魄

登高丘望遠海送君密之北平

登高丘望遠海滄溟萬里縈如帶狂來破浪踏  
長風白眼看人真慷慨使君年紀三十強平生  
說劍鬚眉張卽今轉餉盧龍道銀魚錦綬爭輝  
光薊北軍儲急遼左征東客兵袖手坐使君握  
算且籌邊屈指今年賊當破潞河九月天雨霜  
蓼花開盡菊花黃三唱陽關一回首持杯相視



愁中腸征馬長鳴朔風起碣石宮前空舊址霸  
圖消歇那可尋秋月年年照灤水

玉主行

并序

玉融林玄江少年游燕日醉長安曲中求  
得劉姬鳳娘者傾貲買之無何死林念之  
甚則爲玉主祀之繫懷袖間并刻所製斷  
腸詞於陰詞甚悲愴久之林客蒼梧遇盜  
殺而投之江盡掠其行李則玉主在焉梧  
州李林君與山人舊相識稔知其平生一

夕夢麗人泣且訴若有冤者越明日而偵  
卒以盜告則故郡隸也其人素兇悍每出  
輒十餘日不歸人以此疑之然絕無所得  
踪跡搜其家乃獲所爲玉主者林君詫曰  
此吾鄉人某物女何從劫之盜駭服惶遽  
咋舌死捕其黨與始悉其狀蓋沉之江者  
月餘矣檢出顏色勃勃如生腦後中一弁  
林君遂盡付羣盜於理縉紳聞其事以爲  
奇葉宗伯爲玉主傳而郭太史作長篇歌

之俱行於世

林君少小負奇氣二十結客學文字長安遍謁  
諸賢豪小語纏纏各有致有時走馬入平康平  
康美人號鳳娘相逢相暱無此客願持箕箒侍  
君房俠烈相期豈瑣瑣芳心一寸烟如火便將  
白壁售娉婷何惜明珠買婀娜美人嬌媚墜風  
流紫陌香奩不解愁春風暖抱鴛鴦帳明月光  
窺翡翠樓世間萬事有翻覆玉缺珠沉一何速  
自埋匣鏡不迴光旣斷琴絃那再續旅泊淒涼

舞衣羅幃風動是邪非始信佳人難再得幾  
番夢裏空歔歔賦罷招魂魂不返腸斷鉛華日  
應遠聊將良璞刻芳名比作茗華勒琰琬餘哀  
寫出斷腸詞併入瓊瑤寄所思決絕難銷千載  
恨連綿更訂九泉期生死提携不相離五色絲  
縑勤繫臂身隨南北復東西卧卽同床行並轡  
無端忽作蒼梧行瘴江瘴草愁孤征何物舟師  
太無賴綠林暴客誰知名砍頭陷胷意何酷擲  
向深潭飽魚腹并將玉主爲珍藏新鬼含冤舊

鬼哭蒼梧李官方少年與君鄉曲習君賢夜夢  
美人拜且泣醒來惱縮心忙然便令處處尋踪  
跡玉主光芒射四壁破壁如聞叱咤聲捧出人  
人皆動色使君一見心生悲吁嗟此物從何來  
疇昔之夢真有以滿堂撼撼陰風吹賊也聞言  
咋舌死快意當前寧有此盡縛餘黨察根因腐  
肉由來付湘水湘水浮來七尺軀依然面孔血  
模糊使君撫尸三嘆息羣盜一一伏其辜憶昔  
從君接杯酒醉後諧謔無不有知君俠氣永不  
磨知君俠骨終難朽異哉玉主能報讐不妨聲  
價重青樓區區千金豈足較平生恩怨爲君酬  
將發潞河得家兄消息

潞河三月冰初泮客子瀕行鄉思亂吾兄結束  
欲出門約定今春來相看萍踪反覆那定居薊  
北滇南萬里餘客路花開空有淚故園鴈到竟  
無書兄弟衰年頭各自白塵世何能長作客君去  
但耕南畝田吾行已辦東山屐

舟中阻風戲柬能始

黃河四月南風惡落日飛沙向人撲經旬經晝  
未肯休吹斷孤蓬不得泊鄰舟仙郎樂事多欹  
頭側弁長酣歌帳中少婦相愛語但聽箜篌無  
渡河

河上行

黃河水淺不盈尺官府樓船密如織商舶望風  
爭引避伐鼓鏜鏜皆動色牽纜驛夫疲且餓十  
箇完衣無一箇白頭老叟噤不言日日河干倚  
門坐

濟北謠

黃流不斷僅如綫濟北閘乾水門淺何方官府  
駕樓船丈八梁頭蔽江面百夫力拽未肯前飽  
載何論萬萬千兩岍唾罵都不顧主人但問坐  
艖錢

廣陵別曹能始

楊子江頭潮水急楊花點點隨流濕日暮東風  
吹客舟日斷雲帆空佇立與君三載客長安共  
守閒曹耐歲寒北闕聽雞喧待漏西山立馬咲

彈冠移官政得倉曹長潞水池亭佳可賞濁酒  
頻呼氣益豪新詩分賦神逾王人生聚散信有  
因造物由來亦忌人建業三山天外路昆明萬  
里夢中身出門已是花時節河畔柔條豈堪折  
畫舫遙看隔月行單車祗作經旬別余時奔命  
入平原平原水涸風塵昏狹路相逢重握手長  
途乍見各銷魂平生意氣元同調經行古蹟俱  
堪弔風雨朝登太白樓荆榛夜叩留侯廟戲馬  
臺空落日橫邗溝草冷水無聲掉頭時發廣武  
嘆嗟哉豎子擅其名蕃釐觀裏瓊花死隋帝行  
宮何處是二十四橋月色新風流佳麗應如此  
南來計程亦已多驚心無奈別離何踉蹌杯酒  
不盡意却恨舟行容易過但說南遷無不可日  
日看山捫虱坐桃葉桃花忽憶君碧雞金馬終  
憐我還家幸及荔枝秋鄉里聊從俠少游君若  
題詩相問訊石頭早覓致書郵

壽連江錢尹

神仙壑宅無不有碧山西去盤龍走連江却聳

香鑪峰大海茫茫扼其口錢君本是青雲姿早  
向峰頭拾紫芝榻來閩海稱仙令文藻風流亦  
我師不嫌一邑大如斗且自狂吟獨搔首有時  
閉閣坐鳴琴無事看山長對酒閩南七月天氣  
清金風瑟瑟吹江城士女香花爭獻壽爲君稽  
首祝長生人人喜說神明宰里巷歌謠應可採  
但言鳧舄雙飛况有斑衣衣五彩才子分明  
嶽降神功名福履亦前因年年海上開秋日記  
取人間稱壽辰

桃源洞

亂山重叠芳草路山下流泉色如乳道旁古碑  
半模糊行人指點避秦處當時避秦居此山桃  
花開落自閑閑白雲不比人間世寧許漁郎往  
復還洞天勝地何不有邂逅相逢亦非偶莫疑  
踪跡有邪無花開一問山中叟

遊雲津洞

西南洞壑三十六名山往往隸仙籙雲津古洞  
稱最奇銀峰瑤島紛相屬熒熒石乳斷復連盤

拏綽約浮青烟玉笋亭亭作人立玲瓏詰曲皆  
中穿寬者若廣野窄者如斗門列炬照之不測  
頂緣厓捫壁愁攀援初疑鬼斧鑿定匪人工作  
縹緲真同麟鳳洲微茫宛在蓬萊閣瀟瀟溪流  
清且寒四時不漲亦不乾昏黑不知深幾許但  
聞時有蛟龍蟠編竹爲橋危可渡嵐翠淋漓濕  
如雨灘聲喧作萬壑雷水氣蒸爲九里霧平生  
眼境無此奇黔中碧雲差似之踞地大叫嘆殊  
絕披羅歷覽真忘疲乃知僊源去人自不遠採

藥尋真計非晚試繫漁舟溪水頭花開倘有胡  
麻飯

垂柳篇和楊用脩太史

真蹟在楚雄  
捨資驛樓

滇南二月春風暖處處濃陰青不斷長條拂水  
雨新晴短葉籠烟日始旦萬縷千絲繞岼齊飛  
花飛絮盡橋西雲來掩藹章臺路月落淒迷灞  
澹堤章臺灞澹風光好燕語鶯啼惜春老無奈  
閨人怨別離更令戍客傷懷抱成都才子玉堂  
仙萬里投荒年復年馬上逢春多感慨酒邊對

景倍留連韻華倏忽不相待回首風流六十載  
惟有春光似昔時楚雄山下烟如黛

春暮下關道中望點蒼積雪

點蒼亭亭幾千尺十二雲屏插天碧孤峰烟霧  
晝不開三月春風雪猶積瓊瑤璀璨琪花寒縹  
緲神山白玉闌頗恠叢林鳥雀寂更聞陰洞虬  
龍蟠可憐風塵奔走汗流雨真凡隔絕何可數  
西域雪山無處無請君一望蒼山岨

點蒼石歌

點蒼山頭日吐雲紫光白氣長氤氳却產奇石  
作屏障終朝開採徒紛紛頻年貢入長安道濃  
淡之間山色好君王便作畫圖看豈識閭閻劓  
肝腦朝鑿暮解苦不休詔書昨下仍苛求前運  
後運相結束道旁嘆息聲啾啾耳目之玩豈少  
此十夫共役九夫死從來尤物是禍胎吁嗟乎  
當年作俑者誰子

登雞足山絕頂

葉榆水從山脚流點蒼雞足俱神丘東西對峙



爭奇絕翩翩靈蹟垂千秋我聞雞足之山元淨  
土迦葉授衣卽其處禪宗正印信難求釋氏遺  
踪或可覩相傳八月佛放光輪困五色還非常  
琳宮紺宇不知數浮圖寶刹凌蒼蒼我來登覽  
多所歷烟霧冥冥恍相失披逕先尋兜率菴門  
蘿再叩袈裟石袈裟化去石空存世間塵劫寧  
具論爲問頑石寂無語爲問老僧笑不言罡風  
吹雲雨如注糊絲梯滑不可度大悲閣在山之  
巔下視羣峰互吞吐須臾雨散雲亦開指點遙

山青翠來麗江雪嶺白照眼茫茫海水浮銀杯  
捨身崖前多虎跡仙碁石上草花碧拜佛岩懸  
千仞岡曹溪泉冷成丹液雨後山泉瀾復漫天  
風冷冷吹鬢寒趣合不知沾濕苦神來且復窮  
躋攀華首門扃亦已久昔時衣鉢今何有洞天  
寂寂雲四封層巒半壁苔衣厚俯瞰下方亦可  
憐幻成百里兜羅綿我心一作空明想便如鉢  
裏開青蓮聞見如來非色相眼底何須說真妄  
佛地機關只自知靄山面目聊堪狀信宿山中

俗慮清欲從此地學無生不然解帶還山去身  
騎赤龍朝玉京

同漆兵憲再登雞足山絕頂

君不見豫章漆使君長齋禮佛兼好文又不見  
閩南老學究到處尋山更耽酒相逢同作逍遙  
游把臂高歌共唱酬萍踪遇合信偶爾要令萬  
古垂風流昨日山頭風雨黑今日山頭海雲白  
振衣再上徂孫梯銀河滉漾光相射知君元是  
宰官身得度應須佛地人便向如來叩真偈何  
須苦海嘆迷津

賦得昆明池送薛觀察入 覲便道還里

君不見昆明池水白浸天茫茫萬頃浮秋烟  
蜿蜒連亘五百里驚濤噴浪華山前九月西風吹  
客鬢黃花兩岼嬌相映錦帆開處雲亂飄日落  
千峰天欲暝使君雙劍飛向東楚天白露寒青  
楓還家暫醉平原酒赴闕猶疑鮑氏驄與君偶  
作南蠻客天涯吏隱同于役官舍花開羅綺春  
侯門月冷糴稊夕文酒邀懽曾幾時等閒別去

又成悲山連貴竹猿聲苦木落衡陽鴈影稀鄉  
心一片隨君發夢裡關山幾超忽莫言無處寄  
相思回首昆明千里月

寄壽四叔隱君

阿翁本自悠悠者築室溪頭興瀟灑每尋田叟  
問漁樵時向園丁課乘柘花鳥真憐谷口春烟  
雲還憶山中夜已知老去罷逢迎况是年來畢  
婚嫁秋風八月新酒香庭階蘭桂紛相藉賤子  
天涯記壽辰一杯遙祝田間社翁但飲酒聽我  
歌百歲從容聊玩化卽今解帶且辭榮東山舊  
宅長堪借兩溪光景歲如新日日從君醉鄉也  
何須更羨竹林遊竹林只在鳳丘下

澂江署中遲黃憲副不至

去歲花時送君別愁人杜宇啼紅血今年稅駕  
又秋風酒罈寂寞河山隔久客羈栖兀一身與  
君鄉里心相親邀懽幾醉平池月選勝偏尋野  
寺春澂江江水渾如酒雨裏黃花君憶否望斷  
碧雲期不來謾向青山獨搔首

元夕馳入普安漏下二十刻寒甚戲作却  
寄南中諸公

竟日馳來月正午佳辰况復逢三五窮邊不見  
夜燒燈破屋如聞朝打鼓去年此夕醉瓊筵烟  
火魚龍咽管絃今年此夕逐長路霜風蕭瑟吹  
華顛寂寞繁華何足較飛鴻雪爪誰能料人生  
踪跡豈有常那得長逢開口笑別去經時物色  
新天涯芳草淚沾巾遙知列帳還高會對酒能  
無思遠人

曉岳陽樓

江上凝寒風色惡驚濤噴雪人蕭索孤帆信宿  
不得前目斷愁雲掛高閣洞庭空濶浮君山烟  
樹周遭十二鬟銀盤捧出青螺小信有福地非  
人間須臾雨散衣裳冷飛翠濛茸天欲暝斗酒  
猶堪破寂寥醉中疑作瀟湘景此景由來天下  
奇憑闌何處弔湘姬扁舟且繫江樓下明日重  
尋汗漫期

聞鶯曲

楚江新柳綠如染三月花飛春在萼芳林處處  
語流鶯籠烟罩日晴光艷日出烟銷暮復朝青  
樓紫陌景初調凌晨霧裡音猶澀停午風前韻  
轉嬌嬌啼宛轉聲聲好憐春強半爲春惱思婦  
心傷隴水邊行人腸斷關山道却憶鄉園春暮  
時小堤流水柳搖絲千聲坐對春風軟百轉驚  
看春日遲而今老作瀟湘客客路逢春更蕭瑟  
潦倒詎堪醉一尊風塵何處尋雙屐春去春來  
草又青鶯聲漸老柳漂零不知馬上流連處何

似山中自在聽

石門篇壽楊太君

石門之山何巖從亭亭壁立搖天風秀色蒼茫  
晚逾碧霞光閃鑠晴相射人傑由來借地霧卽  
看閨閣亦寧馨母也春秋八十幾苦節剛腸真  
可紀生兒雋朗比球瑯茂宰風流况帝鄉板輿  
出入隨休暇玉樹芬芳階之下花誥何當答母  
勞錦裳雲帔爲君褒阿母清名足千古石門未

奠西江滸

送胡仲脩歸西湖

西湖霜冷芙蓉老十二橋頭怨秋草  
越客經年逐楚游夢魂却憶孤山道  
孤山人去湖水清桃花處處圍荒塋  
暗香踈影應如昨千古猶高處士名  
南國諸王誰好客中涓不納齊門瑟  
先生偃蹇空自憐凌厲詞場更何益  
商風送女木蘭舟歸臥何妨且一丘  
探囊莫道無餘物還有來時舊蒯緱

贈林二雋卿

江頭楊柳搖新綠荏苒春光去何速  
故人千里忽相過僕馬蕭條塵滿目  
屈指論交幾十年憑陵意氣在樽前  
朱絃獨奏無知己白眼從來不受憐  
暫解君鞍勸君酒浮雲於我夫何有  
酣呼且盡平生歡少小襟懷君憶否  
世路悠悠去莫疑升沉變態亦難期  
君不見豐城雙劍光不滅飛躍延津自有時

西樓全集卷二終

國家圖書館, NATIONAL CENTRAL LIBRARY, TAIWAN, R.O.C.



西樓全集目錄卷二

五言律詩

仙陽道中贈徐老

眺觀音閣小憇僧房

河間渡

立秋日憇龍岡庵二首

初過陳振狂山亭二首

石嵩廢寺

北征



河上別家兄

劍浦舟中

漁梁曉發

丹陽別鄭女孚

景州道中

送李廷燁令東莞

送鄭女孚廣文之同安

送林允卿廣文之清源

三河贈王明府

奉使至山海關

孤竹謁夷齊廟

過兗州 魯王殿下賜醴

九日遊金山寺二首

同年楊仲堅邀遊西湖

武夷山

謝陳令君

寧夏聞捷

懷陳子翼二首

寄懷謝在杭二首

春暮過熙吉雲窩二首

送陳士文之餘干二首

題林熙工芥子庵二首

四月三日飲元徽宅

得子翼消息

山中

山中有懷

彭龍圖墓下作

女實弟夜坐

五日感懷

擬送僧歸日本

病僧

過鄭吏部繼之墓二首

夏日集烏石別墅

晚泊七里灘

咄咄

病

蚤秋雜興十首

送茅平仲還京口

遼陽虜警二首

九龍池

送彭興祖之晉陽

喜陳幼孺孝廉至二首

送方秀才南還

憇靈隱寺

武林贈黃白仲

語溪道人

由拳別李子璞孝廉二首

入吳

吳江見月

西樓全集目錄卷三終

西樓全集卷三

閩中鄧原岳汝高著  
門人韓日纘緒仲訂

仲子慶霖編次

五言律詩

仙陽道中贈徐老

風雨仙陽道停車問隱淪  
黃金窮結客白髮老看人  
余亦栖栖者漂零愧此身  
旅愁渾欲破杯酒見情真

眺觀音閣小憇僧房

佛閣倚江濤僧房花木深忽參端妙相遂證菩提心鉢水澹雲影松風帶梵音蕭然羈旅客聊此滌塵襟

河間渡

歲晚交河渡孤舟白日寒風吹鴻鴈怯霜壓荻蘆殘短劍從人去綈袍愁路難停橈問行客幾日到長安

立秋日憇龍岡庵二首

客棹逢秋日言尋江上山西風下梧葉商意滿松關塔影千峰斷蟬聲一逕閒彌深塵外想杖履幾來還

其二

絕壑精廬秀空壇落葉稀曉烟迷鳥道秋水照漁磯野客探奇至山僧乞食歸西風莽蕭瑟天際片帆飛

初過陳振狂山亭二首

共詫幽棲處探奇客到曾蕭然青草舍疑在白

雲層踪跡已堪妬浮沉未可憑重來應不厭儻  
有酒如澆

其二

十載憐才子平生阻笑言玄成人載酒賦罷客  
過門歲月還三徑風烟自一村從來真隱者老  
不厭丘園

石嵩廢寺

古寺荒涼甚傷心落照前佛龕留鼠迹僧舍斷  
人烟色相總成幻桑田殊可憐只餘洗鉢水相

對亦泠然

北征

驪歌催上道襆被去長安鄉思憑誰說浮生祇  
自看櫓聲深夜寂月色大江寒抱璞已三獻其  
如行路難

江上別家兄

正是銷魂地秋聲愴客途解維猶佇立握手且  
須臾雨散千帆暮風吹一鴈孤今宵酒醒處鄉  
夢亦模糊

劍浦舟中

南浦經行處風烟正暮秋魚腥溪口市燈火水  
邊樓黃葉翻飛急青山相對愁腰間有龍劍莫  
向夜深遊

漁梁曉發

搖落已如此翻爲萬里行風霜驚歲晏車馬憶  
晨征人語遙堪辨灘聲時暗鳴功名是何物辛  
苦二毛生

丹陽別鄭女孀

同作遠遊客相看幾月程如何孤與發翻向白  
門行石屋連鐘寺花臺近冶城奚囊將斗酒暇  
日遍題名

景州道中

寒色黯高原關山非故園人家蘆作屋驛路柳  
爲垣草白霜風苦沙黃凍日昏漂零愧書劍馬  
足信乾坤

送李廷燁令東莞

羨爾滄洲宰單車到海涯卽看娛彩服聊得問

丹砂秋老三江鴈潮平八月槎應過大庾嶺珍  
重寄梅花

送鄭女孚廣文之同安

風流如嗣輔家世卽康成故國傳經去南天捧  
檄行星文隨劍氣秋色駐江聲處處干戈滿淒  
其別思盈

送林允卿廣文之清源

薊門殘柳色送女去傳經寒月臨關塞秋風度  
井陘地疑三晉僻山有五臺青別後相思處愁  
雲日夜停

三河贈王明府

遼陽策馬去八月渡三河忽遇神明宰應憐勞  
者歌風霜初折柳西北正提戈處處憂戎馬相  
看涕淚多

奉使至山海關

被命古榆關秋風草漸斑黃金出塞去白馬度  
遼還漢障乾坤外秦城榛莽間羽書日報警翻  
使劇愁顏



孤竹謁夷齊廟

落日野城邊停驂弔昔賢西山一抔土千載薄  
雲天灤水浮寒月橫林起暮烟采薇人已遠懷  
古更潜然

過兗州 魯王殿下賜醴

單車東入魯朱邸此時開中使傳書到賢王賜  
醴來淮南原好客梁苑亦憐才頗愧君侯意甌  
生不姓枚

九日遊金山二首

正值登高日扁舟江上來金山一以眺黃菊幾  
花開北固晴當戶西風暮舉杯秋懷更蕭瑟倚  
杖獨徘徊

其二

江山兩奇絕形勝壓中原塔影東西映濤聲日  
夜喧秋風吹客夢柳色斷鄉魂去歲重陽日黃  
花別故園

同年楊仲堅邀遊西湖

山翠與湖光蕭蕭送客航雲連三竺白柳拂六

橋黃暝色催移棹涼風趁舉觴明朝解携去烟  
水浩茫茫

武夷山

東南形勝地俯仰見茲山窟宅奇如此仙霧杳  
不還草荒丹竈冷雲散幔亭閒此日風塵客酣  
歌且破顏

謝陳令君

借爾雙鳧舄緘書報武夷曾孫重到日玉女卷  
衣時水涸溪流澀山深木落遲題詩貽茂宰吏

隱亦相宜

寧夏聞捷

西事羈危久還聞轉浙兵忽看傳短檄已自斬  
長鯨野日荒猶慘河流咽未平軍中浪驚喜差  
慰 廟堂情

懷陳子翼二首

雨雪下高齋蕭然寄遠懷別離傷此日忼慨惜  
吾儕短褐曾依楚扁舟且渡淮鄰霄臺下寺猶  
記舊磨崖

其二

流落天難問窮愁客互嘲狂將短劍舞醉把唾  
壺敲塞北音書斷江南羽檄交平生負奇氣寧  
肯老衡茅

寄懷謝在杭二首

岳上一爲別離情今若何孤齋春草滿四望白  
雲多澤國猶徵稅邊方未息戈乾坤數行淚灑  
向太湖波

其二

少年行作郡白眼傲公卿句就時人寫文成老  
吏驚草荒松雪宅雲接闔閭城湖上雙鴻起殷  
勤一寄聲

春暮過熙吉雲窩二首

蕭然春復暮短策叩雲窩掃逕花從落焚香客  
任過山深嵐翠重天暝竹烟多少小歡娛地于  
今髣已皤

其二

結廬人境外歲月且婆娑江水春來碧山光雨

後和鳴琴花欲舞對酒鳥能歌每擬高人傳應  
憐大小何

送陳士文之餘干二首

惜別鳳凰城春風又送行官如秦博士業是漢  
諸生祿薄堪將母齋閒好聽鶯明時終抱璞看  
爾獨蜚聲

其二

當年偕計士薄劣愧同升握手懷高宴論交得  
舊朋石虹晴雪落彭澤曉雲蒸去去勞相憶何  
當問寢興

題林熙工芥子庵二首

開士幽居處心清地自偏焚香時佞佛打坐卽  
安禪旛影搖寒月鐘聲破暝烟世緣都不染長  
此奉金仙

其二

一逕蘿陰密孤亭花氣連圓通疑佛土寂靜見  
人天厨冷還燒菜澗幽合種蓮平生何處士不  
作小乘禪

四月三日飲元微宅

勝日開詩社芳樽對酒人鶯新纔入夏柳暗已  
無春細雨涼書幌流雲淨角巾狂來還縱飲潦  
倒見吾真

得子翼消息

得女京華信潸然涕淚餘病多惟有骨髮短不  
曾梳世事看雙劍交情斷尺書蒯緱應好在何  
處曳長裾

山中

宴坐不覺暝栖栖獨此亭遙憐千嶂月恰對一  
池星竹徑螢光白松林鬼火青郊居聊養拙不  
是愛沉冥

山中有懷

颯颯風吹竹淒淒月在松閉門無一事對榻有  
千峯野火明樵逕泉聲響夜春悠然會心處但  
少求羊蹤

彭龍圖墓下作

前輩風流在荒陵此日過淒涼還石馬荆棘有

銅駝青史已零落白雲將奈何愁看三尺土不  
忍聽樵歌

女實弟夜坐

虛亭分暝色短榻綴晴烟從弟吾家雋蕭蕭池  
草篇虫聲靜四壁鴈影斷遙天夜半看牛斗明  
河若箇邊

五日感懷

五絲逢令節獨酌酒壚邊簫鼓還今日風光憶  
去年繁花嬌帶雨遠樹淨含烟身世傷蓬轉生

涯空自憐

擬送僧歸日本

隨緣元不染乞食且東歸指日浮杯渡凌空卓  
錫飛毒龍馴淨鉢駭浪濕僧衣禪誦知何處天  
涯相見稀

病僧

一室塵埃滿孑然空病空愁眉猶帶雪破衲不  
禁風抱被枯蟬似休糧瘦鶴同由來斷思想只  
識主人翁

過鄭吏部繼之墓二首

繫馬梅亭下懷賢落日邊  
蘭摧仍此地鶴化是何年  
草已沒殘碣雲還迷舊阡  
臨風一掬淚感激向重泉

其二

吾憐鄭吏部慷慨說時艱  
一日看長夜千秋識此山  
詩名杜老後書法晉人間  
寂莫西州路悲風損客顏

夏日集烏石別墅

炎敲不可耐載酒問花源  
少憇青蓮宇如行金谷園  
山光隨杳靄雨氣異朝昏  
藉草聊同醉相看無一言

晚泊七里灘

扁舟依落日山色赴空灘  
秋水峽中淨晚潮江上寒  
微茫漁火動昏黑鴈聲殘  
雲黯嚴陵廟蕭條過客看

咄咄

咄咄悲雙鬢栖栖愧此身  
風塵長作客食息竟

隨人歲月窮炊桂功名老積薪故園書不到鴈  
去更傷神

病

旅食仍多病愁心寄遠天閉門聊謝客伏枕忽  
聞蟬屋角殘雲起城頭落日懸東山舊朋好消  
息向誰傳

早秋雜興十首

客思方蕭瑟蹉跎又早秋涼生虛榻冷暑退小  
堂幽白苧思南國黃雲望薊丘著書吾豈敢迹

或類窮愁

其二

燕京異氣候七月忽長陰風急蒼烟斷天高白  
日沉登樓愁戍鼓束髮愧朝簪汨汨傷蓬轉懷  
思空滯淫

其三

故國東山下人今萬里餘烟塵銷客鬢風雨憶  
吾廬北地寒應早南天信太踈平生甘寂莫養  
拙意何如



其四

客裏厭逢秋，秋風客倦遊。  
雨兼殘日下，月帶斷雲流。  
落葉催歸鴈，清霜澹戍樓。  
寒砧中夜發，偏動漢宮愁。

其五

一官仍計部，八口且長安。  
握筭吾才拙，持衡末路難。  
寄情滄海上，搔首五雲端。  
菊蕊寒相惱，淒淒白露漙。

其六

移居憑古寺，一室謝人羣。  
塔影褰帷見，鐘聲隔院聞。  
虛亭迴夕照，短榻卧秋雲。  
頗愧何居士，長齋不茹葷。

其七

肯顧尚書期，塵纓黯自疑。  
尋僧時問偈，對客或談詩。  
拓落身堪老，栖遲鬢欲絲。  
城南楊柳色，衰颯不堪吹。

其八

國是紛紜甚，朝紳放逐頻。  
上書還此日，傳旨竟

何人黜陟緣 明主安危托大臣  
杞憂徒自切 騎馬且風塵

其九

島夷還據險 大老更臨戎  
闕外無功伐 朝端有異同  
旌麾連海曲 芻粟急遼東  
拊劍空悲切 邊塵起朔風

其十

見說閩中郡 窮民忽揭竿  
且聞鋤亂首 稍已弭兵端  
村鼓時時急 山城處處殘  
故園歸未得 吟

罷獨憑闌

送茅平仲還京口

長安携手罷短劍 傍天涯  
殺氣方摧柳 秋風忽憶家  
殘雲京口樹 細雨廣陵槎  
想到鄉園日 猶堪醉菊花

遼陽虜警二首

如何肘腋郡 歲歲苦刀兵  
大帥徒分閫 書生浪請纓  
金鉦喧列障 鐵騎躡孤城  
瀚海留遺蹟 惟傳漢將名

其二

如聞胡騎動更覺虜塵高東海方流血遼城已  
不毛殘兵疑草木瘦馬畏腥臊肉食真無補端  
居愧佩刀

九龍池

滄池依福地聖水出神臯珠瀑分流遠丹崖入  
望高風來疑散綺月映欲生濤爲問昆明宴何  
人奪錦袍

送彭興祖之晉陽

北地霜風蚤關門落葉稠故人從此去遠道不  
勝愁匹馬岢嵐暮殘雲石室秋明珠須愛惜取  
次莫輕投

喜陳幼孺孝廉至二首

得女鄉關信栖栖病可憐如何冒霜雪况乃涉  
山川小坐同今夕離筵憶去年燈前疑夢寐喜  
極更潸然

其二

萬里風塵客他鄉骨肉親病傳消息惡愁益鬢

毛新坐久寒生夜庭空雪照人且沽燕市酒一  
醉 帝城春

送方秀才南還

作客不稱意歸途方早春關山愁遠道風雪送  
行人世態窮交變天涯舊業貧平生憐俠骨慷  
慨欲沾巾

憇靈隱寺

寶地烟霞古珠林日月開龍宮何透邈鷲嶺忽  
飛來野曠鐘聲杳潭空樹影迴冷泉亭下路遙

憶白公才

武林贈黃白仲

削跡西湖上幽居絕世喧經時惟伏枕一月不  
開門避地家仍破爲園道益尊平生耽寂寞相  
對更何言

語溪道中

草色行看盡客途真可憐扁舟還水國平野卽  
桑田柳葉衝寒放桃花弄日妍春光原自好恨  
只隔山川

由拳別李子璞孝廉二首

三載不相見漂零直至今胥山同此夕危堞起  
層陰春漲河流合天寒柳色深所嗟容易別徒  
有淚沾襟

其二

八口移家遠他鄉寄食難濁醪時自醉長鋏向  
誰彈芳草愁中盡青山病後看離亭一分手烟  
水更漫漫

入吳

舟楫春浮越江山晚入吳微雲依遠樹落日下  
平蕪歲月非吾土風流是此都明朝應倚棹携  
酒上姑蘇

吳江見月

客路幾千里茲宵月可憐關山書信杳湖海旅  
愁牽影入江流遠光添露氣妍長途殊未已目  
斷薊門烟

西樓全集卷三終

國家圖書館, NATIONAL CENTRAL LIBRARY, TAIWAN, R.O.C.



西樓全集目錄卷四

五言律詩

出塞曲四首

將趣弓高聞守者  
裁抑過客行旅相戒不  
敢道景州乃買舟從安德水驛北渡戲  
成一首

懷家兄

懷葉進卿太史二首

明妃怨

銅雀臺

折楊柳

采蓮曲

擣衣曲

入燕

連窩夜泊

渡江

舟夜與玉生小飲

流河阻風

中秋無月獨宿廣信署中

寄女賓從兄

初冬同徐興公憇龍井二首

平湖舟中阻雪二首

眺嘉善縣城城故 先大夫爲植形勝壯

於他邑翔於嘉靖三十四年

春日飲屠園四首

甘露寺四首

小桃源



失硯

漂母祠

濟上

太白酒樓

丙申初度安德舟中二首

送宋民部暫還東平

賦得紅藥當塔翻

送潘進士之濟南廣文

送艾兵憲請告歸陳留

過彭城聞曹能始至不及面悵然寄懷

惠州白鶴新居謁蘇長公祠二首

楊彥履太史楊師雨計部景爾涵舍人王

嘉甫大行同集善果寺餞別沈君仁太

守二首

壽潘山人

毛中丞墓祠在天池山上

送曹能始遊盤山二首

送曹能始調留都二首

別陳寄之

彭興祖從吳門拏小舟追送至武林賦別  
一首

贈倪山人

贈八叔隱君

中秋寧鄉署中

華嚴洞二首

喜女實二弟至

澂江立春

人日雨

新霽同諸公遊松花壩小菴二首

張憲副邀飲點蒼山二首

張憲副餞別三塔寺

移酌禮斗臺

高堯吊楊用脩太史二首

邀孟僉憲遊金蟬菴二首

憇夕佳閣

鎮遠道中

讀王給事壁間作寄懷

安鄉道中二首

送尤秀才

送用吉還閩

送九兄

荅朱季則胡仲脩朱爾實見懷之作三首

西樓全集目錄卷四終

西樓全集卷四

閩中鄧原岳汝高著

門人韓日績緒仲訂

仲子慶霖編次

五言律詩

出塞曲四首

羽書秋報警萬騎出居延列帳朝吹角移營夜  
控弦鴈聲沙積月馬色柳營烟怪得前烽黑單  
于已近邊

其二

孤軍猶轉鬪千里赴師期  
立馬胡塵暗磨刀隴  
水悲腥風吹虎帳朔雪壓龍旗  
却笑漢飛將無功緣數奇

其三

塞外風霜苦軍前草木愁  
啣枚因渡險選騎爲防秋  
轉戰黑山北橫行青海頭  
平生懷壯志原不取封侯

其四

束髮事戎行威名重朔方  
騎將大宛馬縛取鹿蠡王  
日落烽烟黑天低戰血黃  
歸來報天子併上萬年觴

將趣弓高聞守者裁抑過客行  
旅相戒不敢道景州乃買舟從  
安德水驛北渡戲成一首

末路難如此浮生轉自悲  
出門真有礙策馬竟何之  
雲暗聊城道風吹濟水湄  
所嗟漂泊久鼓柁更遲疑

懷家兄

一別忽三月春風花又殘  
薊門歸夢斷閩海寄書難  
旅病日看劇羈魂未卽安  
相思淚已盡何處問加餐

懷葉進卿太史二首

武林分手後一騎各天涯  
但見題名處還疑對酒時  
天高雙闕迥風急片帆遲  
折盡河干柳憑誰寄所思

其二

石渠方授簡東壁正需才  
館閣文章貴周南太史來  
傳經依虎觀載筆入蘭臺  
獨有迷津客風塵首重回

明妃怨

玉顏翻引妬金屋已無緣  
忽見胡塵起猶驚漢月懸  
塞雲愁漠漠隴水去濺濺  
馬上琵琶絕何由續斷絃

銅雀臺

羅衣今寂寞總帳委塵埃  
陵寢空相望君王不

復來雲寒依別殿月冷鎖荒臺玉貌朝朝落淒涼遺令開

折楊柳

榆關人不返折柳寄相思恨別三千里緘愁一兩枝春歸懷遠道鴈去悵佳期莫待花如霰漂零君始知

采蓮曲

芳心那可問閨思不勝愁欲採芙蓉寄清江碧水流丹葩明桂檝綠葉漾蘭舟只恐花零落淒

涼易及秋

擣衣曲

惆悵經年別沙場未解兵衣裳難寄遠砧杵若爲情響逐鳴蛩絕愁隨落葉并可憐今夜月偏照海西營

入燕

北上風霜苦南來歲月多三春變楊柳一葉渡滹沱客况驚蓬斷年華倚劔過長安何處望對酒不成歌

連窩夜泊

帆檣依獨夜昏黑泊空村市遠稀聞漏年荒早  
閉門風塵愁失路燈火黯銷魂浪跡那堪問壯  
心空自存

渡江

作客日已遠渡江春欲殘濤聲高枕過山色掛  
帆看風急魚龍舞天低楊柳寒雲山從此隔回  
首更漫漫

舟夜與玉生小飲

解纜春潮滿開尊野興多櫓聲隨月去鴈影帶  
雲過水白天疑曙江空風欲波客途渾倚醉听  
幘聽吳歌

流河阻風

客思正無賴流河日夕風柳迷津路合雲散驛  
樓空鼓角心堪折關山信不通平生蕭瑟意半  
是道途中

中秋無月獨宿廣信署中

旅泊家何有秋空月未明蕭然騎馬客一憇信

州城遠道游堪倦中宵夢屢驚無能對佳節潦  
倒愧吾生

寄汝賓從兄

一經甘自老八口竟難支貧病人爭棄沉冥我  
獨知小樓高卧處別墅共遊時今日風塵客悠  
悠空爾思

初冬同徐興公懋龍井二首

爲選南山勝欣從初地遊峯迴疑鹿苑泉湧卽  
龍湫雨散雲歸峽天低風滿樓山僧能送客一

過虎溪頭

其二

登臨不憚遠尊酒共淹留洗鉢石潭淨開門篁  
嶺幽寒生還作雨葉下更疑秋來往無人覺清  
泉只自流

平湖舟中阻雪二首

青陽方改歲朔雪忽霏霏宛轉隨風入飄搖帶  
雨飛雲橫官路合天濶旅船稀故國梅花落空  
慙生計非



其二

已失由拳道真迷烟雨樓興隨飛鳥盡心逐野  
雲愁江冷楓猶落天低水不流高歌賦招隱莫  
有子猷舟

眺嘉善縣城城故

先大夫爲植形勝壯

於它邑剏於嘉靖三十四年

島夷窺內地兵燹嘆當時險自何年設人應沒  
世思關山開北障烽火靜南隴父老勞相憶回  
頭涕泗垂

春日飲屠園四首

春風吹客棹一過仲長園竹密纔通徑花明別  
有村鹿眠白日靜鳥散小亭昏選勝時來此山  
中可避喧

其二

幸自逢休暇誰能廢嘯歌維舟依柳岫攜杖上  
梅坡池曠天光入樓空野色多柴門常晏閉不  
厭客頻過

其三

二月春風暖辛夷滿樹花光宜殘雪映艷借片  
雲遮香氣薰瑤席歌聲出絳紗由來山吏部不  
減季倫家

其四

北郭園林好東風杖屨閒曲池分浦淑奇石象  
雲山塔影松關外泉聲竹嶼間無因共招隱惆  
悵暮禽還

甘露寺四首

寶刹臨虛曠琳宮閉寂寥鐘聲雲外杳帆影浪  
中搖山靜喧春鳥江翻鬪暮潮由來懽賞處不  
畏馬蹄遙

其二

客爲尋僧到人今弔古來草埋走馬礪柳覆摩  
雲臺吳越山川隔淮徐烟霧開風流何處問蕭  
瑟空莓苔

其三

客路漂零久空門信宿留依依楊柳色漠漠大  
江流日落麒麟塚天低鷗鷺洲冥心皈淨土真

作白雲遊

其四

幻跡依初地，羈懷信酒杯。  
杖藜聊獨往，雲水更遲迴。  
曲浦分潮入，遙山送雨來。  
悠悠春復暮，惆悵野花開。

小桃源

爲問桃源路，溪窮渡石橋。  
門前流水細，樹杪白雲遙。  
茅舍宜雞犬，山園足稻苗。  
老翁不肅客，相對意蕭蕭。

失硯

千里同來此，分攜亦偶然。  
誰令懷白壁，翻恨失青氈。  
劍化終難合，囊空始自憐。  
長途疲繭客，蕭瑟渡淮年。

漂母祠

日暮淮陰道，荒祠楚水邊。  
寧思一飯報，不爲千金憐。  
古壁穴鼯鼠，空山啼杜鵑。  
王孫去不返，草色空秋烟。

濟上

長途不可極歲晏復西征迢遞高平國蕭條鉅  
野城寒風將客棹衰草逐王程旅思無人覺淒  
其斷雁聲

太白酒樓

謫仙今已沒古蹟餘高樓汶水去不返梁山空  
復秋寒沙埋斷碣落日明芳洲酒客應惆悵登  
臨憶舊遊

丙申初度安德舟中二首

浮生真是幻杯酒若爲懽馬齒四隨年長蛾眉涉  
世難關河鄉信遠雨雪雁聲空  
明日弓高路雲山更渺漫

其二

四十嗟遲暮還經兩度春衰猶頻作客壯已不  
如人宦計平生拙交情到處新東山舊朋好知  
我本來真

送宋民部暫還東平

暫歸東海上含笑出都門清不求人識忠寧負  
主恩風波堪側目花鳥自銷魂行矣休惆悵栖

遲道益尊

賦得紅藥當堦翻

灼灼園中花嫣然散綺霞偏宜清露浥須借錦  
雲遮爛熳侵堦媚離披覆檻斜奇芳原自好况  
在五侯家

送潘進士之濟南廣文

本自金閨彥栖遲老一官楊花飛薄暮瘦馬出  
長安齊魯儒風舊山川古蹟殘登臨有佳興遙  
寄五雲端

送艾兵憲請告歸陳雷田

平生元許國臨難敢謀身疾病懷孤憤 君王  
念小臣冥心謝簪紱瘦骨畏風塵暫息滄洲駕  
悠悠汝水春

過彭城聞曹能始至不及面悵然寄懷

已作經年別還驚遠地來風塵一相失車馬各  
遲迴月色忽迷水山光何處臺可憐江海客漂  
泊幾時回

惠州白鶴新居謁蘇長公祠二首

先生已化去茲地爲誰留屋祗山雲入門餘江  
水流衣冠猶百粵詞賦自千秋惆悵當年事西  
風落日愁

其二

雲物堪娛老江山且卜居才難當衆妬跡故與  
人踈瘴厲山川外風流翰墨餘荒坡留斷碣讀  
罷轉踟躕

楊彥履太史楊師雨計部景爾涵舍人王  
嘉甫大行同集善果寺餞別沈君仁太守

二首

春去花纔放風來絮乍飛離筵各惆悵初地共  
皈依迸水淨香案慈雲護竹扉空門無住着莫  
作淚沾衣

其二

正是尋芳日其如送遠何僧厨供別酒佛呪雜  
離歌忍草迎車合曇花拂綬多前途有書札須  
寄早鴻過

壽潘山人

夙昔慕竒節埋名酒肆中試觀游俠傳何忝古  
人風白髮已如許紅顏自不同時時騎馬去射  
鳥五陵東

毛中丞墓祠在天池山上

中丞舊賜地藏蛻傍青山俎豆烟霞外衣冠夢  
寐間屏空苔作繡洞冷石爲關試問遼城鶴西  
飛幾日還

送曹能始遊盤山二首

甲識吏情淡今知野興濃身輕還跨鶴筆老亦  
雕龍客到雲邊寺僧歸雪裏峰采真遊自好仙  
侶定相逢

其二

盤山亦不遠暇日此躋攀塞近邊聲苦城孤海  
色間筍輿將雪度藜杖逐雲還愧我風塵者栖  
栖老客顏

送曹能始調留都二首

女更移官去高才世共憐青山宜吏隱綠髻卽  
神仙五月鱗魚美三茅寶石妍由來歌舞地佳

麗憶當年

其二

吾真憐小友人或妬狂生偃蹇甘違俗牢騷不  
挫名花明江上渡柳覆石頭城別後勞相憶中  
宵有鴈聲

別陳寄之

通家情不薄伯氏我同門萬里從京國扁舟及  
故園神清衛叔寶才雋陸平原江上潮迴處離  
心那可言

彭興祖從吳門拏小舟追送至武林賦別  
一首

閩江分袂後惜別到于今吳水重逢日悠悠見  
此心麥秋天欲暮梅雨晝長陰感爾綢繆意相  
携下武林

贈倪山人

藥肆且藏名蕭然物外情趨庭佳子弟倒屣衆  
公卿老去身逾健丹成體益輕吾將謝簪紱問  
爾乞長生



贈八叔隱居

端居無個事一室傍青山流水心同適歸雲意  
自閒隴頭携杖去谷口抱琴還晚悟長生訣卅  
砂可駐顏

中秋寧鄉署中

中秋不見月風雨攪深更白露寒湘水青楓暗  
楚城踈燈孤客夢濁酒異鄉情佳節慚虛度年  
年爲遠征

華嚴洞二首

廢洞無人識開山亦有時真疑天匠巧更詫佛  
光奇四壁翻波浪空門隱豹螭居然芥子小何  
處納須彌

其二

嵐氣轉淋漓高低勢屢移崖懸金閃爍乳滴玉  
歲徂曲磴雨晴落虛堂風暗吹可憐兵燹地得  
此淨摩尼

喜女實二弟至

女是吾家雋飄零直到今來尋黃鶴侶共聽滄

浪吟空橐垂長劍高齋托短衾從容一杯酒莫  
忘歲寒心

澂江立春

春光忽已到旅思動相牽綵勝傳官舍辛盤簇  
客筵寒多因近海風急况臨邊故國音書斷鶯  
花又一年

人日雨

閉門聊宴坐花氣轉氤氳人日寒生雨蠻天瘴  
作雲新蔬香可擷老栢苦堪焚更喜蕭蕭竹科  
頭對此君

新霽同諸公遊松花壩小菴二首

退食應多暇其如春興何松風吹帽冷嵐翠着  
衣多曠野聞金錫林垆到玉珂不愁泥滑滑騎  
馬得同過

其二

野色晦明裏河流蒼莽間角巾松徑穩尊酒柳  
堤閒水漲分遙浦雲飛帶別山此中堪息景半  
月一來還

張憲副邀飲點蒼山二首

積雨喜初霽招尋有使君憑軒遙望海飛蓋乍  
停雲嵐氣盤峯出泉流着壑分前山已昏黑猶  
復戀斜曛

其二

龍去潭猶黑鳥飛山更青岩巒餘積雪洞壑隱  
寒星截海驚天險摩霄壯地靈峰頭一回首長  
嘯意冥冥

張憲副餞別三塔寺

祖道雙林外離筵三塔前歸雲不可駐岐路轉  
堪憐刁影滄波動孤標清漢懸傷心揮手處落  
日又鳴蟬

移酌禮斗臺

路入栖真觀雲開禮斗壇松杉依逕暝蘿薜覆  
亭寒洞古龍猶蟄巢空鶴未還今宵何處望海  
氣正漫漫

高堯吊楊用脩太史二首

斯人已淪沒此地餘風流野日山山暮江雲處

處秋玄同揚子宅賦比仲宣樓欲採蘋花薦臨  
風黯自愁

其二

漂零嗟蜀魄棄置怨湘纍遺宅空千古荒村此  
一時鳥歸花滿院蛙鬧草生池惆悵昆明水東  
流無住期

邀孟僉憲遊金蟾菴二首

去郭十里許香烟杳靄間天空雲斷續日落水  
潺湲響急真成瀑流清未出山使君有佳興休

暇幾來還

其二

策馬訪招提烟霞楚水西金蟾不可見野鳥向  
人啼逕轉千盤迥臺臨萬壑齊何須問主客一  
任醉如泥

懋夕佳閣

石林隱佳氣梵閣空崔嵬一室虛明界千峯蒼  
翠來鳥啼山雨合猿去洞雲開忽聽鐘聲遠悠  
悠何處臺

鎮遠道中

厭作黔陽客山行日日陰寒鴉喧古戍餓虎嘯  
荒林壁壘依崖險荆榛隱屋深悲歌何處寫併  
入武陵吟

讀王給事壁間作寄懷

吾憐王給事幾日到黔陽一謫緣群小孤忠托  
聖皇春回江草綠人去楚蘭香歌罷招魂曲臨  
風意不忘

安鄉道中二首

春半安鄉縣荒田草未刪天空惟有水野曠更  
無山榆柳依村密牛羊曝日間遙遙洞庭濶烟  
靄杳難攀

其二

邑小苦流亡民貧歲屢荒春遲槐葉短風暖菜  
花香野店茅編屋村居柳映墻閩南農事早立  
馬憶吾鄉

送尤秀才

共作滇南客相將入楚來鄉心愁對酒春色悵

登臺路入黃陂折江從赤壁回離家忘歲月三  
見隴頭梅

送用吉還閩

小榜泊江干淒其去住難誰憐身偃蹇相對鬢  
凋殘春漲迷朝靄天陰生暮寒臨岐何所贈袖  
裏楚江蘭

送九兄

梅花開復落相送漢江頭日斷孤帆杳心傷春  
水流濤聲石城渡鴈影海東樓此去幽棲好何

年更楚游

荅朱季則胡仲脩朱爾實見懷之作三首  
離情梅雨後歸興麥秋前一札思千里孤尊憶  
去年雲迷石城月柳暗郢門烟酒態爲誰減頹  
唐亦可憐

其二

吾憐胡處士短劍逐秋風骨爲迷花瘦囊因縱  
酒空荒原神女廟麗賦楚王宮鸚鵡洲前草依  
然霧露中

其三

春草他鄉夢風流小謝才客來飲美酒興發臨  
高臺琴借桐根斲冠憑竹籜裁郢中元有曲不  
作楚歌哀

西樓全集卷四終

西樓全集目錄卷五

七言律詩

寄贈鍾明府

冬日過徐惟和孝廉綠玉齋

題葉三丈陸莊園

秋日鄭氏山園

送黃煥歸建昌

陳公子宅上觀伎

聞警



送熊益中解元歸豐城

同林熙吉熙工王玉生徐惟和與公遊錦  
溪竹林

送人赴南宮

渡錢塘江

楊子江

賦得戲馬臺

長安春望

送鄒大澤老師還楚

秋興二首

送同年黃明立南還

薊門

孫將軍招飲觀海樓

舒尚書治河淮北投謁舟中敬贈

煬帝行宮

雨中過綠玉齋看惟和兄弟

袁元徽林雋卿陳用吉小集草堂

問陳振狂

泛峴江

至旗山聞徐唯和陳伯孺先一日遊方廣  
寄懷一首

贈陳伯孺

寄舒孺立太史

贈徐惟和

寄翁兆震太史

郊居

寄張叔弼

寄陳彥莊侍御

贈徐興公

夏日玉生伯孺興公小集

無題

過竹林舊居

袁無競以新詩見示賦答

鳳丘山有朱元晦大書是白玉蟾煉丹處

玉生唯和興公無競宿山庄

過從子禧竹林山庄偶題

玉皇閣

贈王玉生

擬過賈誼宅

古意

越王臺懷古

同張叔弼廣文曹能始孝廉過唯和齋頭

旅次石頭岸

初入都贈楊彥履太史

旅懷

雨後同張函一進士汪仲修孝廉呂叔與

盛太古太學彭典祖山人集城西寺

新秋劉元丙大行茅平仲山人集顯靈道

院

望薊門

送何稚孝儀部謫桂林

恭謁長陵

陪祀山陵二首

九日約史世程太史遊西山

送蘓弘家民部之九江鈔關

九日憶故園

恭遇 慈聖千秋節 上御門受賀志喜

一首

送江國材法曹之平樂

送周光祿督餉昌平便道南還

送岳令爾律之汝陽

同張成叔伯夜去華盛太古集張函一獨

冷齋

夜集楊民部官閣看梅

雪後早朝

送林謹任都諫謫東粵

送吳待之督餉秦中假道還楚

陳幼孺徐唯和曹能始孝廉許靈長太學

張去華山人共集署中賦得長安新柳

送張成叔歸四明

送陳幼孺徐唯和下第南還

寄從子禧

送許靈長太學之范陽

落花四首

春興七首

賦得白桃花

畱別長安諸子時余有浙中之役

九日同鄧道鳴將軍如瀚上人徐唯和孝

廉陳女大袁無競秀才王玉生山人集

平遠臺時余將北發

鄧將軍招飲鄰霄臺同溫司馬閣別駕劉

法曹曹孝廉分韻得仙字

西樓全集目錄卷五終

西樓集

卷五

六

西樓全集卷五

閩中鄧原岳汝高著  
門人韓日纘緒仲訂

仲子慶家編次

七言律詩

寄贈鍾明府

仙令分符百里居一時風調復誰如  
桑麻春遍三千頃斥鹵雲開十二渠  
海國勲名看勒石太平功業付徵書  
羅浮山色仍無恙遠道還能寄

鯉魚

冬日過徐唯和孝廉綠玉齋

風流且莫嘆漂零獨向青山結草亭  
花下開尊空翠落竹間岸幘凍雲停  
人家殘日堪蕭瑟仙觀疎鐘乍杳冥  
怪爾公車方待詔行人錯指少微星

題葉三丈陸庄園

西園隱約水雲偏眼底交游覺女賢  
莎徑烟霞雙屐健茆齋風雨一尊便  
山中生計猶堪老身外浮名祇自憐  
聞道過從多酒客可能日給杖頭錢

秋日鄭氏山房

西風木葉氣蕭森金粟臺前劇暮陰  
幸借琴尊消逸興更堪山水有清音  
雲連睥睨人家盡日落招提塔影沉  
但使元卿三徑穩不妨二仲日招尋

送黃煥歸建昌

黃絃索稱絕藝家有寵姬善歌舞

節俠吾憐高漸離故園歸去復何之囊中襍被  
貧如故馬上琵琶聲更悲岳浦雲收孤鳥沒肝  
江水冷片鴻遲窮交贏得詩篇在珍重尊前付  
雪兒

陳公子宅上觀伎

秋色漂零入夜清華堂曲宴醉逢迎月明露湛  
芙蓉掌天靜風高環佩聲豔曲製來皆按節佳  
人邀得動傾城琴心最是關情處上客誰當漢  
馬卿

聞警

十月黃沙關塞高傳聞胡騎入臨洮 君王只  
說和我利將士誰當破虜勞已自朝中分虎旅  
更從漠北閱龍韜腐儒可有封侯骨漫向燈前  
看寶刀

送熊益中解元歸豐城

豐城雄劍化爲龍神物由來未可逢一日雲霄  
瞻氣象幾回風雨夢芙蓉綈袍共醉荆軻市絲  
筆同題薛老峯別後相思更何處曲江月曉度



疎鐘

同林熙吉熙工王玉生徐唯和興公遊錦  
溪竹林

苦愛西溪竹千挺修篁瑟瑟逗晴暉石林空翠  
和煙潤澗道流泉作雨飛載酒偶隨芳草去迴  
車猶惜白雲違山中桂樹堪招隱矯首風塵幾  
是非

送人赴南宮

漳河砧杵動秋聲尊酒那堪此送行袖底雲霞  
毫五色馬頭風雨劍雙橫蒹葭水落初聞鴈楊  
柳春深好聽鶯 聖主臨軒方賜對可能談笑  
請長纓

渡錢塘江

十月繁霜夜沈寥扁舟孤客欲蒐銷江干木下  
頻聞鴈浦口風來正上潮南宋寢園雲漠漠西  
陵松栢雨瀟瀟塞垣戎馬無消息北望傷心涕  
淚遙

楊子江

颯颯西風江怒號蕭蕭寒色上征袍天晴無數  
黿鼉出野闊徐看鶴鶴高樹影青連楊子驛波  
光白湧廣陵濤六朝踪跡隨流水斜日舟前首  
重搔

賦得戲馬臺

彭城古蹟有高臺曾說當年戲馬來霸氣已隨  
淮水盡雄圖還傍楚山開雕欄蔓草悲黃土金  
甲沉沙認劫灰漢寢秦陵俱寂寞西風何處不  
堪哀

長安春望

曙色遙臨闕角西長安芳草望堪迷樓臺疊碧  
千層迥榆柳籠青十里齊丹幄雲開浮玉仗滄  
池水暖咽金隄春明門外花如綺歌舞叢中聽  
馬嘶

送鄒大澤老師還楚

抗疏歸來荷主恩閒居聊擬奉晨昏但看桃  
李猶燕市忽憶蘭茝卽楚門雲夢煙光涼几榻  
洞庭空翠伴琴尊臨岐徒有沾衣淚他日相思

巫峽猿

秋興二首

六月已破秋氣悲長安客髮忽成絲滿天風雨  
有何意閉戶酣歌聊自怡頗怪鄉園斷消息更  
堪關塞多旌旗浮雲黯黯愁無賴悵望城南楊  
柳枝

其二

邊城緊急羽書飛海上煙塵未息機南北紛紜  
何日定 廟堂籌策亦多違疎楊葉短霜初下

旅鴈聲悲客未歸鄉思逢秋更蕭瑟山中苦憶  
薜蘿衣

送同年黃明立南還

長安客舍雨如絲送女南歸惜履綦山爲兼秋  
兩岸惡鴈因近塞數聲悲天涯楊柳勞相憶故  
國煙霞去不疑同是漢南門下客報恩定擬在  
何時

薊門

上谷東連古薊門黃沙漠漠暗中原遙天衰草

依殘壘落日荒山隔斷垣八月烽煙應未息十年征戍更堪論秋風到處催砧杵愁絕關河非故園

孫將軍招飲觀海樓

獵獵秋風動塞垣將軍畱客駐征軒雲開大漠驚天塹日出層樓見海門殺氣漸高笳鼓合霜威初肅鴈鴻喧遼陽咫尺還多事汗馬何當報主恩

舒尚書治河淮北投謁舟中敬贈

八月潮衝淮水渾樓船南下覓河源千帆影裏旌旗暗萬馬聲中鏡吹喧秋色依然歸宿豫春流無恙屬崑崙玄圭已自清朝錫禹蹟于今可再論

煬帝行宮

龍舸東巡竟不回白雲空鎖碧崔嵬江聲已逐繁華去月色曾經歌舞來遼左軍容愁駐輦淮南王氣悵登臺淒涼往事隨煙滅落日芳原鳥雀哀

雨中過綠玉齋看惟和兄弟

齋頭小雨釀新寒  
短策悠然問考槃  
別後青山成隔歲  
到來白社念同驩  
雲迷曲徑層陰合  
風過疎林落葉乾  
階下籜龍看漸老  
憑君裁作竹皮冠

袁元徽林雋卿陳用吉小集草堂

萬里歸來逢歲暮  
草堂松菊對淒風  
故人乍見形容改  
斗酒真憐笑語同  
日落山城愁塞鴈  
霜深澤國冷江楓  
羽書未罷東南汛  
心折關河涕

淚中

問陳振狂

爲問南山陳處士  
邇來生計竟如何  
朝饑真覺詩腸苦  
日醉那堪酒債多  
歲晚煙霞愁懶慢  
秋風門巷罷經過  
知君傲骨還無恙  
獨倚江亭坐嘯歌

泛峴江

峴江江上放孤艇  
客思蕭蕭雪滿途  
何處漁歌聽斷續  
幾村柘景入虛無  
天寒日晚牛羊下  
風

急霜清鶴鷺呼谷口歸來歲復晏但將踪跡混  
菰蘆

至旗山聞徐唯和陳伯孺允一日遊方廣

寄懷一首

爾去尋仙入永陽扁舟不爲歲寒妨水簾風捲  
長如霧石室煙收定有霜遠磬微茫朝禮塔殘  
燈寂靜夜焚香杖藜到處多探歷囊裏新詩好  
寄將

贈陳伯孺

不將短髮傍風塵買得青山寄此身一逕花飛  
春寂寂小塘風過水粼粼芒鞋到處堪乘興絲  
筆攜來不讓人獨怪門庭車轍滿誰言孺子竟  
長負

寄舒孺立太史

淮河忽作經年別矯首雲霄空復情一臥江湖  
還遠志獨看詞賦有高名朝廷未罷遼陽戍  
東北終愁瀚海兵聞道清時屢推轂可無奇策

動公卿

贈徐惟和

我愛南州徐孺子年來安穩臥柴關逢人且莫  
歌長鍊招隱惟應賦小山半榻白雲心共遠數  
聲清磬夢俱閒可憐門外仙臺近暇日登臨一  
破顏

寄翁兆震太史

春明回首卽天涯越嶠秋風憶履綦此日玉堂  
還視草何年綵筆共題詩西山爽氣來仙仗北  
苑祥光遶御墀但向市中歌擊筑可能隨處

寄相思

郊居

誰憐春去草萋萋暇日看山信杖藜野色忽迷  
天遠近人家只在水東西孤村雨過從花落一  
逕風清自鳥啼睡起高春聊謝客種桃擬作武  
陵谿

寄張叔弢

燕臺歸客倦風塵鄭重緘書問故人雙鬢可堪  
青歲改一丘不厭白雲貧心驚南國旌旗滿目

斷秦川楊柳新烏石鼇峯思共女莫教芳草怨  
殘春

寄陳彥莊侍御

翩翩飛鳥入長安回首江頭荔子丹供奉最宜  
玄武仗斜彈真羨惠文冠鍾陵蒼翠尊前落石  
屋風煙雨後看時事艱難堪涕淚題書千里問  
加餐

贈徐興公

蕭然三逕臥煙霞肯逐風塵老歲華塵尾攜來

溫似玉兔毫開處燦如花任朝東郭先生履不  
忝南州處士家同調最憐賢伯仲翩翩麗藻向  
誰誇

夏日玉生伯孺興公小集

四月涼風吹草亭楊花飛盡柳條青黃鸝聲裏  
初迎夏白社尊前此聚星梅雨乍停煙漠漠麥  
秋纔過晝冥冥浮生回首悲離合可向人間恨  
獨醒

無題



微雲黯黯雨瀟瀟楊柳陰濃鎖寂寥白苧歌殘  
眉黛淺金爐香燼暈紅銷夢回猶憶中秋月書  
去還驚半夜潮錦字如新人不見隔墻妬殺鳳  
凰簫

過竹林舊居

黃梅雨過野花翻杖履尋芳興不違溪上鳧鷗  
還泛泛堤邊楊柳故依依頻年踪蹟仍離合末  
世行藏有是非十里青山三畝宅莫令苔蘚翳  
漁磯

袁無競以新詩見示賦答

君是丹山一鳳毛風流年少亦吾曹雄心祇合  
看長劍妙理還應付濁醪對客真誇司馬賦閒  
居聊擬左徒騷投來明月光如許報爾龍文金  
錯刀

鳳丘山有朱元晦大書是白玉蟾煉丹處  
烏石峯前鷗亂飛天風吹冷薜蘿衣煙迷島嶼  
浮青靄日入溪山淨翠微石壁草荒殘刻在丹  
爐藥化昔人非白雲滿袖芒鞋濕身在瑯臺頂

上歸

玉生唯和興公無競宿山庄

芳郊落日澹平蕪  
白社還同舊酒徒  
極目煙霞晴窳窳  
隔林雲樹晚模糊  
石床草榻人初靜  
流水柴門鳥亂呼  
永夜月光清映郭  
分明一片輞川圖

過從子禧竹林山庄偶題

阿咸小隱竹溪灣  
藥裹時從谷口還  
花逕夕陽人不到  
柴門芳草晝長關  
嶺雲片片尊前落  
林

鳥聲聲夢裏閒  
他日歸耕仍此地  
敢將衰鬢負

青山

玉皇閣

傑閣峇峇接混茫  
飛甍縹緲駐斜陽  
遙空日月開銀榜  
天地山河護玉皇  
江上潮平無宿莽  
城頭烟暝有垂楊  
憑欄極目浮雲細  
西北天高是帝鄉

贈王玉生

風流才子雅相聞  
野鶴翩翩自不羣  
囊裏愧無

金可贈人間真有筆堪焚投來白壁誰知己看  
到青山獨見君我有瀟湘一幅絹還能爲寫幔  
亭雲

擬過賈誼宅

賈傳南遷猶有宅淒涼廢井楚江邊孤臣浪跡  
今如此萬里投荒劇可憐路入衡陽無候鴈月  
明湘水自啼鵑門前立馬空回首楊柳蕭蕭起  
暮煙

古意

滿天寒角夜啼烏寂寞銀床下井梧最恨關河  
遲尺素空教風雨暗流蘓玄菟塞北腸堪斷白  
馬城南影自孤聞道沙場霜氣蚤別來衰草幾  
回枯

越王臺懷古

日落汀洲江吐雲君王遺殿晚氤氳樓船北出  
鄱陽道劍壘東歸威武軍馬瀆潮平天外直龍  
湫泉咽夜深聞一時霸業堪蕭索愁對青山越  
水瀆

同張叔歿廣文曹能始孝廉過惟和齋頭  
杖藜忽指百花潭勝日遙憐此盍簪對客獨懸  
青草榻題詩却憶白雲庵叢蘭經雨香初歇新  
竹臨風籜半含可惜鶯聲今漸老虛攜斗酒與  
雙掛

旅次石頭岸

秦淮爲客動經年日斷南雲接楚天柳岸風多  
迷夜雨葭洲水漲鎖寒煙六朝草色青山外八  
月潮聲白鴈前無柰鄉心正寥落獨將衰髻老

江邊

初入都贈楊彥履太史

一從燕市罷鳴珂惜別俄驚歲月多鴈去江城  
生感慨客來易水動悲歌馬頭不改西山色花  
外遙憐太液波此日相逢休擊筑漂零無柰酒  
人何

旅懷

長安一望旅愁增况復炎天氣鬱蒸數口同來  
仍是客雙扉獨掩却成僧垂楊落日連三輔芳

草殘煙隔五陵憶得江南好巖谷此心應戀白  
雲層

雨後同張函一進士汪仲修孝廉呂叔與  
盛太古太學彭典祖山人集城西寺

西山霽色鬱相望乘興還來謁上方蹤跡最宜  
蓮社侶襟期何似竹林狂祇園雨過菩提長客  
坐風吹簷蔔香海內詩名諸子在漢庭吾已愧  
田郎

新秋劉元丙大行茅平仲山人集顯靈道

院

客裏新秋嘆轉蓬還携尊酒白雲中虛亭竹翠  
消殘暑別院鐘聲起晚風興到定呼花鳥使醉  
來應宿藥珠宮燒丹羽士今何處目斷笙簫碧  
海東

望薊門

漁陽一望倍躊躇出塞聊停使者車見說款關  
無戰鬪可憐飛輓更儲胥秋風易水悲歌裏落  
日崆峒感慨餘遼海外連憂不細征東消息近

何如

送何稚孝儀部謫桂林

暫從建禮卸朝簪萬里投荒惜別深放逐非關  
明主意憂危自信小臣心九疑風雨迷藤峽五  
嶺雲山接桂林君過江潭多感慨懷人莫遣二  
毛侵

恭謁

長陵

文皇定鼎壯燕幽更卜玄宮枕上游樂府舊傳

朱鷺引祠官親奉白龍游太行透遞雲邊路黍  
谷蕭條塞外秋聞說關中胡馬動三犁誰爲掃

神州

陪祀

山陵二首

西山龍象控崔嵬檜栢蒨葱輦路迴雙闕忽從  
香殿出五雲偏傍寢門開風傳野次霜鐘杳月  
落峯頭騎火來盡說祠宮多侍從賦成誰是子  
雲才

其二

天門高處卽稜恩

諸陵俱有稜恩巖

松柏參差護寢園

上谷煙霞環北極西山風雨暗中原清宵似有  
金輿出馳道如聞石馬喧惆悵小臣瞻拜地蓬  
萊真氣至今存

九日約史世程太史遊西山

薊北秋深霜葉紅蕭蕭寒色起悲風登高却憶  
香山寺攬勝還同碣石宮十里樓臺殘照外九  
陵松柏暮煙中題詩預報山靈去蠟屐摩崖典

未窮

送蘓弘家民部之九江鈔關

落葉蕭條秋滿天關門衰柳拂離筵風塵西北  
還多事征稅東南絕可憐廬嶽雲開橫夕照潯  
陽潮上擁寒煙袖中彩筆堪乘輿漢使于今正  
少年

九日憶故園

帝里秋風動客哀可堪獨對菊花杯雲邊落木  
他山寺天畔層陰何處臺極目關河鴻鴈杳驚

心西北羽書來芙蓉蕭颯悲生事攬鏡其如白  
髮催

恭遇

慈聖千秋節

上御門受賀志喜

蓬萊宮闕曉氤氳警蹕聲高虎豹羣  
紗縹發光當晝見霏霏天語半空聞  
上尊競自中官送寶鈔先從戚里分  
人在釣天聆廣樂不須閶闔更排雲

送江國材法曹之平樂

喜從魏闕共鳴珂回首天涯奈別何  
但使三苗知漢法不妨萬里聽蠻歌  
昭潭西去人煙少勾漏南來古蹟多  
自信君恩無遠近少年那復嘆蹉跎

送周光祿督餉昌平便道南還

玉露金風動北平蕭蕭朔氣度危旌  
逢人謾賦思歸引被命聊爲出塞行  
遠水斷鴻悲故國夕陽殘戍見孤城  
因君憶得青山社拓落空慙白



髮生

送岳令爾律之汝陽

天涯把袂惜蹉跎尊酒臨岐怨別多詞賦只今  
推楚調風流猶自憶吳歌天邊積雪趨河洛馬  
首寒雲渡汝沱君去中州勞撫字相思歲晏復  
如何

同張成叔伯夜去華盛太古集張函一獨  
冷齋

我愛風流張廣文喜從燕市更逢君齋頭白墮  
留人醉座上青氈與客分春入殘年仍雨雪寒  
生永夜忽停雲尊前授簡誰能賦藻句還應鄰  
下聞

夜集楊民部官閣看梅

北地春光動早梅更堪羯鼓夜相催風吹素影  
枝枝瘦雪滿繁條樹樹開賦就却憐官閣在粧  
成疑是漢宮來江南花信知無恙望斷遙天鴈  
未回

雪夜早朝

鷄人唱罷雪初殘  
霽色纔回白玉欄  
綵扇影窺銀燭冷  
瑤階光映玉珂寒  
春雲不散朝元閣  
曉霧猶依承露盤  
郎署雍容真竊忝  
綴行聊得侍

金鑿

送林謹任都諫謫東粵

平生慷慨戀明時  
岐路悠悠黯自疑  
世事只今空涕淚  
風塵此去竟何之  
危言不解孤臣憤  
直道還憑聖主知  
最是關門霜雪冷  
可堪流落向天涯

送吳待之督餉秦中假道還楚

輶軒西出入函關  
使節翩翩霄漢間  
二月冰銷聞隴水  
三邊雪霽見秦山  
北庭輸輓終難廢  
南國風煙且獨還  
最是春明芳草綠  
憶君長在紫宸班

陳幼孺徐唯和曹能始孝廉許靈長太學  
張去華山人共集署中賦得長安新柳送  
張成叔歸四明

二月晴光動上林  
玉河柳色晝將陰  
柔條映水

那堪折短葉臨風轉不禁隋苑微寒春尚淺  
灞橋疎影月初沉可憐張緒風流遠天畔依依繫  
此心

送陳幼孺徐惟和下第南還

天涯相見忽分襟世態悠悠嘆陸沉但說荆山  
收白璧竟從燕市失黃金關門風雨窮交淚驛  
路鶯花故國心却愧馮君淹漢署蕭條短髮不  
勝簪

寄從子禧

一客燕雲復暮春天涯芳草總愁人風塵真覺  
青山遠老大翻憐白髮新北地鴻飛原近塞潞  
河水漲不通閩羈縻只爲微官在憶汝遙應愧  
此身

送許靈長太學之范陽

久客都門嘆倦游更堪短劔去邊州青袍未敢  
干明主白馬何當逐子侯塞外煙雲迷黍谷  
春來楊柳暗蘆溝新詩應作清平樂見說佳人  
有莫愁

落花四首

江南花信正堪傷  
看去翻令斷客腸  
繡幙開時初散綺  
舞筵落處更飛香  
闌干月冷雲連水  
鈴索風高夜度霜  
爲問春光今幾許  
只應愁殺大堤倡

其二

飛花歷亂滿晴空  
陌上蹊邊處處同  
寂寞正當三月雨  
漂零無奈五更風  
疎林煙暝銷殘翠  
小院苔深襯落紅  
百轉鶯聲今漸老  
不堪愁絕畫

樓東

其三

一番春信一番稀  
萬點愁人到處飛  
但挂游絲添綽約  
偶隨流水逐芳菲  
多情故自縈閨閣  
弱態猶堪綴客衣  
欲向東園問消息  
數聲啼鳥正斜暉

其四

繁英滿地惜摧殘  
衰謝空憐春色闌  
雨裏可堪依砌冷  
風前聊作墜樓看  
乍離故苑從漂泊  
一

落天涯更渺漫自是芳華易銷歇不須惆悵獨  
憑欄

春興七首

客裏傷春嘆式微長安楊柳正依依漢廷自笑  
功名薄畫省應憐日月非風雨北迷千嶂合關  
河南阻尺書違萋萋芳草天涯路爲問王孫歸  
未歸

其二

雪盡西山凍未消五雲宮闕更嵒崿中璫馳入

爭承勅近侍傳來暫放朝合殿春回香漠漠御  
河水煖草蕭蕭揚雄執戟頭都白日斷金輦駕  
絳霄

其三

皇輿形勝控幽燕百二山河未卜年一自開平  
譏失險遂令元老困籌邊鎮城竟作和戎市瀚  
海終成飲馬泉不見黃金頻出塞中原膏血至  
今憐

其四

昔年被命出榆關使節翩翩塞外還南園未論  
翰輓盡北庭謾說羽書閒荒城尚見秦時月絕  
島遙連海上山回首可憐青歲改蕭蕭簪笏愧  
朝班

其五

遼后粧樓御苑西礎蓮苔冷草新齊泉流石礪  
空餘恨鳥入香奩亦異啼金鎖葳蕤春雨濕翠  
華寂寞暮雲低居庸關外黃沙路極目高風胡  
馬嘶

其六

西山一帶權璫宅樓觀參差接梵宮鷺嶺忽看  
金刹湧龍池故與玉泉通千層碧落鐘聲外十  
里青山柳色中惆悵先朝功德寺門前松栢起  
悲風

其七

薊門春去復如何寂歷鶯花客裏過馬首山光  
連塞路城頭柳色暗關河虜情自古三邊急謫  
籍于今五嶺多抗疏可憐林給事瘴江何處避

風波

賦得白桃花

一枝幽艷畫含光爲愛繁陰正壓墻色比何郎  
原傅粉嬌如合德自生香冰肌嫋嫋飛殘雪玉  
魄亭亭帶曉霜便是武陵人不到可教老却白  
雲鄉

畱別長安諸子時余有浙中之役

滿城飛絮正紛紛尊酒那堪醉夕曛立馬都亭  
愁去國聽鶯三月憶離羣江南芻粟吳中郡於

越樓船水上軍回首薊門霄漢隔更從何處賦  
停雲

九日同鄧道鳴將軍如瀚上人徐惟和孝  
廉陳女大袁無競秀才王玉生山人集平  
遠臺時予將北發

風急霜清木葉黃杪秋雲水正蒼蒼香煙縹緲  
傳仙梵山色依微落女牆老去可堪悲短景醉  
來應不負重陽劇憐浪跡天南北却喜登高是

故鄉

鄧將軍招飲鄰霄臺同溫司馬闕別駕劉  
法曹曹孝廉分韻得仙字

澤國風煙清可憐高臺突兀隱諸天白雲映帶  
青山小紫海蒼茫碧漢連此日旌旗閒部曲一  
時冠蓋集神仙凭欄極目生愁思薄暮寒砧何  
處邊

西樓全集卷五終



西樓全集目錄卷六

七言律詩

同葉進卿太史陳振狂山人袁無競茂才

集越王臺

集林氏池亭

送陳元功孝廉北上

壽周令君

送李選部謫茶陵

發三山鄉先輩出餞答謝



發芋原別諸同社

寄題林志宸進士樓居

擬過古戰場

茶洋驛遇雨答葉進卿太史見懷之作

重過武夷山

雨中同王玉生憇天游觀

蘭溪舟中答贈王永叔進士

西湖贈楊思說先輩

送林叔度山人歸莆

天竺

紫陽洞

寄公朗和尚

寄王百穀

同玉生游虎丘

同毛豹孫王玉生二山人過王百穀半偈

菴值其持戒出伊蒲相餉卽席賦此

同王彥貽鴻臚顧少玄盛傲吾二山人憇

鄒彥吉先生鬯閣

舟次延陵得彥吉先生贈詩賦答

王莊驛和曾舍人壁間作

彭城

滕陽寫懷呈同年趙仲一令君

寄劉沈丘先生

客中送人入蜀

平原同林謹任都諫宴集李莘聘民部衙

齋

三月晦日舟宿安德憶惟和兄弟

至京師

蘇弘家民部邀飲烟水亭

陸開府招飲滕王閣

壽吳大司馬

秋日陳女大振狂幼孺子卿袁無競集徐

惟和與公綠玉齋時子卿歸自長安幼

孺歸自吳興與公將游秣陵余將以使

事之澗

哭舒孺立太史二首

送王民部督餉還 朝便道省覲

九日張叅知邀飲峴山

峴山

謝在杭法曹邀遊道場山分得微字

過歸雲菴弔孫太初山人

武林訪黃白仲

送孫秀才南歸

送興公遊雪川

贈陳思貞太守

陸履素轉運邀飲湖上

昭慶寺訪僧不遇

過表忠觀

答贈楊思說丈人

哭季先生少司成

同白仲玉生再過龍井時白仲持戒

謁岳武穆墳

南屏寺

連以善明府邀飲半月泉

松雲菴絕頂劉令君同遊

送典公南歸

除夕平湖署中遇雨時將有鹽官之役二  
首

出塞

鄭翰卿山人行邊歸賦贈

登秦住山

元夕宴集烟雨樓

寄陳子翼

天寧寺後有漢嚴助太守墓

題黃葵陽先生齋頭古松

康元龍歸自靈州賦贈

同臧晉叔博士康元龍秀才遊南湖

吳太學園林看梅

三日同王彥貽鴻臚顧子開太學張元春  
茹懋集山人遊惠山二首

三月晦日同王彥貽顧子開王太古彭興  
祖集鄒彥吉齋居

游水簾洞

宿萬年宮

壽車子仁守君

七夕邀余宗漢諸子宴集玉皇閣

新秋鄧都護邀飲隣霄臺留別社中諸子

康孟擔山人過訪答贈

江上別諸兄弟

九日同曹子念集王百穀南有堂

同魏計部遊虎丘

十日泊舟寒山寺張幼于追餞寺中同王

百穀曹以新黃道元分得臺字

過淮陰

無題爲陳伯孺賦

過清河聞河工告成恭紀二首

對鏡

歌風臺

謾興

次固節驛寄翁兆震葉進卿二太史

送楊民部督餉還蜀

送陳士文廣文之介休

蘇弘家民部小集齋中

送張太守之嘉興

送莊山人之北平

集萬駙馬新園

送劉太守之叙州

送張憲副之陝西

送三叔廣文之壽昌

送蘇弘家榜士黔中

送何僉憲公露之豫章

送余憲副之粵

送楊憲副之山西時余有嶺南之役

過庾嶺

鎖院

中秋

登五層樓望海作

海上逢丁右武憲副投贈

送鄧刺史之沔陽

送陳七之吳楚

湖口阻風張明府邀同楊太史戴給事宴

集江干

送孫民部出守潞州

送王民部督餉之上谷

送許民部出守寧國

送蔣四還閩

送張叔弢明府之長樂

送葉明府之程鄉

送戴給事謫百粵

送李太守之麗江

送鄭女孚廣文之寧化余將出督通州

送陸纂父山人歸洞庭

送王典客請告歸梁谿

送張叔誠僉憲之山西

送彭太守之福州

送王將軍出鎮漁陽



送宣兒南還

寄陳壻仁祖

潞河署中寄林熙吉熙工

送柳陳父山人還廣陵

九日同王君密曹能始眺潞河城樓

戊戌除夕

元日

元夕程將軍宅上賞燈

送包將軍入領京營

胡元瑞孝廉過訪二首

題東溟奏捷卷二首

送胡計部權稅九江

寄別王君密計部

別潞河諸公

別盛太古

別葉進卿

舟中謾興

謁留侯廟

少宰孫公邀遊梁溪賦謝二首

強善長山人邀遊石湖尋吳王故蹟同錢  
象先彭興祖二山人彭次嘉朱善侯二  
太學王房仲茂才分賦得何字

王彥貽典客六十初度

答郭張虛太學

度杉關

壽施封君前建州司馬

送施水部之留都

過醴陵贈王子孟箕同年

遊嶽麓

伏波廟

碧雲洞贈龍刺史

題陳中丞平蠻冊五首

下邳漫興爲陳壻克何賦

西樓全集目錄卷六終

西樓全集卷六

閩中鄧原岳汝高著

門人韓日纘緒仲訂

仲子慶霖編次

七言律詩

同葉進卿太史陳振狂山人袁無競茂才

集越王臺

西風載酒共登臺萬里寒光照舉杯江上烟波  
雙鳥下天邊雲樹片帆迴疎林歲晏飛黃葉古

殿年深鎖綠苔今日尊前須盡醉不堪惆悵霜  
圖灰

集林氏池亭

芳原霽色淨無塵出郭何妨載酒頻三逕烟霞  
還對客一丘風月獨宜人平蕪渺渺雲邊遠古  
木陰陰雨後新纔到習池拚酩酊可堪倒着白  
綸巾

送陳元功孝廉北上

翩翩疋馬傍天涯雨雪蕭條惜別時無柰青山  
爲客久更堪白鴈向人悲江城霜下聞砧急出  
水風寒鼓棹遲我亦周南暫留滯驛樓臨發重  
淒其

壽周令君

南山霽色曉氤氳北海尊開落紫雲丹竈欲尋  
句漏令幔亭先謁武夷君齋頭碧草春前滿座  
上瑤琴月下聞見說政成多暇日風流仙吏更  
誰群

送李選部謫茶陵

憐君謫宦滯天涯此去三湘客路賒水鏡舊稱  
山吏部風流還說賈長沙黃陵廟裏花應發嶽  
麓峰頭景易斜杯酒不堪頻惜別臨岐目斷五  
雲車

發三山鄉先輩出餞答謝

謾勞車蓋集河梁惜別殷勤酒一觴鄉里舊稱  
詩社長衣冠今見丈人行折來楊柳寒猶結落  
盡梅花春未央南北風烟徒極目三山雲樹正  
蒼蒼

發芋原別諸同社

江上霜飛江水寒空令身世繫微官孤帆渺渺  
山光暮短褐蕭蕭雪片殘此日交情憐對酒他  
年客况寄加餐攬槍未落天東北悵望人間行  
路難

寄題林志宸進士樓居

憐君小隱傍青山水竹平分野色閒逕窄但容  
飛鳥過樓空不礙白雲還經年習靜唯高枕長  
日清齋獨閉關莫謂江湖須遠志便將簪紱謝

朝班

擬過古戰場

平原一望思堪迷沙漠無人去鳥低殘壁如聞  
山鬼哭荒營惟有野狐啼秋風處處摧楊柳夜  
雨年年長疾藜白骨孤魂多少恨烽烟還照薊

門西

茶洋驛遇雨答葉進卿太史見懷之作

蒼峽西連古驛樓蕭蕭風雨颯成秋白雲芳草  
他山路獨鴈空江故國愁是處登臨懷短劍頻  
年踪跡嘆孤舟玉堂詞客空相憶不見關門紫  
氣浮

重過武夷山

昔年曾汎木蘭舟今日逢春感舊遊客路漸驚  
芳草變仙臺長爲白雲留山山烟暝時疑雨曲  
曲溪寒祇似秋玉檢瑤函應可問人間還許見  
丹丘

雨中同王玉生憇天游觀

仙觀岩崑入杳冥千盤鳥道廠雲屏虛疑天鏡

憑香閣似有虹橋落幔亭檻外溪流春更碧雨  
中山色曉逾青到來不隔尋真路偃蹇人間笑  
客星

蘭谿舟中答贈王永叔進士

回首春江共渺漫扁舟風雨路行難紫雲望斷  
千峰暮白雪飛來四座寒澗口灘聲隨解纜石  
梁山色入憑欄時永叔歸天台天邊楊柳勞相憶蕭瑟  
長條不忍看

西湖贈楊思說先輩

六橋春色正芳菲尊酒邀歡興不違楊柳却尋  
天竺去桃花如在武陵歸斜陽寂寂湖光遠平  
野蒼蒼樹影微聞道丈人耽勝事扁舟到處卽  
漁磯

送林叔度山人歸莆

若爲飄泊老風塵却喜還家及早春馬首千峰  
殘雪路天邊獨鳥倦游人孤齋酒熟誰同醉三  
徑花開不是貧招隱詩成能寄遠更堪南望柳  
條新

天竺

遙憐天竺最高峰回首烟霞幾萬重  
旛影飄搖朝禮塔香風縹緲晝聞鐘  
荒林草隱三生石絕澗泉流九里松  
此地前朝曾駐蹕只今雲氣傍飛龍

紫陽洞

古洞谿衍鎖白雲壇前重拜紫陽君  
孤峰忽傍吳山出片石還從竺國分  
日影倒窺晴縹緲露華遙綴晝氤氳  
真仙羽化空遺蛻目斷青天鸞

鶴羣

寄公朗和尚

瓢笠蕭然絕世氛尚餘幻跡在人羣  
開池洗鉢閒清晝掃地焚香禮白雲  
趺坐曇花天外落經行仙梵月中聞  
也知開士幽居好况復支公雅好文

寄王百穀

江烟江水湛悠悠此日看山過虎丘  
芳草欲尋揚子宅春風還憶仲宣樓  
鶯聲茂苑堪携酒柳



葉橫塘且繫舟爲報小山休謝客平生踪跡自  
滄洲

同玉生游虎丘

尊酒從容問虎丘楓橋春水木蘭舟講經臺古  
禪機寂試劍泉寒霸氣收拄杖烟霞縈碧落凭  
欄雲樹澹滄洲江魚塞鴈無消息長路關心雙  
淚流

同毛豹孫王玉生二山人過王百穀半偈  
菴值其持戒出伊蒲相餉卽席賦此

信宿蘇臺春可憐正逢居士禮金仙客來分供  
桑門饌老去勤修菩薩緣梵閣雲開傳半偈法  
筵日麗見諸天浮生自覺渾無定借得蒲團一  
問禪

同王彥貽鴻臚顧少玄盛倣吾二山人憇  
鄒彥吉先生鬯閣

怪來爽氣滿吳關傑閣憑陵霄漢間藝苑風流  
依白社宦途消息付青山泉聲似向梁溪咽雲  
影遙從震澤還此地卽同揚子宅千秋玄草幾

時刪

舟次延陵得彥吉先生贈詩賦答

艤棹江干日欲低  
毘陵城外草萋萋  
五雲忽借孤帆色  
雙鯉還將尺素題  
歸去枌榆宜結社  
春來桃李自成蹊  
殷勤寄與梁溪水  
愁絕征鴻獨向西

王莊驛和曾舍人壁間作

疋馬栖栖向此過  
長途客況欲如何  
荒村歲歉人烟少  
古驛春深柳色多  
北望雲山迷朔漠  
南

來風雨暗關河  
舍人憂國情偏切  
是處還應對

酒歌

彭城

彭城山下古徐州  
霸業銷沈水自流  
大澤西連春草合  
沛宮東峙夕陽愁  
天邊楊柳臨官渡  
馬首烽烟直戍樓  
風景蒼茫傷往事  
旅嵬一倍長  
離憂

滕陽寫懷呈同年趙仲一令君

山色蕭蕭落日黃  
西風驅馬入滕陽  
但言地主

能留客何處天涯得望鄉驛路頻驚楊柳暗征  
途還值歲年荒鷺花寂寞春光暮萬事艱難兩  
鬢霜

寄劉沈丘先生

春風桃李本無言十載終銜國士恩雙鳥只今  
縈夢寐尺書還許問寒暄天回嵩少羲陵出漲  
入黃河潁水渾時事艱危堪涕淚側身南望更  
銷魂

客中送人入蜀

若爲衰鬢滯天涯况值春風送客時馬首飛花  
過益部雲邊落日見峨眉征途冉冉蘼蕪盡野  
店依依楊柳垂最是尊前各分手鷓鴣聲裏共  
凄其

平原同林謹任都諫宴集李莘聘民部衙  
齋

草閣陰森春事微使君邀客解征衣天連雉堞  
鳥爭下水落魚梁花亂飛仗外雲收殘照入柳  
邊風起晚涼歸莫言十日平原飲滿眼烟塵未

息機

三月晦日舟宿安德憶惟和兄弟

西風一葉滯黃河古渡寒烟向晚多別後青山  
惟夢到天涯芳草柰愁何客心已逐殘春盡夜  
思還隨逝水過海上故人相憶否年來雙鬢笑  
婆娑

至京師

春風驅馬入長安淡蕩飛花照客鞍縹緲禁鐘  
天外度參差御柳霧中看玉河故遶宮墻出金  
掌遙臨仙仗寒記得甘泉曾獻賦袞衣如在五  
雲端

蘇弘家民部邀飲烟水亭

何來征節駐江干水閣招邀只暫懽雲黯匡廬  
常作雨潮回湓浦忽生寒千層山翠搖飛蓋一  
帶波光落倚欄今日潯陽愁送客琵琶淒切不  
須彈

陸開府招飲滕王閣

章江東去怒潮回帝子樓臺亦壯哉謾說風流

還此地但經銷歇不勝哀西山雲散滄洲出南  
浦風高白雁來自是中丞能愛客賦成終愧大  
夫才

壽吳大司馬

百粵功成蚤乞身簡書鄭重主恩頻西南邇  
歲還多事出處如公有幾人在昔冠袍依日月  
於今劍舄動星辰東山遠志終無恙莫把閩江  
作涓濱

秋日陳女大振狂幼孺子卿袁無競集徐

惟和興公綠玉齋時子卿歸自長安幼孺  
歸自吳興興公將游秣陵余將以使事之

澗

高齋雨過散秋雲三逕蕭條易夕曛雙劍相逢  
憐去住尺書何處寄殷勤門雁向閩山落白  
下江從浙水分唱罷陽關各南北城頭哀柝豈  
堪聞

哭舒孺立太史二首

濟上悲風吹素車側身西望更躊躇空聞詞賦

傳天祿不見文章典石渠萬里凝烟丹旆遠千  
山落日白楊疎桂林處處猿啼慘極目愁雲繞  
故墟

其二

淮陽別去幾年餘尺素時時慰索居百粵川原  
真憶女七閩風雨更愁予碧山已謝焚魚後綠  
鬢還驚賦鵬初蘭玉蕭條無可問中郎空復有  
遺書

送王民部督餉還朝便道省覲

木落津亭送使槎五雲回首卽天涯頻年澤國  
聞搜粟此日秋風憶及瓜湖上霜清悲鼓角江  
干水漲冷蒹葭知君過里承懽日椒酒遙應對  
菊花

九日張叅知邀飲峴山

九日風高烟樹秋黃花爲愛峴山幽登臨却喜  
從初地眺望還同到十洲絕壑東迴殘照入平  
湖西去片雲收故園別後無歸雁醉把茱萸不  
柰愁

峴山

碧浪秋光清可憐  
峴山風景太湖邊  
虛堂雲黯前朝寺  
斜日帆歸何處船  
十里菰蘆依積水  
萬家桑柘散晴烟  
回頭舊跡俱零落  
芳草殘碑空昔賢

謝在杭法曹邀遊道塲山分得微字

林端香氣遠微微  
迸水澗潭冷照衣  
雙屐却隨飛鳥去  
一尊相對老僧依  
池光黯淡含空翠  
塔勢峻嶒挂落暉  
佛地由來有興廢  
浮雲真覺世

終非

過歸雲菴弔孫太初山人

金風蕭瑟正秋殘  
客到荒林獨倚欄  
黃葉飛來禪榻冷  
白雲歸處衲衣寒  
空堂香火遺僧在  
半世風流斷碣看  
薦罷江蘼更惆悵  
太湖西逝路漫漫

武林訪黃白仲

故人相見各依依  
客裏秋風木葉飛  
但說窮來還有劔  
誰憐病後更無衣  
山將天竺三供游  
屐水

借西湖作釣磯知爾盡忘人我相不須惆悵世  
情非

送孫秀才南歸

客棹遙從江上來離筵別酒忽相催錢塘潮縮  
月初落劔浦霜高雁獨迴楊柳折殘愁解纜芙  
蓉開遍罷登臺吾家小阮如相問宦計艱難愧  
物猜

送興公遊雪川

客子將行怨路岐江頭哀雁不勝悲名高更覺  
逢迎懶家近何妨歸去遲松雪宅荒泉遶戶道  
場山廢草生池君今且醉烏程酒萍水相逢未  
可期

贈陳思貞太守

老厭風塵便乞閒更餘踪跡在人間移來南郭  
宅三畝借得西湖水一灣採藥祗應尋寶笈著  
書端合託名山瓊臺石室多仙籍此地從君問  
大還

陸履素轉運邀飲湖上



湖上霜清木葉凋，攜來尊酒共蘭橈。  
南屏雨霧鐘聲杳，上竺雲連塔影搖。  
水暗蒹葭迷斷岸，夜闌燈火泊荒橋。  
使君自負烟霞癖，不厭尋山十里遙。

昭慶寺訪僧不遇

萬頃平湖生紫瀾，琳宮傑閣坐來看。  
月明夜半聞仙梵，雲散天中出戒壇。  
旛影遙連三竺遠，塔光高映兩峯寒。  
木魚聲斷袈裟冷，不見彌天釋道安。

過表忠觀

一畝荒祠卽故丘，越王香火此湖頭。  
水犀獨擁三千卒，裘馬橫行十四州。  
畫戟秋風栖鳥雀，空山夜雨冷松楸。  
英雄已去殘碑在，山下寒泉空自流。

答贈楊思說丈人

自是青衫一孝廉，湖山容與歲將淹。  
携來畫舫新茶竈，吟對春風舊酒帘。  
開逕不妨詞客過，爲園一任老夫潛。  
更堪繞膝文星聚，百里還符太

史占

哭季先生少司成

天上俄傳記玉樓文星此日暗中州可憐逝水  
浮雲散况是繁霜落葉秋帆過延津疑化劍天  
低汝穎嘆藏舟招魂賦罷頓回首萬事淒涼自  
白頭

同白仲玉生再過龍井時白仲持戒

杖屨重來叩白雲隔林梵磬已先聞僧緣淨業  
多栽竹客有清齋不如葦絕壑風高惟落葉空  
山人靜自斜曛最憐洗鉢泉如玉一歌從教斷  
世氛

謁岳武穆墳

星落轅門鼓不鳴誰從四海問干城金牌晝出  
甘和虜鐵騎宵馳竟罷兵淚盡屬鏤猶帶血夜  
闌刁斗尚聞聲孤墳獨對西湖水春去春來草  
自生

南屏寺

千林蕭瑟動微霜禮佛還應到上方日落烟迷

羅漢殿月明雲閉贊公房人來下界傳僧梵客  
過南山說道場更向蓮花峯頂望六橋衰柳帶  
斜陽

連以善明府邀飲半月泉

小逕松陰閉沈窅半規法水坐相邀初疑月影  
依潭淨忽聽潮音度海遙梵唄傳來空寂寂旛  
幢飛處自瀟瀟尊前況對神明宰一片塵心向  
此銷

松雲菴絕頂劉令君同遊

颯颯江風吹暮寒松濤蕭瑟臘初殘天低西北  
吳山迥雲霽東南震澤寬水國烟霞依淨土下  
方鐘磬落經壇悟來已自輕軒冕真諦還應問  
宰官

送興公南歸

一逐西風問蒨緜囊中畱得鷓鴣裘可堪雨雪  
逢殘臘況對梅花憶故丘繫馬橋邊人解纜打  
冰河上客停舟天涯我亦悲搖落夢斷滄江蘆

荻洲

除夕平湖署中遇雨時將有鹽官之役二  
首

旅况蕭條漏未央且將殘燭送年光  
蒲城簫鼓還除夕何處風烟是故鄉  
歲晏梅花消積雨春回草色耐微霜  
椒盤綵勝誰相問明日鹽官路渺茫

其二

燈影幢幢閱曙更天涯殘臘若爲情  
屠蘇家醉春前酒爆竹人喧雨裏聲  
日月銷人催短髻乾坤作客傍微名  
城頭極目王孫路一夜東風草又生

出塞

年年虜騎犯陰山十萬征人戍未還  
城外揚旗風獵獵隴頭磨劍水潺潺  
烽烟直照飛狐塞亭障齊開倒馬關  
邊帥可憐頻獻馘不知鼙鼓幾時閒

鄭翰卿山人行邊歸賦贈

憐君作客向邊州結束西行只敝裘  
雪暗關山

歌出塞月明沙磧賦登樓五更殘角雞聲曉萬  
幕連營馬色秋去國十年今暫返逢人猶自說  
吳鈞

登秦住山

怒濤風捲雪山開曾道秦皇駐輦來黃屋至今  
臨海嶠翠華終自隔蓬萊空聞螭紐傳天璽不  
見魚膏照夜臺千載興亡一回首松風蕭瑟使  
人哀

元夕宴集烟雨樓

蕭蕭宿莽暖空洲傑閣平臨湖水頭火樹正當  
春夕永星橋還帶暮雲流踈鐘月落僧歸院平  
野風高客倚樓此地相逢拚一醉良宵尊俎暫  
淹留

寄陳子翼

三年襜被客長安短劔應嗟行路難慟哭只今  
憐阮籍悲歌何處弔燕丹漢宮棄置蛾眉老易  
水淒涼馬骨寒莫向市中頻擊筑風流寧作酒  
人看

天寧寺後有漢嚴助太守墓

一麾原自厭承明詞賦翩翩舊漢京物化千年  
餘朽骨魂來何處有荒塋空林鳥過松楸靜永  
夜僧歸鐘磬聲莫道一杯還佛土茂陵衰草不  
勝情

題黃葵陽先生齋頭古松

碧山學士焚魚後舊物猶存三逕松老幹參差  
偏宿鶴疎枝偃蹇欲成龍亭亭却似峯頭見鬱  
鬱還疑澗底逢耐可齋居伴幽獨春風載酒莫

辭從

康元龍歸自靈州賦贈

靺鞨宵馳西度關朔風吹雪滿刀環檄傳塞外  
諸蕃靜獵罷軍前一騎還隴水尚依靈武郡秦  
雲遙挂賀蘭山由來豪氣侵人甚歷盡邊烽意  
自閒

同臧晉叔博士康元龍秀才遊南湖

東風邀客汎雲槎十里平湖抱郭斜梅爲疑寒  
遲破萼雪緣漏日不成花鐘聲隱隱它山寺樓

影層層近水家我欲涉江采蘭芷前林昏黑已  
棲鴉

吳太學園林看梅

水國春寒花事遲隴梅初放向南枝孤芳疑是  
羅浮到雙樹原從庾嶺移竹外流雲開逕處林  
端飛雪倚欄時醉來燒燭還堪賦莫待漂零笛  
裏吹

三日同王彥貽鴻臚顧子開太學張元春  
茹懋集山人遊惠山二首

泰伯城邊新柳黃梁鴻溪上故祠荒一時風景  
春如舊三日招攜醉不妨別浦烟迷葭菼亂名  
園水遶李花香永和勝事那堪問回首蘭亭亦  
渺茫

其二

萍跡相逢絕可憐芳晨况是艷陽天水邊佳麗  
人如玉座上風流客似仙法界松濤依梵磬講  
臺花雨淨寒泉酒闌解纜還惆悵十里青山空  
暮烟

三月晦日同王彥貽顧子開王太古彭興  
祖集鄒彥吉齋居

笠澤湖邊問釣磯  
堤頭楊柳正依依  
鶯聲已逐東風老  
草色空憐客鬢稀  
三逕雲迷踈雨過  
前林日落野花飛  
一時傾蓋須拚飲  
莫管春光歸不歸

游水簾洞

石室逶迤卽洞天  
朱闌曲曲白雲連  
千厓飛瀑四時雨  
百丈流泉一道烟  
月映空山驚散綺  
風來清峽聽鳴絃  
神仙壑宅原如此  
方丈蓬壺何處邊

宿萬年宮

青山隱約傍精廬  
十里烟霞縱目初  
洞口瑤函原漢代  
峯頭真蛻是秦餘  
空壇月出聞吹笛  
午夜風高引步虛  
石榻淒清渾不寐  
神遊謾說化人居

壽車子仁守君

南國風流自楚才  
分符還傍越王臺  
朱輪日映



雙旌動黃蓋雲隨五馬來官閣陰濃丹荔熟佛  
筵香度白蓮開尊前更有金莖露願借餘觴作  
壽杯

七夕邀余宗漢諸子宴集玉皇閣

鼇頂雲開俯大荒松風謾謾動微涼銀河水淺  
星初渡瑤閣秋清漏未央客夢遊仙齊授簡人  
來謁帝謾焚香也知萍跡多離合莫向樽前不  
盡觴

新秋鄧都護邀飲隣霄臺留別社中諸子

秋烟曉霽散芙蓉檠戟遙臨薛老峯芳草頻年  
空惜別青山何處復相逢千家日落愁砧杵古  
寺風來送梵鐘便道出山還遠志故人莫笑宦  
情濃

康孟擔山人過訪答贈

天涯漂泊意何如策馬南來問索居踪跡祗宜  
依短褐風塵耐可曳長裾三山烟景銜杯外九  
漈溪聲把釣餘北客只今傷遠別白頭無計返  
樵漁

江上別諸兄弟

勲業蹉跎鬢已絲更堪短劔傍天涯十年聚散  
憐兄弟千里風塵惜別離解纜正當春漲後懷  
人况值雁來時閩南薊北傷心地回首東山有  
所思

九日同曹子念集王百穀南有堂

江上西風吹布袍停舟聊復問蓬蒿地同南郭  
先生隱人比柴桑處士高囊裏紫萸堪對酒尊  
前黃菊謾題糕天涯節序摧搖落回首風塵心

獨勞

同魏計部遊虎丘

西風蕭瑟晝冥冥彩鷁南來此暫停幸對清尊  
逢九日謾勞紫氣卜雙星宅傳短簿雲迷塔堂  
記高僧月滿庭金虎消殘秋草沒忍將遺事問  
山靈

十日泊舟寒山寺張幼于追餞寺中同王  
百穀嘗以新黃道元分得臺字

楓橋水漲客帆開遲爾輕舟破浪來但說白衣

能送酒忍看黃菊更登臺風幡寂歷寒燈暗霜  
葉蕭疎候雁催此地悲秋仍惜別一尊相對不  
勝哀

過淮陰

川原迢遞客魂銷落日孤帆轉寂寥十月霜寒  
魚穴閉九河風緊雁書遙愁雲故遮田橫國衰  
柳猶依韓信橋惆悵英雄隨逝水淮陽城外草  
蕭蕭

無題爲陳伯孺賦

回頭不見武陵春一種風流別可人斷袖更憐  
香未歇同車真覺寵猶新風吹羅綺傷心盡月  
射攏瑜入夢頻總爲情多難忘却淒涼楚水隔

吳津

過清河聞河工告成恭紀二首

聖祖園陵奠泗濱百川長護屬車塵艱虞正念  
衣冠地開濟誰當社稷臣高闕廻翔龍甍月濁  
流安穩鶴河春年年霜露還供奉極目祠宮草  
色新

其二

黃河水漲入淮陰處處荆榛嘆陸沉 帝寢不  
移清漏靜天山依舊翠華臨老臣拜命俱拖玉  
小吏蒙恩也賜金 聖主無勞更南顧陵前松  
栢轉蕭森

對鏡

霜風蕭瑟歲將陰小邨官階嘆滯淫祇爲旅顏  
愁對鏡其如短髮不勝簪懷人却憶枌榆社處  
世空悲荆棘林白是微名銷傲骨可堪墮落到

于今

歌風臺

漢祖歌風只舊臺雄圖零落委荒苔百年父老  
思湯沐此日樵蘇問劫灰樊巷有碑秋草沒沛  
宮無主野花開眼前壯士今何處寂寞長陵鳥

雀哀

謾興

客路蕭條歲欲闌風塵西北隔長安小臣爭說  
開山易大匠寧知採木難河上風高將結凍舟

前日落更疑寒憂時局促真無計獨抱瑤琴不  
忍彈

次固節驛寄翁兆震葉進卿二太史

征輶去國動經年歷盡風霜黯自憐京邑正當  
三輔地帝城遙在五雲邊南冠憔悴終思越  
短劔漂零再入燕爲語長安舊知己蕭蕭華髮  
已盈顛

送楊民部督餉還蜀

使君乘傳急巡邊詔給司農十萬錢塞上風塵  
愁遠道客中鄉思動新年江橫灩澦驚濤險路  
入峨眉積雪妍堤柳未舒難折贈臨岐立馬倍  
堪憐

送陳士文廣文之介休

西河形勝倚雲中人自談經識馬融短劔到來  
新宦轍寒氈憶得舊門風禁烟此日餘空谷避  
暑當年有故宮湖海襟期君自見不才吾已老  
墻東

蘇弘家民部小集齋中

日斜走馬散衙歸窮巷蕭蕭靜掩扉佐客不愁  
官俸薄爲郎翻覺宦情微春深御苑鶯初入雲  
繞宮墻燕自飛濁酒一杯堪慰藉莫令塵土化  
緇衣

送張太守之嘉興

秀州形勝自西吳出守居然漢大夫千里乘麻  
無隙地萬家絃管是名都鐘聲隱見城中寺樓  
影參差郭外湖記得去年曾駐節舊題今日已  
模糊

送莊山人之北平

都門三載困風塵恠得年來鬢髮新草屨艱難  
還作客蒯緱蕭瑟向何人灤河路繞盧龍塞碣  
石雲連白馬津君去試看東海上島夷何事不  
稱臣

集萬駙馬新園

主第新開 帝苑東西山爽氣有無中疎篁影  
細朱闌繞垂柳陰濃曲巷通名馬賜來金作埒  
御花分得錦爲蓑風流况是秦蕭史一曲吹成

月在空

送劉太守之叙州

金魚朱紱借輝光五馬踰蹊蜀道長溪漲繞山  
邛竹老江城臨水荔枝香雙流北出兼夷部九  
姓西連卽夜郎自是懷柔需遠畧使君慎莫厭  
殊方

送張憲副之陝西

都亭送客柳絲長握手踟躕不盡觴千里金城  
新建節十年粉署舊含香漢朝宮闕青門外秦

地山陵素澹傷分陝可知明主意古來形勝  
說咸陽

送三叔廣文之壽昌

蚤歲譚經鬢已華青氊南去道途賒千層華蓋  
當門出十里桐江帶郭斜徑掩蓬蒿長謝客厨  
甘苜蓿不携家竹林把臂知何日荏苒天涯又  
落花

送蘇弘家杪士黔中

東曹暫輟度支章五月驅車過夜郎只爲掄才

勞使者不妨攬勝入蠻荒地兼夷獠風烟異天  
盡西南驛路長莫道羅施原鬼國 聖朝文教  
遍殊方

送何僉憲公露之豫章

誰從傾蓋借風流忽忽分攜不自由五月關河  
楊柳驛三江烟雨荻蘆洲真人鐵柱宮仍舊帝  
子朱甍閣尚留君去外臺稱執法古來重鎮是  
南州

送余憲副之粵

翩翩憲節出都門朱芾金魚 聖主恩嶺表去  
家千里近南中開府百城尊椰陰遍野山嵐暗  
蜃氣當衙海市喧見說霸圖零落盡尉佗舊蹟  
不堪論

送楊憲副之山西時余有嶺南之役

蕭蕭涼雨颯如秋白馬宵馳肯暫留汾水樓船  
行建節壺關鼓角坐鳴騶十年郎署元高第三  
晉侯封本上游我向日南君向北片鴻何地問  
遼州



過庾嶺

層厓疊嶂鎖崔嵬使節翩翩擁傳來越徼烽烟  
銷漢戍庾關壁壘變秦灰山從故相祠前斷  
有張曲江祠堂水到蠻王墓口回遊子可無詩興動傷  
心不見嶺頭梅

鎖院

帝遣掄才此一方南天秋色曉蒼蒼山深月落  
銅壺靜地迴風清画角長海底珊瑚寒自媚雲  
間奎壁爛生光縱橫彩筆紛如許過眼休迷古

戰場

中秋

一天霽景淨無塵叢桂香飄玉漏頻碧落芒涵  
雲五色紫霄光擁月重輪霓裳縹緲虹橋合蜃  
氣微茫海市新欲向鴻都問仙客前身我亦弄  
珠人

登五層樓望海作

層樓一眺暮雲平談笑真疑逼太清島嶼烟銷  
看日落海門月出見潮生荒丘不辨任囂塚斷

甓猶傳陸賈城此隔三山應不遠纔過弱水卽  
蓬瀛

海上逢丁右武憲副投贈

海上秋高椰葉陰客中相見倍沉吟丹書不雪  
孤臣憤華髮難忘壯士心關塞烽烟聞北伐樓  
船消息急南侵知君雅負匡時策莫向西風思  
故林

送鄧刺史之沔陽

獨憐製錦舊風流此日分符控上游江漢今登  
湯沐邑荆襄原屬帝王州黃蓬路繞京山遠夢  
澤雲連郢樹秋白雪歌殘遺址在不妨官暇一  
登樓

送陳七之吳楚

征車憔悴逐風塵况復臨岐送故人握手一杯  
仍戀別防身三尺不愁貧狂吟太岳峰頭月醉  
狎長干曲裏春只恐蘆中蓼桂老白雲蕭瑟水  
粼粼

湖口阻風張明府邀同楊太史戴給事宴

集江干

征輶北指雁南翔極目風塵太渺茫  
偶爾尊壘成勝會到來冠蓋是同鄉  
江干激雪寒濤白湖口飛沙野日黃  
咫尺關河成阻隔逢人不敢問  
潯陽

送孫民部出守潞州

一麾今喜得專城朱綬翩翩出漢京  
上黨西連漳水繞壺關東峙衛河迎  
花明露冕春相麗風靜鳴笳夜不驚  
聖主由來重邊郡知君年少

負時名

送王民部督餉之上谷

自是風流粉署臣何卑執戟嘆前薪  
十年飛輓仍多事此日籌邊合有人  
上谷山川空朔漠雲州城堡本西秦  
從來經國推方略一笑還須靖虜塵

送許民部出守寧國

駉驪五馬夾雙旌漢吏循良蚤著聲  
東省勤勞推計部南方財賦重宣城  
碑埋石谷空留墨洞

入蓮峯不記名君自多才饒臥理從教閉閣謝  
逢迎

送蔣四還閩

十年裘馬夢長安襪被南來耐歲寒博物幾時  
收汲冢懷人何地弔燕丹雌雄劔去防身拙子  
母錢空作客難滿目風塵悲遠道回頭芳草路  
漫漫

送張叔弢明府之長樂

張前爲昌  
化校官

都亭立馬悵風沙落日垂楊滿路花同籍弟兄

燕市酒異鄉山水廣南槎溪頭蠻女驚行旆海  
外儒生望絳紗咫尺羅浮煩問訊更憑仙令乞  
丹砂

送葉明府之程鄉

出宰都嗟嶺海遙天涯相送乍魂銷願加餐飯  
頻防瘴欲問鄉書只候潮門外腥風吹牡蠣齋  
頭涼雨暗芭蕉亦知井邑凋疲甚不比從前說  
富饒

送戴給事謫百粵

平生孤憤舌空存咫尺風沙晝日昏  
焚草豈能忘納牖種蘭元自忌當門  
雲蒸八桂無歸鴈地逼三湘有斷猿  
屈指賜環非遠事不須惆悵更銷魂

送李太守之麗江

拜命新分紫誥來一麾還借使君才  
左江西去蠻天盡南粵秋高瘴霧開  
蛤蚧聲喧人臥閣刺桐花暝客登臺  
他鄉厭聽陽關疊愁絕河橋數舉杯

送鄭女孀廣文之寧化余將出督通州

纔到都亭便可憐更堪風雨柳凝烟  
千時真愧屠龍劍問渡猶餘飲馬錢  
故國諸生趨絳帳宦途十載傍青氈  
我今亦隔春明路欲寄音書何處邊

送陸纂父山人歸洞庭

年來作客狎燕關回首鄉園夢寐間  
桑柘陰連京口渡楊梅香撲洞庭灣  
孤齋宴坐唯聞水三逕開成不下山  
他日期君共栖隱莫論婚嫁幾

時閒

送王典客請告歸梁溪

六月燕山楊柳垂數聲啼鳥雨如絲卽看執戟  
金門下忽漫揚舲潞水湄綠鬢正當休暇日斑  
衣況是晝游時浮雲西北應回首莫學梁鴻賦  
五噫

送張叔誠僉憲之山西

幾年同隸大司農此別雲山不易逢官是外臺  
猶執法地當三晉本俟封驅車徑問黃河渡行  
部先經白馬峰使節到來唯坐鎮北庭今已息  
邊烽

送彭太守之福州

新秋殘暑潞河邊柳岸西風咽暮蟬惜別莫忘  
傾蓋日計程應憶授衣前越王城北山相對薛  
老峰頭雲可憐鄉里頻聞憂水旱單車到處卽  
豐年

送王將軍出鎮漁陽

塞外烽烟急薊門東方今見建牙尊前旌到處

風雲變萬幕移來鼓角喧雪夜傳餐猶轉關春  
陰堅壁且分屯腰間更有橫磨劍血戰終當報  
主恩

送宣兒南還

漁陽霜冷鴈南飛滿目風塵送女歸薄俸那堪  
多口累浮生已覺十年非他家門第羞紈袴窮  
巷兒郎愛布衣莫學五陵游俠子但將裘馬逐  
輕肥

寄陳壻仁祖

八口羈栖潞水濱髣毛蕭瑟老風塵移官竟作  
倉曹長對客空餘草澤身南國商車征歛急東  
方軍檄輓輸頻干戈滿地雲山遠雙鯉何由寄  
所親

潞河署中寄林熙吉熙工

潞河秋色轉蕭騷躑躅風塵感二毛官自米鹽  
寧免俗地多車馬不辭勞書來隔歲心堪折雁  
去遙天首獨搔苦憶翠旗山下路滄江烟雨繫

漁舸

送柳陳父山人還廣陵

時山人扶弟喪歸葬

西風吹斷鶴鴿羣  
永夜悲歌不可聞  
北地秋深單袷冷  
潞河天濶片帆分  
荒城野店難爲客  
落日寒山此送君  
莫道維揚纔一水  
相思已隔萬重雲

九日同王君密曹能始眺潞河城樓

客懷蕭瑟正悲秋  
醉倚危樓歌四愁  
馮翊重關今左輔  
漁陽千里古方州  
遙天去雁迷邊塞  
斜日孤烟起戍樓  
但說登高能作賦  
不須落帽見

風流

戊戌除夕

小院寒回雪未消  
殘燈一點坐清宵  
年來自覺疎潘鬢  
老去從教瘦沈腰  
栢葉春生官舍暖  
梅花香冷故山遙  
君王尚寢南中命  
頭白爲郎愧聖朝

元日

初陽律轉報芳辰  
嫋嫋東風潞水濱  
試檢曆頭還帶閏  
纔交歲首又逢春  
防身自愛魚腸舊  
閱



世誰憐馬齒新四十五年彈指過  
可堪長作異鄉人

元夕程將軍宅上賞燈

六符初報泰階平  
瀚海無波罷請纓  
虎帳春回還宴客  
轅門口晏且休兵  
燈花影射芙蓉幕  
月色陰連楊柳營  
一曲落梅人盡醉  
滿城都作凱歌聲

送包將軍入領京營

東風水解客離羣  
千騎西行接五雲  
開闔舊提游奕將  
入朝兼統羽林軍  
春回細柳銷兵氣  
日出扶桑息戰氛  
竄喜談詩還說劍  
邇來名將不如君

胡元瑞孝廉過訪二首

天涯作客任浮沈  
一出關門雨雪深  
睥睨秦庭歸白壁  
踟躕燕館失黃金  
青山自許千秋業  
華髮長懸萬里心  
傾蓋不妨頻索醉  
相思十載到于今

其二

河水未半覺春寒  
疋馬西來落日殘  
市上酒人無擊筑  
行間詞客有登壇  
滇池雁阻三湘水  
巖瀨雲迷七里灘  
莫道朋簪容易合  
路岐回首更漫漫

時元瑞還浙奈亦將之昆明

### 題東溟奏捷卷二首

狼山山下水粼粼  
猶記當年戰伐頻  
十里旌旗圍島嶼  
連營鼓角動江津  
衝鋒誰敢先嘗敵  
報國那能更顧身  
可惜功成不受賞  
黃金鵲印足何人

### 其二

蘇州刺史夙知名  
忼慨終軍獨請纓  
幕府不書青海戰  
朝廷終苦綠林兵  
崢嶸江國新祠廟  
彷彿雲霄舊旆旌  
直奉三吳作湯沐  
千秋香火闔閭城

### 送胡計部權稅九江

五老峰前江九流  
使君坐鎮古江州  
歌殘却憶潯陽夜  
興發真憐廬岳秋  
東海烽烟銷戰鬪  
南方財賦困誅求  
更聞十道中涓出  
矯首風塵不

散憂

寄別王君密計部

盧龍使者問征期正是春光欲暮時回首關河  
堪此別側身天地更何之山開越雋雲連棧日  
落昆明水滿池萬里故人勞遠夢塞鴻江草繫  
相思

別潞河諸公

幾年東省愧爲郎此別雲霄各斷腸潞水故人  
勞夢寐蠻方弟子問行藏波光滉漾翻溟海山

翠淋漓落點蒼只恐尺書難遠寄鴈飛原不過  
衡陽

別盛太古

潞河新柳綠如雲匣底雙龍忍乍分老去愧稱  
詩社長狂來聊托酒人群三春草色天涯盡一  
路鶯聲馬上聞見說滇南秋鴈少憶君何處寄  
殷勤

別葉進卿

幾年京國逐車塵萬里分携柰此身寂寞關河

寒食節蕭條鬢髮倦遊人地過湘漢征鴻斷天  
盡西南瘴草新夢隔長安書不到可堪重問帝  
城春

舟中謾興

天涯一望黯消魂况復河乾白日昏孤舫正當  
青草渡幾家同住綠楊村林間鳥雀催歸急水  
次豺狼得食喧故國雲山縈夢寐宦途消息不  
堪論

謁留侯廟

先生已從赤松去寂寂荒祠傍楚丘樊巷草迷  
屠狗宅泗亭雲起斬蛇溝一時韜畧逢真主千  
載衣冠識故侯王氣霸圖零落盡圯橋春水亦  
東流

少宰孫公邀遊梁溪賦謝二首

丘壑從容薶賜閒賦中叢桂正堪攀縱然去國  
心逾赤便道憂時髻未斑涼夜扁舟吳苑月春  
風雙屐晉陵山平生不淺江湖興家在梁溪第  
一灣

其二

清溪載酒夏雲涼五兩風來杜若香野服已忘  
元宰貴深杯不厭老夫狂千村烟火還江廓十  
里樓船是水鄉莫道昆明天外別三台星近太  
微傍

強善長山人邀遊石湖尋吳王故蹟同錢  
象先彭興祖二山人彭次嘉朱善侯二太  
學王房仲茂才分賦得何字

南風乍起水生波十里平湖幽興多茶磨山荒  
溪壑冷郊臺草暖鹿麋過天清野鳥聽歌舞日  
暮江花醉綺羅獨步蒼苔一懷古洞庭浩渺奈  
愁何

王彥貽典客六十初度

人間花甲喜初周俠氣還同馬少游好客儘堪  
隨杖屨生兒真不媿箕裘身閒擬逐山中鹿心  
靜應盟海上鷗恠爾年來饒酒德不妨老作醉  
鄉侯

答郭張虛太學

五月吳天麥秀寒扁舟風雨駐江干敢勞公子  
高軒過誰念征夫行路難是處山川供載筆何  
人詞賦讓登壇哀牢却在蠻荒外莫作譚經使  
者看

度杉關

星輶西指卽杉關客路秋風換旅顏野燒遙連  
樵水渡嶺雲橫帶建昌山酒邊祇自懷三徑天  
外何由問百蠻十載馳驅今更遠鏡中淒切鬢  
毛斑

壽施封君前建州司馬

層層蒼弁列爲屏洞口花開識歲星隱約車徒  
驚過里聯翩簪笏映趨庭吳興自管多耆舊南  
國於今有典刑曾向武夷稱吏隱幔亭幾度會  
仙靈

送施水部之留都

千旄西上儼如仙才子真同入洛年南土盡輸  
山澤賦漢廷自急水衡錢太湖百里移家近霽  
谷千盤攬勝偏誰問昆明于役吏斷鴻衰柳各

風烟

過醴陵贈王孟箕同年

萍鄉西折楚天分，迢遞關河隔暮雲。  
策馬到來尋茂宰，逢人是處說神君。  
山迴嶽麓真仙宅，水遶黃陵帝女墳。  
最恨風塵容易別，鷓鴣江上不堪聞。

遊嶽麓

南嶽飛來第幾峯，亭亭秀出玉芙蓉。  
摩空石磴三千級，拔地雲屏十二重。  
神禹碑刊殘鼎，負玄

君壇古護龜龍老，僧送客楓林下指點前山起暮鐘

伏波廟

艤棹江干落日懸，南征猶自想當年。  
功高銅柱仍如舊，詭起文犀絕可憐。  
楚澤廟荒猿嘯雨，武陵溪咽草凝烟。  
雲臺不歎嗟零落，漢時秋風亦暮蟬

碧雲洞贈龍刺史

磴道西盤萬壑趨，雲山洞澈自仙都。  
泉聲激處

還昏黑嵐氣飛來乍有無隱隱天門晴射日纍  
纍石乳暗垂珠金堂不是人間世吏隱偏宜子  
大夫

題陳中丞平蠻冊五首

年年邊徼羽書飛虎旅朝馳快指揮西海祇今  
橫殺氣南人元自畏天威陣藏魚鳥風雲變旗  
閃龍蛇草木輝樽俎更誇能料敵一時經畧古  
來稀

其二

西酋部落懼威靈絕徼關門夜不扃百濮人曾  
歸禹貢九夷版已屬虞廷烟消黑海無傳箭天  
聳玄山有勒銘十二便宜竒策在何如充國度  
先零

其三

春風習習海波迴萬里妖氛一餉開勢合川原  
真破竹烽連營壘忽成灰夷歌競奏從軍樂  
棘俗驚傳講武臺殲盡鯨鯢築京觀功成併上萬  
年杯



其四

山取水澁各從容  
荒服懽傳息戰烽  
只說椎牛還饗士  
卽看散馬盡歸農  
秋風禾黍雲邊郡  
曉日烟霞海上峯  
始信止戈元遠計  
老臣端不爲侯封

其五

九夷解辯盡來王  
重譯何須數越裳  
方物儘堪輸虎豹  
梟心真已格豺狼  
版圖絡繹歸天府  
名姓依稀入職方  
莫道承平無外懼  
杞人終自切

苞桑

下邳謾興爲陳壻克何賦

誰憐觸熱賦西征  
極目南天問去程  
衰病可堪隨馬走  
窮酸吾亦咲鯁生  
十旬不雨河流斷  
百室無烟暝色橫  
旅况蕭條惟共女  
暮蟬衰柳已秋聲

西樓全集卷六終

國家圖書館, NATIONAL CENTRAL LIBRARY, TAIWAN, R.O.C.



西樓全集目錄卷七

七言律詩

送盧將軍西征

冬日同藩臬諸公泛昆明池憇羅漢寺二  
首

旅懷四首和張肖甫大司馬壁間之作

行役曲陽留別諸寮長

湧泉寺

小憇呈貢使院亭子望海

題莫愁湖和葉少宗伯之作

駐澂江讀方子及學憲南樓觀海之作次韻懷之時子及謫守寧州

巳亥除夕

庚子元日

司署茶花盛開呈薛觀察二首

送黃憲副入賀

送孟憲副備兵曲靖

送田叅知入賀

黔國山園看杜鵑

太華寺

環翠宮謁呂祖祠

安寧溫泉

送朱職方還朝

青華洞

渡蘭津謁武侯廟

漆憲副携酒九龍池

馬氏池亭

過華亭寺

玉皇閣

寂光寺

華嚴寺閱賜藏

同漆使君宿九鼎蘭若

送梅左伯入 覲

送薛觀察入 覲

昆明池餞送魯司農歸 朝

昆明池送蔣廷評歸 朝

盧將軍割軍租助刻文選賦謝

西園賞茶花

庚子除夕

辛丑元日

送羅憲副還蜀

送簡憲副還豫章

送易叅知入 賀

送張憲副入 賀

送李闡帥入 賀

寄錢象先山人

寄強善長

寄王百穀

送杜兵憲暫還東海

送佾侍御按百粵

送王將軍入督京營

答江廷尉進之

贈包給事

送黃太僕之平涼

將發昆明別潘臬諸公

別諸生

送家兒南還

黃鶴樓二首

贈周元孚尚璽

荅任孝廉白甫

黃鶴樓邀王白岳先生作

過登之宗侯園居

贈方子公山人

黃僉憲邀同薛右丞遊赤壁

荅江進之廷尉

荅贈張太史二首時余有郢中之役

登太和絕頂四首

別三兄

禧姪新築園居寄賦

送廖希亮計部還朝

贈江茂才從其尊人入太學

送孫太守棄官歸吳

賀鄒大澤先生得子

送李將軍之清浪

胡仲脩山人以曹廷尉書見訪荅贈

荅曹能始廷尉

贈劉尉

荅余道人

壬寅除夕

癸卯元日

元夕後一日朱季則水部胡仲脩山人署

中觀燈

答贈達之宗侯

答黃叅知督餉之淮

春日朱水部胡山人眺徐將軍山亭

四月一日舟次襄陽士達宗侯出餞

送周憲副入賀

送葉時珍鄉貢秋試之京

送鄒先生之南都

答贈周承明山人

中秋陪直指應公宴明遠樓

送孫宗文太史典試歸朝

送董見心考功典試歸朝

寄劉憲副

九日謝生甫計部竇燕雲學憲同眺振衣亭

送心父四兄入覲

送女嚴五弟南還

癸卯除夕



甲辰元日

贈李本寧太史

西樓全集目錄卷七終

西樓全集卷七

閩中鄧原岳汝高著  
門人韓日績緒仲訂  
仲子慶家編次

七言律詩

送盧將軍西征

羽書傳警自西陲大將親提十萬師  
壓陣靈旗翻鳥隼奮身寶劍擁蛟螭  
牛街雲合屯營處蟒水風清破敵時  
預掃蒼山一片石爲君勒作紀

功碑

冬日同藩臬諸公泛昆明池憇羅漢寺二首

江干風露濕征袍十里鳴榔狎暮濤雲挂松林  
瞻佛閣霜清草海認漁舸憑闌萬頃霞光現隔  
岫千峰翠色高山半舊碑苔蝕盡誰從金馬弔  
王褒

其二

昆明池水直西流此日聊爲汗漫游風急任吹  
青雀舫草枯應識白鷗洲譚禪我自叅羅漢乞  
法誰當問比丘是處登臨堪一醉不知身在古

梁州

旅懷四首和張肖甫大司馬壁間之作

敢將浪跡怨飄蓬極目江山處處同未信途窮  
悲阮籍誰從文似薦揚雄小池竹籜迷疎雨荒  
徑松蘿起緒風自笑年來蕭瑟甚絲絲鬢髮已  
成翁

其二

一騎何來瘴海偏西風瑟瑟倍堪憐烏蠻久已  
歸唐朔金馬猶聞說漢年太華峰高天障日滇  
池水縮草浮烟別來舊社音書絕門下何人更  
問玄

其三

十月陰寒不奈愁南中有客獨登樓山川隔斷  
哀牢國烽火連綿慶甸州北極朝廷頻遣使東  
方將士盡封侯書生囚食真無補感事長懷漆  
室憂

其四

幾年執戟嘆逶迤莫譚經到九夷幸不移家  
無別累亦知隨俗暫相宜霜輕漸下芙蓉葉風  
急頻摧桂樹枝且學杜陵稱吏隱不妨拓落聖  
明時

行役曲陽留別諸寮長

同是天涯客裏身卽今暫別亦傷神謾從秋府  
看持憲忽向寒江獨問津驛路霜嚴惟落葉山  
城日晚不逢人茶花一樹垂垂發笑逐風塵老

却春

湧泉寺

古刹層層霄漢間上方鐘磬隔塵寰石邊水出  
僧同淨林外雲來客自閒謾說蘭亭饒勝事且  
從蓮社問名山松陰十里歸途暝醉擁籃輿待  
月還

小憇呈貢使院亭子望海

危亭半倚白雲層紫海風清一鏡澄隔岼搖搖  
歸估舶隨波隱隱渡漁燈天寒瘴薄嵐光淨日  
落烟銷水氣凝欲挂輕帆拾明月夜深零露與  
難乘

題莫愁湖和葉少宗伯之作

平湖漠漠草蕭蕭歌舞人間久寂寥水冷乍疑  
窺攬鏡月明却憶伴吹簫渚花帶雨開爭艷野  
鳥迷烟語自嬌窠有石城楊柳色春來依舊鬪  
纖腰

駐澂江讀方子及學憲南樓觀海之作次

韻懷之時子及謫守寧州

觀海何年說勝遊風流猶憶鳳城頭滄溟無恙  
鼉鼉壑青草依然鷗鷺洲絕徼江山同此日中  
原詞賦自千秋可憐才子漂零甚極目西風倦  
倚樓

巳亥除夕

馬首東歸夜復除熒熒燈燭坐躊躇青山迢遞  
音書斷華髮奔馳宦計踈市上嚙人驚有虎天  
涯作客嘆無魚一尊且漫悲生事寂莫何慚揚  
子廬

庚子元日

千門爆動曙光新憔悴依然七尺身滿院有花  
都作勝閒庭無草不知春西隅烽火催兵急中  
使金銀入貢頻辛苦一官還絕域碧桃笑殺未  
歸人

司署茶花盛開呈薛觀察二首

爲憐春色逐芬芳移得奇葩到異方重疊紅英  
晴絢綵參差黃暈暗聞香漢江遊女霞爲佩南  
國佳人錦作裳最是東風好相惜栢臺深處不

飛霜

其二

東風日日憶花神走馬歸來喜及春  
豔借赤城霞片片光分錦水月粼粼  
隔叢深淺嬌相妬滿院芳妍色轉新  
但把金杯醉相狎倚闌忘却客中身

送黃憲副入賀

昆明池水不通潮使節翩翩道路遙  
獻壽只憑金鑑錄承恩真戀紫宸朝  
交情湖海愁難別真氣西南苦未消  
客裡送君添感慨杜鵑啼罷雨蕭蕭

送孟憲副備兵曲靖

時有播州之役

桃花落盡思淒其旌節東巡又一時  
開府只今當孔道嚴兵猶得赴師期  
春風楊柳營邊曙夜月關山曲底吹  
他日西南傳露布可無人說運籌奇

送田叅知入賀

西來匹馬自清秋又逐鶯花作遠游  
歷盡黔中

豺虎窟

時有  
捕警

遙瞻天表鳳皇樓班聯列省今方

岳地界南蠻古益州此日田郎仍獻頌漢廷誰  
不羨風流

黔國山園看杜鵑

十畝山園滇海邊滄溟萬頃白雲連西郊草暗  
飛蝴蝶南國春深醉杜鵑片片腥紅晴綉日層  
層空翠晚浮烟侯家別館如金谷何處芳華不  
可憐

太華寺

碧雞疊翠俯昆明偶爾登臨百慮清日照旛幢  
連水色風吹鐘磬雜潮聲僧房隱隱花成塔官  
路依依柳向城下界也知塵土惡却從西海見  
蓬瀛

環翠宮謁呂祖祠

玄都端合羽人居碧嶂丹厓百丈餘囊裏一九  
光照室袖中三尺氣凌虛名山處處神堪降寶  
籙篇篇手自書我欲從師乞真訣飄然獨傍五  
雲車

安寧溫泉

凡溫泉多臭硫黃此獨甘香可飲其清至  
鑿毛髮有垢穢輒浮去水中石皆作碧玉  
色取出則黯淡類瓦礫投之如故疑其下  
有丹砂云

玉池泉煖沸如湯烟樹蒙茸隔洞房秀潤分明  
丹作穴溫柔真羨水爲鄉坐來頗訝玻璃翠浴  
罷微聞蘇合香笑殺華清當日事西風吹草舊  
臺荒

送朱職方還朝

春深南國杜鵑紅無奈分攜暮雨中貴竹山多  
雲作瘴偏橋烽起火連空一時氣槩看持節何  
日從容問掛弓此去禁廷饒將帥論兵真有古  
人風

青華洞

路轉青華第幾盤洞門詰曲白雲端光分半壁  
窺天小嵐入千重取徑寬斷壑水衝丹竈濕懸  
崖苔鎖石床寒山頭徙倚增惆悵不見仙人駕



羽翰

渡蘭津謁武侯廟

滄江深黑水流澌江上平開諸葛祠雙嶂烟霞  
臨俎豆千崖草木護旌旗天威更憶征蠻日忠  
節還傳佐漢時恠得精靈長在眼山頭閃閃陣  
雲奇

漆憲副携酒九龍池

春深雨過倏疑秋綺席雕欄俯碧流泉眼湧來  
龍作穴水心幻山屋爲樓遙隄樹合行人小別

院花飛野雀愁但使兒童歌酩酊山公須爲習  
池留

馬氏池亭

一畝方塘古寺西門前車馬不聞嘶孤齋雨過  
楊花落三月春歸謝豹啼繞舍流泉飛瀑近滿  
山空翠隔林低臨池我亦耽魚樂對酒能無憶  
舊蹊

過華亭寺

碑文方子及製

載酒尋僧席屢移春山何處不相宜琉璃影散

天花落金碧光搖法鏡垂地近西方開竺國烟  
銷下界瞰昆池栖霞片石應堪語苦憶南朝江  
總持

玉皇閣

梅雨初收山吐雲白毫光裏氣氤氳偶從洞府  
尋真誥便叩天門謁帝君旛影摩空虹掩映香  
烟吹霧鶴繽紛塵心未盡空惆悵絳節瑤笙杳  
不聞

寂光寺

長松十里護禪關嵐翠遙連雞足山雨暗旛幢  
無客到花開方丈有僧閒諸天色相藤蘿外萬  
壑烟霞杳靄間欲問西來第一義白雲飛去水  
潺潺

華嚴寺閱賜藏

龍象移來選佛場璽書傳賜有 今皇唐僧竺  
國三千部漢帝蘭臺四十章已自仁祠開寶藏  
誰從苦海覓慈航裝潢盡作蛟螭錦片片瑤函  
出尚方

同漆使君宿九鼎蘭若

九鼎山頭列九峰雲間幻出碧芙蓉香林寶閣  
僧廬淨疊嶂懸崖佛刹重夜靜泉聲時雜磬天  
陰嵐氣欲迷鐘憑君遍說諸名品可是南宗與  
北宗

送梅左伯入覲

羽書飛罷散妖氛岳伯東馳謁 聖君地極西  
南多積雨山連川谷更迷雲官階自識分藩重  
閱閱先論轉餉勛勗苦誅求臣力竭心勞何以

答憂勤

送薛觀察入覲

謁帝東行萬里身蕭蕭秋色亦宜人天涯裘馬  
同爲客邊徼風塵送所親極目千峰寒入楚傷  
心獨雁曉歸聞知君召對先承寵 聖主恩深  
舊侍臣

昆明池餞送魯司農歸朝

菊花黃綻晚氤氳青雀夷猶醉夕曛積水寒生  
昆海月遙天風引葦山雲馬頭殘葉王程迫天

外疎烟客路分不學王褒空獻頌南金聊可奉  
明君

昆明池送蔣廷評歸朝

憶昔相逢南海湄回頭踪跡各天涯可憐徼外  
掄才日更喜花前對酒時霜磬數聲雲繞寺風  
帆一片月生池長安兄弟如相訊拓落青氍老  
九夷

盧將軍割軍租助刻文選賦謝

累從邊塞立功勳况復風流雅好文藝苑新傳  
梁太子兵家舊識祭將軍腰間寶劍爲君死篋  
裏黃金與士分見說諸兒多汗血攜來箇箇五  
花紋

西園賞茶花

五侯小苑竹林西有客尋芳過大隄風軟繁花  
真不動春深濁酒可同携當樓艷色枝枝映拂  
檻紅光樹樹齊我爲花神狂欲舞兒童莫笑醉  
如泥

庚子除夕

蕭蕭歲晏日風霾爆竹燈花不散懷寂莫當爐  
緣禁酒殷勤掃室爲修齋驚心白髮遊堪倦回  
首青山意屢乖記取明年投劾去不將踪跡老  
天涯

辛丑元旦

條風吹暖水生烟春草王孫若箇邊傳詔更聞  
開寶井賞功猶自燕金錢人喧佛舍旃檀社客  
醉侯家玳瑁筵惟有廣文齋獨冷梅花消息負  
新年

送羅憲副還蜀

春郊細雨暮飛花送客東歸道路賒但得還山  
皆樂土何知近水有含沙一厘日月堪娛老五  
畝桑麻且問家試向昆明池上望白雲斷處是  
三巴

送簡憲副還豫章

使君解節賦歸休匹馬東行此暫留拙宦不妨  
甘棄置閒居未許減風流舟過楚水雲千頃家  
在萍鄉月一丘長路艱虞應自愛莫將詞賦伴

牢愁

送易叅知入賀

萬里休嗟蜀道難  
臨岐聊復勸加餐  
西陲捧表今藩牧  
南省封章舊法官  
曉霧青山天外斷  
夕陽芳草客邊殘  
九重早下東宮冊  
乞得恩綸出漢關

送張憲副入賀

憲副初拜叅知仍捧臬表行

一官三載早承恩  
此日東馳叩九閭  
霑蓋隔江知故國  
尾箕分野問中原  
隨班肅入金鑾殿  
獻壽先開白獸樽  
大慶禮成應賜賚  
太平天子正臨軒

送李閩帥入賀

年來烽火靜邊隅  
喜見衣冠集上都  
金甲踟躕看虎拜  
玉珂隱隱聽山呼  
中涓齊獻長春鏡  
外國爭來不夜珠  
聞說聖明今却貢  
遠臣何以答良圖

寄錢象先山人

一徑蓬蒿半畝居  
經過憶是落楊初  
逃名已自

甘龍卧傲世何妨混狗屠吳苑花飛頻入夢滇  
池天遠不通書南中宦况君休問絳帳蕭條兩  
鬢疎

寄強善長

橫塘信宿繫蘭舟風雨時時憶虎丘徼外青山  
勞客夢天涯芳草伴人愁山連越雋還爭險水  
入昆明却倒流萬里間關書一札不知何處問  
滄洲

寄王百谷

南有堂前惜解携單車徑指夜郎西世情真自  
憐蒼狗古跡誰從訪碧雞春滿侯家花競發日  
高官舍鳥空啼王公只愛墻東隱尺素何曾過  
五溪

送杜兵憲暫還東海

六月寒生水滿池芰荷香冷雨連期可憐荒徼  
休兵日正是孤臣去國時燕市竟須收駿骨漢  
宮空自妬蛾眉逢人莫道南中事一片忠勤  
聖主知

送佾侍御按百粵

瘴厲風銷六月寒  
翩翩皂蓋出雲端  
到來山鳥行旆幾處  
溪花映法冠  
八桂秋高晴翠落  
九疑烟霽夕陽殘  
西人莫怨誅求急  
攬轡於今有漢官

送王將軍入督京營

幾向中原血戰來  
建牙西徼亦雄哉  
青山到處頻開帳  
麗賦成時獨舉杯  
北闕風雲龍虎衛  
長安士馬羽林材  
燕昭城外餘芳草  
尚憶黃金舊

築臺

答江廷尉進之

爲憐衰鬢漸成翁  
旅思蕭蕭逐轉蓬  
不向南山看射虎  
却從下里學雕蟲  
刺桐花暗蠻烟外  
鷓鴣聲殘客夢中  
廷尉謾勞誇絳帳  
譚經吾愧馬扶風

贈包給事

一疏朝聞謫夜郎  
誰憐疋馬逐風霜  
平生抗節逢明世  
萬死全軀荷聖皇  
霧裡看山頻攬轡



天邊問舍謾沾裳只今恩詔收遺佚不遣詞臣  
老故鄉

送黃太僕之平涼

平涼西去卽邊城近塞風高萬馬鳴座上葡萄  
春宴客笛中楊柳夜譚兵擁旄自昔推分陝司  
僕于今擬列卿咫尺崇階恩不薄秦關元是古  
咸京

將發昆明別藩臬諸公

蕭條客座廣文氊屈指滇池又幾年正戀鶯花  
春九十却愁風雨路三千鳳凰山下江如碧鸚  
鵡洲前草似烟別後相思魂夢隔逢人空寄遠  
遊篇

別諸生

一官潦到罷譚經且向江潭問獨醒臘盡雪消  
滇海白春來雲破楚山青風塵荏苒虛王朔道  
路馳驅老客星爲語及門諸弟子行藏吾已愧  
鴻冥

送家兒南還

漢水春來漲綠波將歸無奈別離何江津直隔  
閩山遠楊柳空憐楚澤多長路逢人須問訊寸  
陰是處莫蹉跎親知應憶爲官在生計終當付  
薜蘿

黃鶴樓二首

高樓突兀倚層巔漢沔豪華在目前山引鳳皇  
雲漠漠洲迷鸚鵡草芊芊帆檣出沒烟波外鈴  
鐸依稀霄漢邊果有真人吹鐵笛不妨驟駕學  
神仙

其二

形勢分明控楚都天中鶴馭遠相呼江山勝槩  
還今古詞賦風流更有無郢樹曲連雲夢澤漢  
川遙接洞庭湖凭闌一望生惆悵零落當年笑  
霸圖

贈周元孚尚璽

孤臣抗疏幸生還寒色憑陵虎豹關嶺海風烟  
催白髮楚江蘭芷怨青山十年感事空譚劍此  
日蒙恩合賜環謾向巖居賦招隱 君王元未

許投閒

答任孝廉白甫

當年獻賦不曾收，慷慨還從俠少遊。  
眼底江山供嘯傲，尊前賓客羨風流。  
紅顏果爾傾南國，白雪由來重郢州。  
末路逢人多按劍，勸君懷璧莫輕投。

黃鶴樓邀王白岳先生作

三春雨霽楚江渾，黃鶴樓前日欲昏。  
縹緲烟波環大別，微茫山色落中原。  
文章早已慚推轂，遲暮今猶憶在門。  
試問中郎琴畔客，幾人能不負明恩。

過登之宗侯園居

一叩朱門問草堂，王孫愛客謾焚香。  
繁花帶雨迷芳徑，修竹連雲護短牆。  
流水正通栽藥圃，濃陰偏覆讀書床。  
官閒我亦思招隱，策馬時時也不妨。

贈方子公山人

六月炎歊飛火雲，客舟長繫楚江濱。  
東都處士

元工賦南國王孫雅好文篋裏圖書聊自老人  
間筆硯總堪焚橫塘邂逅真如夢十載浮沉愧  
見君

黃僉憲邀同薛右丞遊赤壁

楚江霽色莽蒼蒼赤壁磯頭駐夕陽昔日風流  
傳麗賦此時山水勸飛觴連天樹影迷雲夢對  
岸人家隔武昌莫認前朝征戰地夜闌零露泣  
鳴蜩

答江進之廷尉

昆明池上暫分携芳草天涯失故棲憔悴新秋  
驚旅雁蕭條舊雨憶晨雞書來鄂渚黃山北夢  
隔桃源楚水西昔日避秦人好在因君爲訊武  
陵溪

答贈張太史二首時余有郢中之役

三楚豪華早著聲翩翩學士羨登瀛風流上國  
張公子詞賦同時馬長卿講直金華移北斗班  
聯玉筍近西清知君剩有如椽筆不忝儒臣在  
漢京

其二

千里間關入郢來西風江上對  
銜杯明珠投處光相媚白雪歌  
成調轉哀鄂渚烟波通漢沔荆  
門山翠護樓臺當年屈宋俱陳  
迹今日因君識楚才

登太和絕頂四首

千山羅列擁天門環衛真如侍  
至尊仗外星回依北極崖前霧  
蔽瞰中原飛巒疊嶂羣龍會絕  
壑奔流萬馬喧天爲聖明開大  
岳秦封漢峙

不須論

其二

雲裏飄搖天柱峰紫霄撐出玉  
芙蓉宸居已自誇雙闕帝座依  
然隔九重雨氣迷空埋虎豹日  
光破暝射龜龍分明指引朝元  
路辟穀何勞問赤松

其三

十年寤寐禮靈山金闕瑤塔夢  
裏還閃電光芒翻碧落流霞掩  
映鎖玄關千層樓閣青冥上一

片笙簫紫漢間聞道諸真晨謁帝不知若箇領  
仙班

其四

文皇一旅出燕都帝遣神兵護壯圖處處名山  
頻朔觀年內帑罷徵租璇題碧瓦晴飛動紫  
氣金光夜有無七尺自憐如委蛻欲從天將乞  
真符

別三兄

客中相見重淒然惆悵黃花又各天夜半猿唵

鄭口月秋深鴈叫郢城烟衰年兄弟難爲別未  
路功名好自憐我有東山三畝宅憑君先卜板  
橋田

禧姪新築園居寄賦

聞女閒居賦考槃城東結構草堂寬池平好種  
魚千石徑敞須栽竹萬竿秋爽登臺青嶂合春  
陰閉閣白雲寒阮公早有還山興夢斷鶯花十  
二欄

送廖希亮計部還朝

使君搜粟及瓜期寒色蕭蕭歲暮時漢水霜飛  
楓葉老荆門雲暝鴈聲悲徵求處處仍思亂水  
潦年年更苦饑爲乞司農寬責課莫令中谷怨  
仇離

贈江茂才從其尊人入太學

江郎年少筆如花腹裏藏書足五車璞獻楚宮  
終是玉馬來冀北卽名駒三秋雲冷秦人洞九  
月星隨漢使槎信是鳳毛堪繼美一時詞賦屬  
君家

送孫太守棄官歸吳

五馬東歸郢水寒臨岐珍重祝加餐斑衣幸喜  
能將父赤紱何妨徑去官楚澤叢蘭霜後短吳  
門芳芷雪邊殘冥鴻未必終高遁且莫逢人說  
掛冠

賀鄒大澤先生得子

五月青雲護草堂南天佳氣鬱蒼蒼荆山玉剖  
連城直楚澤蘭移大國香選部風流餘素業名  
家文藻寄縹緗也知岐嶷非凡品辨字于今日

幾行

送李將軍之清浪

郢上山陵借建牙却移西塞柳營賒勲名到處  
堪推轂辛苦平生不問家夜靜千烽光射月霜  
清萬馬色團花三苗此日應無戰幕府如今有  
左車

胡仲脩山人以曹廷尉書見訪答贈

有客扁舟自秣陵奚囊清比玉壺冰莫言短髮  
愁邊盡且喜奇山醉裏登袖出曹丘書一札帆  
經彭蠡浪千層聞君五字知名久倒屣還如得  
舊朋

答曹能始廷尉

故人書到旅愁開珍重寒暄手自裁東去幾時  
窺日觀南遊應許問天台三年作客迷芳草十  
月還家逐早梅薛老峰前仍結社風流誰繼大  
夫才

贈劉尉

華容仙尉漢功曹蓮幕蕭然一布袍湘浦雲開



堪駐馬洞庭湖濶不宜舫民窮尚苦誅求急歲  
歉應知撫字勞此去循行須努力家溫何必問  
錢刀

答余道人

幔亭謝却武夷君歸向南巖卧白雲名在丹臺  
曾受籙身居紫府早離羣敲來石髓臨溪煮劇  
得松脂掃室焚我自風塵兼俗骨浮沉踪跡不  
堪聞

壬寅除夕

臘盡東風散曉寒椒觴曾似故園看十年宦跡  
身堪老一夜羈愁鬢欲殘水國繁華還郢澤  
帝鄉風景卽長安五辛莫問荆蠻俗自喜先生  
苜蓿盤

癸卯元日

雞聲唱徹報新年雨霽千門欲曙天官府尚聞  
催舊賦 君王虛說罷中涓梅花香澹消殘雪  
栢葉光浮弄曉烟五十將臨歸計晚故山荒却  
杜陵田

元夕後一日朱季則水部胡仲修山人署  
中觀燈

帝城春色郢西東  
尊酒逢迎笑語同  
月影却疑今夕勝  
燈光應比昨宵紅  
笙歌十里通江市  
星宿三天繞漢宮  
謾道陽春今寂寞  
披襟還憶大王風

答贈達之宗侯

峴首山迴遶鹿門  
征途邂逅見王孫  
已從竹裏開三徑  
更向花間對一尊  
梁苑客誰陪杖屨  
楚宮人自愛蘭蓀  
憑君莫問高陽事  
習氏池空鳥雀喧

答黃叅知督餉之淮

江頭春晚柳絲長  
處處鶯聲引別觴  
雜沓樓船開鄂渚  
從容征旆下淮陽  
波光遙射千山翠  
雨氣微添五月涼  
此去逢迎無暇日  
使君直節重南牀

春日同朱水部胡山人眺徐將軍山亭

東風澹蕩柳籠烟  
山上孤亭絕可憐  
鈴閣春閒

堪說劍兵厨酒美不論錢江流西遶荆門斷嵐  
翠平分漢闕連此是 先皇湯沐邑龍飛猶記  
中興年

四月一日舟次襄陽士達宗侯出餞

扁舟宛在水雲鄉帝子何來共舉觴隔岸千家  
迷宿莽連城十里暗垂楊春歸自笑人飄泊雨  
散誰堪路渺茫但對青山不辭醉風流未減少  
年場

送周憲副入 賀

荷花纔放柳條疎使節翩翩擁傳車鄂渚風烟  
堪自愛長安消息定何如衣冠遞祝齊天壽宮  
闕新成 上帝居此去應陳金鑑錄稱觴不獨  
萬年書

送葉時珍鄉貢秋試之京

獨從鄂渚唱離歌岸柳青青柰別何久客可堪  
殊氣候長途惟有慎風波袖中劍爲屠龍出臺  
上金囚買駿多看女橫秋須健翮不妨先占孝

廉科

送鄒先生之南都

夢澤風烟暫卜居十年踪跡起樵漁門多弟子  
紛前席客有賢豪託副車官署雍容三省後山  
川佳麗六朝餘匡床坐對臺城月除却焚香卽  
著書

答贈周承明山人

懷中一札再經秋芳草依然鸚鵡洲舌在未應  
嗟落魄囊空何必減風流樓前暫聽梅花笛江  
上虛糜竹葉舟近日諸侯無揖客逢人且莫賦

依劉

中秋陪直指應公宴明遠樓

棘闌深鎖夜無喧風靜瓊樓月滿軒縹緲清光  
閒鼓角蕭森殺氣合橐鞬乘槎恍若窺牛渚授  
簡還如在兔園回首神京西北在五雲高處卽  
徵垣

送孫宗文太史典試歸朝

帝爲西南重楚材詞臣臨發詔頻催誰言草澤  
難逢主未信文章不借媒帆外風烟迷漢水賦

中雲雨傍陽臺天涯尊酒悲離合日斷秋江旅  
雁回

送董見心考功典試歸朝

漢廷珍重下弓旌使者星馳不計程搜得楚材  
俱作棟剖開和璞卽連城一時文采傾南北十  
載交情愧弟兄到處探竒能弔古須知屈賈舊  
齊名

寄劉憲副

千旄出鎮楚關西鈴柝聲中聽馬嘶賓客有時  
陪坐嘯雲山無處不攀躋門臨芷水千江窄路  
近桃源萬壑齊我夢游仙曾寄訊俗緣猶隔武  
陵谿

九日謝生甫計部竇燕雲學憲同眺振衣亭

孤亭晝敞卽丹丘暇日同登最上頭雲影忽隨  
歸鳥沒霞光長覆大江流金沙水漲千家市黃  
鵠山迴百尺樓海內弟兄頻對酒何勞楚客賦  
悲秋

送心父四兄入 覲

使君五馬健如龍  
新領諸侯謁九重  
遠道清霜閒躑躅  
秋江微雨濕芙蓉  
十年空寄風前淚  
兩地真憐客裏蹤  
同學少年今漸老  
竹林尊酒記從容

送女嚴五弟南還

江頭風急柳飛霜  
望盡天涯各斷腸  
人有倚閭長繫夢  
客非彈鋏薄歸裝  
蟹肥且自過彭蠡  
魚賤何當憶武昌  
預拂東山山下石  
明年待我午

橋莊

癸卯除夕

八口南來客歲前  
齋厨三徙跡頻遷  
官因帶印翻多事  
名豈譚詩却自憐  
春入瀟湘遲雨雪  
俗傳荆楚異風烟  
莫將簫鼓催殘臘  
屈指明朝五十年

甲辰元日

朔氣憑陵五夜寒  
十年魂夢隔長安  
上都大索妖書急  
下國頻催逋賦難  
雪擁朱門圍甲帳  
春

歸綵勝簇辛盤不知故宅東山外開遍梅花幾  
樹殘

贈李本寧太史

邂逅真誇御李來春城烟霧一時開青雲千古  
名誰附白雪孤調曲自哀南國風流傳郢澤楚  
臣詞賦重章臺 君王曉闢金華殿還憶當年  
舊史才

西樓全集卷七終

西樓全集目錄卷八

五言排律

歸自遼左過陳七吸江亭賦二十四韻

懷李廷燁十韻

同陳文大女翔惟秦幼孺諸子眺玉皇閣

同葉進卿太史登萬歲寺塔

宿惟和絲玉齋同伯孺作

寄心父四兄八韻心父令香山是先大父

故邑



高太史潘水部同集北山韜光菴晚歸湖  
上作

丙申元日十韻

憇海珠寺八韻

董崇相進士南歸暫過潞河言別作此送  
之

過玕璫嶺

宿大覺寺

冊立 皇太子禮成志喜一首

人日立春

寄宣兒十六韻

西樓全集目錄卷八終

西樓全集卷八

閩中鄧原岳汝高著

門人韓日績緒仲訂

仲子慶家編次

五言排律

歸自遼左過陳七吸江亭賦二十四韻

赤羽初傳警黃金遂入關迢迢驚度塞莽宕愧  
投艱王氣川原外邊塵山海間鼓聲江共沸弓  
影月同彎勢似傾諸島威疑控百蠻馬鳴風颯

颯鴈唳水潺潺芻粟從天下皇華出塞頒未辭  
筋骨苦祇益髣毛斑感事思投筆蒙恩喜賜環  
寄情惟杜曲訪舊此溪灣天際邀青鳥堦前淨  
白鷗潮痕隨雨漲草色帶霜殷雪借孤亭爽雲  
依一逕閒風塵誰蹭蹬杖屨敢追攀浪說金華  
直何知玉筍班百年容偃蹇七尺恨踈頑憤世  
身能隱憂時淚欲潸頰唐酒人態慷慨壯夫顏  
醉任譏狂俠貧從罵老慳江清寧可吸竹密不  
可把臂尋三益冥心問九還偶然嬰世網原  
不落人寰分合藏丘壑居猶混闐闐歲寒長自  
保慎莫負青山

懷李廷燁十韻

山水清佳處憐君吏隱兼官閒長閉閣訟簡日  
垂簾海入龍江闊天開越秀尖烟雲連別島空  
翠落前簷宦拙詎邊幅名高豈米鹽雅懷真不  
忝清操獨無嫌一別悲離合三時變冷炎非關  
鴻鴈少頗畏簡書嚴人是金閨俊才寧瘴海淹  
要知明主意好爲活窮閭

同陳女大女翔惟秦幼孺諸子眺玉皇閣  
傑構凌雲迥重軒接漢開水從千澗遶山向斗  
城回望氣多靈蹟尋源有劫灰玉皇新剏閣金  
粟舊名臺福地川原合仙都日月迴招搖隨五  
緯閭闔逼三台客自探玄至人期攬勝來天高  
踈檜栢石古翳莓苔空翠侵衣袂香烟落酒杯  
風飄晨磬遠潮雜暮鐘哀愧乏脩真骨慚非作  
賦才吹笙人不見日晚更徘徊

同葉進卿太史登萬歲寺塔

寶刹搖空界孤標出上方星躔分景色島嶼入  
微茫鈴逐殘雲落幡隨去鳥長初疑金粟影忽  
見玉毫光月隱晨曦動烟銷海氣涼何緣脫塵  
網於此度津梁

宿惟和綠玉齋同伯孺作

入林欣把臂招隱得同心白社吾將老青山爾  
共尋窓虛蘿月動榻冷竹風侵夢淺斷殘磬情  
多愁遠砧寒蛩依砌靜宿鳥擇枝深晦跡甘雲  
卧浮生愧陸沉從來丘壑相不負紫芝吟

寄心父四兄八韻心父令香山是先大夫  
故邑

一官南海上消息至今疎豈不懷鄉國其如畏  
簡書棠陰侵榻冷蜃氣入杯虛蒟醬日堪飽柳  
漿時可茹宦情隨俯仰別緒惜居諸邑自桐鄉  
舊名仍五嶺餘經綸疑好在俎豆更何如一寄  
梅花使潸然淚滿裾

高太史潘水部同集北山韜光菴晚歸湖  
上作

騎馬出江潯徘徊祇樹林探奇攀磴險載酒入  
雲深地敞聞香氣峰迴隔梵音天連三竺迴烟  
漲六橋陰竹逕千盤轉松關萬壑臨蕭疎驚墜  
葉昏黑送殘禽泉響參禪理旛飛見佛心夾堤  
燈火亂平野月光沉山水欣相契烟霞喜共尋  
何當謝簪紱招隱碧山岑

丙申元日十韻

於越行將半平湖坐復春驅馳容鬢改偃蹇歲  
華新鳥嘯寒初破雞鳴夜向晨梅花何處渡栢

葉異鄉人甲第紛生色辛盤各獻珍風和先送  
煖雨細不飛塵舊俗懷南土新班憶北宸感時  
多局促對酒謾酸辛衰朽關何事飄零嘆此身  
王程猶未已來往更迷津

憇海珠寺八韻

水寺依秋爽虛亭載酒涼蚌開江月白龍蟄浦  
雲黃作對疑沈陸何來嘆望洋風傳仙梵杳烟  
裊佛旛長重疊千家市參差百尺檣乘空真蹈  
海眺遠欲浮湘潮落摧鮫室霜高壯蠓房憑闌

鄉樹外客思正茫茫

董崇相進士南歸暫過潞河言別作此送  
之

少小原同學飛騰各一時風塵吾自老書劍爾  
何之雪積漁陽道水堅潞水湄烏饑號凍木魚  
冷閉霜池日晏放衙晚天寒下漏遲貧猶堪貫  
酒冗不廢譚詩宦况干時失交情閱世知乍逢  
真作喜欲別更成悲鴻鴈春前信雲山夢裡思  
十年京洛客愧說鹿門期

過玳瑁嶺

卽博南山

灌木千章合岩花三月深泉聲盤嶺急雲氣結  
林陰駐幘方危磴褰帷復遠岑嵐光添秀色靈  
籟發清音不盡搜羅興其如汗漫心計程無百  
里問徑有千尋臃腫圍奇樹鞣輶語恠禽未須  
愁瘴癘頗已愜登臨西塞狼烟定南天鴈羽沉  
嘯歌還不廢聊此散煩襟

宿大覺寺

香臺眞寶地精舍卽珠林縹緲旃檀氣微茫鐘  
磬音經函度嶺遠僧臘入山深到處還飛錫逢  
人或布金曇花消暮靄貝葉結嵐陰色相夫何  
染塵緣了不侵偶然叅正果聊得證禪心樓迥  
燈還暗山空漏易沉皈依元自昔墮落到于今  
借問西來意無言只自吟

冊立

皇太子禮成志喜一首

彤庭開黼座寶冊下青宮衆意歸元子天心啟  
聖衷岐嶷眞異質仁孝自家風學以承華進人

非博望通十年虛睿眷此日仰宸聰禮樂鋪張  
別衣冠拜舞同寵應均內外澤已遍疲瘵佳氣  
時輝映祥雲更鬱葱策無勞四皓計或藉群公  
九廟歆天表千方想宅中小臣瞻拜切望斷日  
華東

人日立春

旅舍逢人日江天又蚤春青回堤柳潤香破隴  
梅新苦酒同兒醉辛盤次第陳三年長客楚八  
口未歸聞簫鼓關何事晴明卜此辰形容吾漸

老來往愧風塵

寄宣兒十六韻

楚客漂零久殷勤寄女書更無忘告語好自惜  
居諸適體終宣布充腸不厭蔬田間寬責課縣  
裏早完儲麩葉防醜毒樗蒲絕燕胥西樓千卷  
在東廓一廬餘梅過先搜蠹春來急種魚唯當  
希曩哲慎莫學狂且世路多艱險人情有齟齬  
交游休太廣問訊未應踈當室非安逸承家要  
拮据勗哉崇令德行矣樹嘉譽入市毋張蓋之



郊謾駕車澆風何用習豪氣也須除獨退元無  
競深藏固若虛臨風頻囑付不覺淚沾裾

西樓全集卷八終

西樓全集目錄卷九

五言絕句

閨曲二首

雨

旗山雜咏五首爲林道翹學憲賦

魏宮詞

竹亭

怨詞二首

自君之出矣四首

宮中怨二首

西湖雜咏八首

馬上逢俠客

長干行二首

古意二首

九鼎山雜咏四首

石鏡亭二首

西樓全集目錄卷九終

西樓全集卷九

閩中鄧原岳汝高著

門人韓日纘緒仲訂

仲子慶霖編次

五言絕句

閨曲二首

別郎纔幾時轉見儂懷惡空庭風雨聲坐對繁  
花落

其二

別淚不可揮淫淫似流水怕說黃金臺金臺千  
萬里

雨

高齋十日雨岩花開復落曉起望西山愁雲黯  
相薄

旗山雜咏五首爲林道翹學憲賦

嘯臺

灌木縈層臺倚杖窮清眺儻遇蘇門人便作蘇  
門嘯

玄亭

寂寂草玄亭日午花陰靜載酒人不來雲掩藤  
蘿逕

振衣臺

高臺出林杪客來時振衣山翠千萬重徙倚暮  
忘歸

岳秀亭

亭子在山椒四望清江暝谷鳥時一鳴忽動幽  
人興

西崦

一逕出西坡徘徊日將夕芳草没人長唯有牛  
羊迹

魏宮詞

月照漳江水風吹西陵樹輦路草已荒夢魂自  
來去

竹亭

亭深不受暑四座浮綠雲但須痛飲酒何可無  
此君

怨詞二首

西風白露寒江上芙蓉老繁華能幾時漂零一  
何早

其二

一夜西風起蛩聲處處愁淒涼霜後葉怨殺洞  
庭秋

自君之出矣四首

自君之出矣正值瀟湘秋思君如盍日夜夜啼  
不休

其二

自君之出矣望君無時回思君如風燭淚盡心始灰

其三

自君之出矣不覺羅衣換思君如藕花根爛絲不斷

其四

自君之出矣殘燈照孤影思君如琴絃秋來轉淒緊

官中怨二首

君恩不一面棄置今如此懊恨大長秋歲選良家子

其二

正苦秋夜長宛轉不成睡只消官中漏使妾容憔悴

西湖雜咏

龍井

古井砌寒泉飲之不盈勺夜半雲忽來恐是蛟

龍窟

石屋

石屋深復深白雲在其下別自一洞天誰是棲  
真者

蘇堤

散步蘇公堤桃花雜垂柳山色暮復朝猶云昔  
人有

放鶴亭

草色翳荒墳梅花開復落坐久忽忘歸長天唳

孤鶴

湖心亭

會心豈必遠拄杖見湖光纖塵渾不到乃在水  
中央

十錦塘

春色散芳原繁花爛如綺何處看花人尋春却  
來此

飛來峰

奇峰失其名但識猿啼處何處忽飛來千年不

飛去

冷泉

溪淺不容刀寒泉瑩如玉泠泠清客心聊以濯  
我足

馬上逢俠客

相逢易水上惆悵無一言忽然分手去走馬向  
平原

長干行二首

妾家在長干門枕橫塘水自小慣乘船隨潮采

蘭芷

其二

日高采蓮出日暮采蓮歸西風吹浪惡濕盡綺  
羅衣

古意二首

水上芙蓉花零落在秋浦芳魂不自持芳心儂  
獨苦

其二

池上與君別池水清可憐只消一滴淚枯殺滿



池蓮

九鼎山雜咏

毘盧閣

禪榻不成寐  
虛疑風雨聲  
曉起問山僧  
磴戶流泉鳴

古佛洞

古洞何年鑿  
現此真堯率  
至今山谷中  
猶自聞天樂

華嚴洞

梵閣拄層巔  
雲開出銀榜  
下界聞晨鐘  
疑是諸天上

玉峰塔

寶塔夜放光  
塔中藏舍利  
覓得身外身  
了此義中義

石鏡亭二首

山頭寒日落  
樹杪孤雲飛  
坐對江天晚  
漁舟猶未歸

其二

落葉響空亭江光翻石壁時聞風水聲似有牛  
羊跡

西樓全集卷九終

西樓全集目錄卷十

七言絕句

競渡曲二首

觀音閣口號

熊尉祠二首

寧夏凱歌四首

閩中元夕曲四首

三月晦日送人之安南二首

西湖權歌四首

官怨四首

東庄晚眺

遼西歌

西夏歌

懷林熙吉

得家信

燕京元夕竹枝詞四首

送人之徐聞令二首

長門怨

長信宮

青塚

楊白華

馬嵬驛

宮人斜

紅葉怨

金谷園

薛濤墳

蘇小墓

江上重別惟和兄弟

別瀚公

江上別諸兄弟四首

天游觀讀陳价夫徐勣陳鳴鶴林應起壁

間作悵然寄懷

度分水關二首

嚴陵釣臺二首

西寺訪朗公不遇聞有天竺之行二首

舟中寒食二首

姑蘇別玉生二首

別玉生後風雨大作復成一絕

同彥貽晚至惠山看二泉一軟而去

官橋懷古

郵亭見殘花

春盡

秋宮怨二首

夏日聞鶯

發芋原時振狂追送江滸贈以六絕卽席

歌之歛歔淚下舟次楊青有懷賦荅六首

潯陽懷古

哭張函一廣文六首

西湖雜咏十首

觀海十首

遊仙曲四首

約彭山人遊武夷阻雨大安驛撥悶三首

送閔壽卿山人遊武夷二首

建陽道中

武夷山下作

過呂梁

燕子樓

南旺湖

衰柳

寄陳子翼太學二首

春日雜興十二首

夏日雜興十二首

秋日雜興十二首

冬日雜興十二首

爲林山人悼妓四首

再送士文

黃昭質武部典試還 朝買廣陵羅姬同

載戲贈二首

丁酉紀事五首

壽游子介二首

官詞十首

三月晦日宿安德

荔枝曲十四首

爲林熙吉題冊子五首

明府貽紫花布

寄家信

阮江道中

入鎮遠

羅憲副署中叢桂忽降甘露爲賦二絕

哭徐惟和十二首

哀半

平播凱歌四首

寄宜春張令

湧泉寺邀江廷尉孟憲副盧叅戎宴眺五  
首

昆明署中菊花將放余客句町不得一賞

寄孟憲副

過通海石門

李留後邀宴挹漢亭四首

均陽署中壽朱水部

三月晦日襄陽道中

遇真宮

柳梅祠

答楚王孫贈菊

答別朱季則四首



西樓全集目錄卷十終

西樓全集卷十

閩中鄧原岳汝高著  
門人韓日績緒仲訂

仲子慶棠編次

七言絕句

競渡曲二首

十里湖光爛不收  
綠楊影裏采蓮舟  
歌聲唱斷西山色  
無數朱簾盡上鉤

其二

昨宵新水入溝河五兩風生水自波二十四橋  
車馬隘遊人齊唱采菱歌

觀音閣口號

觀音閣前溪水流觀音閣上行人愁天涯汗漫  
不歸去愧殺沙頭雙白鷗

熊尉祠二首

君是東南尉史才一時保障亦奇哉至今父老  
還祠廟曾說當年破虜來

其二

一劍功成三十年海門東去淨風烟而今歌罷  
迎神曲白馬橫戈亦可憐

寧夏凱歌四首

義旗西指落攬槍花馬池頭鼓角聲露布飛來  
報明主誰知元帥是儒生

其二

將士如雲歌入關平明奪得賀蘭山軍前一夜  
旄頭落莫放重圍片甲還

其三

黑雲擁日壓城頭  
赳赳元戎寔壯猷  
殲盡鯨鯢築京觀  
邊人從此罷防秋

其四

軍中饗士日椎牛  
戰勝歸來盡拜侯  
自是廟堂神武在  
黃河依舊護秦州

閩中元夕曲四首

今宵雨霽動新涼  
短拍長歌夜未央  
學得崑山齊按節  
還珠門外月如霜

其二

邀來女伴轉三橋  
歌舞叢中落翠翹  
歸去春閨愁不寐  
更無腸斷似今宵

其三

街頭寶炬夜初開  
一曲新詞怨落梅  
怪底佳人好粧束  
閩山廟裏看燈來

其四

繡幙珠簾曲宴開  
梅花影裏玉山頽  
也知春色濃如酒  
可忍燈前不醉回

三月晦日送人之安南二首

憐君匹馬向交州尊酒河橋肯暫留一日春光  
應自惜滿天風雨不勝愁

其二

銅柱南頭問去津片雲片雨摠愁人殷勤看取  
長條柳明日相逢不是春

西湖權歌四首

楊花如霰柳如烟宿雨初收水拍天惆悵西隄  
春十里紅妝人在木蘭船

其二

荷花千柄碧層層湖水漣漪散鬱蒸待得晚涼  
風乍起不知身在玉壺冰

其三

漾漾波光蕩綺霞滿天風露冷仙槎夜深爽氣  
侵人骨齊傍菰蘆看月華

其四

湖上西風吹鬢寒澄瀾閣外雪初殘扁舟暫艤  
梅花島縹緲瑤臺十二闌

宮怨四首

金屋花開轉早鶯  
闌干倚遍綵雲橫  
東風似解愁人意  
傳得晨朝警蹕聲

其二

春風暫到洗粧樓  
宮柳凝烟翠欲流  
自笑眉顰還似柳  
不知若箇更多愁

其三

采采芳蘭手自紉  
可堪清怨翠蛾顰  
仙韶別院教歌舞  
一度春風一度新

其四

銀漢光澄寶曆嬌  
瑤臺寒逼紫霞縈  
綺但教月色長  
如此贏得嫦娥伴寂寥

東庄晚眺

雲黯郊原萬壑哀  
清尊落日共登臺  
林鴉散盡愁將夕  
分得前山紫翠來

遼西歌

島夷橫海躡朝鮮  
都護提兵出塞年  
若說竒功唯議款  
何須千騎更行邊

西夏曲

花馬池頭烽燧閒黃雲遙掛賀蘭山輕裘自有  
羊開府不遣胡兒得近關

懷林熙吉

旗亭別酒未成懽一望青山更渺漫纔對秋風  
便相憶長安月色不勝寒

得家信

鄉書半載不曾通夢隔江南回鴈峰今日書來  
情更惡沉吟不敢便開封

燕京元夕竹枝詞四首

西山霽雪散輕寒嫋嫋東風玉漏殘齊向天街  
逐歌舞五陵春色月中看

其二

東華門外錦層層爭看流蘇百子燈寶炬燒殘  
天未曉碧欄干上露華凝

其三

十里笙歌十里春梨花處度香塵滿城珠翠  
紛如綺怪得年年結束新

其四

御苑東頭燈市開游人如在錦雲堆從來 帝  
里風光好日日看花拚醉回

送人之徐聞令二首

送爾單車入海隅石門山色下雙鳧江南驛使  
尋常到庾嶺梅花得寄無

其二

雷陽南去路悠悠大海迴風天際流莫道宦遊  
非故國衙齋一樣荔枝秋

長門怨

一入深宮暮復朝碧雲寂莫夜迢迢若言衰貌  
難承寵何必黃金貯阿嬌

長信宮

長信秋風暗綺羅玉顏憔悴淚痕多空將舊恨  
題團扇不及昭陽子夜歌

青塚

胡塵漠漠暗琵琶鬼魄猶憐漢路賒豔骨不銷  
千載恨隴頭青草蘸黃沙

楊白華

楊花點點逐殘春，飛出宮牆踏作塵。  
一望南天消息斷，東風愁殺倚樓人。

馬嵬驛

羯鼓聲停軍夜呼，君王倚杖更躊躇。  
蛾眉宛轉一朝盡，猶憶宮中私語無。

宮人斜

閉却泉臺無復春，珠襦零落暗生塵。  
當時亦有承恩者，墓草由來一樣新。

紅葉怨

惆悵西風搖落秋，多情却寄水東流。  
由來一葉輕如許，載得宮中萬斛愁。

金谷園

逶迤步障曲藏春，歌舞回頭迹已陳。  
惟有河陽山上月，當時曾見墜樓人。

薛濤墳

三尺荒墳傍狹邪，墳前流水遶桃花。  
花開花落東風老，惆悵空林栖暮鴉。

蘇小墓



油壁青驄不再逢  
西陵猶有幾枝松  
傷心怕問錢塘水  
潮去潮來無定蹤

江上重別惟和兄弟

驛路風吹楊柳枝  
江雲江雨不勝悲  
也知遠道終須別  
借得離筵駐片時

別瀚公

風雨蕭蕭江水渾  
離亭相對共銷魂  
知師不作人間別  
笑指楊枝無一言

江上別諸兄弟四首

舟前握手盡離觴  
日暮烟波正渺茫  
疋馬蕭蕭西去路  
江風吹鴈不成行

其二

驛樓分手卽天涯  
一望雲山使我悲  
客路風塵從此去  
故園尊酒是何時

其三

江上流連幾日程  
隔山愁聽鷓鴣聲  
天寒日暮不成醉  
楊柳依依是此情

其四

久客歸來不盡懽尊前無奈別離難他鄉亦道  
春光好恨殺花開祇自看

天游觀讀陳价夫徐勣陳鳴鶴林應起壁  
間作悵然寄懷

何年採藥入名山玉女峰頭控鶴還今日獨來  
人不見白雲芳草水潺潺

度分水關二首

山頭風雪水浪浪遠道其如客鬢霜咫尺關門  
分楚越可堪今日落他鄉

其二

馬首西行關吏迎回頭雨雪杳江城出門便覺  
風烟隔聽得山歌是楚聲

嚴陵釣臺二首

當時脫屣入青山一着羊裘永不還但說塵緣  
從此斷更留踪跡在人間

其二

風塵作客思依依滄海猶存舊釣磯今日臺前  
重惆悵扁舟此去幾時歸

西寺訪朗公不遇聞有天竺之行

春風一棹語兒溪楊柳低垂鳥自啼孤錫不知  
何處落白雲遙掛武林西

其二

明前日午不聞鐘師去西湖第幾峰咫尺禪關  
不相見更從何處問南宗

舟中寒食二首

楊柳春風縮暮潮姑蘇城外繫蘭橈更堪客裏  
逢寒食故國音書久寂寥

其二

惆悵佳辰草色新桃花處處度芳塵  
畫船蕭鼓隨流水目斷橫塘十里春

姑蘇別玉生二首

日暮山深聞鷓鴣可堪尊酒共踟躕  
姑蘇城外分携去一片風帆下太湖

其二

襍被西遊一劍閒春風吹入道場山  
憑君莫戀烏程酒醉臥苕溪不肯還

別玉生後風雨大作復成一絕

匆匆解纜不知愁別去其如雙淚流一夜夢回  
風雨惡片雲東斷是湖州

同彥貽晚至惠山看二泉一軟而去

春雲漠漠水潺潺客到應誇嗽玉還昏黑更期  
峰頂望隔林烟磬響空山

官橋懷古

官橋故薛地田文食客處也

稷下風流說孟嘗高臺曲沼亦荒涼只今惟有

官橋柳無復當年俠骨香

郵亭見殘花

繁花落盡怨殘春漂泊還隨客路塵縱得東風  
好相惜看來終是異鄉身

春盡

客舍蕭條對夕暉更堪春盡野花飛馬蹄欲逐  
殘春去不信春歸客未歸

秋宮怨二首

瑟瑟涼風吹玉珂銀屏寂莫柰愁何可憐月落

芙蓉冷一夜秋深墜葉多

其二

露下銀床落井梧捲簾愁聽夜啼烏怪來秋色  
淒涼甚知入昭陽殿裏無

夏日聞鶯

綠暗郊原楊柳斜客中倍自惜年華春光已逐  
東風去怕聽鶯聲對落花

發芋原時振狂追送江滸贈以六絕卽席  
歌之歔歔淚下舟次楊青有懷賦荅六首

江頭惜別不勝情一唱陽關黯自驚兩岫蕭蕭  
風雨惡那堪更聽斷腸聲

其二

勞君相送岳江亭水色山光共杳冥今日回頭  
天萬里扁舟寂莫過楊青

其三

一別江樓楊柳新於今飄絮逐征塵不堪更渡  
黃河水風起沙飛愁殺人

其四

我客天涯女索居山中生事近何如可憐春鴈  
歸飛盡不見南來一字書

其五

一室蕭然越水濱山人原是白龍君  
蘆中何處尋踪跡夢斷江頭千頃雲

其六

聞君欲作粵東遊庾嶺梅花黯自愁  
但使出山嘲小草可能容易客羅浮

潯陽懷古

楓葉蕭蕭江上秋琵琶一曲不勝愁  
淒涼最是潯陽水落日無人只自流

哭張函一廣文六首

風雨蕭蕭易水濱圖書千卷盡堪焚  
淒涼一夜文星殞冷落西山幾片雲

其二

廣文齋冷客偏多峴幘相看只醉歌  
怪得今朝車馬絕酒壚寂莫更誰過

其三

伏枕經時病未蘇一尊相對謾踟躕  
花開花落須臾事腸斷燕山舊酒徒

其四

一片青氈宦計疎生涯蕭索更何如  
篋中猶喜遺編在半世辛勤爲著書

其五

醉來白眼太憑陵處處青山興可乘  
化去定應遊帝所蓬山亦有酒如澗

其六

汶水東廻卽岱宗風流還許躡仙蹤  
君今歸去迎陽洞來往長栖口觀峯

西湖雜咏十首

何處飛來靈鷲峯白雲長鎖翠芙蓉  
坐看東海扶桑外湧出金光千萬重

鷲嶺觀曦

其二

石罅流泉一派清井痕苔冷露華生  
渟泓疑是蛟龍壑試聽夜來風雨聲

龍泓漱玉

其三

月隱空山雲亂飛夜涼零露濕人衣梅花開落  
春如舊不見湖邊放鶴歸

孤山梅片

其四

靈隱山前風怒號松林遙接北峯高游人馬上  
聞天籟魂斷揚州八月濤

九里松風

其五

湖頭春晚草萋萋烟水微茫鳥亂啼欸乃一聲  
人不見小舟撐過斷橋西

六橋烟柳

其六

鐘聲隱隱暮烟消天竺三峯高見海潮一片餘霞  
散成綺幾回誤作赤城標

三竺三晚霞

其七

桃花亂落水濺濺無數殘紅積水邊自是芳華  
人共惜縱令飄泊亦堪憐

桃溪春雨

其八

仄迳懸厓日景微淋漓空翠落晴暉洞門詰曲  
深如許恠得雲來逗不歸

石屋晴雲

其九



湖上微風生晚涼舞裙嬌引藕花香木蘭轉入  
花深處鏡裏誰知不是粧

彩鷁紅粧

其十

水邊楊柳弱如絲嬈嬈東風不自持十錦堂前  
千萬樹宜人最是早春時

錦塘春柳

觀海十首

鹽官城外海雲平烟水茫茫風日晴飛度弱流  
三萬里金鰲頂上看潮生

其二

曛曛曙色掛扶桑貝闕波翻紫電光百道霓旌  
齊上下金輪湧出水中央

其三

早潮初縮散晴烟極目波光淨可憐海上神山  
皆歷歷雲中露出小如拳

其四

蜃氣微茫海市開紫雲千頃擁樓臺波平風軟  
澄如鏡親見仙人三島來

其五

朔風吹雪散芙蓉只尺雲開掛白龍千片銀冰  
何處落潮來推倒海中峰

其六

雪裏嵯峨秦住山山前流水日潺湲可憐徐福  
求仙去一逐樓船永不還

其七

千層巨浪欲西馳駕海橋荒砥柱歆怪得神人  
能驅石不教秦帝見安期

其八

海畔諸峰雪未消瑤臺石室更岵嶢罡風吹落  
瓊花冷月斷銀河一水遙

其九

憑欄一望靜無波烽燧樓空晝掩戈見說承平  
無外事不須瀕海更防倭

其十

長隄百里嬌如虹香火猶傳砥柱功一帶桑田  
鹽鹵地茫茫滄海正流東

遊仙曲四首

弱水茫茫清淺流蓬萊西是鳳麟洲玄都不隔  
尋真路親見仙人十二樓

其二

金闕峻嶒白玉都紫雲千頃夜模糊丹房不下  
歲蕤鎖竊得真形五嶽圖

其三

彩雲爲障玉爲橋一夜隨風度海遙清露滿身  
雙袖濕碧空何處坐吹簫

其四

邀得仙人萼綠華蒼虬齊駕五雲車瑤池此日  
重開宴飽看蟠桃千樹花

約彭山人遊武夷阻雨大安驛揆悶三首  
誰憐風雨路行難百道飛流馬上看咫尺幔亭  
何處問洞門深鎖白雲寒

其二

緘書爲報武夷君玉女峰頭幾片雲莫道山霧  
能妬客不妨笙磬雨中聞

其三

溪頭水漲欲迷津日斷虹橋彩幄新莫便移文  
迴俗駕同遊元有住山人

送閔壽卿山人遊武夷二首

曾向金山結草亭人間聊復託沉冥虹橋却赴  
曾孫宴一曲遊仙夢裏聽

其二

十年對客說長生買得靈山隱姓名它日丹成  
生羽翰蓬萊鸞鶴坐相迎

建陽道中

宿霧初收散曉霞清溪百里帶晴沙山城却訝  
霜風蚤一片楓林二月花

武夷山下作

昔年曾謁武夷君踏盡峰頭千片雲今日幔亭  
山下路虹橋仙樂不相聞

過呂梁

水驛蕭條楊柳黃荒郊風急雁啼霜不驚流沫  
三千尺薄暮輕舟過呂梁

燕子樓

惆悵芳塵黯舞衣小樓春去落花飛可憐粉黛  
成黃土愁見東風燕子歸

南旺湖

汶水至此北  
流入衛河

榆柳蕭蕭兩岼秋片帆千里下齊州客中欲寄  
思鄉淚汶水從今却北流

衰柳

殘枝瘦影不禁秋幾樹傷心湖水頭爲惜婆娑  
生意盡更無茂苑舊風流

寄陳子翼太學二首

十年客路太參商望盡天涯各斷腸今日燕臺  
重攜手不堪惆悵淚沾裳

其二

蕭蕭朔雪暗燕關歲晏風霜凋旅顏莫惜十千  
同買醉酒壚猶未遯河山

田園雜興

并序

宋范石湖田園雜興諸詩大槩寫吳中風  
土蓋唐人竹枝之流前輩典刑致足念也  
余夏仲過家偶從屠田叔錄得一通讀之

自快因舟次閒暇率爾效顰餽釘吾鄉故  
事比于里巷之曲分爲四景各十二章要  
令田畷園丁人人可歌而已但范先生時  
已退居一廬橫塘之上辟如老農老圃無  
非實際余方逐物役何敢作英雄欺人卽  
山中故業日就荒蕪又安得此貌言而稱  
之雖然余本措大起于田間犁鋤斧柯幸  
自無恙異日山隈水湄此景不乏使稚子  
每歌一闕輒舉大白浮之罰余決策之晚  
也借以解嘲丙申八月晦日識

春日雜興十二首

茅舍新移近水涯東風送暖到山家不知春色  
今多少一樹棠梨先着花

其二

甞出郊原計耦耕溪橋獨立雨新晴今年不怕  
春無水聽得山鳩第一聲

其三

送神未已復迎神午夜堂中花燭新去歲秫田

羸十斛不妨多釀醉比隣

其四

官府行春咽管絃大家齊到甕城邊就中一種  
田間曲貌出村粧絕可憐

其五

十戶齊輪飲福錢元宵風景樂新年神前燈燭  
光如許忙殺村童夜不眠

其六

花朝前後是芳辰相約東村賽社神但願今年

田地好再來烹宰共嘗新

其七

土膏欲動雨連綿布穀聲聲催種田試向隴頭  
高處望犁鋤都到北山前

其八

春雨霏霏春日遲田家纔及插秧時山歌十里  
聲如沸絕勝吳儂唱竹枝

其九

寒食郊行作勝遊桑間處處有啼鳩人家澆墓

歸來晚折取松枝滿擔頭

其十

墟里蕭條三兩家短牆土舍自橫斜居人不解  
蠶桑利一片荒山但種麻

其十一

莫道山家生計微荷鋤力作不愁饑春來喜得  
多陰雨韭菜長青芥菜肥

其十二

雨後新茶及早收山泉石鼎試磁甌誰知劣煎

峰頭產勝却天池與虎丘

夏日雜興十二首

四月陰濃梅子黃田家摘取滿傾筐也知市遠  
無珍果一任兒童日飽嘗

其二

三耘已了甞從容消息還應問老農但使北風  
休作惡今年穩取十分冬

其三

原田高燥不通潮無柰前溪取水遙聽得桔槔



聲未了淋漓甘雨竟連宵

其四

朝來忽聽采蓮歌別浦龍舟競渡多社裏平安  
無箇事不須巫媪爲驅儻

其五

門外方塘水欲平短蕪是處有蛙聲不知虫黽  
關何事一夜營營聒到明

其六

炎蒸天氣日偏長赤脚蓬頭也不妨記取明朝  
應作雨午來田水熱如湯

其七

槐陰茂密柳陰涼石枕方床一夢長直到日斜  
纔睡覺好風吹送野蓮香

其八

紅綠參差露氣鮮荔枝今歲正當年山居清福  
堪消受飽食還教樹下眠

其九

平疇百里菜花開勾引蜻蜓蛺蝶來謾說村庄

無好景大家看取錦雲堆

其十

山中睡起片塵無獨對南薰草閣孤更喜單方  
唯一味晚厨清暑有香齏

其十一

買得腴田作越田誰知土產與時遷今年苦熱  
越槌短聊足家供不賣錢

其十二

小池一畝傍田居半種蓮花半種魚客到不愁

供具少打魚沽酒擷園蔬

秋日雜興十二首

東菑一望黍離離却喜旬中風日宜大暑開倉  
收穫早連延直到立秋時

其二

牛女年年說渡河良宵瓜果乞靈多天孫賜盡  
人間巧野性從來柰拙何

其三

七月晡時雨候齊乍晴乍晦鳥爭啼前村刈稻

須乘早莫待淋漓水拍隄

其四

秋深禾黍各登場雨後還思插晚秧一歲再收  
纔得食水田幸不畏年荒

其五

種田得穀亦奔波狼藉其如鳥雀何但得好收  
從爾食筭來折耗也無多

其六

西風將雨淨泥場爨下旋聞新米香喚取隣翁

相對飲一杯慙愧老農忙

其七

明月團團似鑑開中秋好景慙徘徊滿街燈火  
紛紜甚何處童孫開塔來

其八

隴頭風緊日西懸村底兒童放紙鳶看到上頭  
齊喝采微茫一點隔秋烟

其九

白鴈南翔天雨霜山中風景入重陽隣家乞得

茱萸酒見說東籬菊正黃

其十

水田十畝芋苗肥下有蹲鴟可療饑  
爐火煨來還供客農家生計未全非

其十一

紫艷紅英一丈高花開真足伴持螯  
客來共醉東籬下莫道徵君不姓陶

其十二

風味爭傳佛手柑奇香原自壓江南  
時人且莫

輕題品蘋果楊梅總不堪

冬日雜興十二首

十月山中氣尚溫小橋流水傍柴門  
隔林煙樹青如染不比江南黃葉村

其二

東風浙浙破寒烟數點梅花着水邊  
自是炎方剩得暖遊人却愛小春天

其三

採得冬青釀酒香瓦鎚煮出更清涼  
纔傾一盞

陶然醉不減仙人碧玉漿

其四

楓落霜酣棋子黃西風吹動滿林香行人馬上  
看如繡此是南中橘柚鄉

其五

平楚烟銷霜月高滿庭叢竹共蕭騷坐來不覺  
衣裳冷添得蓑衣當布袍

其六

客到流連且命觴殘燈無焰不禁霜辟寒最有

茱萸飲醒酒還須橄欖湯

其七

颯颯西風雲欲崩荒郊朔氣太憑陵呼童速緼  
荔枝火此物由來不耐冰

其八

飛霰紛紛臘已殘凍雲蕭瑟閉柴關兒童不識  
風霜苦爭向溪邊疊雪山

其九

茅舍初成覆草新土炕無火莫嫌貧老翁曝背

前楹暖閣盡人間富貴春

其十

郭外罡風吹帽寒滿空飛雪更漫漫朝來失却  
前村路壓壞溪南竹數竿

其十一

閒居無事惜年華玉曆頒來野老家知道臘前  
春信到試將消息問梅花

其十二

簫鼓喧闐夜復除村中生事更何如雞豚蔬菓

家常有不待山妻隔歲儲

爲林山人悼妓四首

十季走馬狎平康買得名姬獨擅場一白鳳簫  
聲斷絕不堪重覩舊衣裳

其二

妝成金屋貯蛾眉一夕花飛不自持唱罷新詞  
更回首愁人無奈月斜時

其三

對面陽臺路已分傷心何處覓行雲芳魂不逐

蘅蕪夢那得仙人李少君

其四

琵琶絃絕綺羅灰  
杜宇千聲喚不回  
見說孤墳荒隴上  
春來依舊野花開

再送士文

滿天風雨怨離群  
客舍鶯聲不可聞  
此去亦知非遠別  
薊門殘雪又逢君

黃昭質武部典試還

朝買廣陵羅姬同

載戲贈二首

維揚佳麗古名都  
艷質堪酬明月珠  
笑向棗間彈一曲  
侍兒元是小羅敷

其二

寶馬香車擁翠鬟  
滿空風雪不知寒  
恠來桃李花如許  
更買芙蓉帳裏看

丁酉紀事五首

勅使身齎金虎符  
但言開採足邊需  
誰知閭里蕭條甚  
淚盡中州柱史圖

其二

兩宮新建太輝煌鋪設還須七寶粧却恠海南  
珠貝盡不教天子坐明堂

其三

經旬好雨慰三農聖主先論禱祀功玉帶麟  
衣兼寶鈔中涓捧出大明宮

其四

琢成玉石巧盤蓮力盡千夫不肯前請看殿中  
方寸地筭來多少水衡錢

其五

千群緹騎護中官朱押黃封濕未乾三百店房  
都鎖却傍人不敢舉頭看

壽游子介二絕句

金門聊復託沉冥始信東方是歲星乞得大官  
甘露酒與君長醉莫教醒

其二

俸錢盡給酒家胡但對青尊不用沽更勅後房  
歌艷曲隔屏齊唱鳳將雛

宮詞十首



日侍金輿奉至尊椒風幸有別承恩同來女伴  
俱零落含淚花前不敢言

其二

越綺吳紗別樣紅分明繡出百花叢中間更有  
飛龍錦御手先頒第一宮

其三

綺閣瑤房午未開侍衣官監各徘徊醉醒展轉  
無人覺鸚鵡傳呼直日來

其四

可憐傾國寵方新花謝花開亦有因夢隔蘅蕪  
消息斷武皇還憶李夫人

其五

露布朝馳自海東 聖皇歡宴萬年宮梨園齊  
奏平蠻曲竟是何人汗馬功

其六

鑾輿避暑著九層臺賜扇含風巧樣裁齊說今年  
工製好詔書特勅守臣來

其七

閣門初啓日西沉曲宴流連夜漏深忽報外頭  
封事急何方鑛使貢黃金

其八

明堂勅遣大長秋妙選民間第一流且喜婚期  
將卜吉朝朝瑞氣傍龍樓

其九

中官走馬捷如飛內監傳宣盡賜緋昨夜新添  
第九女大家拱手賀皇妃

其十

永陵宮女白蒙頭却憶當年侍冕旒最有  
皇能繼武太平垂拱不曾愁

三月晦日宿安德

客路傷春夢屢驚殘燈蕭瑟臥孤城可憐春事  
今宵盡不見流鶯一兩聲

荔枝曲十四首

有引

舟過吳閫彭興祖以王百谷茉莉曲見示  
翩翩竹枝餘響旣抵虎林阻雨無可散悶  
者戲作此曲擬之閩人伉直不能爲楊梅

左袒恐盲谷見之又笑汝高癡乃爲草木  
聚訟也彭興祖客閩中久業品嚐之當助  
我口實不妨作鴻門項伯耳

其一

鳳皇山下荔枝園擇日開林市子喧一百銅錢  
分一擔平明奔進合沙門

其二

纔交小暑日頻催一夜驚看錦繡堆蚤起香風  
遍城鄙人人都道荔枝來

其三

紅如鶴頂大如杯奪取頭籌滿擔回更怕午前  
日色惡齊將青葉蓋頭來

其四

火山先出試嘗新只好山隈及水濱酸沁齒牙  
形味劣果中比作埽除人

其五

荔枝高樹倒垂簷十尺長千兩刃尖摘下但憑  
多少喫飽來還有水精鹽

其六

稍頭狐鼠捷如風  
夜鷺經過樹樹空  
高結茅樓敲竹夾  
曉來添得照山紅

其七

麻繩高弔小筠籠  
上下盤旋西復東  
且喜今年風雨少  
荔枝個個不生蟲

其八

千株傍水各成行  
半是豪家郭外庄  
最好五更乘露摘  
噉時猶帶露華香

其九

珊瑚滿貯水晶盤  
疑是仙人絳雪丹  
飽食日須三百顆  
石林無暑夏堂寒

其十

金盆瀲灩碧波妍  
一道霞光照眼鮮  
何似婕妤初賜浴  
玉肌三尺浸寒泉

其十一

柔袖紅綃錦隊齊  
豐肌甘液壓枝低  
吳兒可是饒輕薄  
錯把楊梅共品題

其十二

萬樹搖風點翠苔不妨對客日千枚城中諸品  
垂垂盡猶有吳航勝畫來

其十三

海中仙品果中王爭說多情十八娘月旦不知  
誰第一看來畢竟狀元香

其十四

千林摘盡荔枝殘密漬鹽醃更晒乾不分側生  
能損價可知輸却玉漿寒

爲林熙吉題冊了五首

斷橋荒徑草萋萋千頃流雲錦水西石磴如盤  
分席坐隔溪垂柳聽鶯啼

其二

不待開帆不待潮枯槎聊當木蘭橈也知身外  
無餘物只有詩囊共酒瓢

其三

松風颯颯散江臯攜得瑤琴手自操一夢醒來  
清病骨不須枚叔賦觀濤

其四

山逕荒涼閉夕陽  
隔林香氣識僧堂  
鐘聲隱隱磬聲寂  
供罷清齋禮法王

其五

積雪初晴寒未消  
杖藜獨往意蕭蕭  
苦吟却得梅花助  
不忝風光在灞橋

張明府貽紫花布

雲間細布紫茸花  
乞自關門令尹家  
擬作華陽高士服  
青山隨處弄烟霞

長沙寄家信

路出長沙秋欲殘  
逢人再四報平安  
謾言書裡多珍重  
纔過沅沅寄信難

沅江道中

征途千里入湘沅  
何處看山不斷魂  
最是楚江秋色裏  
可憐獨少一聲猿

入鎮遠

沅江南轉萬峰齊  
回首愁雲隔五溪  
只說夜郎天欲盡  
單車更指夜郎西

羅憲副署中叢桂忽降甘露爲賦二絕

憐君藜桂小山傍那得金莖露可嘗  
但向枝頭聊一吸不須神漢與天漿

其二

香風颯颯夜無塵幾點如膏露似真  
欲乞刀圭消病渴馬卿元是倦遊人

哭徐惟和十二首

鄉音半載不曾來偶到開緘意屢猜  
忽報徐生凶信至碧雞昏黑夜猿哀

其二

憶得臨行話別時床前媿媿坐譚詩  
單車纔指湘沅路回首南天事可疑

其三

屈指交情二十年高山流水動相憐  
眼前無復知音賞對客那能不斷絃

其四

長安慷慨酒人群俠氣憑陵欲吐雲  
易水只今寒色甚悲歌千載不堪聞

其五

月鎖孤齋萬竹寒  
秋風吹斷碧欄杆  
葦床茶竈俱塵土  
一夜嚴霜摧紫蘭

其六

平生結客少年場  
咳唾如雲語自香  
玉樹摧殘人不見  
淒涼寶玦夜無光

其七

當年三謁武夷君  
夢入峰頭鸞鶴群  
便學徐仙同坐化  
罡風吹散幔亭雲

其八

十年書劍走天涯  
五字翩翩五色霞  
一自玉樓賦成後  
彩毫零落不開花

其九

一領青衫未破除  
誰令曼倩老公車  
槿花易謝瓊花死  
冷落南州孺子廬

其十

寂寂幽居郭外扃  
憶君命駕坐寒汀  
年年烟月無窮恨  
都向山陽遂裏聽



其十一

浪說犁鋤隱是真眼前丘壑更何人酒壚雖在  
河山邈花落花開不見春

其十二

西南萬里乞歸遲他日墳頭哭豈知留取長松  
堪挂劍白雲何處更相期

哀牢

馬頭疊嶂帶崇嵐客路驚逢三月三莫道去家  
今萬里此身還在大江南

平播凱歌四首

義旗西指障雲開親領雄兵百萬來帳下兇徒  
齊授首千年廟社一時灰

其二

勢窮還據海龍城鼓角無聲馬不鳴莫倚舊時  
香火約行圍半是水南兵

其三

山後山前百道攻忽驚飛炮火連空城頭萬炬  
明如晝知是誰人第一功

其四

可憐死士漫如雲樓櫓連山一夜焚自是運籌  
歸幕府果然西塞勒奇勛

寄宜春張令

本嘉

宜春山水豫章西一夜猿聲過五谿忽憶美人  
花發處楚天無際暮雲低

湧泉寺邀江廷尉孟憲副盧叅戎宴眺五  
首

一逕青山十里遙白雲谷口坐相邀不須呵殿  
驚村女拄杖前頭只酒瓢

其二

山隙流泉激雪飛石巖嵐翠濕人衣旛幢不動  
柴門閉日暮老僧何處歸

其三

石邊水出忽濺雲飛瀑潺湲曲曲分試向蘭亭  
問陳跡風流還說右將軍

其四

新釀真成竹葉青一尊相對共沈冥芒鞋踏遍

雲山路笑倚峰頭木末亭

其五

遊興離板酒興豪醉來白眼鬪風騷江山勝蹟  
應如此可道登臨有我曹

昆明署中菊花將放余客句町不得一賞

寄孟憲副

惆悵東籬花事新臨行鄭重託西隣孟公本是  
龍山客借與陶家作主人

過通海石門

層厓迢遞水潺潺嵐翠淋漓渺靄間客子不知  
天萬里褰帷疑作建溪山

李留後邀宴挹漢亭四首

漢江如帶柳如烟亭榭新開閣道連上下闌干  
三十六分明天際出青蓮

其二

楓林瑟瑟正深秋雲散徐看漢水流日晏轅門  
刁斗靜柳營月色度篁篻

其三

大旗獵獵馬蕭蕭  
仗外青山送酒遙  
一曲鏡歌人盡醉  
甲光如水劍橫腰

其四

城頭突出小崆峒  
三楚繁華指顧中  
莫恠朝來多氣色  
林端雙闕卽潛宮

均陽署中壽朱水部

開徧蟠桃春未闌  
仙人飛珮玉珊珊  
太和山主無供奉  
乞得玄君九轉丹

三月晦日襄陽道中

一夕春歸柳暗催  
天涯遊客自徘徊  
大堤飛絮紛如雪  
并逐東風去不回

遇真宮

真仙羽化去人間  
鐵杖金衣色尚斑  
丹竈不留天樂杳  
更餘遺跡在空山

榔梅祠

榔梅花老樹凋殘  
曾耐東風幾歲寒  
自是瑤池天上種  
竒葩那許世人看

答楚王孫贈菊

竹影蕭蕭散早衙滿庭秋色簇黃花南山只在東籬下愧殺柴桑處士家

答別朱季則四首

江頭飛絮白漫漫客子將歸春欲殘漢水東流經鄂渚思君不見獨憑闌

其二

萬頃波濤萬斛舟牙檣如戟狎江流夢中迷却巴陵道春雨春風無耐愁

其三

挹漢亭前春可憐使君醉態逸如仙酒壚徑作河山隔明歲相逢苦箇邊

其四

五年辛苦逐邊州空况蕭蕭不可留遠道關心何日到還家贏得荔枝秋

西樓全集卷十終

國家圖書館, NATIONAL CENTRAL LIBRARY, TAIWAN, R.O.C.



西樓全集卷十一目錄

序

刻李善文選註序

刻世說新語序

承天府志序

廣東丁酉鄉試錄前序

雲南庚子武舉錄前序

雲南庚子武舉錄後序

雲南庚子叙齒錄後序



雲南庚子武舉叙齒錄後序

雲南歲貢叙齒錄序

雲南貢士錄序

湖廣武舉鄉試錄序

湖廣武舉叙齒錄序

吳明卿甌龔洞續藁序

西樓全集卷十一目錄終

西樓全集卷十一

閩中鄧原岳汝高著

門人陳開泰侯亮訂

仲子慶棠編次

序

刻李善文選註序

自李善治文選最稱洽聞其後五臣更爲訓故  
稍緣其舊而刪潤之不能什一於是六家並列  
總雜不堪辟如贅疣徒滋詬病乃近世復變爲



刪爲纂省煩蕪而存簡要取于約而易讀李氏之書幾同秦焰矣夫昭明之爲選由春秋以迄齊梁其辭綿麗其義奧僻其字轉借而多奇童習白紛曾不知其所入李氏廣摭博采曲鬯旁通貌不必合而脉合理不必合而趣合猶車之有指南也官之有鞿譯也且無論其他卽所稱引自六籍而外稗編緯書百數十種皆藝文之所不傳縉紳之所罕覩真足以備漁獵廣見聞號之曰書簾不虛矣夫以撰著如昭明可謂卓

鑒而世猶或廣之乃知意見不同各持其是善之中廢不足異也余嘗謂古人未可輕故籍未易議笑前哲之匪工忘已事之已拙豈非畫蛇添足勞而罔功者哉余雅欲爲李氏恢復舊業示好古者久之行部過哀牢得朱邸故刻旣多魯魚又苦漫漶蓋以分合屢更或非其質矣乃求別本參互訂之擇工鈇板頒之學宮序其梗槩如此

刻世說新語序

瑯琊王氏兄弟表章世說於是人挾一編卽三尺之童無不知有晉故者吾獨惜奉常之批評點竄畧盡而窺豹爲嫌司寇之刪補模擬似工而續貂見誚夫亦好異之累而千慮之失也袁氏善本出於放翁舊物具在贅詞何取輒爲刊其謬誤刻之楚藩夫晉室南渡競習虛浮上以曠達爲宗朝以標格相尚風姿特秀則揖讓而取公卿名理粗通則雍容而躡顯貴及其敗也小者迄以亡身而大者乃至覆國是非人士之

殷鑒與顧其中事則誕而多奇辭則婉而有致宅心物外塵俗之態自消畢志山林烟霞之思彌結江左風流於今爲烈吾時引之以資吾舌而更借之以澹吾趣如山之穀也澤之腊也以餽飮八珍三俎間有餘味矣且亦足以愧世之羶慕而蠅集者爲叙其所繇刻云

### 承天府志序

承天故安陸州幅幘僅僅其後以封建顯制度稍崇 肅皇帝由藩邸入繼始改爲郡割荆門

諸州隸焉比於首善煌煌登三輔而上之矣承  
天大誌紀龍飛則詳叙文獻則畧蓋各從其重  
也夫王迹所基帝業斯熾文治旣起名世相望  
乃八十年來闕而不宣夫非守土者之責與東  
吳孫守君蒞郡之明年蝨賊旣去民乃太和爰  
輯前聞補茲闕典其筆削取於獨裁其義例沿  
於郡國凡五閱月而告成事不佞適入郢則屬  
不佞序之我 國家兩都遞建辟之豐鎬規模  
闕遠何論漢京楚當南紀實維侯服今乃以湯

沐之故進而與京兆同宮闕不移鐘簴如故是  
興王之地磐石之宗也王氣鬱葱山川拱衛天  
運地靈於斯爲盛中興而後 聖神代作休養  
生息亦旣有年士嬉于絃誦民樂於畊耘有司  
循行郡邑直卧而理之優游覆載之內孰知其  
功邇者水衡告急利孔四開貂獠持黃紙錯繹  
於道不采金于山則權貨于市諸啣命者不深  
惟德意一切錙銖取之吏不得職民無所聊生  
毒流于衣冠而克震于陵寢楚俗慄悍易與爲

亂諸無藉不逞之徒闕然並起漢沔之間洶洶者久之幸上明見萬里之外亟更置其人鏗其羽翼爲姦者特勅部院大臣填撫之民以寧息彼一時也中涓四出徧於十五路霍焰無所不張臺臣日告變上意堅持之顧於楚何汲汲也篤祜繩武持危定傾豈枝葉是庇而縱其斧斤廟堂之上能一日忘根本之慮哉人臣幸而在事值維新之會與民更始承酷烈者易爲恩代湯火者易爲德維持調護與上下相安

期無負三聖在天之靈臣亦藉手以逭於薄責此幹蠱之義也作者之意豈惟紀事之爲兢兢毋寧使上焉者厯燕翼之謀下焉者奉紀綱之役庶幾乎有基無壞云爾不然其文則史抑又何所取裁乎志爲卷二十分數三十有九掌故具矣地本侯封不足當列郡五百年而聖人作巍然天子之都志龍飛第一春秋之季諸姬食於楚漢晉而下遷徙不常卿雲見於翼軫之分爲之兆矣彼疆此界舊藉可稽沿革第二分

野第三攷古第四疆域第五東由太室西自江陵江漢朝宗美哉山河之固靈秀與區非 聖人孰能當之志山川第六城郭第七形勝第八思皇多士維周之楨况在舊邦宜崇廟貌禮重美報非有功者弗祀郡縣分轄各有司存鄉有聚市有集民之所由生也志廟學第九祀典第十公署十一鄉市十二郢爲澤國群五方之民獷悍憑陵其天性固然誅求旣峻歲有逃亡厥田下中半爲魚鱉之穴供億浩繁山澤無所出

志風俗十三民數十四田賦十五徭役十六方產十七河伯爲政公私鮮升斗之儲西北多山東南多水盜之藪也誰能去兵飭厨傳治橋梁賓至如歸民不病涉志倉儲十八兵防十九郵傳二十津梁二十一潜沔之交四顧皆水鄉以隄爲命脩築無寧歲咫尺之地瑕勢且土崩志隄防二十二漢江如帶岵山如礪分地建國諸侯非一家政歸岳牧是在守宰庶察秩秩惟穎可書志封爵二十三官秩二十四宦蹟二十五

世稱楚材什五郢產也薪之櫛之莫非國棟風  
流儒雅爲世作程自楚有騷繼美者衆矣志制  
科二十六人物二十七藝文二十八二氏之教  
與儒者相出入苟可勸善異端何有志寺觀二  
十九仙釋三十獨行之士逍遙物表漢陰之野  
高風可尋女貞子孝邦之紀也志高士三十一  
貞孝三十二清溪傳於鬼谷玉泉著於浩然君  
子所過者化何必故都史述九流不拘一概志  
僑寓二十三方伎三十四蘭臺丹井陵谷未湮

鳳港石城芳華尚在幽岩邃壑峭壁崇崗三湘  
七澤可俯而闖志古蹟三十五勝槩三十六妖  
由人興業不自作五行之應蓋亦不誣朽骨可  
灰高名未泐樵蘇不禁何以慰仰止之思志祥  
異三十七古冢三十八傳存外紀好古者所不  
遺要以侈博識廣異聞亦史氏之例也志雜志  
三十九不佞聞之史有二難無徵者不信不尊  
者不從是志也稽之故實則聞見足徵裁之主  
者則耳目不貳故足術也吾請懸之國門與都

人士共之

廣東丁酉鄉試錄前序

皇帝二十五年天下復當論秀于鄉而東粵乃在南服去京師八千里而遙 上先期命臣原岳偕行人臣嘉訓往典試事臣固司農之常隸也展四體以率舊職猶恐不給敢有越思臣朝受命而夕飲冰簡書是懼旣 陛辭而南忽忽不知所爲計入其疆則巡撫御史臣某飭百執事而待之而前御史劉某所禮聘自四方及

臨事而推擇者皆集同考則通判臣某推官臣某某教諭臣某某提調則左布政使臣某右布政使臣某監試則按察使臣某副使臣某而御史監臨焉時奉新例加峻簾內外罔或不虔乃合提學副使臣某海南提學副使臣某所簡士三試之臣預戒分杪諸臣其毋靳目力以盡士技參伍覆之期無掛漏旣得雋七十五人錄其文似者以獻歲在乙酉 上始分遣廷臣主天下省試于是臣寔舉于鄉今且一紀矣臣遂以

諸曹郎覲顏從事夫臣旣以末藝欺主者劣見  
收其敢以臣之陋質爲諸士勸惟是束髮受業  
斤斤而守之奉爲功令而以臣知學時覆今之  
文十不得一也以臣應鄉舉時覆今之文十不  
得五也文章之敝可謂月異無論耳目所及而  
變習若此臣又安所憑依而題其甲乙乎里婦  
之嫁也布裙椎髻操作而前異日遣其女卽勉  
強塗澤而羞澀彌甚毋寧効田間妝乃不失故  
步耳故臣於士雖不敢爲矯枉之過概收其庸

腐者苟其格不雅馴辭不正經卽新銳可喜姑  
且置之何者便辟巧笑非墜婦所習也今諸士  
羔雉具在籍上禮官稍有不當有司索其瘢而  
繩之臣無所逃罪幸而得免而二三輕俊之士  
恨臣之見擯直嘒嘒然抱不平其必曰夫夫固  
俗吏惡知士且又惡知奇士也夫使臣一身上  
不憂 廷議而下憂巷議臣之慮始窮臣之心  
良苦矣自 明興二百三十餘年寔唯休隆之  
運 列聖之所培植久而始鬯賢才輩出溢而



不可勝收 廟堂之上亦且怯于議用而勇於  
議舍卽五嶺之間謫籍居半斯皆曩時耳目之  
臣 上所自拔而用者也 上旣難于一賜環  
之命而復歲以厯弓旌之使此夫棄璧投珠而  
別尋環異臣愚不足以知 上指然 主上寧  
舍已試之臣而求之未試之士斯其寤寐焦勞  
無所不至而所注意于士者亦良重矣京考之  
典 世廟僅一再行未幾而報罷至今 上遂  
爲故事一屆期待從之臣乘傳而四出不惜煩

費異得人爲縣官用 詔書每下未嘗不以釐  
文體正士習爲言三五申令不厭鄭重以今多  
材之世豈乏此彘彘也者而効之而尺幅短長  
又果盡先資之言真能裨于殿最乎况其以諛  
辭進也是 上寔重士而士自輕之也盖今天  
下之所推爲嚆矢而視以左右袒者宜莫如吳  
越閩楚之士其奇險頗僻亦足以駭四方而使  
之易嚮粵以隔在海隅聞見無所染猶知緣質  
而守其經臣亦得循故步而求之差不相遠今

既從吳越之士程才而進矣夫今粵士與吳越之雋扼要爭竒未必勝也假令粵士範馳驅而逐於康莊之途則粵故不後三吳之文繡也豫章之材也荆揚之金也非粵所產也象之齒犀之角香沉水而珠媚川天下珍之旅幣無方夫孰非鉅麗之觀也與哉爾粵士第勗之母悖先訓母奪時趣母驚險而鬪捷母舍璞而露琢世有知之者且亟收之曰此南海之寶也異日者以備任使蔚爲國華乃不負 朝廷所以重士之意耳且也天威孔赫災異頻仍 陛下側席思讐沛然與天下更始士由斯而展采遇合已竒其何以佐下風而寬宵旰夫翼運回天匡時贊治匪異人任乃士也臣聞古之明君每遇天變輒求賢良方正直言極諫之士臣幸藉茲役庶幾得其人焉而應 明詔臣願借子大夫以待命于公車矣

雲南庚子武舉錄前序

自 高皇帝以神武定天下當事者率言武功

疆場之外介冑之士爲政其在荒服人騎射而  
家韜鈴萬曆庚子滇當比士御史劉公旣羅諸  
明經者拔而貢之至十月後開武闈於是中丞  
陳公久鎮茲土赫赫壯猷無競惟烈一時材官  
介士咸感激思奮御史約束申令如故事張侯  
立表枹馬步射闡而問方略焉登其頴者三十  
人士旣錄某以職事例有載言我 國家十三  
司隸滇於西南爲極邊中原冠帶之區縉紳先  
生肝衡而談禮樂視武事贅疣耳乃若邊陲荒  
服夷獯雜處無日不尋干戈其于兵也猶饑食  
渴飲也則奈何贅疣視之且也 高皇帝先平  
中原繼取楚蜀已取黔最後取滇皆百戰而後  
服然旣入版圖則安讐而不動獨滇屢反覆至  
假重臣而世守之猶曰羈縻以此知滇地險阻  
釁隙易生士未可一日安枕國未可一日弛兵  
也不佞竊嘆明興養士二百三十年文武二科  
遞重而不廢計其所爲得士之效則文士十五  
而贏武士十一而縮試屈指永宣以來名世之

臣輩出內安社禩外固邊圉紀燕然之石勒太常之銘皆拔自賢科卓然可紀而武科以功名顯者大約不能相當至新建靖遠遂以文臣而開爵士乃近日遼左川西之役亦皆儒臣尸之夫爾輩平日挾弧矢而志馬上勲意氣甚壯未嘗不謂此嚶嚶者直于楯鼻上磨墨檄之一有緩急率諉於王者而不敢以雁行則又何用此贅疣之不左視之也今試士於騎射業見其技試士於籌策業見其才文質具矣異日在行間

必不肯以勲業讓人則安所決策哉或者見外難稍寧妖氛漸息謂爾輩將無所試其奇然遼左之事識者尚不能無隱憂而西北自跳梁未已士患無其具不患無豎立時上之分茅胙土次之專闢建牙出奇制勝爲國家効死力真亦輩事兎且之詩曰赳赳武夫公侯干城夫以中材之士而當干城則其養之者素也况爾邊士家世談兵者乎其爲干城何可勝道哉毋使人謂滇士勇于名而怯于實也升之司馬且有推

轂子者耳

雲南庚子武舉錄後序

凡視學使者法得兼督衛士良家子羽林健兒與郡國諸生並採擇以備縣官之用云歲庚子十月當校武錄旣成某幸而在事宜有言于末簡我國家文武並用取法于成周屬承平日久勢不能無軒輊彼以詩禮起家徒持文墨議論求多于馬上於是介冑之士益詘沿習而靡其孰能不波識者思所以劑之未能也今以儒學

之後隱約鬢序之中竭力而嘔精無所不漁獵而或坐槁以死爾介冑稍或穎出輒登壇建節爲萬夫雄故稱遇合則介冑易而縉紳難士少隸學宮輒操之如束濕幸拜一官直吹毛而求之爾甿熬之夫不盡拘以文法使貪使詐一切得從便宜故論約束則介冑疎而縉紳密在令甲文臣無世祿而武臣有世爵第勒尺寸之勲則子若孫享之勿絕文臣卽尊貴乎不再傳而止矣故較恩澤則介冑寬而縉紳狹國家內治

責之公卿外圉責之將帥雍容坐理賢者無所見才一旦有警汗馬者重矣故核功實則介胄急而縉紳緩夫廣其貢額疎其文網優其恩數而重其委寄上於爾輩不薄寧言拙也雖然士能自伸則拙伸也士不能自伸則伸拙也邇時名將宜莫如戚少保元敬賢少保南殲倭北拒胡橫草之功勒于五熟之鼎上至以文臣之爵爵之而一二縉紳號文章家者亦爭引之爲重夫使士以功名自奮不以結援爲名高異日而垂社稷勲卽文士嗟乎其後如其不然聞難色變齟齬若轅下駒闕闕逢迎徒以金錢而買寵夫先自拙已何以求伸語曰蓬生麻中不扶自直豪傑之士豈借資而後顯鑠乎維今歲文學博士濟濟而稱俊者三之二什九不佞所統治也藉第令人爲名臣出爲名將文武之道交伸以爲重使四方見而艷之曰滇士則彬彬矣使者不佞願徼寵于碧鷄金馬之靈以諸生而免于臯鼈士謹毋自拙也

雲南庚子叙齒錄後序

萬曆庚子雲南序齒錄成則直指劉公業序之矣而不佞以視學故例贅一言於末簡我 國家招定南土滇最後服輒肆其毒於文告之使憑陵而莫誰何至以大軍臨之而後下蓋緩懷若斯之難也明德翔洽無遠不屆自不佞奉

璽書而杪治之山箐之間無所不窮歷南至於句町西極於哀牢重峰疊嶂黑水惡溪瘴霧停午不散而玄冠文物在在有之青青子衿絃誦

之聲四徹不佞於是益嘆文教之盛邈於幽遐矣夫以滇越在西南陬中原之人不身履其地以爲遐方絕域氣候異齊想風日之駘蕩則詫爲慘凜聞山岳之崢嶸則辱爲怪僻觀花木之滋秀則指爲瘴厲大率欲抑之而不使與中國伍乃今省錄傳於四海與吳越爭勝于毫釐之間退而省其私長長幼幼儼然鄒魯之舊抑何斌斌爾雅也此豈山川之靈人力所通也乎哉聖化遠被如天地之無不覆載一道德以同俗

里譯可格况爾 聖祖所疆理之國二百餘年  
受恩承化之深且久乎宜其有禮而文也雖然  
文已盛者實或衰禮有餘者衷不足士一從鄉  
薦同升諸公兄弟之好不啻其身迨於子若孫  
猶通藉而締世講此真可謂異姓而骨肉矣他  
日在事或不盡然不佞且不忍極言以窮人心  
之變然未可以古道期諸士大夫謂心如其口  
也故識者憂之謂以今視古名則益厚以古視  
今俗乃逾薄質之不存文焉用之今爾諸士之

試於有司挾三尋之矛秘搏若風雨終不遺力  
而讓能既錄名而彙征乃各還其布衣昆弟之  
心共敦夙好持此而服官同心同德協恭和衷  
庶幾可以杜求多者之口而滇始伸于天下不  
然事不由衷以面皮爲肺腑不以心競而以力  
爭至于張陳凶終蕭朱隙末則又何取於是斷  
斷者之爲且閭巷之人不知齒讓爲何物然而  
守望相助患難相恤此非有飾也苟諸士以名  
讓而實爲構母論鄒魯所羞稱得無令此輩謂



吾黨爲面諛徒豪舉者乎則病者乎不佞於諸生不欲以華言相告願以規焉

雲南庾子武舉叙齒錄後序

國家以禮讓爲教士莫不廩廩務名高非獨矜紳能也卽介冑之夫素椎少文亦且慕說古人而習於讓蓋承平以來文之盛也久矣萬曆庚子滇武士入彀者三十人已復倣文士以齒先後錄而請序焉夫矜紳先生繩趨而尺步齟折而脩容其於讓齒則天性也爾介冑而馳者汗

馬挽強果激用壯叱咤則山岳動搖指揮則風雲變色餘勇可賈唯敵是求此寧有人於五步之內哉亦乃屈其雄心委蛇揖遜講兄弟之驩司馬法不聞乎國容不入軍軍容不入國何文吏也蓋不佞觀於春秋之際人習於兵戈智相譎而力相戕何知禮讓然而繇上之役范宣子以讓先諸大夫汰如欒黶不敢爲忤也迄於數世不失諸侯彼棄禮讓而尚首功貴少而賤老則蠻貊之俗春秋所損矣故曰軍旅有禮則武

功成又曰讓德之主也讓之爲懿德德讓也者先王所以相接而不相侵陵者也郤至免胄而趨風楚主以爲君子子玉剛而無禮蔣賈策其必敗則豈必瞋目盛氣以無道行之乃爲勝其任而愉快乎哉是故桴鼓相聞旌麾相靡陣有堅瑕勢有強弱吾以身當其鋒艱險無所避此以不讓爲讓者也至於幕府上功人人自奮退然如不勝衣吶吶然如不出口不道平吳之事不伐江南之勲此以讓爲讓者也其不然者遇

難而退見利而奔暴如虎狼如羊直豪舉耳則奈何拾文士之唾餘而粉飾之爲且爾諸士什九將種也其先世皆一時鵠起於草昧之秋子孫相承以至於今復爲同籍由斯以譚則所稱世好矣異日同心同德立尺寸之勲上以報天子下以報先君則斯錄也庶幾久要者乎夫文士以齒懼其勝質武士以齒懼其勝文要以由衷而出歷初終而不渝則文武異道其揆一也二三子勗之哉如不吾信則有侍御公藥石之

言在

雲南歲貢叙齒錄序

今上廣厲學官揆求雋乂則間五年合郡國士旣廩者盡試之拔其尤於是少年之士莫不競奮而遲暮之士詘焉旣又念士久困佔俾不能自拔偃蹇無復之直坐槁耳則爲罷前議行歲貢如初蓋上側身求賢而尤曲體士心至於如此歲在庚子應論州郡士滇東西就試者六十人凡資深而文稍不悖者輒收之使者不

佞思所以廣上德意而不欲求多於諸士取於備貢額而止工拙無論也士旣錄則各叙其家世而講爲兄弟甚驩刻成屬不佞以片言弁之夫滇之俗半雜夷僂椎結而居閭閻之間慮無不挾氣而思鬪卽二三青衿號爲雋秀而穎出齊民者亦不能洒然盡改其俗名相搏而利相傾無復有廩廩德讓之意且無論其他爾諸生投牒而來一正一陪二耳其中各有物相持而不肯相下不佞私心鄙之而今一旦忽釋其

爭競之心而敦久要之好得無以故事應而非其實也乎哉夫志同升脩世講此其名甚美藉第令以故事而已要其實曾不如路人又何庸此靡文爲也居嘗屈指諸生旣廩之期其多者且三十年少亦不下十五六年而此三十年間所經升沉榮辱不啻百變屢蹶而屢起屢挫而屢更或者一敗而不復振蓋不勝其僂得僂失之心而爭端於是始矣顧爾三十年於此屢蹶屢起屢挫屢更然得者竟得失者竟失苟妄意覬覦則并其故物而失之勿忘勿助乃底於成此靜躁之辨也故曰終身讓路不枉百步此言雖小可以喻大諸生勗哉毋自卑其格毋自銷其精同心同德各効其奇有禮而無飾有厚而無私庶幾哉無負朝廷所以廣厲之意而是錄乃不爲飾辭不然上又何靳於少俊之士而惓惓於若輩爲也

雲南貢士錄序

余視學之又明年當會貢之期於是合滇東西

五十七杪之士久次者如故事試之以備貢額  
大率循其資而收之非以藝相甲乙也覆其文  
近似者不能什一閱其人少壯而强者亦不能  
什一余盖有慨於南司成近疏曰國家鄉貢之  
典本爲遴才今乃不以賢賢而以老老余竊傷  
之夫周官之法諸侯每歲貢士於天子賓而興  
之以需縣官之用彼其時建掀揭之業出爲王  
佐皆老成耆德之士也漢唐而下少雋者前矣  
夫古今人非不相及而取効異者何也余嘗妄

意以爲古之士難於進而厚於積今之士易於  
進而薄於蓄古之君子明經待用卽紛華無所  
染隱約巖穴之中卓有以自負者其精內嗇其  
神內完徐而應之無所不効今之君子自束髮  
而慕功名其途甚廣其欲甚侈心羶而不勝其  
求意鬱而不勝其逼盖旣老而精已消亡矣辟  
之芒刃藏鋒歛鍔善刀而藏之一發於矧何不  
快意焉藉第令未成而試不缺則折耳此輕於  
用者也則今之士何以希蹤古人余猶憶諸生

時見諸曹偶初餽於學宮意氣勃勃久之屢試  
屢挫不能無耗磨無已則企足而待期未卯而  
求時夜強拜一官齷齪盤辟亦自見爲意得徒  
爲少年姍笑資余何忍見此於爾諸生也又安  
能使當事者肯以老老易賢賢今諸生應貢而  
上公車其壯者不妨以科第自見卽不然亦且  
爲人師帥儼然擁臯比於青衿之上指而號之  
曰師模師模願稍自奮毋爲人口實寧使人謂  
使者雖老老猶不失賢賢之誼以此爲諸生解  
嘲是使者之幸也蓋貢士之法一不適謂之過  
再不適謂之傲使者貢士至再傲不傲使者無  
所逃罪其惟二三子之故矣

湖廣武舉鄉試錄序

國家文武並用要在網羅豪傑以佐縣官楚固  
才藪于今爲烈武昌蓋都會之區如循其名非  
獨文德茂矣萬曆癸卯士與計偕侍御應公業  
紀綱而籍奏之亡何而有武闈之役則公爲政  
楚當刻削之後上下洶洶少司馬趙公受 上

特簡輟樞務而多方撫之中外救寧作率彌厲於是王公在蜀胡公在鄖李公在虔郭公在貴竹節制爲勞風猷丕赫亦多士鷹揚之秋也爰合十七郡良家子材官六百餘人比耦而較之拔其什一儼然足備行間矣自承平歲久率諱武而右文其於武備名爲綢繆豫計若不忘危而實則贅視之漸銷漸減不使兵勝于食弁而寇者陽若進而與縉紳伍而陰則痛抑之不使得抗顏于二三大夫卽武舉於鄉外亦珍重其

事精收其穎者而內實弁髦之於緩急無當也毋亦重熙累洽之餘內外安堵邊隅少警亦旋發而旋罷人情習於惰窳見謂無事形安用此堯鰲爲諸堯鰲之以將才自命者亦錄錄無奇人滋厭之如之何能使武事重也楚則不然夫以高皇帝威武鞭撻群雄如振稿然獨楚之僭僞號者岫強而不肯服乃至竭方張之力幾失而後勝之其後遂置寵王列藩衛而表湖山大牙相錯何以故地重故也螽厲慄悍從古則

然大率好勝而不好名喜亂而安變藉第令中原有故直攘臂而起耳難治易動是宜用威幅幘廣而姦宄伏深山大澤龍蛇生焉奈何褒衣雍容而理之猥云偃武解體髀而去斧斤胡可訓也今爾由騎射而進馬上顧盼自以爲人豪談孫吳策成敗磨墨盾鼻上自以爲無遺策人且從旁詆之曰騎射一人敵也所稱古今纏纏陳譚也爾又何以應之雖然法不虛立名不虛附有如爾輩射能命中貫七札而穿楊用兵壹傳古法運以方畧夫非干城之選與今武事誠輕武臣誠萎薺而不振然 廟堂之上未嘗靳封爵之典金印如斗惟有功者授之當事者固不欲弁髦爾爾第勗之它日登壇灑然自奮庶幾豎尺寸功卽以杜輕詆者之口而遺推轂者榮施則不佞之幸也

湖廣武舉叙齒錄序

楚武闢旣撤所采多武健知兵之士業藉其名而獻之矣已諸生退而序齒彬彬焉敦世好而



講兄弟懽蓋傳文士故事而緣飾之者也夫縉  
紳名爲以齒而文實不能勝情外締雷陳之交  
終構蕭朱之隙高者競於名卑者驚於利此夫  
不戈矛而嘅肌刺骨者也實之不存文將焉用  
之况於爾輩長鎗大劍思馳馬上勲意氣憑凌  
逢者披靡寧局促低眉作囁嚅之態且無論其  
不必由衷第破陣之樂聞者方嘔吟而思鬪乃  
以簷帷之艷語當之不類彌甚雖然吾姑爲子  
解爾楚之先與晉世爲仇敵壇坫之上甘受晉

賓日番漣於王敦之血而不得與而晉之所爲  
盟主佐者宜莫如士會賢趙文子稱之曰退然  
如不勝衣而已彼恃二廣之強將狠而無禮夫  
先自敗也已何以霸諸侯古者軍旅之禮什伍  
同爵則尚齒蓋先王不以武備奪文教也類如  
此然則行闔之士寧獨以勇勝哉今觀爾諸士  
少者如乳鷹摩天盪雲壯者如老驥追風逐電  
亦足以稱雄而張楚矣行當專闔而建牙使少  
俊能持老成之慮耆宿勿忘英銳之氣同心同

德強作功名有敗群者鳴鼓而攻之可也藉令  
逡巡情縮效文士之伎倆徒委蛇爲國容卽文  
士吾猶厭之何有於介冑也

### 吳明卿饒甄洞續藁序

吳楚山川瑰瑋甲於寰區楚以鉅麗標勝而吳  
以清佳取妍兩地操觚之士往往割其菁華之  
氣而洩爲文章大率楚取豪雄總雜爲工吳取  
婉約雍容見則求所以調而劑之未能也嘉靖  
之季七子雲興楚有明卿吳則元美此兩先生

者皆儲光岳之精炳靈孕秀相與脩北地之業  
雄才大力旣不崑其方言而又能交相劑以歸  
於正於是東南豪傑靡然從之兩先生遞執旗  
鼓若桓文者垂五十年矣予不幸不獲事元美  
先生最後游楚則吳先生亦已捐館舍每過下  
雒爲低回久之已從州刺史馬君得盡讀其續  
集而求其所謂劑者先生之文本之東京間有  
規模河東者古風樂府本之漢魏間有出入杜  
陵者吾不知其於元美何如獨五七言近體最

爲折衷而合律鏗然其音也雍然其度也商引而徵應經往而緯隨可謂兼至而獨詣矣詎肯兄元美而弟之也夫論材於楚不患其不充氣不患其不鬯顧才之過也龐雜而鮮裁氣之縱也離披而無所底吾安能諱之先生之才無所不究然必反而麗之於情其氣無所不靡然必要而協之於則易世而後能使博學宏詞者不至輕用其所有餘感激用壯者不敢跳於一切而冒凌厲之戒則先生之功於楚大矣先生故有甌甓洞集行於世此則其季子太學續編而付之梓者剗剗之費馬君實任之季子名士良其詩得父膏腴刺史名攀龍素著循吏聲而旁及雅道尤足述也

西樓全集卷十一終

國家圖書館, NATIONAL CENTRAL LIBRARY, TAIWAN, R.O.C



西樓全集卷十二目錄  
序

康元龍詩集序

畊隱集序

閩詩正聲序

王子培詩集序

徐南壁集序

行卷小序

帝京篇自序

西平圖詠序

政餘蕪稿序

徐惟和集序

皇明十六傳小序

權楚錄序

櫻寧生日艸序

題同年公約序

題同門送鄒先生冊首序

張成叔詩集序

嚴氏詩話序

靖州盧氏族譜序

送叅戎李將軍之清浪序

送何尉之武進序

送張大夫守嘉興序

送孫太守之路安序

賀劉直指奏留序

賀御史大夫陳公晉秩賜蔭序

賀直指劉公滿考特詔覃恩還臺報命序

賀司先生馳封大行序

贈大中丞周公擢大理卿序

西樓全集目錄卷十二終

西樓全集卷十二

閩中鄧原岳汝高著

門人陳開泰侯亮訂

仲子慶霖編次

序

康元龍詩集序

自鄭吏部布侯於杜陵吾鄉人視爲嚆矢一時  
翁然從之第天質不同波流遂遠初沿開元終  
入長慶辭達爲宗愈墮惡道傳播四方見者嘔

噉則何以杜吳子之口也反正之功始於袁舍  
人而風雅之變盡於今日卽余二三兄弟極力  
模古非大曆而上不譚乘方張之勢用不盡之  
銳所至分曹授簡海內爭下之矣後來之秀厥  
有元龍元龍本以程書著名僅出其餘而及聲  
詩大有唐風計元龍之爲詩纔一染指參之吾  
黨具體而微其意常有嘖嘖而不肯出者一發  
篋而示吳人吳人輒左其袒藉令需之異日常  
元龍之業成懸之國門安知不有好事如浦長  
源者走千里瀕首而稟繩墨者乎則閩山川且  
徼寵於元龍非獨不佞已

畊隱集序

余從祖子靜先生當 高廟時以遺佚徵不起  
削跡東郊結廬於竹溪之上卽今所聚族而居  
者也一時名勝如王太史恭陳徵君亮皆骯髀  
自喜先生以老布衣參之每一篇出無不擊節  
稱善而先生耽丘壑足不入城市其所倡和自  
數公外泊如也天旣奪先生之後而猶靳其名



平生著述都已化爲烏有殘篇斷簡且與蠹魚共之蓋自先生沒可二百餘年世無知先生詩者夫非後死之責與從諸長老得先生集若干卷稍爲汰而行之先生古詩似陶韋有蕭散自然之趣歌行舒徐宛轉高岑雁行近體翩翩由杜陵以及錢劉無所不有亦可以傳矣今噉名之夫持行卷而遊公卿間不蹙而走四裔耳食者亦爭附之風流如先生獨令其湮沒名與骨俱朽益嘆吾鄉人之不善爲名也

### 閩詩正聲序

自新寧高廷禮選唐詩正聲行於世學士誦之勿絕楊用脩以爲出於閩人弗善也蓋至於今選者日益衆其取旨日益盭於是識者始服廷禮之鑒而信其持論廷禮之言曰詩者聲之成文者也情感於物發而爲聲忠厚和平可以被律呂中金石乃謂之正聲一切憑陵忿詈跳浪而不本於情則姦之屬也余閩中之詩唐世僅僅已其在 國朝大較可得而言洪永之間專

譚興趣則林膳部王典籍名其家弘正之時氣格爲宗則鄭吏部擅其譽至隆萬以來人操風雅家掇菁華道古本之建安揆操旁及三謝取裁準之開元寄情沿乎大曆典刑具存風流大鬯一代聲詩於斯爲盛矣余不佞尚論先哲文獻足徵取其合者編爲是集大抵本高氏之旨以備一方之風而已旣成乃弗能當也夫副墨托之藏山成書或以飼蠹秘者弗傳傳者弗廣未闕半豹先失全牛踈漏之誚寔所不免雖然舉爾所知以俟君子拾遺補闕宜不乏人則不佞以此逃罪矣

王子培詩集序

不佞束髮治經生言意氣勃勃第恨不得一當王子培角前矛以進也蓋久之始定交各盡其技懽然爾女相得矣於是子培益竒而窮時時作阮步兵面孔向人里中兒或謂子培狂生不佞獨謂子培非狂生也子培名精於其業以其餘治古文詞及聲詩麗甚而前里中兒者則又

怪子培經生而安得縉紳先生語往往目攝去  
嗚呼世方以耳視其何知子培狂子培而不狂  
余又何用子培哉君家女存固以諸生稱詩乃  
太倉沔陽二三君子爲之推轂子培所著作不  
啻什襲藏之而其所與游乃落落穆穆世俗所  
厭棄如不佞者余且重子培之狂也夫

徐南壁集序

三衢徐裕菴先生行其祖南壁公詩若文而屬  
不佞某爲序不佞竊謂當世以作者鳴旣卒業

則藏之名山俟所不知者何人然或零落不稱  
至同於龍威丈人之秘卽百世而下有知己者  
直且暮遇之乃若殘壁碎金業已化爲烏有幸  
而有佳子孫揆其美而張之足令靈鬼骨香文  
人氣吐無論作者苦心而傳者之殷勤可念也  
徐公故正嘉時循吏厄於年不得竟其用生平  
所著述極富又厄於火不得竟其傳先生竭其  
蒐括乞請之力於厭棄之餘蓋收者什一軼者  
什九凡數十年而後成書然亦寥寥矣孫主簿

有言精騎三千何必羸卒數萬哉不佞獨愛先生困於廣文寒氊如鐵而惓惓不朽之業使逝者有知當不寄慨於名山不佞所樂書以附于門下士之誼焉

### 行卷小序

余既歸自長安則謝客之竹林舊里携筆床茶竈往也庶幾有賢豪命駕者乎則把臂入林耳更不敢道博士家一語而會屏居月餘足音殆絕孤與無聊故態復作滔滔信腕便得三十許篇夫已蹶于拆坂何取縱轡康莊哉不然敝帚而千金饗之是重余之愚也夫

### 帝京篇自叙

余自甲午夏再至京師僅閱歲而以使事出初入民部火發于臀日呻吟作楚如此者可三月已權稅東門拮据狙獪事面目都惡又可三月最後冒風雪走通州餉戍遼諸將士又旬日歸無何而浙漕之命下矣其間非苦病則苦冗欲一脩故業未能也而同年張函一先生與二三

曹偶結社於城西佛寺時時策蹇過從余間往會之日晏爲期丙夜乃散蓋猶以冗故杯酒流連篇什間作傳示商榷徐付奚奴久之奚囊中漸滿余馬首且南矣旣抵吳興受代兀坐衙齋無事追憶往昔不覺技癢出故紙而錄之僅得百餘篇夫予所居者計曹耳金穀之不習而以風雅博名高固未有心計麤而能歌渭城者因書以志愧

西平圖詠序

滇蓋古西南夷地蠻夷部落錯郡邑而居所轄宜慰諸司取羈縻而已狠心叵測時時詘文告而謀干戈要以處置得宜審機權而據地利鱗介頑嚚可舞于格也中丞陳公奉 上命撫滇最久公素負文武才又習夷情且熟其要害隘塞每命將出師授以方略甚悉諸將退而私語公從枕席上度虜不啻身在行間第按籍而從事如射高墉之隼罔不命中公旣築諸關堡於三宣慰司興屯田爲百世利歲入殆千萬計遂

誅多僣磔丙測擒僂猛奉諸酋張官置吏與內地同海外酋長莫不惴服六詔之民是以太和諸縉紳大夫謂是役也制寇息民廣儲拓上蓋闡外之奇伐史籍所不能談者也乃各爲詩歌以美之六月之詩曰薄伐玁狁以奏膚功文武吉甫萬邦爲憲夫吉甫之于玁狁僅僅懲虜而扞禦之耳未聞闢尺寸之土詩人尚侈而張之公長駕遠馭版圖及於不毛此之爲功卽吉甫無能爲役誠可歌也已不佞不獲與飲至之禮

幸而從諸大夫後讀其詩而想見其餘烈輒爲序其所繇如此公功高而不伐幕府上狀逡巡而不肯應廟堂之上久而有知之者異日彤弓之錫設鐘鼓而饗之某不敏猶能爲公勒銘於太華之石

### 政餘蕪稿序

余初入長安時李臨淮惟寅詩名大噪所交驩傾東南余方困公車業不能以前矛前也久之郎計部惟寅老謝賓客而宋西寧忠甫奕奕繼

之余與何公露時時過從諸子侯無不目攝忠甫矣最後余以郎署久次出視滇學始得黔國公先是公守滇累建大功勲名甚著而會意有所不可輒請告以公歸第公爲人方潔所居焚香而坐其視聲色若染之者旣無他嗜好則日手一篇側弁而哦不休舍人竊窺之曰公將學佔俾爲儒生也耶所著爲聲詩壯麗爾雅冲然盛世之音今所傳政餘蕪稿其一斑也夫公侯世家雍容饗國不闢雞走馬則蹴踔冶遊爲樂乃至屈首下帷潛心大業與詩人韻士爭千古之名此其意誠可念也古今所稱不朽非功則言故有志汗馬之勲者快心於狼望之北旄風雅之業者竭精于文藻之場然而隨陸無武絳灌無文求之作者鮮或兼之臨淮西寧猶不免以文勝若沐公者可謂具體矣公年方四十春秋鼎盛以其餘而肆力於文章吾未見其止也故不辭固陋而爲之序

徐惟和集序

徐惟和之起諸生也余方困公車慕之甚蓋猶未定交云又三年余與惟和偕計報罷始以博士業相切劘然余二人不專持其家言時時稱詩恨相知晚也惟和善譚論好結客風流爾雅人羶附之四方游士稍號能操觚至者輒主惟和惟和亦傾心應之不爲忤惟和旣不第度於本業不無少廢而其自喜爲聲詩益甚竟以此沒年纔三十九耳其弟勸葺其詩若文章合刻之而以書抵不佞曰惟和已矣所不朽者則遺

言在維亡兄平生稱契厚者莫如子其所期許以風雅代興者亦莫如子吾等將何以肉惟和之骨而千秋之不佞且讀且泣未嘗不浪浪沾衿也顧不佞何敢當惟和藉念不忘平生之言是誠在我余聞自林鴻王恭輩有名于洪永間海內所稱閩中十子者也歷百餘年而鄭吏部善夫繼之又四十年袁舍人表繼之乃他方之左余閩而持苛論者猶以吏部之寡於情而舍人之窮於變以爲恨今其集具在試取而隱其



名以附於古之作者吏部之古風不以爲曹劉之參駕乎哉舍人之近體不以爲高岑之雁行乎哉乃惟和稍異是其學無所不窺其於古也無所不濺濯才有所必至則務旁引以盡其才趣有所必合則務根極以窮其趣大抵傳于境而麗于情諧于調而驚於采出入六代之季而始終唐三百年之間句不累篇篇不累格假之以年吾未知其所稅駕矣惟和居恒喜說善夫先生而其化也亦與之同年蒲柳先零豪華都盡悲夫惟和又戲謂不佞吾黨苦心百歲後當有鑒賞者顧安得神遊而聽之蓋沒未幾而王生若輒爲梓其集而行世卽耳目所及固知異代之後有尸惟和者矣

皇明十六傳小序

自劉義慶之世說稗官家誦之勿絕大要弔詭之譚風流之餘緒而已然玄宗雅義往往藉之以行於世而貞觀初纂修者遂盡蒐獵以成一代之史蓋藝苑之精言而史局之別派也吾友

江進之雅以論著顯居常慕說古詰纒纒不休  
暇日則採國史中之奇事可爲法戒者大約仿  
世說之意葺爲十六傳而梓之謂不佞曰秘不  
易傳也冗不易竟也是編也辟之戎行夫非所  
謂選鋒也乎哉夫以漢之季也而晉之東卽名  
德不乏微言具在顧傾覆之餘世道交喪言論  
風旨亦急切而少衷矣 明德方隆士習醇正  
善無近名惡無隱慝一二澹辭皆可書而誦此  
盛世之軌也異日發金匱石室之藏付進之以  
筆削之事此其前矛也夫

### 權楚錄序

自稅使毒楚楚事幾不可支 上更命杜侍中  
代之一切與民休息民有瘳矣侍中旣視事輒  
上三疏縉紳多稱之李留後將軍爲梓行以風  
諸卿命而播雷者余惟 上於侍中之疏固不  
必一一報可卽侍中調停亦未必盡其意之所  
欲爲而侍中平生所艷說於名卿大夫者又不  
待權楚而名始見吾獨喜其所謂內帑減上供

之稅下臣受孝順之名美哉斯言何其剴切而中窾也侍中故爲上上藏書好文墨知大體其議論常依名節有俠烈之風蓬生麻中不扶自直由斯以譚信非虛語嗚乎楚爲湯沐之地寔惟帝鄉彼一時也上下皇皇莫必其命勢且瓦解矣一變而今日商安其業民安其居中間更禍爲福如反掌然信安危在所任哉

櫻寧生日艸序

往不佞一遭沈孟威於長安市中而異日之計

其人磊落爽朗奇士也無何而隸事民部則不佞與孟威同曹懽然爾汝相得矣每與孟威譚古文詞莫不抵掌而稱先秦之業語甚辨星斗覆而煙雲流也稍縱而旁及博士家言則又根極理要躋其蔽而咀其華孟威之言曰經義一小技耳王文恪唐中丞至以此而垂不朽學士誦之勿絕其精足傳聖賢之神而其粗亦足以發摠其獨見而騁其捷安得盡土苴之詆謂敝帚無當也又一日而過孟威得孟威所撰著若

而篇大率多二三君子語矣今縉紳先生習古文詞則卑卑經生業而訓故之儒童習白紛則視古文奇字如梵書不可曉乃孟威兼出而見奇遞建旗鼓令此兩家之士各屈首受功令此爲難非養盛宜不及此蓋孟威爲孝廉時雅與焦弱侯先生講性命之學其得雋于南宮也先生實拔之則求孟威者又在語言文字之外也

題同年公約序

歲在乙酉余同郡舉於鄉者二十二人同出師

門共敦年好文酒過從昕夕靡間既後先入仕南北睽離尺素空緘寸心終鬱起居之音杳然慶弔之問或闕雖肝膽契分不假寒暄而形跡參商幾同楚越用荆斯議再申舊盟敢托久要永垂世講應行條例具載藉中不佞原岳僭題于首更有剩語且需後期方今二三兄弟宦情方濃游轍未息台鼎可居旂常斯勒稍待成功之日白首相看正值引年之時青山未老杖屨招邀琴尊其適會名真率社曰耆英乃爲同志

同心有始有卒者耳

題同門送鄒先生冊首序

雲夢鄒先生爲考功時與陳州季先生各以其經分校禮闈錄楊松年等二十二人旣於事而竣先生業已轉選曹矣先生一時所建白朝廷著爲絜令斤斤三尺守之於時弊孔幾絕而會先生念太宜人春秋高矣輒上書請告當事者雅重先生章屢格先生愈益堅凡三上而始得請同門諸生旣不能挽先生行則追送之河之

澣至戀戀不忍別夫先生出處之際非小子所知第以鳳麟之在山澤豈不稱瑞如必郊塚而後奇是雉兔之可豢而畜也故出則鳳舉入則鴻冥先生出處之際意念深矣先生旣大造吾儕而生成之一旦決絕猶之免赤子于懷江漢之間徒望台垣斗牛之分虛占紫氣乃各爲歌紀別如左而命不佞綴數語以引其端

張成叔詩集序

逢掖之士往往諱言詩非不能詩也彼其越尊

俎而治庖見謂無當將屈首受正業斤斤三尺  
守之有一二慕古者或不勝其奇而染指焉則  
人爭日攝之何用是豪舉者爲也句章張成叔  
謂否否道一耳訓故則理境之語也賦頌則情  
境之用也殊途一致安在其相悖耶蓋成叔於  
兩家言各極其所主而兼撮其長一日而名重  
公卿間矣句章固多奇而四明寔仙靈窟宅道  
書所稱丹山赤水洞天上有二百八十峯毓奇  
鍾淑賀監風流領袖詩家正始其投老乞休猶  
勤人主祖道稱詩至今爲藝林盛事今成叔春  
秋鼎富異日以文章結知 主上如季真之遇  
明皇不難夫非山川之助與成叔制義別有刻  
此一篇則正始之流出於佔俾之餘者要之技  
不止此也

嚴氏詩話序

詩話之流莫盛於宋由晚唐而五季間亦有之  
宋人布侯于杜陵議論爲宗差之毫釐謬以千  
里迨宋之將社也衣冠之裔十九化於腥羶馱

舌侏儻於正聲何有蓋國統垂絕而詩統亦亡矣獨甌閩之間有嚴儀卿者別具心腎嚶嚶反古禘漢唐而祖初盛慶曆而下禁勿譚從最上乘具正法眼其斯爲先覺也乎哉儀卿之言曰詩有別才非關書也詩有別趣非關理也論詩者未嘗不沐浴其言夫昌穀之爲談也奧而奇元美之爲卮也辯而核元瑞之爲藪也博而麗自三子之書出而嚴氏若左次矣要以功在反正延如綫之脉以俟後人如一葦西來玄風大鬯亦安能竟廢之吾故併其集爲序次而行於世勿謂予閩人知管晏而已

靖州盧氏族譜序

范陽盧氏在南北朝稱著姓迄唐不衰其重乃與人主相抗衡欲抑之而不可得今靖州之盧氏不知其所繇始譜自國初由青州而南徙者也蓋以軍功賜爵遂世其官食采而亢宗八世於茲矣夫干霄之木所受蔭者百畝其深根固本歷九曲而入重淵澤地之菌至不知其早晚何

以故無本故也盧氏之先凡三世而死於王事  
白溝東昌之功載在盟府其初以良家子起家  
最後輒加至都指揮使與世襲而總戎父子遂  
三世統兵夫人臣不難捐七尺之軀爲國家拓  
土士死鼓將死綏偉哉國士名與骨俱烈此之  
爲蔭豈特百畝而已哉君子是以知盧氏之後  
方興而未艾也譜創于閩帥君君居滇久歷著  
戰功幕府上狀所以推轂之者甚力其人倜儻  
好文譚兵之暇葺而傳之如此異日者登壇建  
節益侈先祖之美而張之盧之重不獨范陽矣  
譜斷自始封宗法也庶幾無遠胄之謬云

送叅戎李將軍之清浪序

今國家名爲治安無事塞上諸虜海上諸倭皆  
以次率服惟是西南夷苗時或蠕動負固憑陵  
跳浪爲梗猶不能不上厓 廟堂之憂要以犬  
羊抵觸可鞭箠使也滇南李將軍生長西陲最  
熟夷情先是猛酋作難挾奉氏窺伺蒙永將軍  
佐幕府征之功次未上餘黨繼起於是有矣堵



之役將軍持殘卒不滿千駐順寧城下寇張甚部伍無固志將軍以計馘其魁俘獲無筭遂連破十三寨矣堵大定將軍功第一益不佞校士于金齒之間所聞於父老者如此也 朝議錄將軍前後功持節護 顯陵稱留後矣郢固湯沐之邑寔惟帝鄉舊以列侯居守今特命將軍鎮之此其委寄誠重但承平日久林莽無他虞以將軍才武置之敬地識者以爲非宜乃黔中自播平後伏姦猶熾疆界未定議論紛紜當事

者思得威名之將控制之竟以將軍治清浪兵叅大將軍事夫清浪爲貴竹門戶苗夷環山菁而居兇悍成習閔不畏死日禦人於貨行旅斷絕欲大劊之信非將軍不可其風土荒涼兵衛單薄將軍卽才武豈能作此無米之炊要以先聲所震可以奪其魄而制其命不煩兵威守在四境此於將軍可耳國家報功之典謂何不佞嘗嘆國家之用人方事之殷也則賢者常見長至竭汗馬之勞而不得休息及事之緩也則賢

者常見拙投之磽瘠之地使之拂鬱而不能軍  
其究至使賢者消耗其雄心而不賢者益自爲  
身計又其弊至使卒伍之脂膏盡於主帥之手  
而中材之將反轉相倣效而成風是豈一朝一  
夕之故哉將軍好文喜士善譚兵其入郢也出  
其橐中裝日椎牛饗士爲樂已又斥其餘治臺  
榭日結客賦詩說劍爲驪卽清浪之命下于于  
然安之絕無困拂不樂就之意余以此益重將  
軍將軍往矣黔中彈丸地有陳大將軍開府於  
彼且得將軍左右之慮無不雍容奏功者則推  
轂將軍自此始耳

送何尉之武進序

國家弘薪樞之術期於廣收其用以備縣官其  
大者爲甲乙科次則歲貢士又次則掾史功曹  
鱗介羽毛可網罟盡矣蓋周官有府史之屬隸  
之司徒而漢功曹率以文亡害至大官至我國  
家雖稍詘其用而一二穎出者哀然與甲乙科  
竝稱乃今日益何寥落寡當也彼其耗磨於簿

書間玩愒於歲月循資如積薪待次若累黍甚者至三四十年而拜一官覲顏吏民上計畫無復之亦自見其名成亦自見其志效而不知精已銷亡矣夫國家卽詘若用亦何至別開一途急其名而緩其實若是也何君伯端少嘗業儒已棄去習法家言又浮沉冗局無簿書之苦其人少年伉爽一時交游多文學之士縉紳大夫無不推轂何君者何君之謁選銓曹容甚都主銓者固已目攝之及試其文律比精核取成手

中又老吏不如也輒置高等尋以何君尉武進矣武進固毘陵一都會財賦所聚東南鉅麗無逾武進者其民雜五方而居獄訟煩興路當孔道冠蓋日相屬爲令若尉不遑七箸主銓者謂何君才足辦試之盤錯耳何君于軋勤慎足以畢其長又少壯時有餘力不以此爲名成不以此爲志效要以自致其用以見奇試功異日推轂君者豈啻爲功曹時也蓋何君之爲功曹也寔蒞事學宮不佞猶稱弟子員雅與君善卽選

部葉朴齋公時爲令君也每見輒稱之曰安得此快吏然則君往矣一尉固不足以盡君第使人謂閩有人卽掾史多才不獨甲乙科也不佞與有榮施矣

送張大夫守嘉興序

代

漢世多循良之治郡守課最率入爲公卿其權無所不轄而才無所不効故得綜其治行而優異之明興文法詳而事權稍抑吏治始拙矣今江南列郡以百計宜莫如浙之東西列郡以十

數計宜莫如嘉興難治此卽漢之潁川渤海恣睢僻俛恨不得才如黃次公龔少卿者爲之國家不難破一切以酬其功以余觀於富順張大夫庶幾其人也大夫之佐司徒治辦有聲曹郎取受成卽有奇安所用守則專城而居得便宜從事如囊之錐穎且立見矣嘉興蓋吳越間一都會其所產絲枲之利足以衣被天下海濱諸邑魚鹽海錯取之不涸之倉有富厚之名而亦坐此以自困風俗頽窳治淫誨盜猾吏姦民左

右爲媾此非潔已率屬凝神勵精又烏能勝其  
任而愉快乎次公雖用寬和爲名史言其明察  
內敏吏出至不敢舍郵亭姦人去入他郡少卿  
見齊俗奢侈好末技乃躬行儉約期月之間獄  
訟止息古所稱良二千石類如此余每見縉紳  
先生言故嘉興守萬安劉公之賢以爲明興無  
兩者其後劉公卒以才見重至尊顯由斯以譚  
明雖不盡緣漢法躒致寵榮久之且積其勞迄  
以大用今上益明習吏治修元始五鳳之政

守相有異等者輒加秩或內召爲京堂官大夫  
行矣海氛甚惡當事者抱不測之憂曩劉公在  
郡則島夷方躡浙得公而衽席之然則大夫功  
名方自浙始第令後世傳循吏者以後先嘉興  
守取重明吏不遂詘於漢大夫之功大矣

送孫太守之潞安序

先是六卿司屬由甲科起家大率積資至四年  
有奇輒得出守大郡會聖天子厲精圖治久  
道成化雅謂二千石專城而居所轄稍廣柰何

不操刀而使割幸一切之功第令苟且從事其  
何以撫元元而體余一人憂勤之意則務重其  
資而積閔閔非五六年不遷章屢上屢格若不  
得已而姑試焉蓋其慎也漢世綜核之主宜莫  
如孝宣其言曰庶民所以安其田里而亡嘆息  
愁恨之聲者政平訟理也與我共此者其惟良  
二千石乎古聖帝明王之盡心民事類如此予  
總治大司農則楚孫君以進士高等隸事度支  
度孫君前後所以佐余爲理者非一要以敏捷  
俊爽勤于其官庶幾漢吏之風久之以曹郎久  
次竟出爲潞安守矣夫潞安古上黨之地其俗  
勤儉力本都人士折節而務學以君之才具可  
不勞而理但山谷阻深逋逃爲梗宗室彌衍供  
應寔難孫君主計五年固已錙銖校之 上又  
爲之老其才而試之茲土吾知其必有合也予  
觀地節元康之間朝廷輒選博士諫議大夫通  
政事者補郡國守相而東海太守又以召入爲  
右扶風卽君異日以治行聞 上不難効漢法

以褒寵之然後知 聖天子曩所以慎重而不輕授者固將以需其成功而大用之也於其行序以俟之

賀劉直指奏留序

自省方之典不行於是直指使者持斧而四出考吏治所繇奉璽書而紀綱之在令甲御史行部卒歲一更要以震疊四方作新其耳目譬若雷霆迅發不測以爲威何可久也戊戌之秋溫陵劉公按滇巡歷旣遍所部稱平及瓜代臺章

屢格先是滇數苦兵稅額不足逆曾爲梗蓋五年三勤王師軍興時乏帑無見鑷按括進奉夷漢騷然當事者以爲憂夫覈軍實定經制安內而攘外此皆部所事事也無已則請留御史再一歲而更疏上輒報可滇之士民以手加額曰上固未嘗鄙夷吾滇而遐遺之至不難遂借禁闥之臣而式吾土其穎出者曰固也吾黨小人饗利則德顧此荒忽者何足以稽我公爲不佞則謂廟堂誠見萬里之外非小臣所敢知然

私竊度之滇有難一日去公者夫滇非古所稱  
荒服也乎哉此未可以中原之治治也應結之  
民束以三尺則憤鬱不堪稍寬之懼慢而無法  
斟酌調劑不易其俗時或有所懲勸要以戒百  
姓畏其法而樂其便循而習之庶幾至道公之  
當留者一滇在封疆之外僻處一隅吏茲土者  
各以意爲官爰書不必麗情徵求不必麗法甚  
者倚上爲市外見才而內挾詐公廉其狀亟寘  
重典以令四封除其蝨賊民以寧息公之當留  
者二邊徼夷獯素不奈漢法復苦於一二苛求  
者原野之獸能豕畜乎彼計無復之則探丸殺  
人時或有之公與大中丞計議輒發輒擒又戒  
諭諸帥但取渠魁無窮兵爲也迄於今功成而  
夷獯安堵始有生人之樂公之當留者三夫滇  
外附富厚之名而中實枵不支邇來礦脉旣竭  
關征爲暴開采之役所入不足以供所出稅歛  
無藝而商賈絕不來盈則疲民縮則蜚語入矣  
公經畫中窾事事足辦而忠誠惻怛足以感動



其心而使之無不吾聽人但見上下無事嘻嘻然安之而不知公苦心有未易以告人者於時微公居間滇幾殆公之當留者四上旣雅重公而又知滇之外腴而中憊非公莫支也故屈於請代者而銳于請留者蓋寧暫輟拾遺補闕之臣而不忍遐方有不周之澤 上之爲慮深矣藩臬大夫及諸閫帥則謂否否滇卽多故病在四肢朝廷之上不可謂無事使公居中決策豈一手一足之烈哉不是之重而彼之憂此徒治其標者耳不佞謝主臣不佞爲滇人地何知遠圖獨計以爲 上念滇不能爲滇久借公卽暫留於此行將竣事而報命唯中丞公茂績著於南坂簡在已久銓衡樞筦匪朝伊夕而公侍御史閱閱最深卽 上加意西南直以公代陳公建節而鎮撫之於是始真爲滇人有滇人幸甚不佞預以爲賀且爲滇人賀也

賀御史大夫陳公晉秩賜蔭序

今天子加意邊圉尤推轂鎮撫之臣間有軍功

卽賜金贈秩有常式其或拓地廣土是爲社稷  
勲則賞延於世傳之子孫勿絕此報功之殊典  
人臣之所不幾者也方陳公撫滇之四年順大  
之孽作先是奉學據大侯州阻兵拒命其心叵  
測而猛廷瑞者與之同惡協力以拒我師聲言  
將襲蒙化而扼永昌辭甚諄戾公集文武將吏  
問計曰亟發兵誅豎子耳公曰否否此犬羊何  
知第以威信諭之當解散無窮兵也而逆酋暴  
抗如初於是有了丁酉之役遂馘奉學擒猛廷瑞

諸首禍者咸服其辜功狀方上而猛奉餘孽復  
糾合兇黨據故地爲逆焰益熾公復集文武故  
吏問計曰亟發兵誅豎子耳公曰否否此犬羊  
何知第以威信諭之當解散無窮兵也而逆酋  
團結如初於是有戊戌之役公旣筭無遺策而  
三軍皆發憤爭效死力乃盡覆其巢穴而芟夷  
之凡得府一州一安輯流亡六萬有奇俘斬者  
二千餘人鹵其象馬器械無筭前後以捷聞  
上爲策勲告廟已下巡按御史覆核具奏 上

嘉其功進公秩右都御史兼兵部右侍郎蔭一子錦衣衛百戶世襲賜白金文綺其餘將吏陞賚各有差報至所部驩聲如雷于是三老士民聚族而語曰偉哉公之造吾滇也滇雖用武之國實困不支狂酋包藏禍心無所顧忌非公深謀勇斷滇以西危矣乃今夷險阻而郡之比於內地王命游錫誓帶礪而無窮邊境之民於是乎知法之必伸與賞之必信也公之烈也公謝曰此山川社稷之靈余安敢賴 天子之寵材

官介士獵纓而告曰古之將將者率指縱爲功公運籌帷幄何論制勝千里之外每檄下軍前無不中窾披腹心示情素若抉其隱而觸其私人人感奮而樂爲之用將將將兵公兼之矣猶然與士人共則公波及也豈士之能公謝曰此汗馬者之勞余安敢竊諸將校之力藩臬縉紳盱衡而進曰公勞苦功高退然如不出口今茲功簿踰年所矣顧廟堂之上終不能以議論掩成功久則議論定而褒賞從之寵之以樞筦予

之以世爵卽 天子之所以寵靈公與公之所  
以報 天子者抑何其巧於合也公謝曰此二  
三大夫之助也余安敢以尺寸而冒 上恩不  
佞小子竊嘆曰嗟乎不佞觀詩而得公居功之  
心江漢之詩非成周之盛際也乎哉王於召公  
告於文人錫山土田而虎拜稽首也曰天子萬  
年夫以淮夷旣平式辟四方徹我疆土召公不  
自名其功歸之天子陳公逡巡者也肯以此自  
多爲而不宰有而不居 上所爲居成功者類

如此不然麓川猶預五等之爵公何讓焉或曰  
靖遠有所挾而成功者也故賞格獨異公徒以  
赤心結主知何靖遠敢望然則公之功次滇人  
能甲乙之封列爵土且有後命矣

賀直指劉公滿考特詔覃恩還臺報命序

直指劉公奉 璽書按滇已於事而竣當報命  
上從吏民便留使者又一更歲諸大夫旣修  
其事而揚厲之矣公自入境蓋五閱歲于茲度  
公之車轍馬足於句町哀牢之間無所不歷覽

公之惠澤於烟嵐山菁之處無所不溉濯公之  
威稜於黑齒雕題豪右閭左之氓無所不震懼  
巡歷載周滇之父老且喜且懼懼滇之不能久  
借公也 天子果念公久勞於外召還禁闥於  
是 聖政方新思與天下更始惟是拾遺補闕  
何可無長慮之臣命下而公亦以歷俸九年上  
書報滿矣公爲令時以高第考最其爲御史也  
例不得加恩而值 船立大典得改贈父母如  
其官云公旣受代馬首東矣諸藩臬閫帥屬不

佞脩祖道之辭爲公賀不佞幸而在事其何敢  
無言夫御史名爲 天子耳目之司出視行部  
得提衡文武大吏而督治之至貴倨矣自兩都  
而十三司隸其近者朝發而夕聞遠者旬朔可  
覆天行雷厲如臂指之相使何愉快也獨滇去  
京師萬里而遙輦下之言旣不盡相同域外之  
情形又不盡相信故以滇而視諸方則其難矣  
自北司爲政滇乃益億士囂於庠民囂於野威  
有所不得伸法有所不得盡主藏者習見其所

入而不問其所出歲額日增誅求益急此之爲難難之難者也今夫掊擊而霜飛撓蕩而風肅御史者天吏也顧大剛則折大柔則懾俗或阻于羈縻法有窮于調劑一切而不知變敗矣公持其平務歸於至當故其於法不必取深文而不輕出入於絜令之外其於物不必爲已甚而不肯枉吾三尺而徇其私故公寬和能使豪者歸命鷙者輸心而公方嚴至使姦猾之吏怵公之明而不敢肆卽宵小之輩束於公之繩墨而

不盡極其凶威古人爲法家言必正直忠厚爲本公兼之矣辟之虎狼跳浪安能不繫維調其情性而殺其怒心則可以馴而擾也藉令強制而苦縛之母乃激而滋其毒也乎哉夫公之闕閱至九年而公之巡歷至再公之恩命至他御史所不能望者而俛得之此於高皇帝法皆不經見而於公則格若屈而寬於恩恩若縱而溢於格無亦廟堂之上已熟公之才而悉公之勞苦故欲積其資而大用之由斯以譚上

之注意於公蒸蒸厚也公行矣三事九卿則公之餘安得如向所稱爲滇人造福得公遂鎮撫之則滇雖僻遠而虛耗有瘳乎不佞敬以復諸大夫併以慰二三父老也

賀司先生馳封大行序

代

在令甲京朝官三載滿考則晉其階而封其所生德意甚厚間有資不及格不得封願輟其階以馳之者封如故蓋國家以孝治天下期於盡人子之心而極恤下之道故在下者或詘其情

以伸法而在上者或詘其法以伸情夫事有溢於格外而典有出於特恩則人爭艷慕之而況其質行斌斌卓然足術則人之喜稱而樂道者又當何如也予中州有司先生者端方孝友古老之風而自其隸學官時已燁燁有聲一時知名士盡出其門下矣顧偃蹇諸生間以老先生業困一經人謂先生且釋業傲然不屑也嘆曰孰謂司先生竟諸生老哉而大行君少長則日以故業程督之及大行成進士而後喜可知也

先生卽苦諸生乎然好施予至不吝傾囊而應之大行君旣貴益務爲德傾里閭嘗歲荒富人皆閉糴先生內外屬三百餘人無不待舉火者而其自奉極約布袍魚殮取給而已蓋先生老而慕義愈甚居恒自恨不得一命以畢其所欲爲每戒大行君若無念我惟是一介行李持節臨郡國宣布 聖德問民所疾苦無忝稱王人以此遺老人榮施足矣以故大行君奉使屢稱吉得蒙異數而馳封先生實得之庭訓云先生旣拜 上命而同里縉紳大夫樂觀盛典庶幾效一言以壽先生余惟先生爲德於鄉而食報於國卽一命不足爲先生重先生方壯盛大行君日益貴計秩而受寵靈何但一命自今以往先生之慶與年俱新異日者天子脩闕事憲德乞言尊先生爲老更陳說善道大約如向所戒大行君者稍廣之以備惇史小子不敏願得載其事而侈談之是爲序

贈大中丞周公擢大理卿序

代



大江以西形勝據上游匡廬之鉅麗甲於天下其扶輿鬱滄之氣鬱爲人文醇厚闊達倣儻愷易蓋山川之所醞釀然也當英宗朝周文襄公以重臣鎮撫江南風采赫於一時其所規畫釐建至于今爲絜令功業具載國史述矣後百年值今上熙洽之會而得中丞周公周公以名進士敷歷中外爲銀臺納言有聲以薦出撫八閩閩且大治二公皆言產也其勲業聲望大畧相當云 聖天子威德遠被天下奠于覆盂濱


海之民晨出夜歸自適已事而已而太平旣久不能無萌蘖公奉 璽書入閩廩然抱先事之戒夙夜吐握思所以救寧之者甚具甫下車則召父老問民所疾苦飭吏治覈軍實省刑獄與閩人士休息其治取大體而已去歲永陽弄兵姦民爲之窟穴張皇者不勝躁公以爲民愚無知不足煩斧鉞兵革之下其傷實多第布威信明首從反側當自安坐而籌之不煩一鏃戮其魁民以按堵於時微公事幾殆會歲復苦旱米

湧貴至千錢道路嗷嗷公與郡邑吏計便宜巡  
行阡陌減田租若干已發所在粟賑貸之又爲  
喻部中豪母遏糴平其賈所全活者甚衆蓋公  
視四方利害不啻如其身日求善畫斟酌而調  
劑之軍門號令嚴重有上書言事條陳失得輒  
以聞以故處置民間事無弗中窾者閩人士至  
相與語曰是安得留我公于閩而拊循之爲而  
天子念公勞苦于外則制詔主爵者以廷  
尉召公命且下閩人士愀然曰閩方倚重公


爲重主爵者獨不爲閩人地乎不佞進曰不然  
海上幸安寧才臣無所事事卽擁旄坐鎮不重  
溷公廷尉爲天子主獄者也郡國有大獄所  
不得之郡國守相而得之監司所不得之監司  
而得之中丞臺治獄御史所不得之中丞臺治  
獄御史而得之廷尉廷尉一平反而無疑獄矣  
所關係者天下之生死而所持者天下之平此  
孰與閩事重天子重封疆則命公而南重三  
尺法則命公而北胡不可也公所至用寬和治

辦精心爲讞庶幾無刑民自是以不寃矣周公  
之居東而歸也東人歌之九罭之卒章曰是以  
有袞衣兮無以我公歸兮無使我心悲兮蓋東  
人不能釋然於公之遺愛者如此公行矣 天  
子方借公銓衡之地以表率百僚秉鈞持憲雍  
容端揆之上使天下復見周公之業江以西山  
川且與榮施焉則公勲名尤在文襄之右哉閩  
諸孝廉於公有袞衣之愛屬不佞效一言以祖  
公行不佞耄矣畧志其大者具列爲序

西樓全集卷十二終



國家圖書館, NATIONAL CENTRAL LIBRARY, TAIWAN, R.O.C.



西樓全集卷十三目錄

序

壽劉太君八十序

壽陳觀察七十序

陳汝大六十序

壽陳中丞六十序

壽陳長君六十序

壽江太恭人七十序

壽郭太君七十序



壽林母太君序

記

鄆陵令錢公去思碑記

路南州新建儒學記

瀾滄江新橋記

新置雲南府學租記

西樓全集目錄卷十三終

西樓全集卷十三

閩中鄧原岳汝高著

門人陳開泰侯亮訂

仲子慶家編次

序

壽劉太君八十序

代

有劉居馨者嘗從不佞講學於道山不佞亟賞之因得聞其母之賢甚熟蓋居馨之父曰劉長君少業儒已罷去爲文法吏廉平無害人人稱

其長者而宦不達性又慕義喜任俠交賓客傾  
一時賢豪竟以是終劉長君之終也遺二子各  
數歲耳母則日携二子而程督之曰以是藐諸  
孤受之夫子吾藉手以報地下孺子也才吾惟  
子之賁不才惟子之戾吾以子聽命於天矣會  
二子稍長則慕義任俠交其賢豪如長公時母  
至脫簪珥謝紈素手理絲枲女紅以佐客供具  
曰吾以成孺子名以故居馨弱冠試之有司輒  
屈其偶而丹陽西蜀太倉三督學皆雅負人倫

遞爲之推轂廩於學官矣又數年而舉於鄉居  
馨之舉也稍後而人以母故爭艷之居馨旣從  
其兄率家人稱觴上壽母乃不色喜曰吾幸得  
藉手安敢代先君子而食其報哉而居馨當束  
裝赴南宮則又念母老不欲行母謂孺子母念  
吾老吾尚壯恃粥而起卽孺子勉作功名以稱  
塞先君之志慰老婦足矣蓋母年八十健走善  
飯如少壯每晨興羣從問安否穆然頷之已上  
甘脆珍旨人爲進一七箸食竟輒說故微時事

以訓屬子孫曰猶記老婦脫簪珥時狀否色甚  
莊以爲常於是人謂母之壽固未艾也余不佞  
竊窺天人之際嘆其合甚巧蓋天未嘗斬人以  
有餘之福而寡取者承之天未嘗自愛其福善  
之柄而緩得者迎之懸之數十年之前而照之  
數十年之後若券而不爽跡母始終之遇不然  
乎哉母且無恙居馨馭馭向用母御板輿從之  
時致大官之庖以供母母擁膝下三世禕翟雍  
容而饗之迨于百歲所謂得全全昌者與讀史  
至尹先生之母責其子以善養而不祈祿養每  
有概于中夫尹先生之遇誠窮使先生而得時  
遇主奉母以萬鍾寧吐之乎然則母之遭視尹  
母猶賢矣屬母垂悅之辰諸縉紳願脩酌者之  
辭而以不佞之言有當於母遂敬申之

壽陳觀察七十序

天之生人與之以用而不欲盡其用要在養其  
淳龐貞固之氣而極其含弘博大之量其用恒  
若有餘而其所爲用恒若不足當其用則究而



張之播爲功業若文章往往有不敢盡之意而當不用則斂而蓄之爲壽考而往往以全收之蓋人知有用之用而不知無用之用如此也乃今得之陳觀察先生先生以名進士起家山縣令高第召爲郎久之出守真定旣以副使治兵淮陽乞歸省墓未幾復起按察使部廣以東於是先生未五十也一有不當意輒投劾歸天下莫不以先生之不得盡其用爲恨先生曰使吾役役于功名以老異日何以見邴曼容吾欲爲

德乎何處不見奇效志而必當事之爲快也天旣留先生之用而不能不錫之以難老之福先生旣不欲盡天地之用又不能終秘之而時出其緒餘於閭左宗族之間蓋先生歸二十年里人無不待濡沫者內外屬無不待卵翼者卽有大役又無不待資費者二十年猶是矣夫松栢生于高崗庇其下且得美蔭松栢之根益深其蔭益廣人無不願松栢之壽且孳者有之以爲利故也先生之蔭遠者及四方近者遍九族百

年樹德其利實多自今以往幸乞先生無疆之身爲邦人造福則先生之用始大矣九月某日爲先生覽揆之辰其從弟鳴鶴輩命不佞脩辭以先酌者夫物不用則形全人不用則神完鼎釜戈鋌歲月而更也敦彝重器歷久遠而如新先生之在賓筵十二年今且杖于國健走善飯卽百歲不難有如天子脩憲老之禮以究先生之用祝噎在前祝哽在後斯之爲壽不亦鉅麗乎哉柰何以一鄉一家爲此拘拘也鳴鶴曰鄙人何知饗其利爲有德吾子之言其以待他日不佞敬諾

陳汝大六十序

自古稱不朽之業有二脩詞者取令譽煉氣者取永年顧其嘔心竭智或以奪真宰之巧而壽不必長若夫全真守一返視收聽足以嗇造化之精矣而文采不必有也乃今屈指道家者言如道德參同而下往往奇麗膾炙人口又何稱焉吾友陳女大先生少讀儒書隸博士有聲久

之棄去曰是拘拘者何至溷乃公爲改而從俠  
少游縱情聲伎爲一時風流之冠無何復棄去  
曰此非名教法也改而從墨客爲文酒會非正  
始不譚諸墨客尊之爲祭酒乃女大猶不自得  
曰此猶語障也又棄去而講大丹日與諸黃冠  
習吐納之法意乃大樂之竟其術若以旦夕可  
冲舉者女大雖負玄解乎而稱詩不廢亦時時  
逐俠少爲樂每大會輒據首坐談笑自如技益  
精而神益王朱顏華髮飄飄若神仙中人矣余  
不佞爲道家推轂玄元詞家伏膺道德非不朽  
之業乎哉玄元旣爲關尹著書騎牛度關不知  
所終庶幾與天地齊壽女大專精養性竊比老  
彭不朽之業方自此始今僅六十譬如嬰兒顧  
女大之業與年遞變今春秋鼎盛安得定稅駕  
也女大謝曰吾逃儒入俠逃俠入老似矣乃老  
氏所云深藏若虛盛德若愚究歸之于靜篤倘  
亦儒者養性之旨與不佞唯唯

壽陳中丞六十序

中丞公之撫滇也有保障功先是西南夷情數動迄無寧歲當事者既不知其阨塞與其變動所繇大兵屢出不能盡要領因循敬護冀旦夕無事耳滇益不支朝議以爲憂曰是安得忠貞不貳之臣假以便宜而救寧此彈丸地也而晉江陳公實奉 特詔起自楚藩中外相慶以爲得人公旣入滇巡歷咨諏日求所爲安攘計經畫旣定遂西破緬復猛密盡收三宣六慰之地築關堡而疆理之拓地千里且戍且屯夷情帖

然滇乃益安公督滇前後可八載公之年且由艾而耆而上所寵錫以報公者白金文綺無不下亦且由僉而加副顧公所以拮据求寧者八載如一日也夫以公之勞苦功高可謂筭無遺策矣然豈可不謂搖其形而滑其精也乎哉乃公日調兵食夜治程書羽檄縱橫一夕三四起烽火警急輟食而從之而神加王也事有不可爲者隱約而度其宜勢有不能爲者躑躅而伺其間焦勞獨苦若不得已而後應之而貌加腴

也旁觀者與當局者異心耳食者與目聽者殊趣謗言間作朝議不能無異同賴主上神聖力持之耳及至于今事久而後論定公油油然安之而意氣加壯也蓋古所稱善兵法垂勳名而饗有壽考者宜莫如太公望公望八十而載後車九十而壯鷹揚百年而後賜履布侯於營丘所謂用而不用不得已而姑試焉者也南山之詩曰樂只君子邦家之光樂只君子萬壽無疆由斯以譚天爲邦家生賢則必賜之以無疆之福公有大造于滇宜食其報天方奉金馬碧雞爲公湯沐邑不腆南國用作營丘卽由六十而百歲何讓尚父之烈哉不佞又聞之公行兵制勝壹稟武侯居恒所敬事而決策者實純陽先生夫南人俎豆諸葛至今爲烈旣越千載而公繼之異日文武之功成將挾一劍而從吕公游乘彼白雲而歸帝鄉世俗悠悠又安能窮公跡矣屬公初度干支始浹諸大夫命不佞修酌者之辭公久勞於外簡在帝心持衡筭樞且有

後命安國家定四海庶幾社稷之役不佞鄙人僅得其一隅惡敢緩頰也

壽陳長君六十序

代

往萬曆敦牂之歲不佞被召還京師而玉融陳孝廉某者以計偕來每挾策而謁不佞不佞私之乃孝廉時時爲不佞言其父陳長君最後徵之閩人士乃悉長君高誼也長君父某翁倜儻負氣大有古烈士之風嘗讀司馬家禮向慕其爲人每朔望朝其子督教之以爲常翁子率多

業儒而長君獨佐其父拮据治生身爲參伍業稍稍振而會寇警則與兄弟避地閩中諸兄弟事君甚莊而君諄諄無間諸兄弟食指繁一切倚辦君也蓋自君入閩而慕倜儻名益甚凡貧乏者視君如外府無不意飽去者里之待舉火若而人族指之待卵翼若而人婚而待采幣筐篚游而待資斧者又若而人而君傾心應之無所靳居恒謂人吾安能白首錐刀橐藏纍纍卽一錢捫之汗出役役爲兒子虜乎蓋二十年而

減故產人或笑長君柰何瘠其身爲人利君不  
屑也曰吾所爲脩業而息之在孺子耳於是君  
子俱籍名博士有聲而無何其仲者舉於鄉矣  
前里人濡沫於君者心旣幸君而又疑君方豪  
舉是且爲富貴容於車上儻哉君則務爲醇謹  
衣其褐衣修故業如故卽貧乏者赴君終無不  
意飽而去也其天性好施如此歲甲申父老上  
其事有司遞奉明詔褒錫之越明年君以春秋  
杖于鄉而鄉大夫豪傑三老咸造長君爲壽謂  
不佞雅知君而又與孝廉相善也乃走一介行  
李請于不佞曰幸得一言以備將命不佞非知  
言者而自昔讀太史公稱陶朱公三致千金再  
分散與貧交踈兄弟及之陶計且老十九年而  
始聽子孫息之養生家至傳之列仙然其後無  
稱矣乃君富而好行其德四方誦義無窮而孝  
廉與諸文學翩翩穎出以振君未振之緒卽今  
年方壯盛由六十以及百歲其食報無有已時  
此孰與陶朱公多古者養老憲德納言紀之惇

史如長君者可以憲矣屬公覽揆之且不佞敬  
以此申之而因報鄉先生父老也

### 壽江太恭人七十序

當莊皇帝時武林江陽泉先生以僉事按察廣  
以西諸部學持三尺廩廩一有所不當意輒投  
劾歸於是海內咸熟先生名而欽其節而最後  
久之則先生子太守君者由郎署出守福州其  
風節大類先生而潔廉豈弟循良聲獨著閩人  
上固已侈其事而咏歌之矣江先生之以節聞

也與守君之名循良吏蓋皆李太恭人佐成之  
太恭人居恆稱說先生前者率多鹿門之誼而  
其所意授守君爲元元造福則何論雋京兆之  
母哉曩太恭人之就養卽舍春秋高矣守君昧  
爽候顏色已出坐堂皇察民疾苦而噢咻之退  
而具滫瀡奉觴上壽太夫人徐進守君問日所  
興除者某事守君一一對爲特進七箸一再舉  
觴意殊適也以故守君思孺悅太恭人不可得  
則益討閭閻之故而銳行之屬早禱雨徒步暴



烈日中薰其容已又䟽諸溝河築斗門時蓄洩以通水利春作方殷單車行阡陌課耕者椎牛酒勞之父老聚觀至感泣而問左惡少年慄猾作姦則輒寘之理曰吾不欲爲良民蠹也以其暇行學宮與博士弟子品隲文藝題其甲乙彬彬聞人士習守君善政稍推其指由太恭人則舉手加額祝太恭人長壽會歲庚寅太恭人年且七十閩人不忘守君之德而願徼福於太恭人屬不佞修辭以命酌者不佞則謂守君五年

於此其善政可指而譚本之於所自出實太恭人之澤由今以往閩之士得安坐而脩其業閩之氓得安處而食其土之有百世之後孰非太恭人之年哉今兩宮在上女德最茂聖天子以孝治天下雍熙悠久世躋仁壽之域太恭人際休明之運撫膝下三世禕翟雍容而享之守君旦夕內召入班九列益張太恭人之德間致大官之庖與上方桐酒承上餘懽以效太恭人前夫非所謂吉祥善事者與太恭人其尚

顯精神愉快其意志以安我守君守君在郡且  
庇閩卽守君在朝且大庇閩不佞閩人也幸得  
歲歲祝太恭人無恙則所藉手以報守君者哉

壽郭太君七十序 代

郭伯子者與不佞同籍孝廉不啻平生懽蓋伯  
子之隸學官時已推爲諸生祭酒矣而隱約甚  
顧其所交游皆大父行傾一時賢豪長者伯子  
交益進名益高而家亦益落與三弱弟守章句  
兀如瓠瓜也於是郭太君實稱未亡人日督過

之太君之言曰老婦無所恃賴第地下業有成  
言庶幾能自致使老婦得以藉手是在孺子矣  
以此持諸孤莊而嚴每夜篝燈熒然諸孤挾一  
策左右立琅琅吾伊聲夜漏至二十刻猶不休  
少怠則跪之庭下數之孺子不力而忘生者竟  
忘逝者乎諸孤蒲伏流涕不敢仰視其嚴如此  
伯子旣舉於鄉則率諸昆弟更起稱壽太君特  
爲進一觴曰老婦非敢恃孺子自爲功亦唯是  
藉手以報地下耳伯子久困公車而最後謁選

得山東之曹縣亦以母故則太君年七十矣伯子幸語不佞養民勉拜一官卽升斗之祿不足以承母懽幾得大夫一言乃足以承母懽願借疇昔之誼而邀惠於吾子嗟乎此孝子之心也世方以鼎鍾謂孝其旨謂慈以爲非是不足以望父母之腹夫孝在令名於萬鍾何有蜚英騰茂幸哉有子如此其懽可知不然卽伯子異日以治行異等捧徵書入侍見謂貴倨矣藉令無當於令名雖分大官之庖母禔翟而享之孰若

孝廉時稱觴媿快哉吾獨以太君之賢宜食福於後天所以緩於報之而嗇於售之固將以綿郭氏之祚而厚錫母也然則伯子之爲壽且有日矣試以不佞之言效之願太君更爲進一觴

壽林母太君序

林母黃太司徒襄敏公之曾孫也笄而歸於林是爲肖巖君君爲諸生時則已燁然有聲矣而不第有司歸輒發憤下帷達旦也母從旁解曰君柰何以七尺而徇所不可知者乎無何竟以

瘁卒母年二十九耳已持其孤絮泣於庭曰吾何愛旦夕命哉顧此藐諸者受之吾夫族有建立時以報地下不然匹婦之諒溝瀆守之計畫無復之自謂永訣使死者不能慨然釋憾於身後何以托六尺之孤也蓋是時默卿纔五歲而其姑陳者又以哭子喪明母且泣且奉姑姑忘亡矣而家復故貧徒四壁立日以女紅佐孺子讀伏臘修脯輒取給焉默卿恒言每夜篝燈則孤挾一冊琅琅佔俾已卒業從容語先君子一

二事至藪藪淚下云於是都人士咸悉黃太君賢無不願交默卿者會萬曆丙戌則母年五十五而默卿以其先一年與計偕矣屬母初度之日不佞某以年家子從諸賓客後往謁醴酒旣具當脩辭以命酌者不佞進曰嬰杵殺身相勸難于立孤母之憫未亡人且三十年存胤子而玉成之食其報若左券夫天道猶水窪則盈之翁或以張屯或以裕以母始終視此不亦愉快乎哉客曰未也默卿博雅嫻辭功名其所自致

者此不足母所藉令默卿以經術向用雍容著作之庭間致大官供具稱觴上壽母也禕翟享之福履未央庶幾哉色喜乎客曰未也不佞避席曰紛華鉅麗此世俗所侈談也母三十而孀居間闢茶苦以有今日惟是默卿奉母之教振前人之緒卓然樹立于時幸哉有子如此蜚英騰茂貽父母令名則母所藉以報于肖巖君者是所稱完節也以是爲壽可乎哉請以此而聽命閣人

### 記

鄆陵令錢公去思碑記

代

今侍御錢公初令鄆陵以循良著公旣徵邑人誦之勿絕當錢公被召時不佞寔在田間不佞陳人與公所部相聞也公去其邑之三年而不佞亦起家史局守故官鄆陵父老孺慕公如一日謀所以識不忘者則相與尸祝之業有成事輒走一介之京師徵不佞之文勒之石以示永永其言曰鄆爲中州巖邑隸于都會地瘠而民

貧辟如蝸濡動則立槁公初下車旱魃爲政公  
徒步露禱暴烈日中輒禱輒應歲以有秋於是  
流移者多疫且作公爲之醫許昌之民是以太  
和其治獄尤稱神明要於解散之而止一切贖  
鍰盡蠲之曰吾不忍傳爰書而假筮楚剝民財  
也每入覲凡道里費皆取辦於家約勅胥史不  
得受一錢其正身率下如此時時廣厲學宮簡  
諸博士弟子而程督之爲題其甲乙無不彬彬  
頹化者日坐堂皇延見長老問民所疾苦退卽

疏之求善後之策無憾而後卽安蓋五年如是  
矣故公在則民怙之公去則民懷之余鄙又安  
能旦夕忘公也嗟乎舉世方務赫赫名以邀上  
而賈寵朝報政而夕奏功於善後何有卽其蠶  
悍武健稱媮快矣月計有餘歲計不足將焉用  
之乃公徐徐于于與民休息事上必以道拊下  
必以情安靜之吏悃悃無華去後見思是謂遺  
愛蓋不佞曩在田間所耳濡目染者大率如鄙  
父老語矣班史紀循吏每嘖嘖於文翁朱仲卿

有餘思焉考其治行不過仁愛好教化廉平不  
苛以愛利爲行如是而已乃文翁在蜀吏民爲  
立祠堂歲時不絕而仲卿至謂後世子孫奉嘗  
我不如桐鄉也此豈可以聲音笑貌爲哉公今  
爲天子近臣膏澤所及何論一邑惟是鄙人無  
知饗其利者爲有德卽公異日善政遍四方則  
鄢陵爲之兆不佞所願効一言而因以報二三  
父老也公名夢得字  
爲浙之桐鄉人不佞  
同榜進士

路南州新建儒學記

高皇帝之平滇南也蓋實以重兵臨之于是草  
坳未遑講馬上之業豐孽時作無歲不勤王師  
經理既定始圖久安之策郡縣棊置漸以俎豆  
代干戈久之滇乃益治文風且振椎髻之民率  
襲冠裳登其賢能而賓興之壹視中土翩翩乎  
明德遠矣而路南故隸澂江自成化間始改設  
流官地絕僻什一依山菁而居閔不知學其頽  
者稍通章句籍博士往往寄他庠厥後益多道

經路南稍跋涉書生苦之而山箐之民竟不識  
衣冠作何狀則何繇顧化越人被髮視章甫猶  
弁髦何以故不習故也卽引而置之通邑大都  
文物從容赤面而走耳萬曆丙申鍾君應麟來  
守是邦圖之三老咸以爲建學便上其議於視  
學使者兩臺疏請于 朝得報可越辛丑而竣  
不佞受成焉凡所創建者曰大成殿曰明倫堂  
皆五楹曰尊經閣曰敬箴碑亭曰啓聖祠曰文  
昌祠曰鄉賢祠曰名宦祠皆三楹泮水戟門齋

舍衙廡莫不備具蔚然鉅麗之觀矣今守史君  
載德幸而語之曰是諸大夫寵靈而載德藉手  
以告成事者也願使君勒石紀之夫古造士之  
法則莫詳于成周考成周之所爲學者其名曰  
庠而釋之曰庠者養也養也者作其孝弟忠信  
之心銷其暴戾恣睢之習六禮三物皆此志也  
辟之養木者然置之於深山大澤無斧斤之擾  
至於干霄然後以備明堂之用此寧可以歲月  
冀効哉 高皇帝養士二百餘年其法稟之成



周而其要乃在伸士之氣而培其節夫士之氣不扶則抑士之節不植則墮廟堂之上威欲行於逢掖之細何求而不得毋寧自屈而伸之凡以培倫常而明紀綱使之有所維持而不壞古聖王所爲長治久安之術其率用此邇者利孔旣開盡山澤而錮之卽學宮不免焉遂至右鹽鐵之義而左文學之說薄其所謂養者而重其所謂罰者士之氣節幾抑鬱而不得伸彼都人士且儼然依於夫子之教而凜然習于高皇

帝之約束堅持孝悌忠信之心而盡誦暴戾恣睢之氣夫以荒服反覆之國易動難安曩日金革所不能縻者而今以非道加之猶不易其素此無他教之所懷上之所作也史言文翁守蜀見蜀地僻陋有蠻夷之風欲誘進之乃選郡縣小吏開敏者新自飭厲遣詣京師受業蜀人士化之比齊魯焉今士生右文之世不出戶而得師何論漢德故被服聖教則爲良士沐浴聖化則爲良民毋自卑其氣毋自隳其節以用夏變

夷較然不負其所學則豈惟諸大夫藉以榮施不佞視學如此有厚幸矣鍾君內江人史君潛山人前後守澂江者王君祿兆卽墨人程君子侃休寧人皆與有勞者其經費則二刺史捐俸爲大役先而庶官羣弟子亦樂助其成云

瀾滄江新橋記

由永昌北出九十里而近有山曰羅氓其下爲瀾滄江考之漢志有瀾津之歌楊太史用修曰源出吐蕃嵯和深廣莫測兩岸飛嶂插天不啻千尺岼陡水悍不可方舟其上架飛梁爲橋舊矣迺修迺燬其詳不得而聞猛酋作難一烈而焚之主者竭力修建蓋募衆緣而成無何蒲夷再叛大中丞陳公命率統偏師勦之兵憲杜公監其軍賊飛走路絕計無所出夜潛出燒橋欲以斷饗道而困永昌一夜盡爲灰燼惟茲瀾滄在郡治爲咽喉此北走滇雲道也辟如人心然扼其吭則手痺矣公曰賊敢憑陵罪在不赦當滅此而後朝食於是亟檄郡守期不日而告成

功而前募建時頗有羸錙度不足則捐俸爲大  
役先巡憲張公割廩餘佐之二三守相及縉紳  
三老亦各樂助其成經始於春二月而畢設於  
夏六月矯若長虹翻如半月力將岍爭勢與空  
闔利涉之功於是爲大矣守華君勒石于江上  
用示永永則以杜公之命命不佞紀之方春之  
暮也不佞以校士來茲江春水始漲舟楫大有  
戒心今幸覩諸役安敢以不文辭也夫徒杠輿  
梁則王政所有事又司險知山川之阻而達其

道路古之行師者亦率用此漢趙營平奏治湟  
陘以西道橋七十所令可至鮮水左右以制西  
域威行千里如從枕席上過師前史以爲美譚  
而魏崔亮治渭水獲巨木數十章取而橋之百  
姓以爲便至目之曰崔公橋蓋濟人利物知爲  
政者矣況在禦侮是惟要害之區困獸猶鬪何  
所不至跋胡蹙尾將狼顧不遑前矛慮無若臂  
指之相使則茲橋胡可緩也初賊燒橋勢猶猖  
獗幕府以爲憂謂賊且困蝦臂何足以當車轍

乃懸重賞而構之督戰益急賊窮竟縛其魁殲  
艾殆盡蓋賊平而橋亦告竣是舉不煩莞庫之  
士民無告勞財無過費垂永利而足軍興此之  
爲功卽趙營平崔雍州無能爲役矣今天下之  
津梁稱巨麗者宜莫如吾閩之萬安顧所繇不  
朽則以蔡君謨之文君謨不嫌自序其績而公  
乃藉於芻蕘之言將毋令茲橋以公重也而以  
不佞之文輕乎哉公名華先冠縣人張公名堯  
臣內江人華守名存禮興國人而郡司馬鮑紋  
萬戶侯世賢皆爲植法得竝書云

新置雲南府學租記

滇中諸郡邑率有學田計所入僅僅什八爲猾  
胥乾沒徒具額耳此轍中鮒者安所得升斗之  
水而活之先是臨川黃君廷寶以僉事巡昆明  
部中積罰金若干已改治兵爲視學其籍具在  
曰是羨物也而有便計吾以金易粟春而散之  
秋而歛之藏收其仂而不取盈我則不費而千  
家可無饑夫母行則不蠹子約則易輸十年之

濟且益廣乃旬校會計得粟千石立爲經制貯于衛庾縣大夫總其事名之曰小惠君之意若竊比於乘輿之濟云耳行之一年滇人大以爲便久之黃君遷去守者緣爲姦利市猾逋負者不肯輸官或輸而守者蝕之不以告於是代黃君爲漳浦劉君廷蕙極核之半已爲鼠雀耗矣無已則簡其三分之一令之變鑿以佐軍興封其餘以備歲又一年而不佞承乏滇乃大稜四方過羅無所出民間嗷嗷有稱貸者爲下所司料

之額益詰問之則曰此積逋也而前所稱佐軍興者縣吏實匿其書未及上且瓜分者蠶食之矣余聞恚甚檄李官孫君治之引繩批根始得姦匿狀比之嚴闕三月僅完其舊他流移不能償者悉赦之諸豪惡吏論戍有差計得金六百七十兩其充餉者如故實在者四百有奇不佞嘆曰法有美而不行政或久而滋弊當黃公朔義時何異古之常平乃在事者秦越委之徒以望姦人之腹善始者不必善終固非虛語雅聞

滇士無恒產往往食貧藉令急黔首而緩青衿  
謂知務何且民夥而士寡夥則難及寡則易徧  
與其博施而不足毋寧近取而有餘余辨此矣  
行求得市舍一區索價四百兩而贏度不足則  
益以他租充之歲徵租四十金而縮儲郡帑以  
待貧士不佞所爲此者要以終黃君之惠而爲  
都人士升斗之潤矣旣成恐復有如向者乾沒  
也輒爲記其始末使後人有考焉孫君名台偏  
橋人才而敏今知和曲州

西樓全集卷十三終

西樓全集目錄卷十四  
傳

鄭繼之先生傳

徐子瞻令君傳

王叔魯傳

墓誌銘

兵部左侍郎小峯李公墓誌銘

陝西按察司副使魯峯劉公墓誌銘

明安遠侯元配李夫人墓誌銘

處士東郭徐公配鄭碩人合葬墓誌銘

昌黎令封文林郎陳公暨配封孺人段氏

合葬墓誌銘

貴州左方伯麓池郭公墓誌銘

張隱君暨配鄭碩人合葬墓誌銘

陳卿仲墓誌銘

西樓全集目錄卷十四終

西樓全集卷十四

閩中鄧原岳汝高著

門人陳開泰侯亮訂

仲子慶家編次

傳

鄭繼之先生傳

明文章至弘治而一變於是作者百數十家而  
北地李夢陽信陽何景明吳徐禎卿及吾閩鄭  
善夫先生最著先生字繼之別號少谷山人



自其初生太夫人夢日墮於懷吞之遂有身  
生幼負奇質髻椎隸學官則已厭薄一切經生  
言學爲古文詞有聲矣二十舉於鄉明年爲弘  
治乙丑遂成進士而何景明寔直中書相得驩  
甚益切劘爲古文詞已亳州薛蕙黃州王廷陳  
吳郡顧璘三衢方豪東平殷雲霄皆一時知名  
士後先至咸折節而交先生文酒過從靡間也  
毅皇帝初先生猶在選人纂修蘇松常鎮寶  
錄成隨丁內艱積六年授戶部廣西司主事出

權許墅關譏闌有法著爲潔令是時中貴人方  
用事亂朝政先生鬱鬱不自得竟移病滿三月  
上書請告歸歸則築少谷草堂於鰲峰顏其亭  
曰遲清以見志交與鮮絕守令干旄往候顏色  
先生以一童子支剝啄終無所造請諸公愈益  
賢之正德十三年先生病良已起補禮部祠祭  
司主事守員外郎滿三載考贈父母如其官嘗  
奏改曆元事宜語甚核詳經濟錄中 毅皇帝  
之末年儲位久虛逆藩素蓄異謀嬖人江彬

諸中貴人相左右爲姦諸曹郎黃鞏等以諫南巡語侵彬彬大恨矯 旨杖闕下有死者先生不勝憤挾舒芬張衍慶復上疏切諫彬彬益怒罰跪午門已杖三十幸不死當先生罰跪時猶草疏數千言納懷中言所以不當出狀謂方豪曰死則上之無何而 駕發先生詫曰已矣無所容吾言矣彼地下者其以余牖下非夫哉遂再請告歸山人孫一元故與先生契分不薄先生歸一元且死則間道之茗溪哭之爲經紀其

喪浙東饒佳山水洞天石室多仙靈壑宅如禹穴天姥蘭亭雁宕之屬慮無不受杖屨者嘗雪中遊天台褐衣筍輿吟趣甚適時顧璘方守天台聞之曰此必吾繼之也亟使人邀之爲盤桓竟月無何歸閩有終焉之志先生故居南湖去郡城五十里而遙地稍勝先生與一二曹偶如林鈺侍御傅汝舟高澈二山人日觴咏其中而守君汪文盛者時時屏騶從從之先生爲具筭噐食濁醪數斗佐以杞菊汪轟飲至醉也嘉

改元先生用薦起爲南京刑部郎中尋改吏部  
行至建寧遊武夷山大風雪爲寒所中竟游歸  
病遂徬抵家二日而歿年三十九耳病亟猶手  
書鄭重以遺文託高傳二子而後瞑目死之日  
紫氣勃勃不散蓋先生客天台嘗語華玉明年  
海上紫氣東來是吾觀化至矣人以其語驗云  
先生爲文章泚筆立成渾雄蒼老大抵出入諸  
子而本之六經其詩以氣格爲主以悲壯爲宗  
古詩樂府沿漢魏下及六朝歌行近體抵掌少

陵絕句翩翩有青蓮之致書法尤入神真行對  
酌聖教狂草奔放縱橫爛熳顛素而下弗論也  
間又創意點染花草叢篠怪石得象外趣然絕  
不名其業以此人亦鮮知者嘗一晤王文成於  
毘陵慨然有味乎性命之學則從湛氏得其緒  
而力行之功取專詣非獨立門戶而已先生每  
言經生局迹蟬緩其衣多文辭而鮮實効何益  
於殿最乎居恒取國家掌故講其廢置所繇及  
利害甚暫每郡邑有大政先生輒爲決策務也

機宜其所莊事者莆陽林俊司空林雅推轂  
謂有大臣之器厄於年而不得售惜也林欽又  
言先生篤於內行婚嫁七弟妹羔雁筐篚無不  
自其手指指出者莖母屬二十餘喪皆假貸於子  
錢家其厚如此汪守君旣莖先生於梅亭已編  
定其詩文若干卷行於世而子通經世要談軼  
不傳鄧原岳曰余小子與鄭先生不相及而於  
先生外孫林學憲道茂許覩先生像髯而都若  
神仙云其集今盛行世有知者或乃謂時非天  
寶位靡拾遺以無疾呻吟爲先生病夫明正德  
於唐天寶安取低昂哉而欲呻吟者之必賡歌  
也惟王元美評其詩如黃河水稜得杜之骨庶  
幾實錄云

徐子瞻令君傳

往惟和之入燕也與不佞好爲約吾挾駿骨爲  
爾先驅至則會荆軻市中期擊筑爲信不佞敬  
諾蓋惟和行月餘不佞始發及不佞抵闕下  
尋惟和於酒人羣則徐先生函問且至惟和

歸矣不佞舉酒酌地南嚮哭失聲久之不佞  
里先生既祥惟和弟惟起復走吳謁顧道行王  
百谷二先生爲表若銘歸而屬不佞爲之傳曰  
不腆先令之骨實藉此以不朽不佞哀而許之  
徐先生名棊子瞻其字號相坡居士閩中人也  
徐先世受賈先生始以逢掖起家凡再爲文學  
掌故以至今令尹先生束髮讀易則從舒紹安御  
史游御史門墻稍峻每橫經弟子無敢亢者先  
生一再發難輒踞其上舒大屈謂徐卿嶽嶽欲

折吾角邪其年隸學官遂旣廩於是貴谿江干  
順錢塘田叔禾後先督學名能知人爲先生推  
轂甚力然終不第嘉靖乙丑僅以貢上春官盖  
先生屢困省試其文從容醞藉皆根極理窟倉  
卒若不能詳及被放後則又無不爲徐生申恨  
者先生謁選得江西南安訓導而守南安者爲  
林允中與先生筆硯交先生自公庭延接外絕  
不肯私覲崇義缺令臺檄先生攝先生謝不往  
也諸生張某赴他郡歲試貧不能具資斧至

其子以行先生爲出橐中裝贖還之其守正義多類此滿三歲遷廣東茂名教諭守功令如初先生爲人介而和所至身自督課以士行相切劘故諸生每憚其嚴然婉曲情至絕無他腸士以此歸之而當道者久亦廉其賢而爲之延譽竟以薦擢江西永寧令云先生雅不習爲吏又惡聞箠楚聲嘗取唐人拜迎長官心欲碎鞭撻黎庶令人悲二語榜之座右永寧租庸歲二千緡耳又多逋負令坐此奪俸先生謂民色如

菜寧忍割其脂膏令立槁乎終不加一箠或謂徐令弱不任事先先生嘆曰吾有去吾官耳吾不欲以繭絲易五斗也遂投劾歸先是吉州張守君雅知先生屢匿其牒弗以聞至是張以考績行乃得請先生之在邑也無赫赫功其去也百姓思之謂徐侯長者卽先生可知矣旣歸買宅鰲峰之麓雲山四封幽寂可憇植花木百十種手自剪剔妙得其候每花時佳客過從出濁醪相對煮笋燒藿雅歌留連客未醉主人已頽矣

客散去不知也先生雖逃於酒乎內行尤淳少事父母以孝聞伯兄無子嫂趙老而盲先生母養之所得俸錢歲分給與諸兄弟隨手盡其學自六經子史以至稗官小說無所不漁獵三爵之後篇什間作要以寫其所自得而止不求工也先生素強無疾其視履飲食不減少壯俄得病遂卒春秋七十九矣屬纊之時語賓客曰人生駒隙耳其將化也無論富貴功名如夢如幻卽此四大歸之泡影奈何以幻化之軀久視

息於世間也賓客相顧嘆息是安得達者之言而稱之先生所著有徐令集周易通解養生纂要藏於家三子燻燠燠皆負雋才燻卽惟和籍孝廉燠名布衣俱能詩與不佞同社

鄧原岳曰人謂先生治邑如陽道州勇退如陶彭澤任達如王無功篤行如繆羊令庶幾近之余獨怪先生口不談莊老其臨化之言一何懸解也故曰不知悅生不知惡死不以心捐道不以人助天是之謂真人

王叔魯傳

王叔魯者閩人先名元字學曾改今名更字少文云其先故多顯者曾祖士昭以名進士爲叅政有聲叔魯之爲兒時不好弄五歲就外傳日記千言七歲工聲偶每客至命之屬對行觴輒應聲而就客大喜無不爲飲至醉者而葉兆中太守尤奇愛之謂其父亨仲是兒了了且大而宗十二學書摹倣聖教十得其六七八隸學宮於是楚黃耿子健先生寔收之拔置高等叔

魯雅不喜博士業所爲制義若不經意得者然老文學讀之至咋舌嘆曰安得作爾馨語一二曹偶爭願交叔魯矣已從徐燧兄弟游燧兄弟善詩則叔魯亦善詩其從父崑仲善繪事則叔魯亦自以其意作山水寫生出其表也又時製古印章鐫刻精妙卽名其家者皆愧恨以爲不及其人玉立英英獨照於人交恂恂如也口不挂臧否而引大義責人有古烈士之風性尤篤孝侍母疾竟病不解帶居喪擗踊絕而復甦



號慟路人爲之酸鼻父坐此不更娶鰥居終日  
家故貧環堵而居叔魯于于安之焚香燕坐左  
右圖書數卷佳客過從揮麈而譚仙釋之緒纏  
纏不休居恒善病貌癯然不勝衣又性好客朝  
夕應接常若不及父始禁其往來而叔魯已坐  
羸疾不可爲矣方叔魯病時而從林氏學養生  
家言終日兀坐習吐納之法不大驗日就彫瘵  
叔魯亦自知其必死賓客問疾譚吐如平時忽  
一日語其父曰父幸自愛兒去矣擊木魚數聲  
而逝年僅二十未有室也卒之日弔客雲集皆  
行哭失聲同時而哀輓者二十餘人不佞自長  
安歸叔魯已臥病故余不得交叔魯及讀徐燧  
哀辭而憐之更爲之慟夫叔魯一少年而負盛  
名奪造化所忌古稱丈夫蘭摧玉折悲夫

墓誌銘

兵部左侍郎小峯李公墓誌銘

代

萬曆戊戌夏四月二日少司馬小峰李公卒於  
家越明年將襄大事李公與不佞同榜兄弟日

善也公子錦衣燦暘以奄窳之事來告謹爲  
其大者勒而藏之幽按狀公諱松字某 別號  
小峯家世霸州大城人祖祥有隱德父淮以歲  
貢爲鄆陵簿邑人至今思之俱累贈通議大夫  
兵部右侍郎兼都察院右僉都御史皆以公遼  
左功母繳氏累贈淑人是生公公纔五歲而繳  
淑人見背其繼者爲王太淑人保護甚至鄆陵  
公素竒公語太淑人曰孺子也才母爲他兒所  
溷吾當自程督之耳以故公經術一切取諸庭

訓無他師稍集諸生則諸博士家業已心攝之  
矣戊午舉於鄉壬戌成進士於是鄆陵公已不  
逮養公泣曰吾父辛苦一經不得售兒幸薄售  
乃三釜之饗不以養而以祭何以稱圖報哉初  
受得歸安縣持節甚苦以愛惠得民心獨請託  
不行卽權貴家以事居間公集氣待之不爲禮  
以此諸權貴家不能無恨公爭媒蘖其短幸直  
指龐公尚鵬力救之得解然竟坐此左遷爲鄧  
州判官居無何擢滕縣苦節如初已擢工部憲

衡司主事調兵部武選司進車駕司員外遂  
爲遼東兵備僉事時虜數躡遼左鎮城空虛滋  
不支公至周視形勝規畫便宜拓紅螺山爲內  
地鑿山築邊墻遙接山海關連亘八十餘里曰  
此遼數世利也墻旣成邊人始有固志累陞叅  
議副使叅政按察使至右布政俱照舊管事遂  
擢右僉都御史巡撫遼東進兵部右侍郎兼右  
僉都御史巡撫如故公在遼十二年與虜百十  
戰斬馘五千八百餘級最後大虜挾五萬騎徇

塞公召諸部先期薄之諸將皆謂虜勢張不宜  
輕出戰不利懼喪全師公曰虜勢張吾不出且  
逼廣寧吾先自敗遂率勁兵夜馳九十里與虜  
遇且戰且前虜見師銳退避數舍相持竟日虜  
無所掠饑甚遁去朝議積公前後功蔭一子錦  
衣衛副千戶世襲蔭一子國子生子予告命已又  
加兵部左侍郎以繼母喪歸遂不起公性篤孝  
事繼母王太淑人如所生居父喪幾至滅性自  
爲孝廉時好賑人之窮每稱貸以備緩急人成

謂公公去諸生幾何而務博濟爲也公笑而不  
答家居置義田三百畝收其租入付族長老籍  
掌之卽族人婚嫁羔雁葬葬棺槨率視公爲外  
府矣公配裴氏累封淑人男子三長卽燦暘錦  
衣衛世襲副千戶婦段氏次煇暘錦衣衛正千  
戶婦溫氏次燦暘國子生婦紀氏則側室羅氏  
出孫男二長培寅次培貞女六孫女二公生於  
嘉靖乙酉年十一月初一日享年七十有四葬  
于某山公守遼最久功亦最大公去遼遼益坐  
困夫遼陽京師左臂國家倚爲安危疆場之吏  
非久任無以責成功卽李公可觀矣是宜銘銘  
曰士初仕試爲令蹶而興氣益振東方之事爾  
爲政鑿閭山高莽相映瀚海茫茫淨如鏡祁連  
起冢功堪竝千百餘年積餘慶

陝西按察司副使曾峰劉公墓誌銘 代

憲副劉公嘉隆間名進士由法曹起家積至今  
官以老致仕歸歸十餘年始卒余里居久雅信  
公之爲人公喪旣除其子繼祧將襄大事不

千里來徵余銘以余論公庶幾循良質行君子也邑有耆舊卽後死者安敢以不文辭按狀公諱宗岱字伯東號曾峰其先棗強人也國初有效忠者徙歷城因家焉凡若干傳而爲贈公最以明經爲鄭州學正諸生嚴憚之是爲公父贈公娶牛安人不宜子公與弟某皆出側室茹太安人公生四歲而孤二母遞襁褓之抱影窮廬更相爲命矣公稍知學日肱篋讀贈公遺書每達旦不休業已成兄弟皆隸博士二母喜相慰

也兒幸俱縫掖吾襁褓不爲勞無何弟某與其婦皆卒牛安人亦物茹太安人泣語公吾二寡母辛苦持二孤相繼淪謝吾母子孑然兩身耳何以報死者地下乎公亦頓首流涕於時公學益進文日益有名周與泉先生築白鶴書院以招來學公以高第往諸生折節下之嘉靖壬子公舉於鄉已未成進士時人爲公大器固當晚成一第不足溷乃公也公初授爲河南府推官號能執法伊庶人淫虐日操守令短長旣伺入

無所得心怵公而忌公者反構公爲伊黨造其  
語中之幾不免會南海龐中丞疏薦力甚事得  
寢已擢戶部主事督代州倉所建白悉中機宜  
一日虜犯朔川督臣主車戰失利卒大潰主者  
惡其彰也縛二逃卒欲誅之公謂督臣潰卒尚  
未盡歸今僂此柰反側何督臣固信公遂釋不  
誅公治賊也而知兵如此邪在鎮滿考改員外  
郎得封贈如今甲差竣轉郎中而六安之命下  
矣公之謫也猶以蜚語故久之公議益白稍擢

沁州知州量移廣平府同知所至興學校修城  
堡去輒見思尋擢南京戶部員外郎調兵部武  
庫司郎中出爲山西僉事分部河東蓋兵備也  
公在河東多保障功三年陞浙江叅議以入賀  
行遂陞陝西按察副使太安人且八十矣公宦  
遊四方太安人率御板輿從之最後一病垂殆  
公乘間請曰母春秋高兒備員外臺官不薄願  
奉母歸故廬母匏繫爲也遂乞終養旣家居益  
爲色養太安人喜施予務中其權內外族貧者

待公而後舉火羔雁資斧棺槨布絮人劑而紼  
之家人以爲言公謝曰此太安人指也太安人  
沒時公已老猶孺慕不衰人以爲難晚治別業  
於湖南觴咏自適賓客過從流連日暮蓋自是  
不問外事矣所著有漁樂滓言多微詞公素強  
偶抱末疾迄不起則丙申八月二十四日卯時  
距生辛巳十二月十九日戌時春秋七十有六  
配呂氏封安人處士詢女側室楊氏李氏呂氏  
李氏皆前公卒子一李出卽繼祧娶陳氏南京  
工部郎中可大女女二俱楊繼一適潘鳳翼教  
授子震子一適許恒長史邦材子卽李于鱗集  
中所稱殿卿者也繼祧將以今年十一月四日  
塋公於濟東新兆而以二母附銘曰藐藐諸孤  
孰翼之成煢煢寡嫠孰遺之榮快若健鷗不隕  
其名逸如冥鴻益葆其精歷下之山鬱鬱佳城  
余爲爾銘嗚呼此賢大夫之塋

明安遠侯元配李夫人墓誌銘 代

安遠柳侯元配李夫人薨于京師年纔三十

歸葬南都而丐焦弱侯太史狀徵不佞爲之書  
若銘李夫人者太保臨淮侯女也臨淮爲先太  
師門下士與不佞通家契好則不佞安敢辭按  
狀李氏之先出隴西始祖曹國公尚 高廟姊  
大長公主主蚤殂 高廟憐之恩賜獨厚再傳  
爲岐陽武靖王則所稱開國元勳歿而祀于  
太廟者也 肅皇帝時盱山公出鎮三楚臨淮  
子舍間實生夫人夫人幼而端凝穎敏數歲已  
通孝經列女傳諸書及笄歸于柳侯家人竊議  
是貴人女不必嫻於內則而夫人事姑更甚恭  
旦暮上食唯謹至出嫁時裝買田若干畝爲供  
具太夫人安之於是侯弟尚壯未有室侯以爲  
言輒出私橐爲之納婦其賢而知禮皆此類也  
居嘗勸侯讀書習騎射與學士大夫游奈何從  
諸子侯鬪鷄蹴踘自鄙薄爲侯深領之賢豪造  
請不避寒暑所結交盡大父行知名士矣侯襲  
封可四月而夫人病病卒不起疾亟猶勅女媪  
勿令太夫人知母以新婦故傷病者心蓋太



人時亦寢疾且阽危云夫人生於嘉靖乙丑十一月二十六日卒於萬曆甲午正月十日葬于南都天闕山之祖塋高廟所賜地也銘曰赫赫侯門厥有姬姜爾年不售爾德則良天闕若堂奕世而昌

處士東郭徐公配鄭碩人合葬墓誌銘

東郭徐公之葬也在楓木之原其子孝廉仕檟謁徐司勳狀而來請曰先壟之封二十有五年矣而銘石尚虛惟是不孝無似不能加尺寸于

先隱君也無已則願勒一言于墓門死且不朽余哀而許之公諱滙字宗達別號東郭先生其先有幸隆者爲宋河南節度使與金人戰死子大興以蔭爲衢州守葬常山遂家焉數十傳而爲公父味山翁有隱德爲鄉大賓味山翁年四十而生公少習博士業有聲一旦棄去拮据治生中年乃益饒公旣以身起家而諸弟方宦游一切倚辦公也或以爲言公曰但得承膝下歡此錙銖何有盖味山翁晚益康豫喜公爲能

矣已以其間剏宗祠置祀田若干畝歲時合於  
訓以大義族人化之內外屬以緩急告者未嘗  
以無爲解有不平輒不之公府幸得公居間立  
解其爲鄉人所重如此公諸子皆隸學官所以  
督責之者不獨爲名高於是姚江錢緒山先生  
得王文成之傳講學於武林公遣諸子從之游  
語之曰此學者第一義也諸子稟公之教率尚  
躬行郡邑守相每下車聞公名咸折節下公尊  
爲祭酒每當蜡賓欲致公爲重公固謝不往也

晚年築一室於郊引泉種樹爲游息之所顏其  
堂曰師古人謂公出入不悖人倫卽不拘繩墨  
而闇與之合雖曰未學謂之學矣公生于正德  
庚午八月七日卒于隆慶十月二日年六十一  
娶鄭氏爲給事鄭公林孫女和順孝敬實稱內  
助大抵公所爲德于鄉孺人多贊成之生于正  
德丁卯閏正月七日卒于萬曆庚辰四月二日  
年七十有四子三長卽仕櫝次仕棻爲連江丞  
次仕陞爲郡學生孫男六孺人之卒也後公卜

餘年祔葬於公禮也是爲銘銘曰謂公隱邪  
政于鄉謂素封邪示我周行有美碩人君子偕  
藏石室既封百世其昌

昌黎令封文林郎陳公暨配封孺人段氏  
合葬墓誌銘

余聞齊魯多循吏蓋陳公其一云公名良輔字  
鳴治別號念齋御史勗之父也世爲齊之莒父  
人代有聞者公父真爲文學有聲母曰崔孺人  
屬公髮未燥則已失怙恃矣文學病革則持公

襁褓中泣曰而父竟以逢掖終他日成吾志者  
孺子也公雖幼已心識之舞勺而通博士業終  
日守一編側首吟哦群兒黜之如弗聞也者二  
十隸學官試每屈其偶嘉靖丙午舉明經試南  
宮不第至庚戌危見收矣亡其策格弗錄自是  
而五上皆報罷嘆曰此亦儻來者安能繫此而  
匏瓜爲乃謁選得真定之靈壽士民安之可一  
年而調繁改昌黎昌黎城惡山水漲圯其北隅  
虜倏至居民皇皇公戒嚴誓以死守虜衆薄而

攻旦暮且下公念北隅缺益厚集旗幟設木柵拒之虜疑有伏不敢進相持三晝夜度不能破乃引去於是微公事幾殆初入犯時民爭出城避寇城且空公馳至北門過走者具言城可守狀民稍稍來歸而備兵使者中訛言謂公無固志坐是得論勘人方爲公不平而公竟倦遊拂衣歸矣既歸不問外事益務爲德於鄉歲租入輒隨手盡邑有大役捐資爲士民先士民化之時御史君已多貴徵公程督甚厲萬曆癸酉御

史君舉省試第一人十年而成進士公喜可知也吾庶幾藉吾子以見吾父及御史君令襄陵公所以語襄陵令者如治昌黎御史君奉命唯謹三載考績封公如令甲公笑曰吾爲循吏孰與爲循吏父樂哉公去昌黎幾三十年父老猶思慕之爲尸祝特祠歲時伏臘不廢其得民如此公生正德丙午年五月二十日卒萬曆甲午九月廿五日春秋八十娶段氏贈太孺人有婦德生于正德辛巳十二月十四日卒于嘉靖丙

寅十月十六日春秋四十五合葬于某山負  
抱某以某年月日窆男三長卽御史君娶蔣氏  
贈孺人繼李氏封孺人次勸娶劉氏先卒次助  
娶左氏孫男六元胤元受元敬元度元賓元復  
會孫男二勸助元受皆諸生元胤以諸生旣廩  
君子謂陳氏固未艾也是宜銘銘曰公爲士有  
厚養而困一第阨公者天公爲政有保障功而  
有不得售阨公者人又胡爲哉阜昌而戩穀耄  
耄而歸真盖天人之際有不可逆定者或豐而  
嗇或屈而伸莒父之丘蜿蜒而嶙峋碩人與偕  
爾子孫振振

貴州左方伯麓池郭公墓誌銘

郭方伯者萬曆間名臣也歿十年而不克葬久  
之不佞入滇搜諸闕事始悉方伯公行誼而公  
壻朱中丞者遂以唐孝廉堯官之狀請不佞爲  
志其墓而銘之夫方伯敷歷中外幾三十年一  
再專藩而以貧死其賢可槩也按公狀諱斗字  
應宿別號麓池其先河南封丘人國初有諱福

者從征雲南以功授右衛前所百戶遂爲其  
人三傳而進副千戶又再傳而進正千戶是爲  
明威將軍諱彬其得明威稱也以公故配汪恭  
人生丈夫子三長卽公公生文弱不類將家子  
嘗私謂所親曰儒子當以經術起家耳安用兜  
鍪爲乃盡屏去孫吳書不讀讀毛氏詩日下帷  
母間寒暑塾師避席屢矣而諸統縉子率日攝  
之此衰衰者當以槁死公夷然不屑也十四隸  
郡庠而建安太宰李公絕竒之試輒冠諸生丙

午舉于鄉庚戌之南宮而明威公坳訃至公徒  
跣歸哀毀甚癸丑成進士除湖廣之孝感令民  
敬之如神君邑有殺人者獄已成公疑之有嫗  
而丐於前者公曰此探我也下之獄則真殺人  
者使嫗爲偵一訊而伏庭吏皆驚屬歲侵民多  
殍庾穀百千石業請于臺矣而未及報可公曰  
是且溝中瘠何能待久第發倉給之有不可令  
坐其辜後事聞更謂郭令知便宜慰薦之竟以  
高第徵拜南京戶科給事中初莞庫卽條陳十

二事汰其冒濫者人稱便一夕有數人伏堂下  
出懷中金爲壽則皆以公條陳故而受公惠者  
也公怒呼吏卒縛之踉蹌走免三載考績得封  
贈如令甲尋以汪恭人喪奔歸服闋補戶科給  
事中尋遷兵科轉左巡視京營於是協理者爲  
大司馬蒲坂楊公公爲之佐所經畫多合 肅  
皇帝以此知公有白金文綺之賜會操江都御  
史某藉權相爲忤多不法公疏糾之權相爲之  
與主得不罷而公竟出爲山西副使當是時公

直名大著而前都御史者亦遂鎮撫其地客爲  
公懼公顧益自發舒不爲阻公之分憲也主驛  
傳先是民困馬戶歲費不貲公議官置馬給諸  
傳甫一歲餘羨以兩計者七千負郭居民甚夥  
日苦剽竊不休公議建外城盡護之民藉以完  
相率於城西立祠祀伏臘卽都御史欲脩郤於  
公卒無以中也久之擢四川左叅政已改貴州  
按察使值安國亨之變督撫議剿撫之宜未定  
公謂此狂酋家自仇殺不足煩王師撫之便豎

撫以爲然則又請曰黜故滇孔道關嶺以西  
險陘往來病之久矣國亨罪當罰粟計可得萬  
石藉第令修之平爲大道此百世利督撫以爲  
然下令如公策非久擢浙江右布政尋轉左公  
素熟于國計又持廉不取一錢浙鉅藩財貨出  
入以萬計公別爲勾校法著爲令宿蠹若刷暇  
日則與僚從日游西湖諸寺且觴且咏詩成輒  
手書榜之人多傳誦者謝御史某驚而張初報  
謁諸藩司欲撤去堂座公以舊規不許謝嘆之

中以蜚語太宰仁和張公知公廉意不直御史  
然被調去去之日僅圖書數篋耳則杜門謝客  
有終焉之志而中外論薦可十餘牘強之過楚  
而江陵相公有父喪還里弔者櫛比公獨不往  
江陵滋不悅時山西貴州俱缺左使部議欲以  
公補山西江陵持之竟補貴州公之貴州無幾  
時當入覲而諸酋長以故事餽遺累千金公悉  
卻之已上計以老勒致仕蓋江陵猶以前恨云  
公旣懸車服居士服盤桓山澤間甚適去城三



十里有進耳山者最幽寂公結菴其下讀易  
香不復親世事昆明名利如妙高羅漢華亭員  
照之屬皆峭蒨可遊公每經旬杖屨一還性與  
衲子問難疑義而已公性好施與醫藥余雁及  
棺槨之費歲無虛日諸衲子有所營建率倚公  
爲大檀越顧公宦而挫產橐中如冰皆宛轉應  
之耳公內行惇至居家以孝友稱痛明威公之  
不逮養刻像事之每晨興爲具衣冠肅拜老而  
不衰公旣推世蔭於仲弟科累官至都護而卯

翼其季弟魁以鄉薦爲令尹公什九居外俸入  
盡以付季季所置產皆上腴公歸絕不問季季  
亦竟不言公老至不能具饘粥季若罔聞也者  
公謂諸子曰吾入仕久不能爲女具升斗之儲  
然女能自致何必待成業不然雖山積何益蓋  
季死而產垂盡公子顧能以清白世其家人以  
爲天道云公素無疾飲噉不異少年無何示微  
疾而卒蓋萬曆己丑八月某日也距生正德戊  
寅正月二日春秋七十有二元配汪氏封恭人

先公卒次李氏葛氏吳氏子七維城維邦維宣  
維疆維國皆業諸生多旣廩者而維城尤以文  
行爲予所獎拔維省維民尚幼女四壻皆鉅族  
朱中丞運昌其最顯者也孫男四孫女四以某  
年月日葬于歸化寺之祖塋公詩法錢劉時時  
出奇語其登岳陽樓酒酣放歌有影分疎樹方  
知月光瀉銀河不辨天之句膾炙人口所著麓  
池存稿十二卷藏于家銘曰公有口忌公者箝  
公口使不得逞公有才忌公者屈公才使不得  
竟不伎不求毋躁毋競知公者號公爲貞爲白  
爲恭爲清鬱鬱新阡佛廬相應公也窀穸彌子  
孫之慶

張隱君暨配鄭碩人合葬墓誌銘

張隱君名圻字孟京別號少石山人其先世由  
固始入閩有諱懋者以鄉薦爲周王府紀善爲  
人方嚴周王憚之語其郡志中懋生濬濬生廷  
器凡三爲令長著循良聲也令君娶于唐而  
生君君才數歲而唐物其繼爲賀孺人君所以

事之母不如唐孺人者賀孺人亦憐愛之如所  
生君自幼有至性歲時伏臘及唐孺人忌日未  
嘗不涕泣汎瀾然至上膳賀孺人許則言笑自  
若柰何以此傷生者心令公固已異之矣已令  
公謝羅田縣事歸君實爲家督拮据家人產坐  
此不能竟學嘗循其頂嘆曰張氏數世衣冠自  
我而中廢乎且丈夫不仕則當爲德於鄉名布  
衣之俠令四方慕義耳於是益務施與趨人之  
急不啻其身每遇歲饑倡義發粟以食餓者所

全活甚衆又一日椽篋中得遺券若干悉聚而  
焚之至其所自奉一皂綈不掩脛藜藿之食取  
給而已君雖少文然其出入必本於人倫居令  
公及賀孺人之喪君且老矣猶哀毀踰禮嘗分  
箸故取其薄者及苦窳者人多稱之葉氏寡妹  
貧無依君竭力周給之終其身其孝友醇至多  
此類也公旣好爲德而鄭碩人復時時從吏之  
碩人爲太守時佐孫女笄而歸君君從令公游  
宦四方碩人秉家政不妄費一錢惟以貧乏赴

愬者宛轉應之無所恡其事二尊人尤極色  
賀孺人祝曰無以報新婦願新婦得婦如新婦  
耳君壯未有子碩人勸之置勝碩人晚舉勲絕  
憐愛之然持之嚴勲素醇謹所與遊皆一時知  
名士化碩人之教也隱君生正德乙亥年三月  
十六日卒萬曆辛卯年十二月十二日春秋七  
十有七碩人生正德戊寅年二月初八日卒萬  
曆乙亥年八月二十一日春秋五十有八男子  
四長卽勲郡諸生婦王氏碩人出次燾婦陳氏  
繼陳氏次杰娶朱氏次默婦周氏燾少出爲仲  
叔後女一適陳文湛俱勝出孫男三孫女四其  
墓也在雲林山之陽坐乙向辛鄧原岳曰張氏  
固多賢志稱紀善公貨藥得數十金追還之而  
羅田公在海門嘗白一寃獄而不使人知皆竒  
行夫孟京隱者也猶抱畝畝之義乃其侔儻任  
俠夫婦同德知其流澤遠矣吾聞之徐燧云銘  
曰有丘墳如在坎壈如是惟張隱君與鄭碩人  
之居爾子孫食其餘福履只且

### 陳卿仲墓誌銘

余不佞之游於婦家也而友壻陳卿仲就木垂十年遺二孤數尺耳其奇似卿仲其窮壯於卿仲在時蓋又若干年始克葬屬不佞自遼歸則二孤以狀請曰惟是先茂才之不及事先生也有不肖孤在惟不肖孤之不足以辱先生也有人瑞翁遺愛在不肖孤敢徼惠於人瑞翁而圖不朽人瑞翁者太守林德敷先生也先是人瑞翁於諸壻中獨奇不佞而憐卿仲今卿仲已矣

不佞則何敢無辭陳氏之先世有顯者至中丞公達益張中丞公廉吏與人瑞翁歿皆祀于鄉實卿仲父中丞公旣以清白遺子孫僅餘薄田數畝破屋數椽如蝸濡矣無何而島夷躡閩併爲煨燼則就方丈於都城以居坐益困至不能舉火卿仲夷然不屑日取藏書讀之自媮快也婦兄司徒公方治漕河念卿仲折簡邀卿仲欲爲之地卿仲謝不往督學使者司徒公同籍司徒爲居間卿仲避弗肯就試也久之始隸學官

不甚守其業時時學古文詞側弁而哦若聲詩也者諸博士耳之不知作何語率目攝去獨今梁山令趙仁甫與相倡和促刺不休然以其間就博山試又輒屈其偶以此名籍甚公卿間而前日攝者亦遂折節卿仲矣卿仲孝友天植內行醇備其避寇往山中挾女弟俱行道雨澗水暴發婦溺深澗中漂里許卿仲不問也已聞道走玉融病五日不知人猶諄諄問女弟安在其篤誼如此故人郭生無子老且死謂人曰陳叔

子且收我頃之卿仲至營其喪如郭生言乳媪余卒卿仲哀毀如所生曰異日以祔我後世子孫省墓必分媪一盂麥飯幸無相忘居恒念張太孺人之不及封願得以身當之則發憤下帷申旦乃止一日大劇嘔血數升遂不起年僅二十五耳婦林氏卽人瑞翁仲女二子長卽价夫爲郡諸生次薦夫甲午鄉貢進士俱能詩孫男四國禪國杼國祝國枋孫女八卿仲生於嘉靖己亥九月一日卒於嘉靖癸亥九月十二日塋

于萬曆某年月日塋在某山坐某向某卿仲名  
朝鉅字輔之以字行稱其別字云小史氏曰陳  
氏父子俱負雋才卿仲厄於年而不得售夫天  
既與之矣而又奪之既屈其身矣而又承其名  
有不可曉者嗚呼無涯之智結爲大年即使壽  
如冥靈人與骨俱吾何取於卿仲銘曰不知其  
父視其子不知其報視其履石室既扁君子攸  
寧陵谷變遷徵余斯銘

西樓全集卷十四終

西樓全集目錄卷十五

墓表

明定國小侯徐公墓表

光祿寺大官署監事陳君時應墓表

行狀

大中大夫江西左叅政海洲陳公行狀

封承德郎吏部文選司主事黃公行狀

明登仕佐郎大理寺司務雲門陳公偕配

林孺人張孺人行狀



保昌丞吳公暨配劉孺人側室陳孺人行狀

王茂才知守行狀

先大父行狀

先考文岩府君行實

丘嫂林碩人行狀

西樓全集目錄卷十五終

西樓全集卷十五

閩中鄧原岳汝高著

門人陳開泰侯亮訂

仲子慶霖編次

墓表

明定國小侯徐公墓表

代

嗚乎此明定國小侯徐公之墓按狀公名廷輔  
字君渥別號葵軒今太師西亭公元子也 高

皇帝既平天下裂土而封功臣於時中山武寧

王功最大褒寵甚至王既薨子世其封未幾  
文皇帝起北平王次子復用靖難功封定國兩  
公竝建二百餘年勿絕南北秉樞爲諸侯長矣  
自定國始封迄太師公凡八世太師公娶王夫  
人爲成山伯女禱於神而生公公爲人玉立沈  
毅寡言喜讀書善騎射列侯爭下之今 上丁  
丑駕幸山陵公以勲衛護行賜一品服甲申駕  
幸玄宮復命公隨侍賜賚尤渥先後管理紅盛  
將軍及义刀圍子手皆出特 旨公謂此古綴

衣虎賁之士朝廷以備非常者奈何凋敝至此  
乃爲清占役杜腴削禁衛一時改觀每大朝會  
金甲成行趨蹌甚肅公之教也公內行醇備事  
太師公曲爲恭謹務中其懽居王夫人喪水漿  
不入口者三日太師公恚曰我在女何得爾乃  
勉進薄粥猶蔬食經年雅言吾祖提十萬師橫  
行沙漠繫元孽如雉兔真男子事吾徒鮮衣怒  
馬日逐少年場此爲園中豕耶方海上告警羽  
檄紛紜公每慷慨欲請一旅効行間曰吾當縛

奴虜笞其背耳識者咸謂公智力足辦非獨貌  
言乃年未及強賚志以歿命也公生卒詳具墓  
志中初娶張英國公女繼娶湯靈璧侯女子二  
希臯希夔墓在賜地之次 某曰明勲舊封公  
者五人中山之後居二可謂盛事徐小侯負才  
而多奇氣竟其所之庶幾武寧餘烈公侯之後  
必復其始卵而未翼有遺恨焉

光祿寺大官署監事陳君時應墓表

嗚乎此明大官丞陳時應之墓按狀時應爲閩  
著姓系出光州五季之亂徙居閩至贈公姓乃  
滋大贈公諱某以鄉貢爲如臯學官用子貴贈  
戶部尚書郎贈公生柯是爲叅知公嘉靖中名  
進士兵備贛州有大功載郡碑中娶于林寔生  
時應時應甫襁褓而林恭人見背稍能言叅知  
公謾語曰識而母否時應跪對曰父在卽母在  
耳言隨淚下公大奇之十九補邑庠生屢試不  
錄已以叅知公教入太學非其志也時應挾一  
蒼頭襍被往至淮揚河水已合時應布袍皂帽

策蹇驢而北再旬而抵長安太學諸胄子挾厚貲而明得意鮮衣怒馬出入狹邪之間騶從甚都時應絕不與通日與一二窮交閉戶爲文酒會蓋時應客居三年自言不識邯鄲倡作何狀儕輩多嫵笑之時應持之自若久之聞參知公病急馳歸曰吾奈何捨晨昏而萬里也而參知亦念時應甚已相見大驩益健食如常時應恂恂色養參知公安之又善治生拮据家人產歲租入倍參知公時已斥其餘爲公治丙舍築臺

榭以備遊觀公每爲引滿參知公坳時應已逾艾哀毀過禮人以爲難其居喪造次皆有法程旣葬猶經年居廬其孝如此服闋謁選得大官署先是時應單騎北行旣抵都蕭然旅泊人無知其爲貴介公子者時應又能勤於其官諸公愈益重之然時應終不自得居恒扼腕謂大丈夫不能自致功名乃以貲郎終乎每鄉里宴會輒謝病不往人頗怪之而時應亦覺憔悴不耐勞無何遂病病卒不起年五十九耳時應已失

恃依繼林恭人恭人愛之不啻若已出時應亦奉之如所生叅知公有庶弟杞少時應二歲時應莊事之出入必偕閭閻如也時應自甘澹泊服御取布素無華至事叅知公及奉賓客皆極豐腆不爲量與人交愷悌率易不設城府人有過不憚面質之褊心者或不能容惟不佞素知君信其爲篤行質直君子也憶在長安時時應命駕杯酒流連余謂時應人生適志耳時應家幸不乏何苦以七尺而殉一官時應深領之乃未及決策而溘先朝露豈非命也時應卒時爲萬曆乙未年五月一日配鄭氏侍御鑰女男子二長女修次女存皆隸諸生女修娶於鄭而女存爲余壻孫男二志道女修出弘道女存出女子五婚嫁皆士族其葬也在鼓山下岐之陽

行狀

大中大夫江西左叅政海洲陳公行狀

代

嘉靖中不佞與陳公君則爲同舍郎雅相善也久之後先歸浮沉里社時時文酒過從又久之

則公不余鄙以其女女子子稱姻家矣公之卒也不佞哭之慟旣除喪其孤鳳鳴深衣練冠垂涕洟而請曰唯先君子之習於大夫也願丐大夫一言藉手於作者不佞哀而許之蓋陳之先由汴固始入閩聚於南郊之臺江其後於郡城之金華里居焉故陳氏遂爲閩縣人有諱鼎者好爲德於鄉閭鄉人多之鼎生紳紳生瑩瑩生源清是爲贈戶部公娶馬安人爲贈尚書石壘公女實生公贈公嘗一領鄉薦顯矣乃僅爲如

臯教官以卒其得稱戶部也與馬之得稱安人也則皆以公貴公幼就外傳已刺促博士業有聲林梅西先生一見異之妻以女稍長籍弟子員益自力爲文章而湛邃於理旨每試輒屈其偶矣王御史瑛者名能知人按閩校郡邑士得公奇之爲延譽遂以庚子舉於鄉於是贈公以謁選之京挾公行明年贈公坳京邸公搏頰叩天哭日夜不絕聲已策一馬箠扶喪歸也而馬安人以哀慕贈公亦坳公固柴毀幾不勝喪日

絮泣曰天乎不使吾以升斗逮吾父母蓋又十年爲嘉靖庚戌始以進士高等授戶部主事戶部弊竇如鼠穴而公之督京倉輒摻剔其積蠹若而條曰吾不能共猾吏治也未幾監督淮漕則蠲貧民之歲租輸廩錢者而民尸祝之矣滿三載考奏最稍遷員外郎郎中頃之出爲杭州府知府公之爲郎中也當京察尚書方公鈍署公考冠諸曹郎名藉甚而吳公鵬爲太宰吳固浙人雅識公於漕運時逼欲得公爲浙地重浙

首藩而杭直孔道簿書山積諸冠蓋相望所非時報謁者至不遑寢食公曰使吾奪諸令尉權屑屑期會則有所不暇抑豪右持大體召父老問民疾苦爲興利除害吾宴坐堂皇猶掇之矣郡勢家割西湖旁隙地淤爲葑田耑其利湖益塞湖旁田數萬頃皆坐困公按籍而核之疏水所由漑田乃大饒卽勢家憾公然卒無以難也以其餘治郵傳供張甚設賓至如歸最後島夷躡浙舶主王直爲之導窺杭鉅麗甘心焉羽檄

芻午與胡總督宗憲計誘直降磔之市事聞賜  
白金文綺會流賊入江西憲臣有死事者朝議  
擢公爲江西按察司副使兵備贛州得便宜從  
事公愈益發舒布威信明圻堦水陸皆有備軍  
聲大振乃嚴師期冠一韎韜而馳之先定太和  
破賊百餘艘俘其魁賊殊死走萬安公乘勝趣  
萬安逆戰於谷口伏火器魚榜中盡殲之所鹵  
獲以千百數賊無噍類詳具陳符卿昌積碑中  
而賊酋林朝曦梁寧等復時時起爲亂公復贊

幕府掄之部中悉平遂晉其省叅政公之有功  
於江西甚大度且不次遷矣而忌公者方責公  
苛禮公不爲屈則爲蜚語媒孽公公笑曰彼豈  
謂吾怙功難於棄一官邪吾不欲効褊心者曉  
曉然以尺寸自白竟拂衣歸年方四十七耳公  
爲人方嚴威稜可畏目閃閃如岩下電與人交  
絕不設城府內行尤醇至念贈公及安人之不  
及貴每歲時伏臘涕泣汎瀾與其庶弟杞極友  
愛庶母邵二十三而寡公所以事之甚莊暴其



節於有司表異焉杞少長悉推贈公產與之佐以橐中裝別置田若干與羣從兄弟而時厚其穎者內外屬咸倚公如外府纂譜牒葺饗亭立祭田以供祀事人倫備矣既老治第舍嵩陽傍開別墅精廬中啟鑿方塘亭之五柳雙桐觴咏自適郡國守相素嚴重公每延爲鄉大賓公爲一再行不竟往也而其病執蓋猶以鄉飲不勝瘁故卒之年爲萬曆丁亥年五月二十九日距生正德丁丑正月十六日春秋七十有一嗚呼

公以名進士敷歷中外至三品而縉紳學士猶惜公之用未竟其才既退優游家食二十餘年撫膝下三世受命考終而縉紳學士猶惜公之享未竟其福此不佞所以哭公而慟者也公諱柯君則其字別號海洲配林氏贈安人先公卒學諭泰女卽前所稱梅西先生也繼林氏封安人男子一贈安人出卽鳳鳴太學生孫男二女脩女存曾孫男一志道女二孫女五鳳鳴以萬曆庚寅四月初一日葬公於古山里古岐鄉祔

贈公兆坐辰向戌鳳鳴之居喪也造次必以禮  
有孝稱而諸孫皆朗秀世其家公可以瞑矣不  
佞不文不敢侈其詞以諛故人地下故述其履  
歷如此

封承德郎吏部文選司主事黃公行狀

代

黃氏先世家礪山有諱士賢者實遷寧陵自士  
賢遷寧陵族始大然亦多隱德士賢生六老六  
老生欽欽生宣宣生綬綬生榜娶於楊生二子  
而其次爲封吏部公吏部公諱卷字文仲學者

稱東陵先生公五歲而孤族中豪謂是藐諸孤  
者易圖也爭齟齬之母楊度無如之何則日抱  
二孤泣於庭公引裾問故母且泣且告也公指  
天自誓異時所不報若者有如日發憤下帷手  
一編矣十歲通周易大義爲文泚筆立成十三  
籍博士旣廩而學使者見海翁公東溪徐公東  
原朱公皆名能知人後先推轂之然竟不第最  
後以諸生久次應鄉貢公嘆曰吾逢掖三十年  
十上報罷今且老奈何與兒子輩犄角乎遂棄

去或謂公卽不愛一官獨不念引裾發憤時邪  
公謝曰主臣吾有孺子在是能畢吾志蓋通政  
君州而多奇徵公以此自負業已日夜程督之  
矣隆慶庚午通政君舉於鄉遂成進士公謂所  
親曰吾嚮者固言之以身見奇孰若以子見奇  
乎而先是齟齬公者咸蒲伏請罪公不問其長  
者如此通政君初授內黃令公輒舉古循良吏  
以諷之謂唯惠可以得民唯廉可以律身當官  
者以爲格言已君擢選部公來京師則申飭之

勿務進趨勿徇權力辨官材持公道庶幾乎勝  
任耳以故通政君所至治辦有聲而公亦再受  
封如其官初通政君念公與王太安人春秋高  
請告還里有終焉之志公促治裝曰吾幸壯善  
飯孺子當服官思報効母吾二人以也公旣轉  
員外郎中益杜門不通書問約束中外無得以  
私請郡國守相往候顏色公謝饒不任拜謁至  
相語曰吾郡中都不知有吏部卿父鄉飲大禮  
迫欲得公爲重公強起應之後遂謝不往也通

政君遷太常少卿改右通政竟以念公故因冊封蜀藩遂過家而邸報轉左則君已疏乞歸矣歸無何而太安人卒公有痿病遞發遞愈旣鰥居忽忽不樂已復發遂不可支通政君遍求異方終不効病革遺命無作佛事喪葬一視文公家禮執通政君手噉語而逝嗚呼公所謂得正而斃者哉公性篤孝事母楊曲爲恭謹母持孤子甚莊公所以孺悅之者無所不至侍疾衣不解帶藥非親嘗不以供居喪毀瘠幾滅性與伯

兄相處五十年尤極愛敬通政君稍貴盡推故產與之曰此母志也馬氏老姑與母黨諸楊兩家中表公待之如兄弟歲少侵輒散粟以贍宗族病則挾醫視之與之藥貧不能喪爲之衾歛與之材四方人人誦義矣公爲人方嚴人有過面斥之及與人言破赤心相視無他腸人益親之生平無嗜好獨喜古圖籍積至百千卷度之一小樓坐卧讀之經史百家以及稗官小說無所不漁獵客至抵掌而談今古纏纏不休惟不

喜釋子書曰其語妄不足溷吾目也公於訓故尤精根極理要執經問難者屢嘗滿戶嘗刪定蒙引存疑二書至今傳誦之晚年更著四書宗旨研精極思殆忘寢食書未就而卒余唯中州多耆舊之士往往以奇節稱乃若德行文學較然不悖所聞則吏部公爲之嚆矢今書具在文獻足徵卽俎豆尼谿之側其孰曰不宜公初封文林郎以通政君內黃報政故再封承德郎則以大婚禮成覃恩云公卒以壬辰二月十五日距生辛巳十月十日得年七十二配卽王封太安人子二長克念卽通政君娶張氏繼李氏邵氏贈封俱安人次克嶷鴻臚寺序班娶王氏孫男五維城維封維墀維基維垣通政君以七月四日奉吏部公與太安人合葬於城東七里之原將乞銘以圖不朽不佞屬在肺腑知公質行獨詳撮其大者具列爲狀

明登仕佐郎大理寺司務雲門陳公偕配  
林孺人張孺人行狀

萬曆甲午不佞初入計曹於是廷尉屬雲門陳公與鄉里十數公同官京師者朝夕過從甚懽也而公年又最長每聚會輒推公爲祭酒偶不至則慘然不樂如是者久之旣不佞以使事出聞問稍踈比余再入京師脩故事如初然覺公貌少衰興亦漸減旬日而公病病卒以不起矣公子勲扶廣柳南還將襄大事則徵不佞爲狀而邀葉太史爲志若銘公元配林孺人者先大夫中表兄弟也公於不佞爲尊屬不佞沐浴盛

德久矣敢不供命公諱樂字九成別號雲門其先爲光州固始人宋戶部侍郎德剛者爲福建制置使兼知福州遂家焉其聚族於今之藤山也則自公大父珪始珪生銑弘治乙丑進士守太倉州太倉公生道沂贈登仕佐郎娶于鄭爲少谷先生女次生公太倉公官旣不達則日督諸孫力學而公自爲童子時以穎異稱嘗從塾師受書一日師與其徒講易公從旁竊聽私爲訓故嶽嶽出師上塾師大驚太倉公聞之心獨

喜比寢疾則手其袍笏而授之曰繼吾志者孺子也時公已籍諸生名大譟隆慶丁卯始舉於鄉而太倉公不及見矣未幾登仕公亦歿初登仕公得奇病公晝夜入侍不解帶忽見有物舉床者三侍者皆走匿公不爲動卒亦無他居喪哀毀逾禮有孝稱服旣除時當計偕以方營兆弗行公念鄭孺人且老願得祿養終餘年庚辰下第遂謁選得南靖學官蓋猶以便養故而鄭孺人亦竟不之官公乃身往而留其配張孺人

侍鄭孺人安之居南靖五載所成就士類甚多尹某者驕貴甚欲公有所降禮公不從又時時以他故齟齬諸生公持之強尹日伺其短無所得乃已歲時學使者下教曰部中有不檢宜懲者悉以名聞公逡巡謝無有奈何毛舉而誣諸生先是新進生必贄具然後許廟見公嘆曰此市道也吾不忍人以狙獍面孔相視立命廟見且勅其貧者勿用贄以故諸生咸愛而親之先後部使者亦無不爲公推轂者已擢南雍學正

可一年而以鄭孺人憂歸服闋補北雍兩都人士咸願出公門下爲幸公旣久次當轉司務時有他部缺而大理稱冷局愛公者欲爲公道地公不荅吾寒骨固習爲之吾不爲誰爲之者人謂公慕恬退而甘寂寞有古老之風公又不肯浮沈其官時佐廷尉有所建白務持大體大理歲決獄中璫奉詔往視供帳甚盛費不貲猾吏緣之爲姦公覈舊籍爲之中制事事治辦人不得侵漁減公私費十之四廷尉以爲能欲條爲令會公病不果公性儉約服用無紛華布袍蔬食取給而已所居環堵之室幾不蔽風雨卽寒士不能堪公于于然安之在大理已再滿考人冀公且遷而公逝矣死之日至不能殮葉太史進卿與諸同鄉經紀之僅得歸塋視其寢室蕭然如逆旅傷哉貧也平生所著述皆零落不傳僅存易說六卷往往多微言詩歌翩翩有獨得之趣書畫皆不經意而各名其家又嘗輯古今應變事蹟爲一書曰經世要畧識者謂公負奇



而不行試厄於閒曹命也夫公生嘉靖壬辰四月二日卒萬曆丙申十一月二十五日年六十五初娶卽林孺人早夭無出繼卽張孺人生子四長勲以選貢入太學有才名娶詹氏次烈郡庠生娶林氏次杰娶葉氏次然娶何氏孫男六維城維域維垣維墀維 女二一適倪廷 一適胡琬林孺人生嘉靖癸巳三月十七日卒嘉靖甲寅十二月十三日年二十二張孺人生嘉靖戊戌十月十五日卒萬曆丙申八月十九日

年五十九公後孺人纔三月耳林孺人奉舅姑極孝謹張孺人事公久尤稱內助皆賢媛也葬以某年某月某日墓在某山坐某向某不佞謂公土木形骸而風流不乏與人交絕去城府而中實方嚴其行誼流品要當於古人中求之耳不佞不文姑撮其大者而爲之狀

保昌丞吳君暨配劉孺人側室陳孺人行

狀

先是吳氏諸孤將葬其父保昌君于郡城之西

郊而以其配劉氏貳陳氏祔焉一日維鎬衰絰而墨其容造不佞曰唯先君子之以文法起家也而縉紳大夫推轂之歸而不鄙夷於縉紳先生也與之游今襄大事敢徵狀於吾子而徼惠於作者不佞敬諾葢不佞竊見乎今之習文法者齷齪守其家言不能引於一切之外幸循資得一官不自貴重纍纍捆載歸以爲是固然耳乃今觀於吳君其進退一何潔廉君子也君先世出延陵不知其所由入閩有諱郎者登宋淳

熙進士爲上虞令凡四傳而爲崇仁公諱真以篤行舉爲崇仁簿轉徙于長樂之十六都家焉真生富富生鑾鑾生法靈法靈生宗泰皆不仕宗泰娶於劉而生君君少業儒已廢去曰男子何所不見奇又何事佔俾而匏瓜之爲於是稍習書獄傳爰書得推擇爲掾文無害矣卽訊牒移者輒從輕比不肯爲深文以故人人稱吳君長者久之謁選吏部試其文高等超授廣東保昌縣縣丞君爲人勇有幹力公廉不通饋遺人

謂保昌饒君幸自爲計君謝曰吾弁髦其官弁  
髦其節邪卒不變無何翁源大饑姦民挾衆爲  
亂君奮然請得身當之而兵憲劉公穩者雅亦  
才君檄君置幕下悉以兵事委焉盜尋平上功  
狀則兩臺交獎之矣令某有賄聲劉公廉其狀  
以屬君君逡巡不敢當微風令令反疑君構已  
噉之南雄守周公思久愛君甚則亟行縣奪縣  
印授君君固辭不可令迄罷去君旣攝縣益自  
力爲苦行日供具不過一二箕噐食衣一短後

衣盡穿欲行金錢者望君貌皆咋舌去故事樂  
戶每置伎則饋常例若干君抵之地罵曰豎子  
敢以此汙乃公立叱出之邑有淫祠黠僧倚爲  
姦利君毀其祠斧佛像焚之聞者惕息已署英  
德署翁源其苦行自力大率如保昌時邑尚書  
譚公大初少許可每見君輒呼清白父母云然  
君性執不善作媿媿態而翫法者心害公會劉  
兵憲謝病歸而周守入計君嘆曰微二公誰復  
明我者卽日解印綬去職而周守抵南康聞君

行慰留之不得則邀君具賓主爲文祖之且爲  
言于藩司得以致仕歸橐中裝僅僅耳君睨笑  
曰吾有孺子在視橐中裝孰多蓋公在保昌固  
已私奇維崧兄弟禮明師教之矣旣歸則益治  
丙舍勤督之斥買書至于卷皮而授維崧等居  
恒語云而父不難棄一官歸守一空囊實惟孺  
子才得以經術自致以已見奇不若以子見奇  
耳及二子業旣成君喜曰兒幸且貴是橐中裝  
不薄君以此益務爲德傾里閭矣憲副蔣公以  
忠侍御陳公奇謀後先爲邑令聞君名數存君  
于家君一再報謝遂引避不見吾下吏安敢抗  
禮於縣大夫其恭謹如此君始負氣矻矻不可  
下然不爲城府君恂恂不能言至抵掌論事鬚  
盡張每晨興揖其子孫嚴若朝典而對賓客接  
之溫然日治家人產取自給而貧乏赴愬者未  
嘗以無解無論君大節皎然卽其他質行庶幾  
不倍人倫者邪君先娶劉孺人有婦德佐君爲  
儉勤雖貴無絲枲之奉而陳孺人以側室侍君

三十年無幾微忤事嫡劉甚莊皆足述也君諱  
臻字希舜別號平岡卒萬曆戊子五月初七日  
距生正德己卯二月十一日爲年七十劉孺人  
卒萬曆己卯八月初三日距生正德己卯四月  
廿六日爲年六十有一陳孺人卒萬曆丁亥七  
月十七日距生嘉靖丁酉十一月二十六日爲  
年五十有一墓名獅山坐辰向戌葬以萬曆庚  
寅三月初一日子五長夢岳卽維崧候官廩生  
劉出次夢京卽維鎬舉乙酉鄉薦次夢斗次夢  
旭俱陳出次夢桂則繼李出也女四孫男四應  
兆應碧應璘應珂孫女六婚嫁皆士族維鎬者  
不佞同年兄弟也故知君者莫若不佞不佞具  
列其可傳者備史氏採焉

王茂才知守行狀

王茂才諱中式知守其字別號靜虛系出太原  
周子晉之後五代時入閩遂爲閩之候官人世  
有顯者至明而司訓公鑛始著嘗以三禮領鄉  
薦兩爲校官稱良師鑛生贈公謨謨生某爲刑

部郎中有懿行詳具郡志中實君父二母張封  
宜人 生丈夫子二君其次也君少秀穎每從塾  
師問難疑義進退若成人里中見稍已目攝之  
矣刑部公以春秋顯君則亦受春秋學刑部公  
奇愛之無何而刑部公見背君哀毀骨立讀禮  
之暇發篋徧讀所藏書每至丙夜不休服除籍  
博士弟子於是錢塘田公爲督學馬平王公爲  
李官爭推轂君也君名籍甚一時然每省試輒  
覆落客謂君不當釋業耶君嘆曰良農能爲耕

不能爲時顧當預我鎡基耳益下帷發憤至丙  
夜不休及伯子庭桂舉於鄉君而後喜可知也  
以爲吾可以報刑部公矣君旣耽學晚病足不  
能出戶獨臥一小齋齋頭古書數百千卷且讀  
且乙一二佳客過從商榷古今作筭藿食泊然  
相對自愉快也君與人言諄諄如不出口其內  
行醇至有古長老之風事母張宜人以色養宜  
人老而亡恙宜人以天年終猶孺慕不能已已  
伯兄中立卒君收其遺孤子視之伯母藍早寡

而無子君養之終身伯父某貢入太學卒於途君走千里外經紀其喪歸葬之備禮已其嫠若孤相繼卒君所以喪之如初卽內外屬視君爲外府君竭力應之無所慳其天性也伯子旣計偕無何物責逋者日嗷嗷客爲君筴君姑徐徐而子旣不幸柰何一旦取辦於若君謝不聽吾終不以貧故使吾兒負他人金地下視其籍若干舉賻金償之諸子錢家各意飽而去以此人愈益多之林宗伯之脩郡志也開局芝山寺中一時脩纂皆知名士而君與焉林少許可顧獨稱君行誼卽君之爲人可知矣君以正德戊寅十二月十二日生以萬曆庚寅年六月十三日卒春秋七十有三卒之日盥櫛如常手一卷而絕配林氏子三長卽庭桂娶於張次庭槐娶於朱繼娶於葉次邦楨諸生娶於陳女三孫女七婚嫁皆士族其顯者爲進士林紹用君積學有蘊藉足以自見猶然老文學而不得售諸子翻翻玉立足以償君之志而不必盡効卽効而不

得享天之報施善人何如哉墓在某山墓以某月日余不佞與邦楨交最久故不辭固陋爲述其槩而使之請銘

### 先大父行狀

先是大父文林公卜兆於官峰起家甚壯旣若干年大父卒啟之有蟻微先府君改卜得吉壤去故窆高可數十步而以大母林太孺人附俸不能爲備禮其後五十年余小子將脩闕事稍爲封其土立豐碑表之於是敬敘次其遺行以

示永永大父諱忠字誠夫學者稱思齋先生蓋余鄧氏由浮光而入閩也代有顯者及高曾而下抱缺畝之義終焉曾大父繼明公娶於陳而無子繼娶於張有丈夫子三人繼明公之卒也張孺人年二十四耳日撫諸孤而程督之又能以儉勤守其家適有天幸田數穰業乃大饒大父旣少孤事母張益爲恭謹甘旨之暇下帷讀書至丙夜不休而時洪鹿溪先生講二戴大義大父與長公文夫往受業於是大父與長公皆



以諸生旣廩長父任俠而大父侃侃長者同舍  
生成日異之矣其最高弟則太守林公德敷亟  
謂大父奇士也每有所著述人人爭授簡名籍  
籍起至其試於鄉輒不利嘉靖初以貢入京師  
羣公聞其名邀致之久之謁選得廣東饒平訓  
導而長公先亦以貢訓合浦矣大父性操切居  
恒以禮約束諸生故事學使者出行部則校官  
率諸生越境謁大父至則戒諸生不得越境謁  
曰此令甲也學使者誰何之具以名對而學使

者愈益重公無何府君舉於鄉而大父亦遂改  
廣西賀縣教諭府君謂廣以西道惡竟不欲大  
父往大父嘆曰孺子何知卽吾爲儒生師視爾  
於今也是謂不得於身於其子而吾何以道惡  
爲解使謂弛負於子而丘園自高爲又何可謂  
不得於身於其子也且吾幸未老稱爲儒吏作  
率譽髦惟是稱圖報耳非久卒於官而長公罷  
合浦歸後十餘年始卒初張孺人幼大父猶困  
諸生早起挾一冊治家人產課耕者日昃反舍

則健關琅琅佔俾聲以爲常其御子弟甚莊雖  
間室之內嚴若朝典每居庭無敢以綺繖進者  
與人交驟卽之廩如徐而察之溫如也蓋不佞  
聞之府君云大父生成化壬寅八月十六日卒  
嘉靖戊戌九月初七日年五十七林太孺人生  
弘治乙巳八月二十三日卒正德丙子十月二  
十三日年三十二大父之稱文林也與大母之  
稱太孺人也皆以府君令香山時奏最得封三  
子長府君某嘉興府通判爲太孺人出娶葉氏

封孺人次遂娶高氏繼娶袁氏次暹邑庠生娶  
黃氏早夭則勝嚴出也二女一適鄭林出一適  
謝嚴出有孫原德大秋原錫原遇原岳

先考文岩府君行實

先府君之棄諸孤也且十六年矣於是不肖弱  
不曉事其懿行盡軼弗傳而所爲狀若志亦寥  
寥不甚稱及不肖少壯益習諸長老時稱述先  
府君一二事輒志之而粵人則已列府君名宦  
傳中尸祝之矣其敘致甚詳以爲古循吏卓魯

之流會林宗伯修郡志不肖始按其本末具上  
之林故嘗與府君論詩不合罷去事遂寢不肖  
日怔怔怦怦懼先德之就泯無以藉手地下謹  
撫其遺事輯爲行實附之家乘云府君諱遷字  
世喬別號文岩其先由浮光入閩聚族於閩之  
遂勝里竹嶼之陽鄧氏之爲閩人也自宣議公  
始著宣議公諱興仕宋爲宣議郎譜所稱一世  
祖者也數傳而至文正公生七子一子誠洪武  
間以明經薦爲黃州太守著聲一子定徵遺逸

不起能詩與王典籍恭相倡和有耕隱集行于  
世而第四子祐者亦能詩徵辟俱不就嘗舉百  
金裝爲鄉父老蠲重科鄉人德之祐生光光生  
卓卓生珩珩生亮亮生三子次爲思齋公忠以  
鄉貢終賀縣教諭娶於林是生府君府君之爲  
兒時則已危行長者矣思齋公嚴持府君急嘗  
夜讀久燈燼削松木繼之傷指赭其衣也然不  
使思齋公知無何大母卒柴毀殆不勝喪思齋  
公旣司訓之饒平而府君用禮經籍弟子員卽

當家給政役顧業益進嘉靖戊子府君年二十  
五舉于鄉下第歸築一室於東山之文殊寺刻  
曰文山人讀書臺則文宕所繇稱矣已入太學  
遊諸公間盡傾其偶間以其經授諸生屢常滿  
戶外府君既博闕其爲經多獨得不盡沿陳氏  
故久之大父卒於昭潭凶問至府君哭幾絕馳  
一衛而南哀慟驚一路人時人稱之又明年爲  
甲辰上春官復不第乃謁選得廣之香山香山  
孤懸海島中號盜藪難治府君甫下車則謁故  
黃大司成得鄉禮頒行之每朔望朝其父老爲  
講說大義又捐俸買縣地之仁山剪棘立書院  
與邑弟子設俎豆稱詩書不期月羣盜解散邑  
故貧而順德新會豪據其產十之四稅各歸其  
邑而轉輸之稅屢訕卽武健吏安能越他縣侵  
吏權一日府君召其豪詰之好爲約籍其首者  
一視土著不然吾且以籍籍而田豪相顧稽首  
唯府君命逋負始息新會豪趙恒脩匿三竈腴  
田千五百畝多椎金錢與諸用事左右爲姦府

君以督府檄往視核出欺者爲儒學義田還報督府以爲能移文十邑爲守令勸已復薦之於朝而它治行疏亦可十餘牘庚戌考最進階文林郎得贈典如令府君旣撫其民而教之又以其暇從黃公講誠明之學黃少許可獨推轂府君爲延譽名益振擢判嘉興且行屬春作輒出俸金四十兩市牛酒勞諸耕者民大悅爲立碑于石岐頭紀其事至嘉興島夷方躡浙中府君請城嘉善曰是松江間一喉舌地哉人或難

謂時詘不便府君曰往者盜起而長矛之桀爲鄉子弟憂卽所焚蕩奚啻一城之費居則又以大役難成不事事非計也乃身往行城及城成而郡立仰功碑焉嘗一攝海鹽適寇攻海鹽則守海鹽攻乍浦則馳守乍浦府君疲兵事稍困欲投劾去會章屢格李家宰之再被召也道由浙府君以病不往迎李謂府君鄉人薄我又攝海鹽時鄭少宰舍人怙爲私府君無所假貸鄭滋不悅竟以丙辰大計歸而胡司馬在鎮論府

君城守功得賜帑金十兩府君嘆曰吾奉職無狀固罷一田間老叟朝議猶序其績邪既歸立義田百金供族人之死喪及婚嫁費時出橐中裝助之常苦不及歲治棺若干皆美材遺人家忌惡以爲不祥府君行之自若其自奉甚約賓客過從不筭噐食杯酒流連談藝而已而以緩急告者宛轉應之無所恡府君尤負人倫不肯髻時府君奇愛之則於童子中得林雋卿陳用吉使從孺子遊曰吾不欲使狡者溷孺子而

最後得從兄心父噐之所以督課館穀有加不數年雋卿用吉試諸生高等而心父舉於鄉遂成進士令府君故邑人咸服府君知人府君於書無所不讀至老嘗不釋卷其於方藥相塚星卜往往以其意爲之卽名其家者皆出府君下於詩好建安陶杜下及長慶文好眉山父子汪洋自快不爲鈎棘語晚得鼎陽山大樂之築精舍其旁鑿洿池環其外堤上皆植梅柳肩輿獨往一平頭負書囊先驅時藉草坐側弁吟哦興

至泚筆成十餘首意殊適也所著有禮經講義  
及山居存稿藏於家其餘散逸者尚多府君生  
以弘治甲子九月初七日卒以萬曆乙亥十一  
月三十日年七十二配葉氏封孺人而不肖母  
王氏則卒業太學時娶爲側室者也府君莊葉  
孺人迄於白首揖諸子如賓不冠不見庶幾萬  
石家風諸子長原德郡庠生娶林知縣以毅女  
次大秋邑庠生娶葉知縣繼熙女次原錫娶黃  
長史仲陽女繼娶黃次不肖原岳娶林知府春  
澤女大秋葉出原德原錫原岳俱王出諸孫長  
慶善娶田茂才萬方女次慶禧郡庠生娶鄭推  
官日休女次慶宣郡廩生娶楊國子生道華女  
次慶家郡廩生娶翁翰林院脩撰正春女次慶  
寵聘吳知縣萬全女孫女一適陳汝存邑庠生  
叅政柯孫男一適陳士寵國子生太常卿聯芳  
孫男餘尚幼府君葬鼎陽山伐山得坎僅容槨  
而二母皆不得祔

丘嫂林碩人行狀

丘嫂林碩人之歸伯兄也不佞猶在襁褓碩人子畜之不佞於碩人不啻母也不佞稍長益莊事碩人及不佞成進士過家碩人喜且泣曰小郎且貴矣老婦茆茆將旦暮填溝壑恐不能待則願以弱子屬小郎不佞謝不敏蓋不佞未起家而碩人病病卒以不起年僅五十七耳不佞卽無以報碩人而會猶子禧爲碩人襄大事則爲述其姘節徼惠名公乞一言以志之林碩人者故揭陽令以毅女也母曰谷孺人笄而嫁女

得君在先大夫爲冢婦於是嫡母葉孺人始衰而吾母王孺人善病碩人處兩姑之間皆得其驩心滌瀦旨甘手而進之無不親幸碩人者女得君雖爲家督乎顧碩人嘗居間幸母敗卽碩人稍不與聞又輒困於是家政一切倚辦碩人若操丈夫權矣而碩人事女得君慎甚不敢以褻見人愈益賢之女得君守諸生不得志輒發憤下帷至嘔血碩人從旁解之曰是悠悠不可知者奈何以七尺殉乎而會先大人物一二不



逞者復起大訟齟齬之女得君邑邑不自得碩人復爲之營解不使女得君知也然女得君亦竟不起遺孤二俱幼無何其少者復殤碩人抱禧絮泣曰吾不難相從地下也奈此如綫者何禧始勝衣則日程督之學至一歲再更師已隸博士弟子碩人嘆曰兒庶幾能讀父書地下有言幸不辱命矣初女得君既廢箸買宅或以爲凶君病革問語碩人必徙居吾魂魄不安此故碩人旣爲君營葬卽謀徙宅費皆不貲無不自

碩人手指出者又以其間督臧獲力作刻期報功季年業乃大饒歲租入倍於女得君在時人謂碩人何讓寡婦清哉碩人幼通孝經及內則諸書慷慨知大義揭陽令死無子所遺貲鉅萬碩人謀之宗老爲立後世其祀每歲時必之墓所哭盡哀以爲常奉一寡姊相莊迄於白首碩人卒姊哭之慟不旬日亦卒其孝友惇至多此類也碩人旣勞於家秉季年精神益衰八月之日夢輿人以女得君之命逆之與之期遂以逾

月月朔下世嗚呼碩人之稱未亡人也十有六年其心豈一日忘女得君地下哉碩人自謂得死所矣惟是碩人以一婦人爲吾家持門戶四十年非直不佞有生成之感其自先大夫以下寔饗之則安得使之泯沒而已也女得君名原德郡諸生與不佞同出其葬也鄭法曹日休爲之志若銘碩人生嘉靖丁酉四月一日卒萬曆癸巳九月一日男子二長慶禧郡諸生娶鄭卽日休女次慶祚早殤孫女一塋壇下山祔女得君禮也古云女德不出中門不佞且不敢諛辭以欺大君子敬舉近似者而爲之請銘

西樓全集卷十五終



西樓全集目錄卷十六

祭文

同年祭蔡青門先生文

祭林少司徒文

祭別朝變文

祭同年陳德見刺史文

同年祭吳母文

同年祭吳丞文

祭黃孝廉文



祭陳大叅文

同年祭盛太淑人文

祭徐孝廉唯和文

祭李封君文

祭亡女文

祭陳封君文

祭劉封君文

祭賈中丞文

祭黃老師文

祭張年母文

祭劉沈丘老師文

祭湯年伯文

祭同年黃元甫文

祭同年熊國亮文

祭大宗伯馮公琢菴文

祭洪方伯心菴文

西樓全集目錄卷十六終

西樓全集卷十六

閩中鄧原岳汝高著

門人陳開泰侯亮訂

仲子慶霖編次

祭文

同年祭蔡青門先生文

嗚呼大江之西匡廬秀結扶輿鍾靈寔生人傑  
溫然者容矯然者節爲家國禎爲文章伯江陵  
秉軸蒞事西曹于時巨姦勢沸且驚侃侃大議

以障狂濤用謫鹽官氣乃益豪重明麗天鴻漸  
于達公論始鬯薦剡四馳卽擢武部風裁獨持  
出視楚學去吏而師亦旣積勞爰陟東藩捧表  
入賀載馳載奔溘然朝露懼此煩寃德不必壽  
天道寧論中空散雲半壁墮嶽奎宿無光滄溟  
乍涸萬里聞喪且疑且愕元龜何寄與刑何托  
乙酉之役主試於闕猗與百士濟濟惻惻布列  
中外凡若而人如彼大造萬物陶甄某等牛渤  
馬溲物情所棄援枯就榮不厭憔悴生我覆我  
勉思報塞母負明恩

祭林少司徒文

維翁偕計世廟初年於時先人附驥周旋亦越  
三載翁寔登庸猗與伯父躡翁遺踪異姓骨肉  
合志同方不佞無良翁乃父行不佞之妻於翁  
兄弟翁之季子余視猶壻年誼世好久而弗渝  
朝夕畔援休戚與俱去歲之冬奉使南還拜翁

床下奉公懽顏暖語從容殷勤惜別豈期一疾  
便成永訣長君持憲新命載頒翁忽長往鶴馭  
難攀高山墮雲長夜流星扶輿喪魄河嶽收靈  
燕翼貽謀百不失一富貴考終近代誰匹翁今  
歸真蓬萊方丈吾儕小人猶懷几杖一束生芻  
視翁遺像翁也臨之如在其上

祭別朝鑿文

唯翁忠厚醇謹道固委蛇隱約恬澹而托於醫  
方中取聖意外見竒起骨加肉扶顛持危人固  
有言國醫爲上其次醫人厥功亦鬯手摩指按  
活者無量杏花橘林流風可仰如翁之德宜壽  
于天如翁之功宜稼于田八十考終若委蛻然  
生寄死歸復何憾焉翁有二子次予猶昏受翁  
禁方亦名其藝善醫之門久而不替子孫振振  
以大而世

祭同年陳德見刺史文

嗚呼君自丙戌釋褐迄庚寅卒於新都蓋壽不  
迨四十而位止於下大夫中間升沈悲喜真若



白衣蒼狗變態須臾其可喜者業已忽如石火而可悲者則安得不動人之嗟吁初君束髮入庠下帷卒業辛勤憔悴幾忘故吾旣而領鄉薦魁南宮其應制諸篇傳之天下天下珍之如連城之璧照乘之珠無何捧檄無爲分符百里薦君者列其治行第一以爲水鑑之與冰壺一時貪墨之徒惡君節而議其激姑息之吏忌君嚴而病其拘然君竟以此積勞中腹心之疾至於外罷而中竭神耗而骨枯及其以考績入朝二

三兄弟視君于邸怪其色甚萎而貌甚癯然猶流連欵洽慷慨欷歔乃文學之命下而君病已不可支蓋踰歲而殊矣憶乙酉偕計諸兄弟謂君風神爽朗昂昂千里之駒不巍然爲名卿則儼然爲鉅儒豈期一疾遽先朝露平生意氣如斯已乎廣柳南來竚立踟躕黃腸黯淡漆燈饌餬寸心盡折惆悵世途悠悠蒼天視君遺孤

同年祭吳母文

古稱女德不踰中門而質行昭灼在人耳目則

多顯于後昆故其令儀淑問微乎不可指數而其大者固可得而論孺人早事保昌君歷三十餘年無微忤而膝下林立皆丈夫子矯然而鳳鸞騫卽立訓厲辭無改於洙濡之愛而雍容燕喜益深其鞠育之恩及伯子以孝廉起家聲名日大人謂孺人且貴倨而言不出口至性彌敦蓋世所稱周伯仁之母亦以其子重而迨今方之嗣徽比之懿典異代同源顧獨惜其福履未央溘然逝矣使伯子徒負風木之痛而異日所以賁錫孺人者不於人間而於九原某等與伯子疇昔偕計休戚畔援與茲靡依哀愴何言而庶幾以慰孺人之靈者有伯子在則寵光未艾精爽長存

同年祭吳丞文

吳航舊族稍徙于閩脩業而息義動比鄰居不易度處不訾仁化俗息爭有廩廩德讓之風排難解紛則慷慨任俠之倫及其以文法起家公卿推轂稱其長者無何以循良佐邑豪強屏跡

謂之神君夫惟大雅卓爾不群飄然解組青山  
白雲人生適意富貴何云教子願年朝饘夕穀  
愛而知勞拮据佐讀矯矯伯仲如玉斯琢已足  
徵其義方之訓而貽之以無疆之福矣某等之  
與維鎬寔同偕計交相定省有若兄弟意公之  
年不億其麗豈謂一疾溘然長逝也何以奠之  
生芻是將何以報之寵光未央不於其身其後  
則昌蓋公之生也七十年如一瞬而公之歿也  
則千百世而不忘邪

祭黃孝廉文

嗚呼天或成人以名而不竟其福或予人以才  
而不求其年蓋造物有不可曉者卽賢聖所不  
能全唯君幼挾駿聲負奇氣昂然而虎虬躍矯  
然而鳳鸞騫及戊子領鄉薦魁多士天下固已  
耳其名而傳誦其應制諸篇爾乃獻筴闕下一  
不見收白璧弗售黑貂欲穿君且倦游而歸歸  
而病且死矣蓋君之精神已耗於下帷之日而  
一有不當意輒骨立而僊朝茵薤露電光石烟

高堂垂白遺孤可憐或謂君貌不勝德骨相迥  
遭皮相之言予不謂然受命於德貌何尤焉君  
今已矣二三兄弟疇昔周旋哭君奠君有淚如  
漣生芻一束薦以寒泉殲此良人嗚呼蒼天

### 祭陳大叅文

國倚老成鄉稱耆舊名德所當歸於不朽皎如  
太白傍倪列宿又若高山俯視羣阜唯公早歲  
登朝載主度支從容轉餉紀綱列司出守杭州  
敷政維宜衽公席公左視右尸兵備贛州振刷  
爲期遂叅其省政而大體是持斯已立德立功  
效志見奇及夫拂衣歸來隨物卷舒結客談藝  
掃軌著書卽問俗者化於其德而從政者式於  
其間膝下三世爲龍爲駒隆施厚積代食其餘  
惟先大人疇昔周旋勿謂小子而甘棄捐引以  
通家視子姪然余女公孫遂結褵焉如公篤誼  
胡不百年公不百年光彩常鮮

### 同年祭盛太淑人

天之生賢以翊 明主有開必先爰篤其祐儻

無姬姜孰光申甫古今如斯耳目可睹惟太夫人太行孕神克配君子爲國虎臣累功積德匪夕伊晨含幽韞秀以裕後人載誕我師以大而世眷注者天簡在者帝出則秉銓入而典制版輿臨之優游勿替方期大拜邦家襲慶上尊未御婺星掩芒秦雲黯淡隴日無光奪我所天盡號盡傷人孰無死哀榮爲福惟太夫人受天百祿流蘇輜駟六珈象服耄耄考終胡云不淑某等不佞獲造師門慙次泉知源與茲

靡伊哀愴何言薦以生芻敢告九原

祭徐孝廉唯和文

嗚呼三山秀結作者雲蒸十子旣往吏部代興隆萬之間舍人振響建安以降大曆而上南風不競瓦缶雷鳴舉世嘈嘈誰知正聲東海徐生超超玄箸蚤歲登壇千言立吐雅言丈夫不朽爲期尚論古人如親見之翩翩吾黨匪朝伊夕立挽頽波牛耳遞執乃馳赤幟以令四方前矛所至吾軍益張子之談鋒前無堅陣子之風流

領袖後進長篇短牘古體新詞矯若龍虎怪如  
蛟螭口爲雌黃筆代袞鉞凌厲詞場勃宰理窟  
人或忌才天或忌名蘭摧玉缺大運隨傾予也  
二人寔惟臭味予倡予和予經子緯高齋共卧  
別墅同遊無言不盡無語不酬予歸自燕旋復  
西邁子已卧病晤言不載臨發告別問疾寢門  
子猶噉語努力中原造次分携竟成永訣雙眼  
欲枯寸腸盡裂嗚呼曹謝少年累困人言予幸  
免全儲于蠻天女大老子忽爲異物陳七貧病

僅存皮骨子復長往舍我同曹厄在陽九傷如  
之何予嘗謂子毋忘歲晏蚤返初衣山巔水畔  
予且倦游解組不遲子先朝露予復疇依想子  
平生景慕先哲烏山之麓新祠業業今併祀子  
以繼徽音龍樓鶴筆遂子素心嗚乎爾母旣衰  
爾子尚稚門戶蕭條後事誰寄不佞惟友謝客  
惟甥兼有雋弟內外經營千秋者名三尺者土  
先行爾集後襄爾墓萬里之外魚鴈沈浮爾肉  
已寒當歸荒丘別有哀辭聊以當哭殲我良人

百身莫贖

祭李封君文

嗚呼天眷名世有開必先凝祉發祥或爲之前  
倚與我公天之所授國倚老成鄉稱耆舊厥有  
賢胤奕奕名卿文武爲憲方內敕寧朝望旣崇  
帝心益注翁割其榮輒承異數萇爾播州巨憝  
作讐敢肆憑凌爲西南憂 帝念專征誰可與  
者乃咨卿士以命司馬司馬建牙節制諸軍連  
衡四省虎旅成羣懼彼先聲殲此小醜遂覆其  
巢亦授之首攄茲宿憤振我威靈凡諸反側莫  
我敢承幕府上狀司馬之績露布未馳忽罹凶  
戚大澤載寶高山出雲不有名德孰開元勳玉  
魚金印且膺後命公也九原與茲嘉慶某守在  
四封羽檄相聞賀未出境弔已在門敬遣材官  
緘辭入蜀何以將之生芻一束

祭亡女文

吾今年六月由昆明移鎮臨安得家報見女手  
書諄諄知女誠心宛至如在目前也越三月而

女凶問至且痛且駭愕不知其由女自幼婉順  
聰慧吾母嬌而憐之襁褓不去手女未許嫁而  
吾母逝矣吾每見女未嘗不痛念吾母也吾喪  
母之後家事蕭索每飯不過蔬菜顧安所得鮮  
美者黃虀粗糲臧獲之食耳女甘之不言貧及  
于歸吾已獲第猶不能脫貧藉粧奩取給而已  
女安之不言薄女嫁未幾吾遠宦都下女母從  
之弟妹盡室而行女書信頻頻惟以不得奉顏  
色爲恨不及私也吾謂女賢淑寬和孝順恭謹

皆宜受來福而享年乃未三十而死也聞女病  
風寒旣非死候又非急症女母朝往視而夕告  
絕此何說焉婦人愛女悼亡傷逝無端怨尤之  
語吾不欲爲女道唯有呼天愴地而已吾去年  
夢女似產後服藥熱極攻心大叫楚毒若爲火  
所薰灼者曾與十伯道之以爲不祥今一年所  
矣遠而見夢久而後驗真不可思議也嗚乎痛  
哉吾旣倦游亦圖歸計今年四十有七髮如牛  
尾近有頭暈病壯者溘先朝露衰者何能久延



幸得乞身看女墳墓骨未朽而肉已寒門長扁  
而草已宿此冥冥者又何知卽女夫異日以一  
命寵榮女女兒異日以五鼎供養女終不能返  
女魂而附之魄也則今日何以慰女地下而解  
我一時之恨嗚乎萬里羈人寄豆羹之饌命女  
弟奠女告女父子之情於茲決絕言不能文有  
淚如血

祭陳封君文 代

和氏之珍寔惟楚璞不顯其光渾乎未琢猗與

令德守一含真韞而不試以俟後人赫赫哲嗣  
爲名御史出按三秦曰綱曰紀總憲專藩爰陟  
中丞開府西南乃用軍典入長西臺特由 帝  
簡不剛不柔不諫不懟子拜寵靈公亦承恩服  
不改素老而彌敦位視列卿年登大耋得全全  
昌完名高節公今羽化歸白雲鄉海天鶴馭凌  
風而翔某撫鎮茲邦高山可仰典刑凋喪徒懷  
几杖昔佐司馬令子同朝辟之草木臭味相投  
鬱鬱祁陽泱泱祁水薦彼溪毛公其鑒止

祭劉封君文

代

國倚老成鄉稱耆耄耄慶鍾後裔名掩前哲惟公  
早歲登朝騰茂蜚聲官雖分臬重於公卿未壯  
辭榮有才弗試祿不酬能德浮於位天惟戩穀  
人亦留餘伯仲競爽以大公間重則秉銓貴而  
掌制八座崇階公家有二章服迺進恩綍薦加  
簪紱蟬聯萬石君家公也逡巡聞命益悚微臣  
不佞敢席子寵公之名德士林所宗公之閔闕  
官籍誰同卽今考終譬如乘化上爲列星熒熒  
不夜某于伯子幸辱同時聞公至行懷公令儀  
不腆之奠緘辭千里北望燕雲有淚如泚

祭賈中丞文

代

漳河以北萬山盤礴篤生令人沈沈嶽嶽惟公  
起家茂宰直入諫垣孤忠自許慷慨千言出守  
大邦治行斯邕旣擢藩臬扶搖而上遂由光祿  
開府贛州閩海江南迺敷令猷秦關百二晚乃  
爲政自陝以西邊塵不競內外敷歷垂四十年  
爵及上卿四方稱賢受命考終豈曰不壽沒爲

明神于帝左右昔在留都會憶周旋節鉞所臨  
或後或先尺素殷勤蒙公之愛公今已矣手澤  
尚在薊北燕南弔唁無從一束生芻以告於公

### 祭黃老師文

嗚乎天降名世式作周楨辟如符瑞爲鳳爲麟  
唯師早讀秘書遂典國制虎觀橫經簡在者帝  
乙酉之役主試于闈內外布列亦若而人桃李  
陰森映帶南北匪以營私實惟爲國讒言煩興  
蚊聚成雷才高取妬位逼見猜師旣辭榮爰立

遂已四海蒼生猶望復起師雖暫退有子登庸  
九載行河以佐司空簪紱盈庭後先繼美爲萬  
石家爲通德里胡不慙遺溘焉歸真朝野悲悼  
有識酸辛師之文章蔚然世寶師之行誼由古  
之道壽不副德爵不副名茫茫天地孰知其情  
某等陶鑄師門枯株朽質或仕或隱報恩何日  
關山寥遠聞訃參差日月逝矣魂去何之稽首  
陳詞有懷莫吐決絕一時淒涼千古

### 祭張年母文

睠茲南紀是曰名都厥有女德非獨丈夫天岳  
逶迤洞庭所滙或以人靈或以子貴猗與賢淑  
作嬪于張相彼夫君爲珪爲璋夫旣龍潛子乃  
鵲起母也雍容亦受帝祉爰自民曹綱紀晉州  
赫赫憲臣翩翩令猷蠢爾播酋跳梁無狀 帝  
命徂征獲軍以往惟此播功護軍之勞拓我版  
宇戢我弓刀護軍上書乞恩歸養有子承懽母  
氏無恙定省幾年母棄杯棬禕翟考終復何憾  
焉某等辱與令子司曹通籍十載于今瞻依自  
昔天低夢澤雲黯瀟湘婺宿掩芒娥月沈光兔  
首可羞生芻以薦靈之歸來鑒予菲奠

祭劉沈丘老師文

唯師積學嫻辭時名籍甚用繼前脩以開後進  
旣入南雍一經自娛遂與計偕高步天衢鉛刀  
爲妖鎔鄒見頓師也安之氣乃益奮爰以選人  
捧檄而南青氈獨冷白壁何慚擢令中州沈丘  
爲政五載於斯甘棠可咏長君登庸師乃賦歸  
尋我舊隱返我初衣翩翩賢胤芝蘭相映惟師

雍容胤此餘慶歲在乙酉分校于閩嗟予薄劣  
亦荷陶甄十年偃蹇浮沈中外辟如生成都忘  
覆載叨叅楚藩馳問起居師已坐化嗚呼嘻噫  
某於諸子馬齒差長今亦倦游臨風獨愴頓茲  
朽質見拔師門徒佩明德未報明恩千里棧辭  
聊以當哭楚水通淮寄淚一掬

祭湯年伯文

雲夢大澤惟周職方扶輿鬱結山川相望乃有  
耆舊夫婦同德爲里之模爲家之則何以貽謀

教子成名何以戩穀亦割其榮翩翩比部廉而  
不劔三尺持平爲文無害寔逢具慶庶幾全昌  
君子偕老其樂未央胡不慙遺後先乘化適去  
適來唱隨地下省覲過里覲此閔凶朝夕在側  
含視從容某義忝通籍情若昆弟匪怙匪恃與  
茲出涕典刑旣喪名德不留生芻一束以告諸

幽

祭同年黃元甫文

惟靈質韞荆山氣吞雲夢矯若祥麟肅如威鳳

英資天授邈矣寡儔兼通墳典能讀索丘擗藻  
春華調高白雪興趣不羣風流自別公車射策  
通籍金閨翩翩楚材爲璋爲珪乃隸冬官考工  
之署閎闕益崇聲聞亦著同榜兄弟結社稱詩  
牛耳逝執誰爲白眉君入水曹余司通庾尺素  
相聞平生未吐旣忝楚臬寔惟鄭鄉忽聞凶信  
掩袂自傷中空墜雲半壁摧嶽吾道何寄典刑  
安托代割郢中往奠無繇薦以寒泉中心若抽  
祭同年熊國亮文

嗚乎古士君子孝以成忠匪直國華居然儒宗  
惟公壯歲登庸芳名籍甚進退自如得失無競  
於時伯母嗇嗇而康公也陳情再疏君王菽水  
承懽斑斕自喜曰温曰清左甘右旨母旣考終  
永慕不忘浩然長往景山之陽四海賢豪願言  
勸駕一命是膺以光泉下惟公謁選例當美除  
斬而出守于例奚居人益妬才天亦助虐凶信  
何來聞者錯愕伎夫索瘢借公爲名遂犯衆怒  
而蒙惡聲某等同籍弟兄分乏茲土睽違一時

隔絕千古廣柳南還漆燈模餽絮酒炙雞以問  
諸孤

祭大宗伯馮公琢菴文

嗚乎天生碩喆爲國家楨下奠河嶽上垂列星  
惟公東岱儲精風流縕藉發爲文章班楊齊駕  
綺歲登朝讀中秘書既窮萬卷亦足三餘再秉  
文衡士歸陶鑄桃李清陰惟人所樹遂陟春坊  
益重巖廊參佐銓部中行朋亡 帝簡忠貞晉  
大宗伯爰立之命匪朝伊夕公所著作居然宗

工公曰小技辟則雕虫經世大業彘彘何有立  
德立功庶幾不朽如公一身安危繫之公亦慨  
然旋轉爲期云何一疾萬事長已 君王輟朝  
商旅罷市其緬懷疇昔實幸周旋愛而不見於  
今三年忽聞流訃無由奔謁殲我良人臨風哽  
咽絮酒炙雞千里緘辭生芻一束魂其格思

祭洪方伯心菴文

嗚呼清源衍秀龍首儲精篤生哲人維周之楨  
蚤歲登庸玉潤金英翩翩茂宰奕奕名卿直道

危言朝野盡傾典試于黔多士作程敷歷中外  
猗與蜚聲遂長雄藩漢水方城除奸剔蠹曰公  
曰清虐喘播焰南土震驚公也雍容獨持其平  
殲厥短狐坐制長鯨不有君子誰秉國成人猶  
戀公公忽辭榮生爲豪傑沒爲神明奠茲方嶽  
映彼列星某等同寮伯仲同榜弟兄十日不見  
公歸冥冥旣失元龜安寄典刑臨風一奠以迓  
公靈

西樓全集卷十六終



西樓全集目錄卷十七

啟

請撫臺入簾宴啟

請按臺入簾宴啟

請正考入簾宴啟

請副考入簾宴啟

請撫臺鹿鳴宴啟

請按臺鹿鳴宴啟

請正考鹿鳴宴啟

請副考鹿鳴宴啟

請各撫院鹿鳴宴啟

與佾侍御啟

三通

復陳弘宇憲副啟

復張蓮濱憲副啟

壽劉直指啟

壽羅存冲憲副啟

西樓全集卷十七目錄終

西樓全集卷十七

閩中鄧原岳汝高著

門人陳開泰侯亮訂

仲子慶霖編次

啟

請撫臺入簾宴啟

伏以漢水波澄三千里鯤鵬噴浪衡陽日出十  
五城鷹隼橫秋代是文明時當燕喜恭惟臺下  
中朝元老昭代儒宗德洽章逢功成樽俎更恢

天網榷楠杞梓兼收不腆方城琰琬璠璣竝列  
洞庭張樂湘浦開筵特徵祭戟之臨併借鈞衡  
之重鳳凰山下彤雲掩映當尊鴻鵠峰前紫氣  
飛來滿座百寮承式多士具瞻

請按臺入簾宴啟

伏以栢臺霜肅風行棧樸之鄉桂苑秋高化啟  
鯤鵬之路覃敷文命獨朗奎光恭惟臺下大猷  
經遠正氣匡時允中朝執法之班適南國多材  
之地金衡廣度元資師匠之功玉鑑高懸竝受  
王明之福賓簾載誌天網斯張開四照於文林  
導百源於學海澄空璧月光含柱後之冠拂漢  
商飈氣稟雲間之仗敢藉綱紀之寵仰承貞肅  
之儀所望儼然不辭責只

請正考入簾宴啟

伏以文苑持衡夙仰人倫之鑒明庭額俊共驚  
帝簡之難寧慎重而擇官故逡巡而降命均瞻  
北斗肅拜下風恭惟臺下河嶽炳靈文章司命  
家傳忠孝世擅勲名惟茲荆楚之邦實曰湯沐

之地恭承明詔廣取真才不辭水陸跋涉之勞  
毋廢朝廷寤寐之典幸子大夫之夙駕慰都人  
士之彈冠敬開薇省之樽敢屈蓬山之馭楚材  
堪採元資匠石之能荆璞可收終借卞和之識  
高山仰止多士具瞻

請副考入簾宴啟

伏以 帝簡天曹式重銓衡之寄地嚴材館寔  
推藻鑑之司降命匪輕遭時非偶恭惟臺下天  
真朗徹位望高華起造化於毫端握星辰於掌

上蓋衆意獨嚴弓旌之使而 上心尤注湯沐  
之鄉故屢請而乃俞竟兼程而赴命雙旌閃電  
萬里馳風不辭七尺之奔勞用慰諸生之饑渴  
璠璣是寶何煩三獻之勞杞梓可材豈靳千金  
之價湘潭借色江漢生輝邀大別以開筵對高  
樓而張樂萬惟臨况曷任光榮

請撫臺鹿鳴宴啟

伏以轅門晝靜營前干盾千層賢路秋開境上  
弓旌四出騏驎竝收天廡參苓都入藥籠祇仰

龍光同茲燕喜恭惟台臺力扶綱紀身寄安危  
天眷西南草野人人自慶風清江漢萑苻在在  
無喧卽朝野之具瞻信文武以爲憲萬流仰德  
庶士傾心網羅廣被于遐邇陶鑄適歸乎玄象  
肅肅其羽瞻熊軾于星橋菁菁者莪列鴈行于  
雲路伏望彤騶是賁繡虎斯臨式觀南紀之人  
文共慶生成之禮樂

請按臺鹿鳴宴啟

伏以栢府懸衡允副斗山之望棘闈撤鎖盡收  
江漢之英祗候乘騶齊誇得駿恭惟台臺文章  
司命象緯元精采風而麟鳳呈祥攬轡則豺狼  
遁跡額時髦以登天府盡榘楠杞梓之材持憲  
節而蒞帝鄉肅械樸樸燠薪之化百寮承法似漸  
羽之鴻儀多士趨風若凌霄之鳳彩伏望威臨  
豸繡寵賁龍光紫微夾道以迎軒丹桂飄香而  
度樂

請正考鹿鳴宴啟

伏以玉堂承詔詞臣稽古之榮金鑑掄材 聖

主得賢之慶力追大雅再見淳風士欣遇合之  
奇人嘆文章之盛恭惟臺下金書玉簡家臨禹  
穴以探奇天祿石渠世際堯階而抽秘新術綸  
綍會剖璠璣文星適度於江津奎宿正臨乎郢  
甸竊喜拔茅之會恭逢撤棘之辰潔彼芳樽儼  
然珠鳥肅候鳴鸞之馭祇聆祝嘏之音請看三  
楚之鞭楠盡屬一時之桃李

請副考鹿鳴宴啟

伏以衡雲標瑞一時龍馬呈祥漢水涵靈千里  
鯤鵬競化士歸陶鑄人慶遭逢祇候台臨共瞻  
奎聚恭惟臺下清融水鏡峻峙斗鈞 帝簡文  
衡珍重東曹之選名高月旦揆羅南國之英非  
特爲一時之光固欲備異日之用冠裳耀日雍  
雍鷺序之班桃李如雲濟濟龍門之坂迂仙旌  
于鄂渚聆天樂于洞庭共際休明均瞻景運

請各撫院鹿鳴宴啟

伏以文當啟運於昭大國之風道重作人式侈  
嘉賓之頌惟龍光之遠照適燕喜之分臨幸際

昌期聿觀盛典恭惟台臺中和合德文武兼材  
節槩凜冰霜士歸欽式風猷光日月人懾威嚴  
卽樽俎而功成信鼎鉉之望重榘楠杞梓慶匠  
石之兼收琰琬璠璣多方城之作貢子大夫之  
權衡不爽都人士之意氣方新共聽鹿鳴喜看  
鴻漸遙借干旄之指恍瞻檠戟之臨不腆承筐  
戒幣祇將乎明德有懷駐節乞言更切於周行

與佾侍御啟

台臺殿中法從柱後勲名皂蓋遙臨癘氣全銷

百粵花驄西首霜威直肅三湘官儀快睹于荒  
塚使節驚傳于夷服動搖山嶽鼓舞風霆長寒  
貪墨之心永簡 聖明之眷顧葑菲不遺于下  
體乃斗箕時取其虛聲翩翩尺一之書戀戀故  
人之意寄情良篤念舊何殷某昔受事名都代  
庖上國久沐沫濡之愛更深饑渴之懷量移以  
來寤寐何已乃厯遠札鈞來雙鯉猶鮮更拜多  
儀擲下百朋逾腆寸心獨結九頓爲慚豈臭味  
之能投乃神情之特契衡陽雁斷空懸琰琬之

思桂嶺雲迷敢後瓊瑤之報輒馳冗役敬候台  
禧鱗鴻之使已遲蘋藻之將彌褻仰惟鑒納曷  
任悚仄

又

伏以昆明浴日標形勝于西南點蒼出雲紀星  
躔于翼井古稱仙宅今作材藪自揣顛蒙何當  
巨麗恭惟台臺人倫師表盛世羽儀東壁圖書  
天上青藜借色西臺法從人間白簡生風暫對  
德輝便瀾宿垢更厓容接益佩鴻私其德本支

離性徒木強橫經非易敢秉鐸而稱師持憲自  
慚懼張羅而失士尚冀模範不遠好而示以周  
行典刑在茲憐而垂之末照忽瞻溫札獎慰過  
情兼捧腆儀綢繆溢格拜嘉匪報感悚交并祗  
有心藏末繇躬叩

又

伏以白簡叩闈共倚回天之力繡衣行部還高  
煖海之功志在澄清職司獻納非藉朝望曷振  
臺綱恭惟台座越雋鍾祥昆明衍秀讀書中秘



人驚手筆如椽執法內廷 帝謂威靈似鐵山  
川動色節鉞生寒馮翊遙臨天上一星作使潞  
河暫駐雲間孤隼橫秋偶接清言輒欽高誼某  
八閩男子四十腐儒秉鐸名邦濫竽重地望履  
幕而霜肅仰止末光捧竿牘而春回瞻依厚眷  
未操刀而使割更稟繩墨於大方豈習水而知  
津願借楫維于先覺彘彘踈節罔報瓊瑤耿耿  
私衷徒勞饑渴伏惟台鑒慰此下情

復陳弘宇憲副啟

恭惟台臺中州碩德南國儒珍茗水專城真覺  
一時春盎吳山持憲遙臨萬里風清爰陟楚藩  
遂叅省政弘猷益鬯芳譽彌高不佞舊幸識荆  
今叨御李浙江烟樹猶懷杯酒流連湘漢波濤  
更想干旄掩映片鴻飛到滄滄紫氣擁千峰雙  
鯉投來燦燦丹霞明五色顧起居之未致何金  
玉之載臨九頓爲慚寸衷徒結

復張蓮濱憲副啟

恭惟門下節鎮瀟湘綏懷荆楚允矣星懸一路

悠然雲覆三江春滿湖濱此日豺狼斂跡霜清  
海甸當年鷹隼橫秋憲節如新清風益鬯 聖  
主恩深侍從賈生寧久長沙清時望屬俊髦張  
相何甘楚澤不佞某七閩男子下里編氓曾隨  
竹馬以逢迎尚憶花驄而至止茲者崎嶇入楚  
叨冒叅藩慚尺素之未投感雙魚之遠擲長箋  
忽啟翩翩彩霧當門雅贖載頒燦燦朱提滿篋  
臨風寄謝對使登嘉徒佩私恩曷勝感戢

壽劉直指啟

伏以一陽啟泰日景初長三壽作朋歲華斯茂  
億萬劫共當震旦八千歲以爲春秋恭惟先生  
大人抱壽國珍爲瑞世寶滇池暫駐雲間孤隼  
橫秋洱海遙臨天上一星作使惟茲暢月正值  
昌期瑞已叶於雲祥神尤徵於嶽降繡衣日暖  
人歌有脚之春皂蓋風高壽衍無疆之筭某初  
承陶鑄夙賴帡幪占紫氣于中天戴清輝于北  
極依懷徒切尚阻鳧趨祝頌何辭敢稱燕賀伏  
惟台鑒俯賜涵原

壽羅存冲憲副啟

昆池春蚤正值花朝南極星躔又當震旦泰階  
可指奎宿遙臨草木借輝光憲府開尊歌麗景  
神仙餘氣色外臺列宴祝長生喜晝夜之初分  
卜春秋之鼎盛輒效華封之祝長符嶽降之祥  
共慶稱觴仰邀脂轄

西樓全集卷十七終

西樓全集目錄卷十八  
尺牘

上舒開府

上劉豐津座主

上黃葵陽老師

與門人舒孺立編修

與翁肇震脩撰

二通

與葉進卿少宗伯

二通

與陳侍御彥莊

與鄒愚谷先生 二通

與陳伯孺茂才

與陳用吉茂才

與惟起

與惟和 二通

荅同年李子璞孝廉

與徐惟和孝廉 二通

荅李廷燁東莞

與王百穀 三通

與同社

與陳奉常青田

與陳振狂山人 二通

寄徐興公

與王玉生山人

與唯和兄弟

與伯孺兄弟

與陳汝大

與陳汝翔唯秦

上季老師少司成

答沈伯含進士

與韓仕廣民部

與鄭翰卿山人

與屠緯真儀部

答黃白仲

與顧道行學憲

與公朗和尚

與顧世卿

與林熙吉

與林熙工

三通

與王百穀

二通

與張幼于

答江纘石中丞

答鄒大澤老師

上陳毓台中丞

答李本寧太史

與王彥貽鴻臚

答孟穀餘憲副

寄徐惟起

寄林雋卿

寄屠田叔辰州

寄吳子脩明府

寄薛鳴宇廉憲

與蘇弘家民部

上趙大司徒

與盛太史

上孫栢潭少宰

與錢象先

與強善長

與同年江進之廷評

答舒中陽尚書

與心甫兄

與曹能始戶部

答鄒愚谷老師

與舒中陽大司空

答耿巡撫叔臺

與黃肖源太僕

與馮慕崗年丈

答李斗野大叅

與臧晉叔國博

與柳山人陳父

答門人曾璇石侍御

與同年竇燕雲學憲

與曹能始大理

與葉少宰進卿

答同年袁六休



西樓全集卷十八目錄終

西樓全集卷十八

閩中鄧原岳汝高著

門人陳開泰侯亮訂

仲子慶霖編次

尺牘

上舒開府

某不佞自奉武林手書二襪于茲及明公進僕  
卿無何而開府黔南竟不獲一起居臺下唯是  
謏劣無似謬蒙賞識遂以末技爲主者所收此

孰游揚之哉客冬得貴省賢書知公子偕計卽  
所錄應制諸篇天下傳頌稱快焉不佞某而後  
喜可知也由是以窺明公渥德左券在人隆積  
厚饗蓋未有旣矣初抵燕風塵勞苦次公輒携  
公子過存雙魚疊素從天而下開函捧讀光儀  
咫尺獎借太過雅貺鄭重不佞某何以有此於  
公豈謂夫夫也者業已置之門下而公子曩時  
屬有一日之雅遂溢許焉慚感慚感卽審撫茲  
貴竹風猷赫然當宁方借公以表百寮秉鈞軸  
而持衡之不佞某者庶幾得望下風重承大教  
則拜厚貺布鄙私尚有日也

上劉豐津座主

自別老師則策蹇而行買舟至清源改從陸委  
頓風塵行李憔悴抵家則以病謝客凡閉關三  
閱月視廬江如隔天未久不聞問疚焉於懷某  
無狀自惟一椎魯諸生偃蹇田間謬蒙賞識借  
以虛聲而踈庸僻廢重負雅教時時效博士伊  
吾勉強卒業握枯管愈覺才盡以此益狼顧自

嗤矣老師雅抱碩望當道者且破格以待何嘗  
不見奇效志一第當奈老師何而况有公子仁  
兄光弘鴻業而老師雍容享之亦何嘗不見奇  
效志也

上黃葵陽老師

某主臣某不佞無所短長於世蒙老師不棄管  
蒯而收其瑕類此自老師湔拔之豈某能以北  
郭之伎濫竽齊門而天幸至是乎第其中實無  
有而虛聲未敗卒令見放傷老師知人之明而

爲宮墻玷奈何哉旣歸杜門則捧老師所示程  
義頰首揣摩曾不得其所入間不自量妄有所  
稱述而乍合乍離旋復廢去政恐終自墮落無  
以奉慰至指致足媿也老師方以文章潤色鴻  
猷卽太平之業雅已有端復得長公以嗣家學  
赫然交映此不亦吉祥善事而榮施於門下士  
者哉近作數首併呈左右更乞一指示之則又  
老師所以終教不佞者矣

與門人舒孺立編修

蓋不佞別足下携一襪被策衛行矣舟抵清源  
乃得報爲頓足起舞不知身在羈旅也足下雋  
才挾三尋之矛摧鋒陷堅搏秘若風雨卽一日  
而名重天下薦紳先生無不願望丰采者乃猶  
不棄憔悴而萬里問訊情愫委至儀幣爛焉不  
佞一下里狂生何以有此於足下不佞一何幸  
乎不佞旣罷歸則謝客之山中老大自嗤偃蹇  
無狀睨三寸管輒欲嚙破柰足下高誼何足下  
且以文章親幸雍容著作之庭顧問之暇不廢

披覽由斯而勒成一代之業爲不朽之盛事此  
足下饒爲之顧安得拓其餘以波及不佞而指  
示之也小兒生已十二周歲頑鈍懶散酷似其  
父邇再舉一男厲人生子政恐其復類我也

與翁肇震修撰

陳士文過家得奉手教甚慰士文舟次寶應幾  
不免陽侯之厄瑤函危作殷洪喬蓋湖多水怪  
足下制策在彼得毋令蛟蜃旁睨哉不佞十月  
抵家苦尚平之累作一牛馬走無須臾之隙計

選期尚早就道猶未有期外扇頭小詩少致下  
私亦冀懷袖之餘不遂棄捐耳

又

去歲過家苦王程殊迫踉蹌西邁不獲更致起  
居憶老年丈讀禮之暇益習天下之故行將卽  
吉副廟廊側席之思政且及子鄭重鄭重弟本  
疎懶無所短長今幸承乏于西南夷荒忽之區  
藏拙可也萬里之外孑然無侶獨與兒子相依  
退食焚香蕭然有髮之僧矣

與葉進卿少宗伯

一別台儀便再改歲足下旣領春官兼有爰立  
之命某卑冗外臣遂不敢以猥名上塵清覽欲  
問起居逡巡未敢也乃孫廣文舍人還家忽拜  
遠教誨諭勤督兼以諧謔始知天上貴人未嘗  
忘故耳留都風景佳麗晏起大樂然朝野望殷  
恐不令足下長有此樂滇南絕徼某只携一子  
而西旅况蕭然無可適意今年得藉大庇幸不  
中考功循資暫轉便圖歸計想足下悉此微衷

非浪說也外致芟芟少抒遠念更一札及薄物  
問曹郎者幸爲轉送如其得請還家便寄鄉里  
南行者亦可蠻天寥廓夢寐爲勞臨楮凄然寸  
心都斷統惟台鑒不盡所言

又

承役歸自白門得拜台札加以佳章厚幣鄭重  
如許感激高誼何日忘之明公折節鯁生不自  
知其辭之過矣不佞某居夷凡再閱歲校閱之  
暇焚香讀書亦足散懷而中貴人日與青衿爲  
構每波及不佞某不能以七尺殉之然旣覩面  
諸生上那得忍氣坐視甘爲此輩所魚肉也日  
來閉門謝客具文乞休而都臺宛轉留之且復  
中止第光景如此要不可久羈彼將磨牙俟我  
食而寢處之智者詎宜臥豺虎之側而以爲安  
乎金陵鉅麗山水清絕門下日眺勝大樂然念  
及鄉里後進跼蹐至是得無黯然憐之否

與陳侍御彥莊

自明公入閩閩人士無不沐浴厚德而飲其醇

乃衰宗尤百倍常情二三兄弟荷陶鑄之恩感無已時不佞奉教六年於茲遂得拾咳唾之餘濫竽獲雋此孰提挈之哉客歲冬初假道南還屬明公捧徵書而北道路莽宕遂爾相左竟不得一睹光儀慰此區區典刑猶存徒懷饑渴聞台駕當以春暮入留都雨花石屋之勝淋漓馬首間緩轡微吟興趣甚適於今疆事稍寧明明在上大雅君子豈樂毛舉鷲擊以爲捷此明公善息時矣

與鄒愚谷先生

某記自晉陵載奉手札便至京口風雨渡江回首白雲依依在望旣驅車北行委頓頗極然時時於懷袖中沐浴佳什恍然如奉杖屨都忘勞鞅也某自起家而北所歷閩楚吳越齊魯燕趙之墟七千里而遙舟車作勞篇什間作然皆無聊之詞呻吟侘傺之聲故曰越吟不便棄去彙之成帙且以正於師門老師肯爲某玄晏乎哉老師人倫師表此道正宗一經品題便作佳士

况某在門下士之末豈其靳咳唾之餘而不以假其毛羽也是以忘其穢惡布之郵筒幸爲竄削而重以片言百世而後所不覆之誦而投之溷則某拜如天之貺矣

又

某極寒劣無似老師收之門下而過意慰存某不知所自致矣既與王彥貽遊惠山昏黑返舟遂不及再叩玄亭遲明解纜走一老蒼頭候道左乃老師復屢一介而馳之手教鄭重墨妙盈

篋服膺高誼能不潜然卽老師曲庇門下士何至屈月旦之評而濫許至此老師人倫師表四方思一奉顏色而不可得某既辱接引又辱金玉之音登龍倒屣方斯爲快矣舟抵毘陵幾百里而遙勞使者遠頒益增慚悚外邕閣詩一錄扇頭請政某此道僅一染指耳望老師憐而指示之不敢護其短也

與陳伯孺茂才

既與足下別則走翠旗山椒望二仲小榜飄然



見紫雲擁舟如染者豈足下奚囊在耶不佞以  
次日卜舟風日清美露坐蓬上科頭長嘯兩岍  
人疑爲江神矣

與陳用吉茂才

踈狂窮措忽仗劍而從羈旅遊行李依依僕夫  
催道辟如野馬就銜更成茶酷矣廿年聚首一  
旦阻絕縈戀同袍祇有永嘆計不佞髮初燥得  
交足下足下矯矯不羣前矛勁甚不佞者乃得  
賈勇先登即足下何由焉

與惟起

伯子行恨不得一面極惘惘昨得薦夫報山人  
遞改初衣柰足下何第五之名果勝驃騎乎

與惟和

日苦梅雨兀坐一小樓如枯蝦也林熙吉陳伯  
孺乘漲西行別時訂約再三不佞許以六日往  
峴山山靈掃石待我政恐足下寒盟又添一臥  
游故事耳

又

山齋小雨與玉生兀坐風景凄然門無剝啄恨  
足下兄弟不共此興耳明日稍閒能杖短策過  
松林逐麋鹿芳草間乎

答同年李子璞孝廉

長安羈客不自意得從足下爲俠者游每一開  
尊相對兩腋習習風生豈所謂臭味者乎被放  
以來潦倒奔命視七尺如一枯體廓落兮而無  
友生惆悵兮而私自憐時於落月停雲想見顏  
色耳足下自雋才一第當奈足下何卽相國折  
箠下士足下據右坐稱上客醉則擁陳姬挾一  
冊高臥風情固自不惡孰與不佞兀坐書空苦  
哉荏苒歲月束裝在近爲問郭隗先生黃金臺  
上猶有收駿骨者乎則不佞且至矣

與徐惟和孝廉

不佞抵吳則已聞足下北矣爲之躑躅於橫塘  
烟雨間意極惘惘旣入燕便訪足下於酒人羣  
絕無踪跡也居一日而何尉來乃知素車白旐  
翩而南者卿耶爲之絕地大叫髮上指冠也尊

君素強無疾何以遽至此且天既不憖遺又何  
巧令與足下左使足下抱終天痛神理荼酷豈  
真有不可知者乎不佞日買苦酒三十銅錢潦  
倒燕市中恐終成一薄劣相幸勅從者掃齋頭  
一片石待不佞歸也惟起骨立如少年絕粒僧  
不至號慟滅性乎

又

數日乃得簡出然亦苦酬答每一挾冊不能盡  
了已復投書起矣蠹魚殊酷欺先生久客將西  
樓藏書飽噉無餘昨乃撥其種聚族而焚之恨  
不能極吾兵威也恐復竊發耳惡詩書扇頭奉  
惟起當爲吾緘之箴箴不敢怨也

答李廷燁東莞

自北歸一切酬應苦惱計未得一日高枕卧耳  
每吟邊酒次輒思我廷燁耿然于懷想據案治  
爰書作宰官面孔真覺勞頓然聞李令君政聲  
甚著一二猾吏畏三尺如水賢者豈可測乎不  
佞弟無似與惟和兄弟及諸酒狂結一社於烏

石山下篇什不少今且付梓秋末可得成書當  
寄郵筒一求證印也香山君曾會面不此中望  
其半札如鴟尾上天書乃知茂宰自貴侷令人  
氣盡

與王百穀

曩過虎丘蒙長者傾蓋之誼已解攜而西也回  
首吳門少微星如隔河漢唯是大雅方執牛耳  
而號中原凡在行間敢不共命不佞至猥雜無  
聞乃長者不棄而辱收之不勝管蒯之感耳不

佞由閩入燕間關水陸以日計者三月有奇以  
程計者七千里而遙寄踪寫懷動至盈帙大約  
多懷土惜別之什故題之曰越唵聊以比于作  
勞之歌庶幾於記里之鼓耳不便敝帚而且以  
灾木百世之後所不覆之甑投之溷浮沉之水  
則寔借資於金玉之言蒼蠅飛不百步附騏驥  
而千里矣是以不揣迂踈妄求賞譽願長者以  
咳唾之餘稍拂拭之不佞沐浴盛德感無已時  
亦知足下廣大教主必不惜此齒牙而假我毛

羽也

又

長安羈客偃蹇而拜一官乃得計曹作此面孔  
西山寂寂笑人百穀先生已在生天奈何不一  
手援之也不佞於先生卽無問傾蓋但寤寐在  
十年之前高山景行懷之已久豈可謂不如故  
矣不腆小集曾寄一尉而南願受繩墨且乞金  
石之言亦知惡物不足辱齒頰但不可當吾世  
而失先生若曰噉名則吾豈敢

又

駐吳興時徐興公過衙齋知足下猶不忘疇昔  
之言念高誼無已且云足下將游道場一醉烏  
程酒也不佞私喜得借杖屨爲山靈光寵久之  
不至則暫之長典視漕而謝在杭乃以手教見  
示貌陋於無鹽飾之以珠玉足下假借不佞不  
知其言之過耳不佞良苦且問諸水濱今行部  
抵秀州矣盈盈一水脈不得語輒走一介致起  
居

與同社

姑蘇驛與玉生別意乃太惡以此竟不能修尺  
一訊二三兄弟不佞非人哉不佞既舍玉生而  
北至京口渡江卽從陸間關委頓殆不能堪至  
滁陽復失我舊物益令行李無色知我者當一  
助悽惋耳一入都酬應亦自不少選期更須秋  
冬之間早知爾恨不且浮沈望中無事衝寒跋  
涉虛索長安之米也自三之日起家計程七千  
里而遙揆其囊中可百餘首已錄一通寄玉百

穀乞序序到便當入梓又作梨棗之灾預以報  
足下社中想修業如故獨令不佞騎一駑馬僕  
僕塵埃中言之真自氣盡玉生游道何如無愁  
餽粥否謝吳興不辨如南越尉佗治陸先生豪  
快意耳同社兄弟欲人人致數語才短不如陳  
驚坐安得十吏逝供欲令侍史者一槩作寒溫  
幾字性又惡之輒布尺二牘統茲寄憶也

與陳奉常青田

某家食載周曲荷台眷瀕行復辱祖道耿耿至

今藉庇以六月謁選濫竽計曹某端蒙人也授  
之握算不知縱橫乃苦錢穀簿書之役真不知  
所自致矣明公養高林壑聲望卓然在朝公卿  
無不承其風而願爲之下况今東夷窺伺西虜  
跳梁非藉老成何由安輯明公亦安能以東山  
老也

與陳振狂山人

吳維鎬抵燕道足下客越消息甚惡弟固知臨  
邛令不辨此乃令馬卿幾典鸚鵡裘奈何奈何

向嘲足下如山中鹿不肯跬步出閭右今當益  
就長林老白龍江上矣北征稿已竟今便傳一  
部去試科頭讀之澆以斗酒亦覺耳後風生何  
必陸大夫千金裝哉陳氏小孺已下車病後頭  
顛髡然頭髮茸茸如還俗僧真可憐也二月八  
日寄聲

又

芋江上辱祖餞遂握手不忍別依依此情何可  
爲喻旣發舟東風健甚樓船西走如騎快馬南

望鈞龍臺僅僅奉大吸江亭乃在雲霧中而紫  
氣勃勃鏢人知陳先生詩囊固自無恙卽東登  
日觀峰北登黃金臺恐此紫氣長在眼耳

寄徐興公

別後凡得手書二紙如見故人也開春十又一  
日阿和抵都於是不佞方有通州之役與阿和  
劇談丙夜遲明而別心甚恨之旬日始竣事歸  
阿和已移居東邊時時跨蹇馬過從各出近作  
繁聲歌之覺易水悲風不減荆卿時狀此亦何

必綠玉叢竹中哉初得幼孺書謂病甚不果來  
令人無色一日與曹能始共飲阿和樓中忽見  
幼孺使者風雪中至云以前月二十三日抵彭  
城矣計程三日且至爲狂躍不能自制此君來  
便成踴足但不知執牛耳者何人耳不佞夏間  
恐有搜粟之役則荔子丹時又得一聚首也

與王玉生山人

不佞以五月二十六日抵家始知足下竟遊燕  
惆悵者久之長安諸貴人畏山人如蝎視書畫



如贅疣王先生不餒死亦大幸八月之望入吳  
興受代日醉謝客郡齋旅懷稍不寂寞耳足下  
當以何日歸不佞明年三月渡淮暫復還家不  
知得聚首不今因報代人便附布區區割一日  
之廩政得如許爲我買酒肉弔荆軻先生也

與唯和兄弟

不佞萬里風塵神骨俱俗然每憩綠玉齋便如  
華胥之國君家兄弟風流爾雅人士所宗以不  
佞叅之則臭味矣湖上重辱祖道相對黯然至

不能出一語而別旣登舟則出贈言作曼聲歌  
之何必曉風殘月哉唯起當以秋暮入越不佞  
幸先至且勅道場山靈邀杖屨也困溪舟次寄  
聲

與伯孺兄弟

峴山幸與伯孺日夕然不盡所懷擬都下相聚  
當不落莫耳幼孺書來乃得伯孺病狀令人黯  
然踪跡參商再見何日行時辱幼孺祖道重以  
金玉之音挾之而西偉然朶雲之贈也行矣且

入太湖眺道場蒼弁諸山則幼孺舊遊之地題  
名未湮風流可念當無惆悵於尊前而欷歔罷  
酒也舟過困溪改而從陸風塵莽宕驅七尺而  
殉之足令達人齒冷矣

與陳汝大

弟以四日發舟東風甚勁乘餘皇如馳快馬是  
日反遂宿白沙新月可憐江清見底黯然思我  
汝大疑在尊前矣長篇綺麗有盧駱家風挾此  
而從長江水怪辟易何論壯我行色哉旣入困  
關改而從陸殘暑未銷客途殊倦視我汝大浮  
白痛飲擁如花而歌落梅真成隔世人回敬布  
尺一不盡欲言

與陳汝翔唯秦

西郊辱君家二阮以瓊瑤爲祖道函致巾箱覺  
紫雲滄勃不散旣解纜猶依依帆檣間也六之  
日次困關復從陸西邁萬里馳歸堪此委頓計  
社中二三兄弟修故業如昨真千載勝事雅俗  
殊途竟成風馬但柯斧無恙想不令風流獨擅

耳

上季老師少司成

某向在都下得老師南中信知尊體暫違和且以告請諸門下士竊議廟堂注眷方殷計日內召老師壯盛之年何恙不可已而輕於去就也無何而某以僨運之浙行至涿鹿則老師疏再至矣既倉皇不及一訊已觸熱輒由江州而南蹙過家道路莽蕩無緣趨候茲以八月之晦入吳興受代便欲徑走留京致起居又迫漕事不

得西想老師日益調攝安勝如常鍾陵大江之勝淋漓几案間致足樂也某謏劣無似竊在陶鑄今乃濫役此邦未習水而操維楫傾覆是懼老師亦何以鞭而策之耑役馳尺一仰候台履惟老師宥其臯而炤存之幸甚

答沈伯含進士

曩在燕市一再握手知仁兄爽朗自是風塵表物既過武林晤楊思說先生乃悉仁兄風流儒雅是我輩人則又爽然自失矣不佞弟謏劣原

非吏材與之握算不知縱橫不得已而托於此道以文其陋詎可傳之作者以貽誚大方惟是兄弟之誼或憐其矇昧而指示之是以忘其醜而以近刻二種請命焉弟既株繫於此不獲面稟繩墨而手教鄭重并辱厚贖令人益深惕息敬拜卷一扇一奉以爲篋笥之珍且於仁兄得一斑矣

與韓仕廣民部

曹能始南還以手書見存讀罷如見面孔也西庾無事應酬少澹挾冊琅琅且讀且乙庶幾兼隱者乎弟駐武林凡三閱月湖山之勝未及染指夙興奔走望塵投刺出終日蔬食割廩餘以供過客真堪冷齒也

與鄭翰卿山人

不佞曩在長安謂足下具俠骨而已入武林而得足下詩稍已異之然一斑片羽不足盡英雄之技未敢便謂臭味把臂入林忽然別去遂令六橋三竺寂寂笑人邇再過苕溪始盡讀足下

塞上諸稿音適調雋在王維李頎鴈行披覽未  
終欣然獨往始恨西湖之上不得各挾三尋之  
矛以下駟相敵吾鄉雅道方鬯二三兄弟狎主  
齊盟傳之中原人馬辟易願邀三山之靈引鄭  
先生馬足而東雞壇未湮牛耳可執窮羽徵於  
中宵極才情於暇日豈不快哉人便附布尺書  
寫茲夙意外扇頭小作願處君懷袖之中

與屠緯真儀部

不佞髮未燥則已聞東海屠先生矣無緣一奉

顏色徒懷饑渴而會接粟入越甃過武林握手  
黃白仲知門下客遊天竺無何竟發也爲悵恨  
者久之江以南作者如林自王廷尉汪司馬旣  
歿先生代興執牛耳而先驅敢不供命不佞齷  
齷小生伏膺此技殆將十年不獲師承終墮惡  
道今且乞靈于天幸屠先生在五百里之內豈  
可當吾世而失之則不諱其醜願以近刻二種  
求印證于大方比征業已有序之者不敢重煩  
先生帝京一篇劄劄初成特乞一言爲玄晏先

生行爲衆生說法普度十方寧謂其無因至前  
而金玉其音哉

答黃白仲

京兆卷得跋乃益佳當并阿明而二矣屠先生  
望海歌置之行李中覺波濤洶涌天吳立而馮  
夷舞也武夷茶久欲致小許澆磊塊今送一觔  
不佞謁武夷君命一羽衣於接筍峯頂得之非  
浪語也

與顧道行學憲

明公向涖閩中不佞曾不獲一奉顏色已過吳  
門又苦栖栖未惶意極悵惘今年幸約王山人  
策馬箠而西庶幾一聞緒論乃弭楫江干明公  
復有省墓之役竟尔相左桃花流水杳不可攀  
有式間翹注而已小詩書扇頭少致仰止之私  
明公方建旗鼓號召中原不佞儻在行間願稟  
麾下則奉令承教尚有日也

與公朗和尚

不佞聞公朗舊矣風塵游客曾不得一叩上座

穆如清風徒懷夢寐每宿徐壯孤齋頭輒讀佳  
什食哀家梨爽不可言想師風韻都不減支遁  
今年弭棹河干咫尺禪林但不佞舟行不便與  
地主相見無緣獨望精廬坐自參商乃知凡骨  
終隔佛地矣新刻一部并扇頭小詩一首願求  
印可粗篋一柄乞作小草爲懷袖之珍普度法  
門豈惜此腕母謂擅越落第二義也

與顧世卿

不佞往在謝郎許聞顧公子甚習昨入吳江約  
與王玉生共過諧賞園伏謁尊公兼得與公子  
還往旣復相左遂愴皇發舟亦以尊公不在不  
敢輒與公子相見玉生歸口公子不置風流儒  
雅直逼古人令人又爽然自失矣之吳門訪王  
百穀王亦且往惠山乃知風塵夙習到處爲山  
靈所妬柰何柰何敢附一書于玉生道此耿耿  
它日繫舟垂虹橋母相避也

與林熙吉

客歲過家席未溫而北轅風雪間關抵都已是

殘臘矣今夏移官政得通州倉曹長屬漕運方始酬應不遑日食廩給五錢節饗餐以待過客妻孥怨詈若不聞也者而過之不得已遣大兒南旋署中少安又覺寂莫乃知旗山下自有真人宅何必走此火宅自取苦惱也老母晚景健食爲慰視膳之暇詩編想且盈篋幸一寄示不佞髮髻日異而貌亦惡特持三寸管覺尚捷如風雨耳

與林熙工

不佞竟作倉曹老吏矣屬漕事方興耳目疲敝政如坐火宅中思得甘露水一灑之合眼見芥子菴具種種妙相七寶蓮花非人間所有借此神遊祛此困魔矣計洞主功果日大飛昇在近普度衆生不佞當先登寶筏幸無相忘二茂才日益精進如挾三尋之矛無所不靡不聞達磨有此佳兒洞主猶似勝之署中寒儉兒子不能消受苦欲求歸洞主有何慧力爲不佞一護持則大幸耳



又

不佞弟以王春十日發昆明閏月六日入楚受  
事蓋楚爲滇孔道旣入其疆例不得過豫章而  
還里也面壁洞天握手何日花徑落英真成夢  
境矣弟雖有三男兒總不好紙筆因思足下翻  
翩佳兒政如雙壁足令人妬也伯孺貧困應如  
故幼孺病青竟當何如恐上池未有效異日更  
作何計卽國語可傳世上無枵腹左氏文人厄  
運乃至此乎茲家兒以姻事回令之上謁舅氏  
并致芟芟土物微小勿罪

又

弟近過鄖陽得謁玄岳縱遊太和山頂其宮闕  
之壯擬於皇居山川奇麗烟雲變態信非玄武  
不足以當之恨不與足下共耽賞耳若黃鶴赤  
壁其芟芟者絕不足道弟冗骨勞軀不敢與洞  
主靜修者較獨得遍遊名山自謂視卧遊者稍  
快何如老母襄事不獲執紼爲恨敬布區區用  
伸祖道幸賜麾存

與王百穀

自丙申九日酌菊南有堂忽忽三載不佞且北走燕南走粵馳驅數萬餘里馬足不休而王先生安然一蒲焦之上冷眼坐視此何啻千劫哉不佞今復出鎮潞河日齷齪米鹽瑣細坐席未煖而朝議復欲置之烏蒙金齒之間幸且留中苟且旦夕之安耳謝將軍承教不敢不善視之然不佞與此輩皆勉強卒事不欲苛求蓋其天性踈懶不能與人爲媾也明春尚恐爲考功法所中幸而得免當乞南邊一斗大郡計必取道吳門陪王先生杖屨石湖一眺了此夙願如何如何

又

自橫塘解纜宵不相聞一入滇池視吳門政如天末耳每吳人至輒問王先生起居無恙已舊吳令江君以讞獄至更悉足下平生云且杖於國與諸俠少樂伉浪不減壯年相與嘆息者久之然則先生信異人也滇中靈秀者山川耳其

奇譎真十百東南至如雞足山雲津洞竟是佛  
國都非欲界所有孤栖窮谷足自豪矣校閱事  
竣猶憶足下贈章刻木無墳典之句思爲昆明  
一洗之則爲求得李右率文選一部擇善工梓  
之已完其半驟見之決不以爲滇技也俟卒業  
或得郵致請政耳因京口王廣文東還附布起  
居

與張幼于

自寒山寺一別再奉手書卒卒不及裁答政爲  
風塵俗物不能三月膠坐且燕且粵車旁生耳  
故然每翹首南顧未嘗不在橫塘烟水間也不  
佞今出鎮潞河日逐米鹽勾校耳目爲蔽明春  
藉庇或得免於考功法當乞南方一小郡計必  
取道吳門冀得暫奉清言耳外割廩金不腆附  
謝輕車致供門客一餐

答江續石中丞

恭惟明公赫赫壯猷震於南國不動聲色豎社  
稷之勲卽功疏所列令齷齪書生悸怖欲死此

六籍所不能譚者廟堂之上且虛台席以俟四方欣然企足掀揭之業甚休甚休不佞越在南陲不得一賦軍樂以當饒歌而明公乃不棄管蒯千里寄示不佞某卽辱劣安不獵纓氣壯也孫清愍大節凌凌古今爲烈明公優恤其子若孫丁寧再四此真古人之誼不佞敢不仰承台指苟可以卵而翼之又何愛焉西湖志曾於曹大理許借閱實未奉副墨或浮沈易水不可知明公秉如椽之筆一經刪削便足名世又何藉鰕生而窮其短哉

答鄒大澤老師

某待罪楚藩受事且半歲老師台駕過漢口某以候人無狀不獲馳謁江次悵望紫雲低回久之曩寔不揣謬戾妄以末技上投請政師門乃老師不棄管蒯惠然以珠玉賁獎借過當非薄劣所敢承也愛忘其醜政恐爲月旦之累謹百拜稱謝辱示新刻種種瓊瑤璀璨某且讀且乙應接不暇方今以文章名世者惟吳楚二三大

夫緯真逃虛應酬爲累老師與本寧先生迺執牛耳政如衡山在楚卓爲羣望之宗玄嶽後顯而踞其上吳于是避楚三舍矣冗刻奉政舊稿遲當續上某屈首此技垂二十年不知可有從入之路否幸老師明指之某雖耄猶可折筆使也

上陳毓台中丞

某備員滇中罪狀非一所以得逃于罪責寔荷帡幪唯是由曹郎出守藩臬事體未諳舉動弗

率而台臺念鄉里後進曲護其短而獎掖之曩在宇下恬然不知自覺乃今知之顧圖所以報答明恩未能也更承手札遠頒讀之更爲泣下台臺坐羽檄中猶不棄菅蒯斯真古人折節之誼矣滇東西夷警計復勞台慮沙儂侵擾跳踉釁端已久緣西塞未寧且置之度外蠢夷遂謂我誰何肆無忌憚耳今誠使盧叅將率真卒五百調附近諸土兵一大創之且可貽數年之安台臺從枕席上度虜如在目中又何么麼之足

慮也某道務稍簡過從亦稀輒蒐舊稿盡付之  
剞劂并餘刻四種呈政

答李本寧太史

某束髮脩詞慕說明公甚迫恨無繇一望顏色  
而頰首稟繩墨不自意隸事郢中幸聞高誼殊  
悉顧方困于簿領未得通姓名致起居乃臺下  
不難以金玉先之觸目琳琅令人心折於今作  
者零落獨明公巋然如魯靈光四方人士願乞  
一言之贈不可得乃不佞口尚乳臭何足掛明  
公齒牙而札貺鄭重曲加拂拭恍然不知所置  
對也

與王彥貽鴻臚

盛山人入楚曾拜手書旅次忽忽末由款敘門  
下噉食甘酒如少年時計今當益壯老景強健  
可樂也弟客秋代割於襄郢間旣苦簿書夏五  
歸武昌復不耐奔走固知風塵之吏永無安枕  
之期彼十畝閒閒者何人哉以此益懷山水之  
思長動麋鹿之性矣張元春無恙否今揣一介

乞妙染爲齋頭之玩此非門下從吏不能得亦  
不能速昏似不佳不知長者能爲我別構否萬  
萬留心附致彋彋備老蒼頭晨炊耳不成享也

荅孟穀餘憲副

不佞某謏劣無似隸司農者四年而羸勾校出  
入耳目爲敝今且抗顏青衿之上作此舉止不  
勝羞澁之態矣恭惟台臺碩望雅抱人士所宗  
不腆海方固已沐浴盛德幸而在事得共昕夕  
左挈右持庶幾免于臯訐不佞引領西望何啻

饑渴乃辱台注先一介而存之推與過情慰諭  
鄭重開緘捧讀不知所置對也不佞某候代潞  
河閱月者再已買舟而南夏五劣得抵家曾未  
息趾又催上道半載之間馳驅萬五千里孱弱  
之人堪此消鑠政恐碧雞金馬寂寂咲人耳行  
次平夷漸邇光儀點蒼出雲亭亭在望輒附來  
役用布腹心晉謁在近披襟非遲統惟台存臨  
楮耿耿

寄徐惟起

既與足下別遂徑西然私心未嘗不念阿和慮其弱不任病滇雲過夜郎數千里馬牛不相及魚鴈何有前寄鄉書一再問訊都不得報入春夢寐殊惡食息不寧無何凶信至矣爲之慟哭幾絕阿和聰令穎徹風流神雋吾輩中夙然寡儔此宜爲造化所忌蘭摧桂折有識同悲况不佞骨肉兄弟相期有素而足下以友于兼師資稱手足者乎平生遑遑爲噉名計顧名是何物形乃先化此子桓所以興悲季鷹因而致慨也今遺言具在後世必有知者決不與七尺同盡即使百年垂老亦不過令異代知有徐生而已么躋功名更不足道卿相而朽也與孝廉而傳也孰軒輊哉阿和地下固無恨獨後死者不能不痛人琴之亡悵河山之顛耳更望足下珍攝節哀以理自遣外哀辭一首挽章十二絕句托足下讀而焚之靈床致悠悠之懷見平生之誼也先後諸稿稍暇一一葺錄不佞倘得善地當爲鏤行三尺新阡徐乃議之耳



寄林雋卿

不佞旣別足下而西也初冬纔入益部坐席未  
溫便復東枝凡五旬而盡六郡弟子魯人或以  
爲敏政於無佛處稱尊耳窮坵萬里烽火關心  
夢寐故山不勝憂生之戚計投閒不遠乞身在  
近丘壑自穩何必奔走爲快乎足下與用吉自  
劇長安幸有主人輒索價不出今不佞去國乃  
翩翩而往誰復爲酒人羣者今先致戔戔爲酒  
資擊筑燕市中當一和歌也

寄屠田叔辰州

自辰州別後遂長驅入滇不復聞問矣常武有  
郡役歸曾寄一札時方有東巡之役匆匆不知  
作何語也窮冬校東南六郡逼除抵舍發鄉書  
乃得徐惟和凶信爲之慟哭幾絕蓋不佞起家  
時惟和與振狂皆病振狂近瘵惟和似瘡途中  
頗慮之然豈意其便登鬼錄遂爲不起之病乎  
此君風流爾雅邈然寡儔令其少延必有以垂  
不朽者乃奔走不遑中道殂喪琳瑯摧謝士林

悲詫矧不佞結同心之誼託山水之契那得不  
顧影自憐聞歌隕涕也陳女大先卒遂併祀於  
烏石新祠則此君於使君可謂千秋之誼矣老  
母在堂遺孤未壯生妻孀苦愛妾去惟令人思  
之不勝荼毒之嘆使君夙結金蘭情逾骨肉何  
以慰地下之靈敬錄哀辭一首輓歌十二絕句  
情苦鼻酸不能成聲附郵筒請教非徒傷逝便  
以當哭也

寄吳子修明府

去秋之役迫于王程長驅就道大覺匆遽瀕行  
知台體向平今當益壯更乞葆攝慰此遠懷北  
園謝客枕席自高南風徐來池水微皺恨不使  
不佞弟得一岍嶺其間商略風雅如何如何弟  
以初冬入滇中月東巡抵除返舍又以春盡西  
歷夏五回都蓋五閱月而盡句町哀牢之境又  
以其間登雞足山叩華首門是佛弟子迦葉授  
衣處亦大奇觀又不得與足下同此玄趣也萬  
里荒徼孑然七尺之軀退食之後與兒子焚香

相對真如有髮之僧矣

寄薛鳴宇廉憲

自台駕東行再奉手札諷誦答贈諸篇麗如鼓  
吹矣尚不知輶車竟得抵鄉否萬里風塵馳驅  
不易懸念更自心折也不佞某罪業多端瓦全  
玉碎都未可必第世路險巇光景近夕恐還山  
之期亦自不遠矣長者閤閱已深內召孔亟從  
此一別承教無期北望燕雲何以寄相思也事  
之隙也爲滇士標一指南校梓李善文選於此  
劄劂頗工計歲餘方得告成以圖歸之人作此  
長計亦大不量耳

與蘇弘家民部

少別如許大覺濶絕悵望楚天我勞如何知己  
涖江關視事寢興無恙想匡廬鉅麗時時落官  
舍中致有西山爽氣也十月之朔弟承乏權稅  
東門日作狙獍面孔向人今且竣矣俗氣猶在  
眉睫間足下何以洗滌我潯陽故白傅舊治琵琶  
老伎風流不惡足下少年自賞豈作青衫濕

也使還附此寄聲

上趙大司徒

恭惟台臺清朝秉衡內臺持憲寔惟周翰用作  
商霖某幸蒙覆露雅荷生成乃以菲才承乏秉  
鐸而出此孰游揚之哉顧其中寔無物覲顏稱  
師蒞事以來不勝冰兢之懼西南夷遠在萬里  
外文風尚鬱士行未孚自愧孑然之躬不足作  
程因循卒歲則私心有所不安一以法繩之或  
又以荒徼之治未宜苛責也台臺化俗宜人禮

樂所宗願乞繩墨之言便作韋弦之佩于今海  
甸多故豺虎四馳庾廩空虚朝不謀夕台臺主  
計于此勤勞不易廟堂之上且虛揆席以待相  
業益弘否運斯泰顧國是未定人情尚搖安得  
挽狂瀾而東之使天下復見太平之世也滇雲  
視京師政如天上翹企台垣徒有耿耿

與盛太史

長安馬蹄間竟不獲一奉顏色既不佞某有潞  
河之役未幾而走滇南萬里遐荒視京師政如

各天安所得尺素浮沈而問起居也者惟是仁  
兄雍容著作之庭文采炳蔚四方望之以爲威  
鳳祥麇居然國華異日秉政紆老師未竟之業  
爲同年二三兄弟榮施何不可也某本薄劣辱  
老師謬收之茲且強顏博士之上不任是懼此  
中虎視眈眈日與青衿爲構不佞某旣不能輕  
七尺而與之鬪則有投劾乞身山林自快而已  
迷陽習足何地可投三楚且棘林四方必有尋  
覷者政將及子何以策之

上孫栢潭少宰

某無似晚辱明公傾蓋之誼不鄙其粗疎而辱  
收之斯高風卽古人何加焉己亥之夏旣抵敝  
廬隨踉蹌西邁十月劣抵南中嵐烟瘴雨草木  
蒙翳真所謂各天矣心儀台光關山阻之安得  
以尺一問起居也明公以身係天下輕重林臥  
已久方今國是未定時事益惡非得大力何繇  
挽回梁溪山水自佳顧謝傳安能獨樂藉令明  
公在朝一掃而更之日月若闢而朗者豈不快

哉不佞某下才承乏徼外卽投荒不以爲困而  
是椽人者時有齟齬作耽耽虎視某海濱一男  
子那能低首相奉以此輒動歸興烟霞痼疾殊  
不可耐矣家有薄田足供餽粥一丘一壑則不  
佞事但使明公持衡不使有額外誅求者又何  
知山林之不可也

與錢象先

過足下窮巷中蕭然寒士然泠泠清絕令人骨  
爽旣別而南便踉蹌西上僅携一幼子行辟如  
一苦頭陀僅免行脚耳南中壑穴之秀入眼所  
無如雞足山是佛祖受衣處洞門扃閉如故云  
有專精人便可令開僕頂禮半日恍然如見未  
敢爲足下道之僕且圖還山如得請尚欲枉過  
吳門縱數月之樂而後別外小詩書扇頭并割  
酒資少許不知足下酒度比曩日能長進否也

與強善長

石湖之遊念足下鄭重別後音問絕矣僅携一  
子萬里入滇校閱之暇過從都罷燒香烹茶亦

足度日此中山水奇絕而花事猶勝杜鵑至三十種山茶至五十種春日風煖大足媚人時時把茗茗相對不知其十二釵也恨無如強山人者共賞耳足下殊壯無塵俗事不知日醉青樓幾回更可盡幾斗苦醕也

與同年江進之廷評

曩吳門一過從藐不聞問藉天之幸台駕讞獄於此私心獨喜以長洲地劇令長不遑七箸台丈猶得賈其勇霏霏譚風雅之致况此昆明斗大荒徼刻期可了願五華之靈與年丈角前矛而竟千古之業不可謂非三生之幸矣第恐楚鏡甚二廣前驅遂無堅陣弟悉索敝賦詎堪借一乎聞使節遂已入黔弟不獲負弩候迎則爲布區區於執事者如此

答舒中陽尚書

某頓首春初蔣廷尉自長安繇置明公手教及嘉幣開楫如奉清光矣某自唯瓠落之質寔無所短長而明公於格外收之使之不自厭棄佩

服私恩二十年於茲顧浮沈偃蹇落落如初寢  
興隨人不能自見則何以報答知己之誼而明  
公猶不遐遺曲爲拂拭存問再三委曲情至此  
薄俗所未有也某視學于此不及考者期月不  
意藉台庇濫竽楚藩本一老學究而今之拮据  
吏事政恐無以免於臯鼈今安得金石之言比  
韋絃之佩乎後宮就館者幾人佳氣充閭者幾  
度以明公碩德茂勲當世世饗之固無庸鰕生  
贅矣時令真寔雅樸爲當道所知不佞某又惡  
能令重

與心甫兄

武昌隔姑孰盈盈一水耳不得一相從十五年  
闊別心緒棼如無繇面訴弟歸自西南夷游興  
殊倦山林之趣無日不思城中一區尚未經理  
城外五畝不覺就荒痴兒既不了事窮交時復  
過責但使林園足備燕遊宮室劣蔽風雨桑麻  
足供衣履梗稻可給饗餐雞豚不乏蒸嘗酒醴  
時待朋友山巔水澁月下花前五斗易賒雙屐



猶健家食優游亦何不可大丈夫年已半百鬢  
亦漸皤安能隨俗寢興闕人顏色坐爲不知已  
者所描畫也兄倘有意乎則請以十年之後待  
長者於東山之下曩在昆明僅携一子亦自安  
靜茲者家衆紛紜官舍狹隘餅壘滿案令人嘔  
噦乃知薄劣之相自合鰥居寧爲有髮之僧竟  
作無生之想二子尚未定師長者更欲爲完娶  
而歸期未決咄咄計無所出也兄入計事竣尚  
取道過家否

與曹能始戶部

燕市分携絕不聞問旣發潞河凡三月而後抵  
家馬首旋西形神困憊只携一少子入滇可知  
寂莫也窮冬遂校迤東諸郡十得其六無大瑰  
異此真不佞弟藏拙之地足下當笑我作夜郎  
王矣播患未息東路已絕鄉信不通宦情更惡  
足下畫省雍容擁小姬痛飲易酒豈復念及不  
佞耶徐唯和遽作異物令人喪氣此君博雅多  
聞假之以年必有以垂世者中道摧折不勝云

亡之痛佳人難再得不可謂非風流永謝也校  
文之役知必借重昆明卽不腆足下得無意乎  
此中得一釀法清如竹葉青軟如金盤露時共  
一醉亦不惡也外薄具酒資幸令少姬收付酒  
家胡

答鄒愚谷老師

不佞某去年以殘春入楚便拜老師手教及扇  
頭見贈佳章日寘之懷袖辟之羹牆矣無何承  
乏代割於鄖襄郢沔之間隔武昌又可五百里  
復以直指西巡拮据爲累欲一致起居未暇也  
仲夏劣得代返舍而沈茂才曲祈陽東歸始以  
瑤函見示洞庭玄岳名勝甲于寰宇何昆明敢  
望顧自才短不足以仰慰山靈耳沈生年少雋  
才情采足術且受詩師門當爲國寶其父令君  
善政在漢循吏間父子翩翩各當孔門四科之  
一奕奕奇事卽某言非重當爲游揚于二三大  
夫

與舒中陽大司空

某滇中一再奉台札未繇端致款忱去年春仲  
量移入楚無何承乏代割郎襄郢沔之間蓋十  
晦朔得代返舍屬直指西巡拮据從事卽七箸  
不遑矣桂林與衡陽接壤豈真片鴻不到聞問  
闕然西望雲山能無淒斷明公功高不賞四方  
豪傑扼腕至今河臣屢失績用弗成廟堂之上  
能無求舊之思乎哉某謏劣無當覲顏備藩才  
短臯多慮不免于考功初意欲借捧表之役暫  
且過家徐圖進止今旣不成行徘徊江上聽人  
穿鼻耳明公何以指其迷而牖示之後庭爾來  
曾有將雛消息否孺立兄遺稿曾成梓否便間  
幸乞相聞

答耿巡撫叔臺

某不佞久辱老公祖鑪錘之中方璽書視學某  
籍孝廉以形跡自嫌不敢求識面于門下長安  
咄咄馬蹄乍出乍入又不能伏謁一問性命之  
旨此某之罪也更不自意假靈于江漢得自西  
徼量移大邦卽米鹽閒局未嘗不顛覆是思此

去白門盈盈一水間尚不及走快足而致起居  
乃老公祖不鄙儼然以一介存之貺札爛然非  
不佞所敢承也鎮撫以來江濤清晏彈丸之地  
安所藉寵于元老而久羈於此乎惟是國是紛  
紜人心怨憤餉訕于邊才竭於野腹心方潰咽  
喉可虞非大君子主持於上何由挽晷輪而中  
之材官回草率勒謝

與黃肖源太僕

三千里之外瑤函直北作鷓尾上天書百拜捧

讀涕淚俱下前過貴陽謁郭公謂平涼固自善  
地不意其荒涼乃爾也但塞外無事天氣早寒  
長者擁愛姬彈琵琶夜飲自樂何必武昌魚哉  
葡萄酒出自西涼笛中有折楊柳曲勸學者恐  
未誤當由解詩者未審耳陳君已久去楚聞已  
改選尚無入楚理弟去秋承乏代割於鄖襄郢  
沔之間時一走謁玄君登太和絕頂下看七十  
二峰如展旗視黃鶴樓一撮土何足辱長者問  
此益復見妬第不佞歸思亦不可奈青山芳草

時厯夢思安得北乞薛老峰南到清源片石從  
長者作汗漫游良足樂也

與馮慕崗年丈

得年丈手書知年丈在困阨之中且夷然無牢  
慙拂鬱之感此非有涵養大力安能雍容若是  
如不佞第碌碌隨人巾幗而冠者當媿死矣楚  
都人士方日夜祝天願馮使君賜環復蒞茲土  
爲三湘七澤造百世之德 聖明在上不難一  
金雞之命然則年丈幸善加餐諒赦非久也弟

去秋代庖鄢郢去武昌已六百里而遙北鴈南  
鴻消息永絕欲一致橐籥之餽而不可得茲于  
夏五得代返舍適有捧表之役敬附戔戔統乞  
麾存今年楚中旣澇且旱水陸俱困賦歛殊棘  
盜賊煩興地廣民頑更難料理年丈念茲舊土  
何以策之弟雖散局敢爲二岳徼一言之惠而  
轉致之當事者草次不備

答李斗野大叅

襄陽古蹟甚多游覽非一文選樓巍然闐闐間

高明爽朗時爵一杯足謝靈鬼出郡城三十里  
則武侯所居隆中在焉台下公餘試物色之倘  
有恍佛卧龍者乎習池事雖不足言然非政平  
訟理與士民相安卽欲日醉而歌酪酊胡可得  
也哲人舊事在在可師台下車轍所臨有神明  
之稱千載嗣興居然競爽矣鄂渚倉卒無以爲  
歡乃復辱遠貺何以堪之

與臧晉叔國博

茗雪解携聞問永絕十年之間不佞方北走燕  
西入滇歸復於荆楚偃蹇歲月所至無狀計台  
下望日益重著述日益富四方望之以爲教化  
主視不佞猶蚤蝨耳白門佳麗之地無所不快  
意臧先生風流不減少壯日逐五陵豪佳事種  
種非乏獨恨酒趣稍欠耳胡仲修孟浪游楚幾  
坐槁于黃鵠磯頭幸朱水部爲之居間得免窮  
途之哭然以其間得登覽玄岳盡七十二峰之  
奇其沾沾自喜者以此今且東還輒附致起居  
併彘彘爲候惟筦存之

與柳山人陳父

潞河一別陳父倏忽五年聞且倦游閉關自樂  
老來詩律自當益細安得緘致江流盡挾唐處  
士之奇也不佞客滇馬跡遍于西南其洞壑山  
林往往勝絕非中原所有也今客楚踟躕一城  
之內衡岳去鄂渚千里而遙翹首雲山政如夢  
境客秋因鄖陽之役暫過太和秋雨淋漓七十  
二峰時在雲霧中信宿而下僅當染指耳不佞  
將返初衣便圖歸計歸則迂道過白門從柳先  
生作方外遊先生許我乎西游具碧雞集中今  
因胡仲修寄訊門下併薄俸戔戔聊備晨飧酒  
價

答門人曾璇石侍御

白潞河一別倏忽四年滇之南楚之東再奉手  
書欣如面對也門下由中秘出按河東威望赫  
然豪猾斂跡行且徊翔九列勒勳旂常不佞戔  
戔隨人食息計典在近願備埽除自惟五十將  
臨鬢髮毵毵如艾一丘一壑意甚甘之但無被

惡名得潔身以去幸耳三晉去武昌若風馬無  
繇走快足問興居門下乃不遐遺耑使而存之  
嘉貺鄭重視恒百倍不佞九頓登嘉有慙面目  
矣令祖老師教澤在閩諸生建祠于金粟山之  
下想已落成聞林叅知封君身拮据爲大役先  
從弟曾以其事相聞不至落莫否丁酉一榜應  
南宮者寥寥獨借重門下爲不佞壯顏色名世  
信不在多然披砂揀金奇寶不乏何不偶如是  
孰知其解乎

與同年賓燕雲學憲

自年丈之出守也弟方南走粵北走潞河又西  
南走句町哀牢人跡所不到之處竟不能遣一  
介相聞也弟已自甘疎節矣夫溫陵去三山僅  
三百里許信使隔絕而滇楚各天殆同異域顧  
瀟湘衡巫之間星若聚而雲若合者不可謂非  
天之幸也辱手札遠臨欣然獨笑計披襟不遠  
當各帥左右廣以相從耳忽謂米鹽俗吏敢侵  
陵上國也



與曹能始大理

薛觀察入滇覽足下贈詩及梅花帖種種奇絕  
如坐孤山庾嶺中清香入脾矣不佞去荒徼而  
忝楚藩其名似美顧滇夷服也山水實奇秀視  
學使者無所不寘杖屨楚則畫地而守跬步不  
出戶如衡嶽太和皆在宇下實若殊方不聞所  
朝夕游宴自黃鶴外無奇者初由岳陽來三宿  
樓上風雨經旬視君山一拳隱隱雲霧間安得  
學曹先生有山水緣吏而仙者乎此去白門一  
水而近信使可時相聞新梓滄浪詩話及玉王  
篇各一冊附政

與葉少宰進卿

某頓首某居夷者二載視中原不啻各天然此  
惓惓私衷無日不在燕磯牛首之間也微明公  
之庇量調內地既脫虎口漸近龍門從此可月  
致起居時詢動定不可謂非甌生之幸矣恭惟  
台下簡在已深爰立在邇於今國本幸正邦本  
尚搖非借大力何由挽昃輪而中之宗社有靈

假明公以端揆之地中興之業企足待之矣某  
浮沈外藩覆露非淺卽退處山澤得安食其土  
之有夫孰非明德哉某邇來大覺衰謝每欲移  
疾以去而饑寒無計且復叨升斗之祿究竟雞  
肋難戀鷗盟可狎一丘一壑自其分耳明年捧  
表竣役尚圖暫過金陵一問顏色且定出處之  
策也

答同年袁六休

年丈暫寄丹丘烟霞自快耳計東南形勝當盡

歸杖屨中何許匡廬一指掌乃弟所沾沾自喜  
却在荒徼夷服之外人所不經見亦所厭見者  
如雞足山南明萬象諸洞志所稱爲佛國天都  
仙源福地使者以全收之此真夜郎王敢與漢  
爭大年丈得無笑其言乎方子公曩於吳門避  
遁今十年往矣新詩亦奇進袁中郎門固無庸  
物媿簿書面孔向俗無以仰酬清誼耳少脩倡  
和諸什氣骨大屈其偶不忝難弟此黃鬚郎乃  
爾秀雅人安可貌定也新刻四種奉上覽政尚

圖崑問起居

西樓全集卷十八終

重刻西樓全集跋

先大人自經生帖括軍國政事而外唯詩  
文著述不朽大業之爲兢兢也從先世以  
來至曾大父大父皆用貢舉服官世學淵  
源家聲丕振代有作者從祖與大父寔有  
耕隱集有別駕集此西樓存稿先大人之  
所作也自奏疏錄序諸篇以及詩之古近  
體一莫弗備大人見棄家學無成時讀父

書未嘗不掩卷流涕而對家人兄弟曰吾今日得以食息起居者莫非父有徒知溫飽而不知大人生平苦心焉用人子是以勉壽梨棗以板藏於家而書行於世及就甲秩於齷幕量移叅軍戔戔小吏得載父書以爲羔雁海內宗工多荷傳誦擊節嘆賞私謂作述之意可以無憾矣然閩嶺間關重載脩阻未能廣傳往往爲恨近復於

官邸纂成家乘乞韓宗伯公序之拮据竭力獲繼先志喜與全集并行不意西樓近燬藏書一空而耕隱別駕與先集皆化煨燼家報至如重喪祖考可勝痛悼昔吳顧子通少有至性每攬父書展布席端洒掃捧讀閱畢入函服膺不失家雖不敏性竊慕通官俸雖微父書爲大敬以三集勉力拮据盡付剗劂且此通都大國流行爲易

勝我窮鄉僻壤度水越山裝載舟車百不  
什一天或有意於先世俾家承乏此地得  
以重梓而經始之日值韓宗伯公與陳司  
農公訂閱功多玄晏使得重懸國門廣布  
四海何奇逢也江南刻工號勝他省書成  
視舊本爲精繕不唯先世有靈而喜於冥  
漠卽覽者或亦因是而加展卷存歿之幸  
曷有旣哉崇禎改元仲子慶宗謹跋

